

BIBLIOTECA NAZIONALE

110

A


27

NAPOLI

110  
a  
27.

83  
N  
58







P. OVIDII  
N A S O N I S  
O P E R A

EX RECENSIONE  
PETRI BURMANNI  
*Cum Notis Selectionibus.*

T O M U S I I I .



VENETIIS MDCCLXXXIX  
Apud Thomam Bettinelli

*Cum Facultate, ac Privilegio.*





P. OVIDII NASONIS  
FASTORUM  
*LIBRI VI.*

THE UNIVERSITY OF CHICAGO

LIBRARY

1917



## AMICE LECTOR.

**K**alendarium, quod vides, cum in vetustis membranis reperissem, quamvis mendosum fœdeque depravatam multis partibus, & ab homine hujus argumenti non satis perito confectum, quia tamen Fastis Nasonianis attexitur plerumque in Codicibus antiquis, nos quoque illud in editione hac nostra nequaquam duximus omittendum, adornaturi & ipsi aliquando Fastos, qui Nasonianis accuratius respondeant. Vale. HEINSIUS.

## KALENDARIIUM.

### JANUARIUS.

|                 |  |
|-----------------|--|
| <b>A</b>        | Kal. Januarii. Jani Festum, Junonis, Jovis, & Æsculapii. |
| <b>b</b> iv.    | Non.   |
| <b>c</b> iiii.  | Non. Cancer occidit cosmice.                             |
| <b>d</b> ii.    | Non.   |
| <b>e</b> Nonis. | Lyra oritur.   |
| <b>f</b> viii.  | Id.  |
| <b>g</b> vii.   | Id.  |

- A vi.** Id. Festa Jani Agonalia. Delphin oritur.  
**b v.** Id. Medietas hiemis.  
**c iv.** Id.  
**d iii.** Id. Festa Carmentis & Juturnæ.  
**e ii.** Id.  
**f Idibus.** Festum Jovis. Redditæ sunt provin-  
 ciæ populo Romano.  
**g xix.** Kal. Febr. Cæsar Augustus vocatur.  
**A xviii.** Kal. Sacrificium Carmentis. Festum Por-  
 rimæ & Postvertæ.  
**b xvii.** Kal. Festum Concordiæ.  
**c xvi.** Kal.  
**d xv.** Kal. Sol in Aquario.  
**e xiv.** Kal.  
**f xiii.** Kal.  
**g xii.** Kal.  
**A xi.** Kal.  
**b x.** Kal.  
**c ix.** Kal. Lyra occidit.  
**d viii.** Kal. Pectus Leonis occulitur.  
**e vii.** Kal.  
**f vi.** Kal. Festum Castoris (& Pollucis.)  
**g v.** Kal.  
**A iv.** Kal.  
**b iii.** Kal. Festum Pacis.  
**c ii.** Kal.

# K A L E N D A R I U M.

9

## F E B R U A R I U S.

- d Kal. Febr. Templum factum est Carmenti. Celebratur Asylum.
- e iv. Non. Lyra penitus occidit.
- f iiii. Non. Occidit Delphin.
- g ii. Non.
- A Nonis. Augustus dictus est pater patriæ. Aquarius vadit ad occasum.
- b viii. Id.
- c vii. Id. (Primus dies Ferialium.)
- d vi. Id.
- e v. Id. Ver incipit.
- f iv. Id. Initium Veris.
- g iiii. Id. Bootes oritur. & est festum Fauni.
- A ii. Id.
- b Idibus. Festum Jovis & Fauni. Nefastus dies Fabiorum.
- c xvi. Kal. Martii. Anguis, Corvus, Crater oriuntur.
- d xv. Kal. Sol intrat in Pisces. Iterum Fauni.
- e xiv. Kal.
- f xiii. Kal. Festum Quirini. Festum stultorum & Fornacis.
- g xii. Kal. Ferialia.
- A xi. Kal. Caristia virorum.
- b x. Kal. Termini.

- c ix. Kal.  
 d viii. Kal. Fuga Tarquinii Superbi. Veris initium.  
 e vii. Kal.  
 f vi. Kal.  
 g v. Kal.  
 A iv. Kal.  
 b iii. Kal. Equiria in campo Martio.  
 c ii. Kal.

## M A R T I U S.

- d Kal. Martii. Festum Martis & Junonis. Ancilia feruntur, non est bonum nubere.  
 e vi. Non.  
 f v. Non. Alter Piscium conditur. Oritur Vindemitor.  
 g iv. Non. Bootes citius, Vindemitor tardius occidunt cosmice.  
 A iii. Non. Festum Vestæ. Cathedra Julii.  
 b ii. Non. Festum Vejovis. Pegasus oritur heliace.  
 c Nonis.  
 d viii. Id. Corona Ariadnes oritur.  
 e vii. Id.  
 f vi. Id.  
 g v. Id.  
 A iv. Id.



- b iiii. Id.  
 c ii. Id. Altera Equiria fiunt juxta Tyberim.  
 d Idibus. Festum Annæ Perennæ. Julius Cæsar occisus in Capitolio.  
 e xvii. Kal. Aprilis. Scorpius oritur.  
 f xvi. Kal. Milvius oritur. Festum Bacchi. Vilis anicula hederis coronata vendit populo libatum. Melle Libero patri sacrificamus. Libera toga datur. Miluus oritur chronice. Festum est Ledæorum, qui fuerunt Argivi, vel Larium.  
 g xv. Kal.  
 A xiv. Kal. Quinquatria Palladis captæ.  
 b xiii. Kal.  
 c xii. Kal.  
 d xi. Kal. Sol in Arietem.  
 e x. Kal. Ultimus dies quinquatruum.  
 f ix. Kal.  
 g viii. Kal. Æquinoctium vernale.  
 A vii. Kal.  
 b vi. Kal.  
 c v. Kal. Festum Jani, Concordiæ, Pacis, & Salutis.  
 d iv. Kal.  
 e iii. Kal.  
 f ii. Kal. Festa Lunæ labentis. Templum in Aventino monte.

## A P R I L I S.

- g Kal. April. Festum Veneris & Virilis Fortunæ. Scorpheus occidit.
- A iv. Non. Pleiades oriuntur.
- b iiii. Non. Meretrices lavantur sub myrto. Fors Fortuna Virilis. Scorpheus occidit cosmice.
- c ii. Non. Hebæ & Matri Deorum Megalenses ludi fiunt.
- d Nonis. Festum Publicæ Fortunæ.
- e viii. Id. Orion occidit chronice.
- f vii. Id. Festum Cerealium ludorum. Libra occidit cosmice. Juba victus est a Jul. Cæsare.
- g vi. Id.
- A v. Id.
- b iv. Id.
- c iiii. Id.
- d ii. Id.
- e Idibus. Festum Jovis Victoris. Templum .... Libertatis.
- f xviii. Kal. Maii. Dies grandinosa. August. Cæsar vicit Mutinenses.
- g xvii. Kal. Forda litatur Telluri.
- A xvi. Kal. Triumphus Augusti. Hyades occidunt heliace.

- b xv. Kal. Sol in Taurum.  
 c xiv. Kal. Equiria. Combustio vulpium.  
 d xiii. Kal. Festa Palis. Roma condita.  
 e xii. Kal. Festa Veneris. Vinalia.  
 f xi. Kal.  
 g x. Kal.  
 A ix. Kal.  
 b viii. Kal.  
 c vii. Kal.  
 d vi. Kal. Festum Rubiginis. Aries oritur heliace. \* Prothius oritur cosmice, occidit heliace. Tempora Veris prima finita sunt.  
 e v. Kal.  
 f iv. Kal. Festum Floræ & Vestæ.  
 g iii. Kal.  
 A ii. Kal.

## M A J U S.

- b Kal. Maii. Amalthea Capra oritur cosmice. Ara Laribus posita.  
 c vi. Non. Flat ventus Argestes: Hyades oriuntur cosmice. Finis Florantium.  
 d v. Non. Panthera Chironis oritur. chronice.  
 e iv. Non.  
 f iii. Non. Stellificatio Lyræ. Sagittarius oritur.  
 g ii. Non. Scorpius apparet in parte media.

A Nonis.

b viii. Id. Lemuria celebrantur. non est bonum nubere.

c vii. Id. Orion occidit chronice.

d vi. Id. Festum Martis Bisultoris.

e v. Id.

f iv. Id.

g iii. Id.

A ii. Id. Pliades oriuntur heliace. æstas incipit.

b Idibus. Ora Tauri oriuntur heliace. Scirpea simulacra mittuntur in Tyberim. Festum est Mercûrii.

c xvii. Kal. Junii.

d xvi. Kal. Junii.

e xv. Kal. Sol it in Geminos. Agonia Junii fiunt.

f xiv. Kal. Canis Orionis exit.

g xiii. Kal. Lustra Vulcani fiunt.

A xii. Kal.

b xi. Kal.

c x. Kal. Mos sacrorum pro fuga Tarquinii faciundorum, non modo inest fuga Tarquinii. inest viii Kal. Mart.

d ix. Kal. Festum Publicæ Fortunæ.

e viii. Kal. Rostra aquilæ oritur chronice.

f vii. Kal. Bootes occidit heliace.

g vi. Kal. Hyas occidit heliace, oriens cosmice.

|         |      |
|---------|------|
| A v.    | Kal. |
| b iv.   | Kal. |
| c iiii. | Kal. |
| d ii.   | Kal. |

## J U N I U S.

e Kal. Junii. Festa Carnæ, Junonis Monetæ, Martis,  
& Tempestatis. Aquila oritur chro-  
nice.

f iv. Non. Hyades oriuntur heliace.

g iiii. Non. Bellonæ Festum.

A ii. Non. Dedicatio templi Herculis.

b Nonis. Festum Trinomii Dei Fidei Sancti Se-  
mipatris. malum est nubere ante Idus.

c viiii. Idus.

d vii. Id. Tergum ursæ occidit heliace, & re-  
gis Lycaoni. Lycaonida fiunt ludi Ty-  
beris.

e vi. Id. Datum est templum Menti. Festum  
est Vestæ. Asinus coronatur. Ara  
Priapi. Priori Palladium liberatur ab  
igni Gallico. Mors Crassi & suorum.

f v. Id. Delphin oritur chronice.

g iv. Id. Matralia fiunt. Rutilius & Didius oc-  
ciduntur. Templum Fortunæ Servius;  
Concordiæ Livia dedicavit.

A iiii. Id.

- b 11.** Id.  
**c Idibus.** Jovi invicto datum est templum. Minora  
 quinquatria Palladis fiunt.  
**d xviii.** Kal. Julii.  
**e xiii.** Kal. Dione orta est heliace in fronte  
 Tauri.  
**f xvi.** Kal. Flat Zephyrus prosper navigantibus.  
**g xv.** Kal. Sol in Cancrum. Pallas colitur in  
 Aventina arce.  
**A xiv.** Kal. Secundus ventus. Orion oritur heliace.  
**b xiii.** Kal. Delphin oritur chronice. Sol in Can-  
 crum. Volsci & Æqui vincuntur.  
**c xii.** Kal. Templum datum est Sumano Jovi.  
**d xi.** Kal. Æsculapius, qui & dicitur Ophiucus  
 & Serpentarius, chronice oritur.  
**e x.** Kal.  
**f ix.** Kal. Victus est Flaminius.  
**g viii.** Kal. Syphax vincitur. Hasdrubal occidi-  
 tur. Festum Fortis Fortunæ. Solsti-  
 tium.  
**A vii.** Kal. Festum Larium & Jovis Statoris.  
**b vi.** Kal. Orion apparet a Zona inferius. Sol-  
 stitium.  
**c v.** Kal. Laurum.  
**d iv.** Kal. Templum Quirino factum.  
**e iii.** Kal.  
**f ii.** Kal. Festum Pieridum.



P. OVIDII NASONIS  
**F A S T O R U M**  
 L I B E R I.

**T** Empora cum caussis Latium digesta per annum,  
 Lapsaque sub terras, ortaue signa, canam.  
 Excipe pacato, Cæsar Germanice, vultu  
 Hoc opus; & timidæ dirige navis iter.  
 Officiiue levem non aversatus honorem, 3  
 In tibi devoto munere dexter ades.  
 Sacra recognosces Annalibus eruta priscis;  
 Et quo sit merito quæque notata dies.  
 Invenies illic & festa domestica vobis.  
 Sæpe tibi Pater est, sæpe legendus Avus. 10  
 Quæque ferunt illi pictos signantia Fastos,  
 Tu quoque cum Druso præmia fratre feres.  
 Cæsar's arma canant alii; nos Cæsar's aras;  
 Et quoscumque sacris addidit ille dies.  
 Adnue conanti per laudes ire tuorum: 15  
 Deque meo pavidos excute corde metus.

Da mihi te placidum; dederis in carmina vires.

Ingenium vultu statque caditque tuo.

Pagina iudicium docti subitura movetur

Principis, ut Clario missa legenda Deo. 10

Quæ sit enim culti facundiâ sensimus oris,

Civica pro trepidis cum tulit arma reis.

Scimus &, ad nostras cum se tulit impetus artes,

Ingenii currant flumina quanta tui.

Si licet, & fas est, vates rege vatis habenas; 25

Auspice te felix totus ut annus eat.

**T**

Empora digereret cum conditor Urbis, in anno

Constituit menses quinque bis esse suo.

Scilicet arma magis, quam sidera, Romule, noras:

Curaque finitimos vincere major erat. 30

Est tamen & ratio, Cæsar, quæ moverit illum:

Erroremque suum quo tueatur habet.

Quod satis est, utero matris dum prodeat infans;

Hoc anno statuit temporis esse satis.

Per totidem menses a funere conjugis uxor 35

Sustinet in vidua tristia signa domo.

Hoc igitur vidit trabeati cura Quirini,

Cum rudibus populis annua jura daret.

Martis erat primus mensis, Venerisque secundus:

Hæc generis princeps, ipsius ille pater. 40

Tertius a Senibus, Juvenum de nomine quartus:

Quæ sequitur, numero turba notata fuit.



At Numa nec Janum, nec avitas præterit umbras;  
Mensibus antiquis adposuitque duos.

**N**E tamen ignores variorum jura dierum;

Non habet officii Lucifer omnis idem.

Ille Nefastus erit, per quem tria verba silentur:

Fastus erit, per quem lege licebit agi.

Neu toto perstare die sua jura putaris;

Qui jam Fastus erit, mane Nefastus erat.

Nam simul exta Deo data sunt, licet omnia fari;

Verbaque honoratus libera Prætor habet.

Est quoque, quo populum jus est includere septis:

Est quoque, qui nono semper ab orbe redit.

Vindicat Ausonias Junonis cura Kalendas:

Idibus alba Jovi grandior agna cadit.

Nonarum tutela Deo caret. omnibus istis

(Ne fallare cave) proximus Ater erit.

Omen ab eventu est: illis nam Roma diebus

Damna sub adverso tristia Marte tulit.

Hæc mihi dicta semel, totis hærentia Fastis,

(Ne seriem rerum scindere cogar) erunt.

**E**Cce tibi faustum, Germanice, nuntiat annum;

Inque meo primus carmine Janus adest.

Jane biceps, anni tacite labentis origo,

Solus de Superis qui tua terga vides;

Dexter ades Ducibus; quorum secura labore

Otia terra ferax, otia pontus agit.  
Dexter ades Patribusque tuis Populoque Quirini:  
Et resera nutu candida templa tuo. 70  
Prospera lux oritur: linguisque animisque favete.  
Nunc dicenda bono sunt bona verba die.  
Lite vacent aures; insanaque protinus absint  
Jurgia. differ opus, livida lingua, tuum.  
Cernis, odoratis ut luceat ignibus æther; 75  
Et sonet accensis spica Cilissa focis?  
Flamma nitore suo templorum verberat aurum,  
Et tremulum summa spargit in æde jubar.  
Vestibus intactis Tarpejas itur in arces:  
Et populus festo concolor ipse suo est. 80  
Jamque novi præeunt fasces; nova purpura fulget;  
Et nova conspicuum pondera sentit ebur.  
Colla rudes operum præbent ferienda juvenci,  
Quos aluit campis herba Falisca suis.  
Juppiter, arce sua totum cum spectet in orbem, 85  
Nil nisi Romanum, quod tueatur, habet.  
Salve, læta dies, meliorque revertere semper,  
A populo rerum digna potente coli.  
Quem tamen esse Deum te dicam, Jane biformis?  
Nam tibi par, nullum Græcia numen habet. 90  
Ede simul caussam, cur de Cœlestibus unus,  
Sitque quod a tergo, sitque quod ante, vides.  
Hæc ego cum sumtis agitarem mente tabellis;  
Lucidior visa est, quam fuit ante, domus.  
Tum

Tum sacer ancipiti mirandus imagine Janus 95

Bina repens oculis obtulit ora meis.

Obstupui; sensique metu riguisse capillos:

Et gelidum subito frigore pectus erat.

Ille tenens dextra baculum, clavemque sinistra,

Edidit hos nobis ore priore sonos: 100

Disce, metu posito, vates operose dierum,

Quod petis; & voces percipe mente meas.

Me Chaos antiqui (nam res sum prisca) vocabant.

Adspice, quam longi temporis acta canam.

Lucidus hic aer, & quæ tria corpora restant, 105

Ignis, aquæ, tellus, unus acervus erant.

Ut semel hæc rerum secessit lite suarum,

Inque novas abiit massa soluta domos;

Flamma petiit altum; propior locus aera cepit;

Sederunt medio terra fretumque solo. 110

Tunc ego, qui fueram globus, & sine imagine moles,

In faciem redii dignaque membra Deo.

Nunc quoque confusæ quondam nota parva figuræ,

Ante quod est in me, postque videtur idem.

Accipe quæsitæ quæ caussa sit altera formæ; 115

Hanc simul ut noris, officiumque meum.

Quidquid ubique vides, cælum, mare, nubila, terras;

Omnia sunt nostrâ clausa patentque manu.

Me penes est unum vasti custodia mundi;

Et jus vertendi cardinis omne meum est. 120

Cum libuit Pacem placidis emittere testis;

*Ovidius* T. III.

B

Libera perpetuas ambulat illa vias.  
 Sanguine letifero totus miscebitur orbis,  
 Ni teneant rigidæ condita bella seræ.  
 Præsideo foribus cœli cum mitibus Horis: 125  
 It, redit officio Juppiter ipse meo.  
 Inde vocor Janus. cui cum Cereale sacerdos  
 Imponit libum, mixtaque farra sali;  
 Nomina ridebis. modo namque Patulcius idem,  
 Et modo sacrifico Clusius ore vocor. 130  
 Scilicet alterno voluit rudis illa vetustas  
 Nomine diversas significare vices.  
 Vis mea narrata est: caussam nunc disce figuræ.  
 Jam tamen hanc aliqua tu quoque parte vides.  
 Omnis habet geminas, hincatque hinc, janua frontes: 135  
 E quibus hæc populum spectat, at illa Larem.  
 Utque, sedens vester primi prope limina tecti,  
 Janitor egressus introitusque videt;  
 Sic ego prospicio, cœlestis janitor aulæ,  
 Eoas partes, Hesperiasque simul. 140  
 Ora vides Hecates in tres vergentia partes,  
 Servet ut in ternas compita secta vias.  
 Et mihi, ne flexu cervicis tempora perdam,  
 Cernere non moto corpore bina licet.  
 Dixerat: & vultu, si plura requirere vellem, 145  
 Se mihi difficilem non fore, fassus erat.  
 Sumsi animum, gratesque Deo non territus egi:  
 Verbaque sum spectans pauca locutus humum.

Dic, age, frigoribus quare novus incipit annus,  
Qui melius per ver incipiendus erat? 150  
Omnia tunc florent: tunc est nova temporis ætas:  
Et nova de gravido palmite gemma tumet.  
Et modo formatis amicitur vitibus arbos:  
Prodit & in summum seminis herba solum:  
Et tepidum volucres concentibus aera mulcent: 155  
Ludit & in pratis, luxuriatque pecus.  
Tum blandi soles: ignotaque prodit hirundo;  
Et luteum celsa sub trabe fingit opus.  
Tum patitur cultus ager, & renovatur aratro.  
Hæc anni novitas jure vocanda fuit. 160  
Quæsieram multis: non multis ille moratus,  
Contulit in versus sic sua verba duos.  
Bruma novi prima est, veterisque novissima Solis:  
Principium capiunt Phœbus & annus idem.  
Postea mirabar, cur non sine litibus esset 165  
Prima dies. Caussam percipe, Janus ait.  
Tempora commisi nascentia rebus agendis:  
Totus ab auspicio ne foret annus iners.  
Quisque suas artes ob idem delibat agendo:  
Nec plus quam solitum testificatur opus. 170  
Mox ego; Cur, quamvis aliorum numina placeam,  
Jane, tibi primo tura merumque fero?  
Ut per me possis aditum, qui limina servo,  
Ad quoscumque velim prorsus, habere Deos.  
At cur læta tuis dicuntur verba Kalendis; 175

Et damus alternas, accipimusque preces?  
Tum Deus incumbens baculo, quem dextra gerebat;  
Omina principiis, inquit, inesse solent.  
Ad primam vocem timidas advertitis aures:  
Et visam primùm consulit augur avem. 180  
Templa patent auresque Deûm: nec lingua caducas  
Concipit ulla preces; dictaque pondus habent.  
Desierat paucis: nec longa silentia feci;  
Sed tetigi verbis ultima verba meis:  
Quid vult palma sibi, rugosaque carica, dixi, 185  
Et data sub niveo candida mella favo?  
Omen, ait, caussa est, ut res sapor ille sequatur;  
Et peragat cœptum dulcis ut annus iter.  
Dulcia cur dentur video: stipis adjice caussam,  
Pars mihi de festo ne labet ulla tuo. 190  
Risit; &, O quam te fallunt tua secula, dixit,  
Qui stipe mel sumta dulcius esse putes!  
Vix ego Saturno quemquam regnante videbam,  
Cujus non animo dulcia lucra forent.  
Tempore crevit amor, qui nunc est summus, habendi: 195  
Vix ultra, quo jam progrediatur, habet.  
Pluris opes nunc sunt, quam prisci temporis annis;  
Dum populus pauper, dum nova Roma fuit:  
Dum casa Martigenam capiebat parva Quirinum,  
Et dabat exiguum fluminis ulva torum. 200  
Juppiter angusta vix totus stabat in æde;  
Inque Jovis dextra fictile fulmen erat.

Frondibus ornabant, quæ nunc Capitolia gemmis;  
Pascebatque suas ipse Senator oves.  
Nec pudor, in stipula placidam cepisse quietem, 105  
Nec scenum capiti supposuisse, fuit.  
Jura dabat populis posito modo Consul aratro;  
Et levis argenti lamina crimen erat.  
At postquam Fortuna loci caput extulit hujus,  
Et tetigit summos vertice Roma Deos; 210  
Creverunt & opes, & opum furiosa cupido:  
Et, cum possideant plurima, plura volunt.  
Quærere ut absument, absumenta requirere certant:  
Atque ipsæ vitiis sunt alimenta vices.  
Sic, quibus intumuit suffusa venter ab unda, 215  
Quo plus sunt potæ, plus sitiuntur aquæ.  
In pretio pretium nunc est. dat census honores;  
Census amicitias: pauper ubique jacet.  
Tu tamen auspiciū si sit stipis utile quæris,  
Curque juvent nostras æra vetusta manus. 220  
Æra dabant olim; melius nunc omen in auro est  
Victaque concedit prisca moneta novæ.  
Nos quoque templa juvant, quâmvīs antiqua probemus,  
Aurea. majestas convenit ista Deo.  
Laudamus veteres, sed nostris utimur annis. 225  
Mos tamen est æque dignus uterque coli.  
Finierat monitus. placidis ita rursus, ut ante,  
Clavigerum verbis adloquor ipse Deum:  
Multa quidem didici. sed cur navalis in æræ

Altera signata est, altera forma biceps? 230  
Noscere me duplici posses in imagine, dixit;  
Ni vetus ipsa dies extenuaret opus.  
Causa ratis superest: Thuscum rate venit in amnem  
Ante pererrato falcifer orbe Deus.  
Hac ego Saturnum memini tellure receptum. 235  
Cœlitibus regnis ab Jove pulsus erat.  
Inde diu genti mansit Saturnia nomen:  
Dicta quoque est Latium terra, latente Deo.  
At bona posteritas puppim servavit in ære,  
Hospitis adventum testificata Dei. 240  
Ipse solum colui, cujus placidissima lævum  
Radit arenosi Thybridis unda latus.  
Hic, ubi nunc Roma est, incædua silva virebat:  
Tantaque res paucis pascua bubus erat.  
Arx mea collis erat, quem cultrix nomine nostro 245  
Nuncupat hæc ætas, Janiculumque vocat.  
Tunc ego regnabam, patiens cum terra Deorum  
Esset, & humanis numina mixta locis.  
Nondum Justitiam facinus mortale fugarat.  
(Ultima de Superis illa reliquit humum.) 250  
Proque metu populum sine vi pudor ipse regebat.  
Nullus erat, justis reddere jura, labor:  
Nil mihi cum bello: pacem postesque tuebar:  
Et clavem ostendens, Hæc, ait, arma gero.  
Presserat ora Deus. tunc sic nostra ora resolvo, 255  
Voce mea voces eliciente Dei.



Cum tot sint Jani, cur stas sacratus in uno,  
Hic ubi juncta foris templa duobus habes?  
Ille manu mulcens propexam ad pectora barbam,  
Protinus Œbalii retulit arma Titi; 260  
Itque levis custos, armillis capta Sabinis,  
Ad summæ Tatium duxerit artis iter.  
Inde, velut nunc est, per quem descenditis, inquit,  
Arduus in valles & Fora clivus erat.  
Et jam contigerat portam: Saturnia cujus 265  
Demserat adpositas insidiosa seras.  
Cum tanto veritus ~~committere~~ numine pugnam,  
Ipse meæ movi callidus artis opus.  
Draque, qua pollens ope sum, fontana reclusi;  
Sumque repentinas ejaculatus aquas. 270  
Ante tamen gelidis subjeci sulfura venis:  
Clauderet ut Tatio fervidus humor iter.  
Cujus ut utilitas pulsus percepta Sabinis;  
Quæque fuit, tuto reddita forma loco est;  
Ara mihi posita est parvo conjuncta sacello: 275  
Hæc adolet flammis cum strue farra suis.  
At cur pace lates, motisque recluderis armis?  
Nec mora; quæsitæ reddita caussa mihi.  
Ut populo reditus pateant ad bella profecto,  
Tota patet demtâ janua nostra serâ. 280  
Pæc fores obdo; ne quâ discedere possit:  
Cæsareoque diu nomine clausus ero.  
Dixit; &, attollens oculos diversa tuentes,

Adspexit toto quidquid in orbe fuit.

Pax erat; & vestri, Germanice, caussa triumphī 185

Tradiderat famulas jam tibi Rhēnus aquas.

Jane, face æternos, Pacem Pacisque ministros:

Neve suum, præsta, deserat auctor opus.

Quod tamen ex ipsis licuit mihi discere Fastis;

Sacravere Patres hac duo templa die. 190

Accepit Phœbo Nymphaque Coronide natum

Insula, dividuâ quam premit amnis aquâ.

Juppiter in parte est. cepit locus unus utrumque;

Jundaque sunt magno templa nepotis avo.

**Q**uid vetat & stellas, ut quæque oriturque ca-  
ditque, 195

Dicere? promissi pars sit & ista mei.

Felices animos, quibus hæc cognoscere primis,

Inque domos superas scandere cura fuit!

Credibile est illos pariter vitiisque locisque

Altius humanis exseruisse caput. 301

Non Venus & vinum sublimia pectora fregit,

Officiumve fori, militiæve labor.

Nec levis ambitio, perfusaque gloria fuco,

Magnarumve fames sollicitavit opum.

Admovêre oculis distantia sidera nostris, 307

Ætheraque ingenio supposuere suo.

Sic petitur cælum: non ut ferat Ossan Olympus

Summaque Peliacus sidera tangat apex.

Nos quoque sub ducibus cœlum metabimur illis,  
 Ponemusque suos ad stata signa dies. 310

**E**Rgo ubi nox aderit venturis tertia Nonis,  
 Sparsaque cœlesti rore madebit humus;  
 Odi pedis frustra quærantur brachia Cancri:  
 Præceps occiduas ille subivit aquas.

**I**nstiterint Nonæ: missi tibi nubibus atris 315  
 Signa dabunt imbres, exoriente Lyra.

**Q**uatuor adde dies ductis ex ordine Nonis;  
 Janus Agonali luce piandus erit.  
 Nominis esse potes succinctus caussa minister,  
 Hostia Cœlitibus quo feriente cadit; 320  
 Qui calido strictos tincturus sanguine cultros,  
 Semper Agone? rogas; nec nisi jussus agis.  
 Pars, quia non veniant pecudes, sed agantur, ab actu  
 Nomen Agonalem credit habere diem.  
 Pars putat hoc festum priscis Agnalia dictum; 325  
 Una sit ut proprio litera demta loco.  
 An, quia prævisos in aqua timet hostia cultros,  
 A pecoris lux est ista notata metu?  
 Pars etiam, fieri solitis ætate priorum  
 Nomina de ludis Graja tulisse diem. 330  
 Et pecus antiquus dicebat Agonia sermo:  
 Veraque iudicio est ultima caussa meo.

Utque ea nunc certa est; ita Rex placare sacrorum  
Numina lanigeræ conjuge debet ovis.

Victima, quæ dextra cecidit victrice, vocatur. 335  
Hostibus amotis hostia nomen habet.

Ante, Deos homini quod conciliare valeret,  
Far erat, & puri lucida mica salis.

Nondum pertulerat lacrimatas cortice myrrhas  
Acta per æquoreas hospita navis aquas. 340

Tura nec Euphrates, nec miserat India costum,  
Nec fuerant rubri cognita fila croci.

Ara dabat fumos, herbis contenta Sabinis,  
Et non exiguo laurus adusta sono.

Si quis erat, factis prati de flore, coronis, 345  
Qui posset violas addere, dives erat.

Hic, qui nunc aperit percussi viscera tauri,  
In sacris nullum culter habebat opus.

Prima Ceres avidæ gavisa est sanguine porcæ,  
Ultra suas merita cæde nocentis opes. 350

Nam sata, vere novo, teneris lactentia succis,  
Eruta setigeræ comperit ore suis.

Sus dederat pœnas. exemplo territus hujus  
Palmitē debueras abstinuisse, caper.

Quem spectans aliquis dentes in vite prementem, 355  
Talia non tacito dicta dolore dedit:

Rode, caper, vitem: tamen hinc, cum stabis ad aram,  
In tua quod spargi cornua possit, erit.

Verba fides sequitur: noxæ tibi deditus hostis

Spargitur adfuso cornua, Bacche, mero. 360  
Culpa sui nocuit; nocuit quoque culpa capellæ.

Quid bos, quid placidæ commeruistis oves?  
Flebat Aristæus, quod apes cum stirpe necatas,  
Viderat inceptos destituisse favos.

Cærulea quem genetrix ægre solata dolentem, 365  
Addidit hæc dictis ultima verba suis:

Siste, puer, lacrimas. Proteus tua damna levabit;  
Quoque modo repares, quæ periire, dabit.

Decipiat ne te versis tamen ille figuris,  
Impediant geminas vincula firma manus. 370

Pervenit ad vatem juvenis: resolutaque somno  
Adligat æquorei brachia capta Senis.

Ille sua faciem transformis adulterat arte:  
Mox domitus vinclis in sua membra redit.

Oraque cærulea tollens rorantia barba; 375  
Qua, dixit, repares arte, requiris, apes?

Obrue maciati corpus tellure juvenci:  
Quod petis a nobis, obrutus ille dabit.

Jussa facit pastor. fervent examina putri  
De bove: mille animas una necata dedit. 380

Poscit ovem fatum. verbenas improba carpsit;  
Quas pia Dīs ruris ferre solebat anus.

Quid tuti superest, animam cum ponat in aris  
Lanigerumque pecus, ruricolæque boves?

Placat equo Persis radiis Hyperiona cinctum, 385  
Ne detur celeri victima tarda Deo.

Quod semel est triplici pro virgine cæsa Dianæ,  
Nunc quoque pro nulla virgine cerva cadit.  
Extæ canum vidi Triviæ libare Sapphos;  
Et quicumque tuas accolit, Hæme, nives. 390  
Cæditur & rigido Custodi ruris asellus.  
Causa pudenda quidem est, huic tamen apta Deo.  
Festa corymbiferi celebrabas Græcia Bacchi,  
Tertia quæ solito tempore bruma refert.  
Dî quoque cultores gelidi venere Lycei, 395  
Et quicumque joci non alienus erat:  
Panem, & in Venerem Satyrorum prona juvenus;  
Quæque colunt amnes, solaque rura, Deæ.  
Venerat & senior pando Silenus asello,  
Quique rubro pavidas inguine terret aves. 400  
Dulcia qui dignum nemus in convivia nacti  
Gramine vestitis accubuerunt toris.  
Vina dabat Liber: tulerat sibi quisque coronam.  
Miscendas parce rivus agebat aquas.  
Naiades effusis aliæ sine pectinis usu, 405  
Pars aderant positæ arte manuque comis.  
Illa super suras tunicam collecta ministrat:  
Altera dissuto pectus aperta sinu.  
Exserit hæc humerum: vestem trahit illa per herbas.  
Impediunt teneros vincula nulla pedes. 410  
Hinc aliæ Satyris incendia mitia præbent:  
Pars tibi, qui pinu tempora nexa geris.  
Te quoque, inextinctæ Silene libidinis, urunt.

Nequitia est, quæ te non sinit esse senem.

At ruber, hortorum decus & tutela, Priapus 415

Omnibus ex illis Lotide captus erat.

Hanc cupit, hanc optat: sola suspirat in illa:

Signaque dat nutu; sollicitatque notis.

Fastus inest pulchris, sequiturque superbia formam.

Irrisum vultu despicit illa suo. 420

Nox erat: &, vino somnum faciente, jacebant

Corpora, diversis victa sopore locis.

Lotis in herbosa, sub acernis ultima ramis,

Sicut erat lusu fessa, quievit humo.

Surgit amans: animamque tenens, vestigia furtim 425

Suspense digitis fert taciturna gradu.

Ut tetigit nivæ secreta cubilia Nymphæ,

Ipsa sui flatûs ne sonet aura, cavet.

Et jam finitima corpus librabat in herba;

Illa tamen multi plena soporis erat. 430

Gaudet: &, a pedibus tracto velamine, vota

Ad sua felici cœperat ire via.

Ecce rudens rauco Sileni vector asellus

Intempestivos edidit ore sonos.

Territa consurgens Nympe manibusque Priapum 435

Rejicit, & fugiens concitat omne nemus.

At Deus, obscæna nimium quoque parte paratus,

Omnibus ad Lunæ lumina risus erat.

Morte dedit pœnas auctor clamoris: & hinc est

Hellespontiacæ victima grata Deo. 440

Intactæ fueratis aves, solatia ruris;

Adsuetum silvis, innocuumque genus;

Quæ facitis nidos, quæ plumis ova foveitis,

Et facili dulces editis ore modos.

Sed nihil ista juvant: quia linguæ crimen habetis, 445

Dique putant mentes vos aperire suas.

Nec tamen id falsum. nam, Dis ut proxima quæque,

Nunc penna veras, nunc datis ore notas.

Tuta diu volucrum proles, tum denique cæsa est:

Juveruntque Deos indicis exta sui. 450

Ergo sæpe suo conjux abducta marito

Uritur in calidis alba columba focis.

Nec defensa juvant Capitolia, quo minus anser

Det jecur in lances, Inachi lauta, tuas.

Nocte Deæ Nocti cristatus cæditur ales, 455

Quod tepidum vigili provocat ore diem.

Interea Delphin, clarum super æquora sidus,

Tollitur; & patriis exserit ora vadis.

**P**ostera lux hiemem medio discrimine signat:

Æquaque præteritæ, quæ superabit, erit. 460

**P**roxima prospiciet Tithono nupta relicto

Arcadiæ sacrum pontificale Deæ.

Te quoque lux eadem, Turni soror, æde recepit;

Hic ubi Virginea Campus obitur aqua.

Unde petam causas horum, moremque sacrorum? 465



Dirigat in medio quis mea vela freto?

Ipsa mone, quæ nomen habes a carmine ductum,

Propositoque fave, ne tuus erret honos.

Orta prior Lunâ (de se si creditur ipsi)

A magno tellus Arcade nomen habet. 470

Hic fuit Evander: qui, quamquam clarus utroque,

Nobilior sacræ sanguine matris erat.

Quæ, simul ætherios animo conceperat ignes,

Ore dabat vero carmina plena Dei.

Dixerat hæc nato motus instare, sibi que, 475

Multaque præterea tempore nata fidem.

Nam juvenis, vera nimium cum matre, fugatus

Deserit Arcadium Parrhasiumque larem.

Cui genetrix flenti, Fortuna viriliter, inquit,

(Siste, puer, lacrimas) ista ferenda tibi est. 480

Sic erat in fatis: nec te tua culpa fugavit;

Sed Deus. offenso pulsus es urbe Deo.

Non meriti pœnam pateris, sed Numinis iram.

Est aliquid magnis crimen abesse malis.

Conscia mens ut cuique sua est, ita concipit intra 485

Pectora pro facto spemque metumque suo.

Nec tamen ut primus mœre mala talia passus:

Obruit ingentes ista procella viros.

Passus idem, Tyriis qui quondam pulsus ab oris,

Cadmus, in Aonia constitit exsul humo. 490

Passus idem Tydeus, & idem Pagaseus Iason:

Et quos præterea longa referre mora est.

Omne solum forti patria est; ut piscibus æquor;

Ut volucris, vacuo quidquid in orbe patet.

Nec fera tempestas toto tamen horret in anno: 495

Et tibi (crede mihi) tempora veris erunt.

Vocibus Evander firmata mente parentis

Nave secat fluctus, Hesperiamque tenet.

Jamque ratem doctæ monitu Carinentis in amnem

Egerat, & Thuscis obviis ibat aquis. 500

Fluminis illa latus, cui sunt vada juncta Terenti,

Adspicit; & sparsas per loca sola casas.

Utque erat, immissis puppim stetit ante capillis;

Continuitque manum torva regentis iter.

Et procul in dextram tendens sua brachia ripam, 505

Pinea non sano ter pede texta ferit.

Neve daret saltum properans insistere terræ,

Vix est Evandri vixque retenta manu.

Dîque petitorum, dixit, salvete locorum;

Tuque novos cœlo terra datura Deos. 510

Fluminaque, & Fontes, quibus utitur hospita tellus,

Et Nemora, & Silvæ, Naiadumque chori;

Este bonis avibus visi natoque mihique:

Ripaque felici tacta sit ista pede.

Fallor? an hi. fient ingentia mœnia colles? 515

Juraque ab hac terra cetera terra petet?

Montibus his olim totus promittitur orbis.

Quis tantum fati credat habere locum?

Et jam Dardaniæ tangent hæc litora pinus.

Hic

Hic quoque caussa novi femina Martis erit, 520  
Care nepos, Palla, funesta quid induis arma?

Indue. non humili vindice cæsus eris.

Victa tamen vinctes, eversaue Troja resurges.

Obruet hostiles ista ruina domos.

Urite victrices Neptunia Pergama flammæ: 525

Num minus hic toto est altior orbe cinis?

Jam pius Æneas sacra, & sacra altera patrem,

Adferet. Iliacos excipe, Vesta, Deos.

Tempus erit, cum vos, orbemque tuebitur idem:

Et fient ipso sacra colente Deo: 530

Et penes Augustos patriæ tutela manebit.

Hanc fas imperii frena tenere domum.

Inde nepos natusque Dei (licet ipse recuset)

Pondera cœlesti mente paterna feret.

Utque ego perpetuis olim sacrabor in aris, 535

Sic Augusta novum Julia numen erit.

Talibus ut nostros dictis descendit in annos,

Substitit in medios præscia lingua sonos.

Puppibus egressus Latia stetit exsul in herba.

Felix, exsilium cui locus ille fuit! 540

Nec mora longa fuit. stabant nova tecta: nec alter

Montibus Ausoniis Arcade major erat.

Ecce boves illuc Erytheidas adplicat heros,

Emensus longi claviger orbis iter.

Dumque huic hospitium domus est Tegeea, vagantur 545

Incustoditæ lata per arva boves.

Ovidius T. III.

C

Mane erat: excussus somno Tirynthius hospes

De numero tauros sentit abesse duos.

Nulla videt taciti quærens vestigia furti:

Traxerat aversos Cacus in antra feros; 550

Cacus, Aventinæ timor atque infamia silvæ,

Non leve finitimis hospitibusque malum.

Dira viro facies; vires pro corpore; corpus

Grande: pater monstri Mulciber hujus erat.

Proque domo longis spelunca recessibus ingens, 555

Abdita, vix ipsis invenienda feris.

Ora super postes adfixaque brachia pendent,

Squallidaque humanis ossibus albet humus.

Servata male parte boum Jove natus abibas:

Mugitum rauco furta dedere sono. 560

Accipio revocamen, ait; vocemque secutus

Impia per silvas ultor ad antra venit.

Ille aditum fracti præstruxerat objice montis:

Vix juga movissent quinque bis illud opus.

Nititur hic humeris, (cælum quoque sederat illis) 565

Et vastum motu collabefactat onus.

Quod simul evulsum est, fragor æthera terruit ipsum;

Istaque subsedit pondere molis humus.

Prima movet Cacus collatâ prælia dextrâ;

Remque ferox saxis stipitibusque gerit. 570

Quis ubi nil agitur, patrias male fortis ad artes

Confugit, & flammæ ore sonante vomit.

Quas quoties proflat, spirare Typhoea, credas,

Et rapidum Ætnæo fulgur ab igne jaci.  
Occupat Alcides, adductaque clava trinodis 575  
Ter quater adversi sedit in ore viri.  
Ille cadit, mixtosque vomit cum sanguine fumos,  
Et lato moriens pectore plangit humum.  
Immolat ex illis taurum tibi, Juppiter, unum  
Victor, & Evandrum ruricolæ vocat. 580  
Constituitque sibi, quæ Maxima dicitur, aram,  
Hic ubi pars Urbis de bove nomen habet.  
Nec tacet Evandri mater, prope tempus adesse,  
Hercule quo tellus sit satis usa suo.  
At felix vates, ut Dis gratissima dixit, 585  
Possidet hunc Jani sic Dea mense diem.

**I**Dibus in magni castus Jovis æde sacerdos  
Semimaris flammis viscera libat ovis:  
Redditaque est omnis populo provincia nostro;  
Et tuus Augusto nomine dictus avus. 590  
Perlege dispositas generosa per atria ceras;  
Contigerunt nulli nomina tanta viro.  
Africa victorem de se vocat: alter Isauras,  
Aut Cretum domitas testificatur opes.  
Hunc Numidæ faciunt, illum Messana superbum; 595  
Ille Numantina traxit ab urbe notam.  
Et mortem & nomen Druso Germania fecit.  
Me miserum, virtus quam brevis illa fuit!  
Si petat a victis, tot sumat nomina Cæsar,

Quot numero gentes maximus orbis habet. 600  
 Ex uno, quidam celebres, aut Torquis ademtae,  
 Aut Corvi titulos auxiliaris habent.  
 Magne, tuum nomen rerum mensura tuarum est:  
 Sed qui te vicit, nomine major erat.  
 Nec gradus est ultra Fabios cognominis ullus. 605  
 Illa domus meritis Maxima dicta suis.  
 Sed tamen humanis celebrantur honoribus omnes:  
 Hic socium summo cum Jove nomen habet.  
 Sancta vocant augusta Patres: augusta vocantur  
 Templa, sacerdotum rite dicata manu. 610  
 Hujus & augurium dependet origine verbi,  
 Et quodcumque sua Juppiter auget ope.  
 Augeat imperium nostri Ducis, augeat annos:  
 Protegat & vestras querna corona fores.  
 Auspiciisque Deis tanti cognominis heres 615  
 Omne suscipiat, quo Pater, orbis onus.

**R**espiciet Titan actas ubi tertius Idus,  
 Fient Parrhasiæ sacra relata Deæ.  
 Nam prius Ausonias matres carpenta vhebant:  
 (Hæc quoque ab Evandri dicta parente reor.) 620  
 Mox honor eripitur, matronaque destinat omnis.  
 Ingratos nulla prole novare viros.  
 Neve daret partus, istu temeraria cæco  
 Visceribus crescens excutiebat onus.  
 Corripuisse Patres ausas immitia nuptas, 625

Jus tamen exemptum restituisse, ferunt.  
 Binaque nunc pariter Tegeæ sacra parenti  
 Pro pueris fieri virginibusque jubent.  
 Scortea non illi fas est inferre sacello,  
 Ne violent puros exanimata focos. 630  
 Si quis amas ritus veteres, adsiste precanti:  
 Nomina percipies non tibi nota prius.  
 Porrima placantur Postvertaque, sive sorores,  
 Sive fugæ comites, Mænali Nympha, tuæ.  
 Altera, quod porro fuerat, cecinisse putatur: 635  
 Altera versurum ~~postmodo~~ quidquid erat.

**C**andida, te niveo posuit lux proxima templo,  
 Quâ fert sublimes alta Moneta gradus:  
 Nunc bene prospicies Latiam, Concordia, turbam:  
 Nunc te sacratæ restituere manus. 640  
 Furius (antiquum) populi superator Hetrusci  
 Voverat, & voti solverat ante fidem.  
 Causa, quod a Patribus sumtis secesserat armis  
 Vulgus, & ipsa suas Roma timebat opes.  
 Causa recens melior. passos Germania crines 645  
 Porrigit auspiciis, Dux venerande, tuis.  
 Inde triumphatæ libasti munera gentis;  
 Templaque fecisti, quam colis ipse, Deæ.  
 Hæc tua constituit Genetrix & rebus & ara,  
 Sola toro magni digna reperta Jovis. 650

**H**ÆC ubi transierint, Capricorno, Phœbe, relicto,  
Per juvenis cures signa gerentis aquam.

**S**eptimus hinc Oriens cum se demiserit undis,  
Fulgebit toto jam Lyra nulla polo.

**S**idere ab hoc, ignis venienti nocte Leonis 655  
Qui micat in medio pectore, mersus erit.

**T**ER quater evolvi signantes tempora Fastos;  
Nec Sementiva est ulla reperta dies:  
Cum mihi, sensit enim, Lux hæc indicitur, inquit,  
Musa. quid a Fastis non stata sacra petis? 660  
Utque dies incerta sacro, sic tempora certa;  
Seminibus jactis est ubi fœtus ager.  
State coronati plenum ad præsepe juvenci:  
Cum tepido vestrum vere redibit opus.  
Rusticus emeritum palo suspendat aratrum: 665  
Omne reformidat frigida vulnus humus.  
Villice, da requiem terræ, semente peracta:  
Da requiem, terram qui coluere, viris.  
Pagus agat festum. pagum lustrate, coloni;  
Et date paganis annua liba focis. 670  
Placentur matres frugum, Tellusque, Ceresque,  
Farre suo, gravidæ visceribusque suis.  
Officium commune Ceres & Terra tuentur.



Hæc præbet caussam frugibus, illa locum.

Consortes operum, per quas correcta vetustas, 675

Quernaque glans victa est utiliore cibo;

Frugibus immensis avidos satiate colonos,

Ut capiant cultûs præmia digna sui.

Vos date perpetuos teneris sementibus auctus:

Nec nova per gelidas herba sit usta nives. 680

Cum serimus, cælum ventis aperite serenis;

Cum latet, ætheria spargite semen aqua.

Neve graves cultis Cerealia dona cavete

Agmine læsuro depopulentur aves.

Vos quoque subjectis, formicæ, parcite granis: 685

Post messem prædæ copia major erit.

Interea crescat scabræ rubiginis experts,

Nec vitio cœli palleat ægra seges.

Et neque deficiat macie, neque pinguior æquo

Divitiis pereat luxuriosa suis. 690

Et careant loliis, oculos vitiantibus, agri;

Nec sterilis culto surgat avena solo.

Triticeos foetus, passuraque farra bis ignem,

Hordeaque ingenti fœnore reddat ager.

Hoc ego pro vobis, hoc vos optate coloni: 695

Efficiantque ratas utraque Diva preces.

Bella diu tenuere viros. erat aptior ensis

Vomere: cedebat taurus arator equo.

Sarcula cessabant: versique in pila ligones,

Factaque de rastri pondere cassis erat. 700

Gratia Dīs, domuique tuæ: religata catenis  
 Jampridem nostro sub pede bella jacent.  
 Sub juga bos veniat, sub terras semen aratas.  
 Pax Cererem nutrit: pacis alumna Ceres.

**A**T quæ venturas præcedet sexta Kalendas, 705  
 Hac sunt Ledæis templa dicata Deis.  
 Fratribus illa Deis fratres de gente Deorum  
 Circa Juturnæ composuere lacus.

**I**Psum nos carmen deducit Pacis ad aram.  
 Hæc erit a mensis fine secunda dies. 710  
 Frondibus Actiacis comtos redimita capillos,  
 Pax ades; & toto mitis in orbe mane.  
 Dum desunt hostes, desit quoque caussa triumphī.  
 Tu Ducibus bello gloria major eris.  
 Sola gerat miles, quibus arma coerceat, arma: 715  
 Canteturque ferâ, nil nisi pompa, tubâ.  
 Horreat Æneadas & primus & ultimus orbis:  
 Si qua parum Romam terra timebit, amet.  
 Tura, sacerdotes, pacalibus addite flammis;  
 Albaque percussâ victima fronte cadat. 720  
 Utque domus, quæ præstat eam, cum Pace perennet,  
 Ad pia propensos vota rogate Deos.  
 Sed jam prima mei pars est exacta laboris;  
 Cumque suo finem mense libellus habet.



P. OVIDII NASONIS  
**F A S T O R U M**  
 L I B E R II.

**J**anus habet finem. cum carmine crescit & annus.  
 Alter ut hinc mensis, sic liber alter eat.  
 Nunc primum velis, Elegi, majoribus itis:  
 Exiguum (memini) nuper eratis opus.  
 Certe ego vos habui faciles in amore ministros; 5  
 Cum lusit numeris prima juvenia suis.  
 Idem sacra cano, signataque tempora Fastis.  
 Ecquis ad hæc illinc crederet esse viam?  
 Hæc mea militia est. ferimus, quæ possumus, arma:  
 Dextraque non omni munere nostra vacat. 10  
 Si mihi non valido torquentur pila lacerto;  
 Nec bellatoris terga premuntur equi;  
 Nec galea tegimur, nec acuto cingimur ense;  
 (His habilis telis quilibet esse potest.)  
 At tua prosequimur studioso pectore, Cæsar, 15  
 Nomina: per titulos ingredimurque tuos.

Ergo ades, & placido paullum mea munera vultu  
Respice; pacando si quid ab hoste vacas.

**F**ebrua Romani dixere piamina patres:  
Nunc quoque dant verbo plurima signa fidem. 20  
Pontifices ab Rege petunt & Flamine lanas,  
Quis veteri linguâ Februa nomen erat.  
Quæque capit lictor domibus purgamina certis,  
Torrida cum micâ farra, vocantur idem.  
Nomen idem ramo, qui cæsus ab arbore pura, 25  
Casta sacerdotum tempora fronde tegit.  
Ipse ego Flaminicam poscentem Februa vidi;  
Februa poscenti pinea virga data est.  
Denique quodcumque est, quo pectora nostra piamur,  
Hoc apud intonsos nomen habebat avos. 30  
Mensis ab his dictus: secta quia pelle Luperci  
Omne solum lustrant; idque piamen habent.  
Aut quia placatis sunt tempora pura sepulcris,  
Tunc cum ferales præteriere dies.  
Omne nefas omnemque mali purgamina caussam 39  
Credebant nostri tollere posse senes.  
Græcia principium moris fuit. illa nocentes  
Impia lustratos ponere facta putat.  
Actoriden Peleus, ipsum quoque Pelea Phoci  
Cæde per Hæmonias solvit Acastus aquas. 40  
Vestam frenatis per inane draconibus Ægeus  
Credulus immerita Phasida iuvit ope.

Amphiaraidēs Naupactoo Acheloo,  
Solve nefas, dixit. solvit & ille nefas.  
Ah nimium faciles, qui tristia crimina cædis 45  
Fluminea tolli posse putetis aqua!  
Sed tamen (antiqui ne nescius ordinis erres)  
Primus, ut est, Jani mensis & ante fuit.  
Qui sequitur Janum, veteris fuit ultimus anni.  
Tu quoque sacrorum, Termine, finis eras. 50  
Primus enim Jani mensis, quia janua prima est.  
Qui sacer est imis Manibus, imus erat.  
Postmodo creduntur spatio distantia longo  
Tempora bis quini continuasse Viri.

**P** Rincipio mensis, Phrygiæ contermina Matri, 55  
Sospita delubris dicitur aucta novis.  
Nunc ubi sint illis, quæris, sacrata Kalendis,  
Templa Deæ? longo procubuere die.  
Cetera ne simili caderent labefacta ruinâ,  
Cavit sacrati provida cura Ducis: 60  
Sub quo delubris sentitur nulla senectus.  
Nec satis est homines, obligat ille Deos.  
Templorum positor, templorum sancte repostor,  
Sit Superis, opto, mutua cura tui.  
Dent tibi Cælestes, quot tu Cælestibus, annos. 65  
Proque tua maneant in statione domo.  
Tum quoque vicini lucus celebratur Asyli;  
Quâ petit æquoreas advena Thybris aquas.

Ad penetrale Numæ, Capitolinumque Tonantem,  
 Inque Jovis summa cæditur arce bidens. 70  
 Sæpe graves pluvias adopertus nubibus Auster  
 Concitat, aut positâ sub nive terra latet.

**P**roximus Hesperias Titan abiturus in undas,  
 Gemmea purpureis cum juga demit equis;  
 Illâ nocte aliquis, tollens ad sidera vultum, 75  
 Dicet, Ubi est hodie, quæ Lyra fulsit heri?  
 Dumque Lyram quæret, medii quoque terga Leonis  
 In liquidas subito mersa notabit aquas.

**Q**uem modo cælatum stellis Delphina videbas,  
 Is fugiet visus nocte sequente tuos. 80  
 Seu fuit occultis felix in amoribus index:  
 Lesbida cum domino seu tulit ille lyram.  
 Quod mare non novit, quæ nescit Arionæ tellus?  
 Carmine currentes ille tenebat aquas.  
 Sæpe, sequens agnam, lupus est hac voce retentus: 85  
 Sæpe avidum fugiens restitit agna lupum:  
 Sæpe canes leporesque umbra cubuere sub una;  
 Et stetit in saxo proxima cerva leæ.  
 Et sine lite loquax cum Palladis alite cornix  
 Sedit; & accipitri juncta columba fuit. 90  
 Cynthia sæpe tuis fertur, vocalis Arion,  
 Tamquam fraternis obstupuisse modis.  
 Nomen Arionium Siculas impleverat urbes;

Captaque erat lyricis Ausonis ora sonis.  
Inde domum repetens puppim conscendit Arion; 95  
Atque ita quæsitâ arte ferebat opes.  
Forsitan, infelix, ventos undamque timebas;  
At tibi nave tua tutius æquor erat.  
Namque gubernator distracto constitit ense,  
Ceteraque armatâ conscia turba manu. 100  
Quid tibi cum gladio? dubiam rege, navita, pinum.  
Non sunt hæc digitis arma tenenda tuis.  
Ille metu vacuus, Mortem non deprecor, inquit:  
Sed liceat suntâ pauca referre lyrâ.  
Dant veniam, ridentque moram. capit ille coronam; 105  
Quæ possit crines, Phœbe, decere tuos.  
Induerat Tyrio bis tinctam murice pallam:  
Reddidit ista suos pollice chorda sonos.  
Flebilibus veluti numeris canentia durâ  
Trajectus pennâ tempora cantat olôr. 110  
Protinus in medias ornatus desilit undas.  
Spargitur impulsâ cærula puppis aquâ.  
Inde (fide majus) tergo Delphina recurvo  
Se memorant oneri supposuisse novo.  
Ille sedens citharamque tenet, pretiumque vehendi 115  
Cantat, & æquoreas carmine mulcet aquas.  
Dî pia facta vident. astris Delphina recepit  
Juppiter; & stellas jussit habere novem.

**N**unc mihi mille sonos, quoque est memoratus Achilles,

Vellem, Mæonide, pectus inesse tuum. 120  
 Dum canimus sacras alterno pectine Nonas,  
 Maximus hinc Fastis adcumulatur honos.  
 Deficit ingenium, majoraque viribus urgent.  
 Hæc mihi præcipuo est ore canenda dies.  
 Quid volui demens Elegis imponere tantum 125  
 Ponderis? heroi res erat ista pedis.  
 Sancte Pater Patriæ, tibi Plebs, tibi Curia nomen  
 Hoc dedit; hoc dedimus nos tibi nomen Eques.  
 Res tamen ante dedit. sero quoque vera tulisti  
 Nomina. jam pridem tu Pater orbis eras. 130  
 Hoc tu per terras, quod in æthere Juppiter alto,  
 Nomen habes. hominum tu pater, ille Deûm.  
 Romule, concedas. facit hic tua magna tuendo  
 Mœnia: tu dederas transilienda Remo.  
 Te Tati, parvique Cures, Cæninaque sensit. 135  
 Hoc Duce Romanum est Solis utrumque latas.  
 Tu breve nescio quid victæ telluris habebas:  
 Quodcumque est alto sub Jove, Cæsar habet.  
 Tu rapis, hic castas Duce se jubet esse maritas.  
 Tu recipis luco, submovet ille nefas. 140  
 Vis tibi grata fuit: florent sub Cæsare leges.  
 Tu Domini nomen, Principis ille tenet.  
 Te Remus incusat; veniam dedit hostibus ille.  
 Cœlestem fecit te Pater, ille Patrem.

**J**AM puer Idæus media tenus eminet alvo: 145



Et liquidas mixto neſtare fundit aquas.  
En etiam, ſi quis Borean horrere ſolebat,  
Gaudeat. a Zephyris mollior aura venit.

**Q**uintus ab æquoreis nitidum jubar extulit undis  
Lucifer, & primi tempora veris eunt. 150  
Ne fallare tamen; reſtant tibi frigora, reſtant:  
Magnaſque diſcedens ſigna relinquit hiems.

**T**ertia nox veniat: Cuſtodem protinus Urfæ  
Adſpicias geminos exſeruiſſe pedes.  
Inter Hamadryadas, jaculatricemque Dianam, 155  
Calliſto ſacri pars fuit una chori.  
Illa Deæ tangens arcus, Quos tangimus, arcus,  
Eſte meæ teſtes virginittatis, ait.  
Cynthia laudavit, Promiſſaque fœdera ſerva,  
Et comitum princeps tu mihi, dixit, eris. 160  
Fœdera ſervaret, ſi non formoſa fuiſſet.  
Cavit mortales: de Jove crimen habet.  
Mille feras Phœbe ſilvis venata redibat;  
Aut plus, aut medium Sole tenente diem.  
Ut tetigit lucum (denſa niger ilice lucus; 165  
In medio gelidæ fons erat altus aquæ)  
Hac, ait, in ſilva, virgo Tegeea, lavemur.  
Erubuit falſo virginis illa ſono.  
Dixerat & Nymphis: Nymphæ velamina ponunt.  
Hanc pudet, & tardæ dat mala ſigna moræ. 170

Exsuerat tunicas: uteri manifesta tumore

Proditur indicio ponderis ipsa sui.

Cui Dea, Virgineos, perjura Lycaoni, cœtus

Desere, nec castas pollue, dixit, aquas.

Luna novum decies implerat cornibus orbem: 173

Quæ fuerat virgo credita, mater erat.

Læsa furit Juno, formam mutatque puellæ.

Quid facis? invito pectore passa Jovem est.

Utque feræ vidit turpes in pellice vultus;

Hujus in amplexus Juppiter, inquit, eat. 180

Ursa per incultos errabat squalida montes,

Quæ fuerat summo nuper amanda Jovi.

Jam tria lustra puer furto conceptus agebat;

Cum mater nato est obvia facta suo.

Illa quidem, tamquam cognosceret, adstitit amens, 185

Et gemit: gemitus verba parentis erant.

Hanc puer ignarus jaculo fixisset acuto,

Ni foret in superas raptus uterque domos.

Signa propinqua micant. prior est, quam dicimus Arcton :

Arctophylax formam terga sequentis habet. 190

Sævit adhuc, canamque adiit Saturnia Tethyn,

Mænaliæ tactis ne lavet Arcton aquis.

**I**Dibus agrestis fumant altaria Fauni,

Hic ubi discretas insula rumpit aquas.

Hæc fuit illa dies, in qua Vejentibus arvis 195

Ter centum Fabii, ter cecidere duo.

Una

Una domus vires & onus susceperat Urbis:

Sumunt gentiles arma professa manus.

Egreditur castris miles generosus ab isdem;

E quis dux fieri quilibet aptus erat. 200

Carmentis portæ dextro via proxima Jano est.

Ire per hanc noli, quisquis es; omen habet.

(Illâ fama refert Fabios exisse trecentos.

Porta vacat culpâ, sed tamen omen habet.)

Ut celeri passu Cremeram tetigere rapacem; 205

(Turbidus hibernis ille fluebat aquis)

Castra loco ponunt: destitctis ensibus ipsi

Tyrrhenum valido Marte per agmen eunt.

Non aliter, quam cum Libyca de rupe leones

Invadunt sparsos lata per arva greges. 210

Diffugiunt hostes, inhonestaque vulnera tergo

Accipiunt: Thusco sanguine terra rubet.

Sic iterum, sic sæpe cadunt. ubi vincere aperte

Non datur, insidias armaque cæca parant.

Campus erat: campi clauderant ultima colles, 215

Silvaeque montanas occulere apta feras.

In medio paucos, armentaue rara relinquunt:

Cetera virgultis abdita turba latet.

Ecce, velut torrens undis pluvialibus auctus,

Aut nive, quæ Zephyro victa repente fluit, 220

Per sata perque vias fertur; nec, ut ante solebat,

Riparum clausas margine finit aquas:

Sic Fabii latis vallem discursibus implent;

*Ovidius* T. III.

D

Quosque vident spernunt. nec metus alter inest.  
 Quo ruitis, generosa domus? male creditur hosti. 225  
 Simplex nobilitas, perfida tela cave.  
 Fraude perit virtus. in apertos undique campos  
 Prosilunt hostes, & latus omne tenent.  
 Quid faciant pauci contra tot millia fortes?  
 Quidve, quod in misero tempore restet, habent? 230  
 Sicut aper silvis longe Laurentibus actus  
 Fulmineo celeres dissipat ore canes;  
 Mox tamen ipse perit: sic non moriuntur inulti;  
 Vulneraque alternâ dantque feruntque manu.  
 Una dies Fabios ad bellum miserat omnes: 235  
 Ad bellum missos perdidit una dies.  
 Ut tamen Herculeæ superessent semina gentis,  
 Credibile est ipsos consuluisse Deos.  
 Nam puer impubes, & adhuc non utilis armis,  
 Unus de Fabia gente relictus erat. 240  
 Scilicet ut posses olim tu, Maxime, nasci;  
 Cui res cunctando restituenda foret.

**C**ontinuata loco tria sidera, Corvus, & Anguis,  
 Et medius Crater inter utrumque jacet.  
 Idibus illa latent; oriuntur nocte sequenti: 245  
 Quæ sibi cur tria sint consociata, canam.  
 Forte Jovi festum Phœbus sollemne parabat:  
 (Non faciet longas fabula nostra moras.)  
 I mea, dixit, avis, ne quid pia sacra moretur:

Et tenuem vivis fontibus adfer aquam.

250

Corvus inauratum pedibus cratera recurvis

Tollit, & aerium pervolat altus iter.

Stabat adhuc duris ficus densissima pomis.

Tentat eam rostro: non erat apta legi.

Immemor imperii sedisse sub arbore fertur, 255

Dum fierent tardâ dulcia poma morâ.

Inde satur nigris longum rapit unguibus hydrum;

Ad dominumque redit; fictaque verba refert:

Hic mihi caussa moræ, vivarum obsessor aquarum:

Hic tenuit fontes officiumque meum. 260

Addis, ait, culpæ mendacia, Phœbus? & audes

Fatidicum verbis fallere velle Deum?

At tibi, dum lactens hærebit in arbore ficus,

De nullo gelidæ fonte bibantur aquæ.

Dixit: & antiqui monumenta perennia facti, 265

Anguis, Avis, Crater, sidera juncta micant.

**T**ertia post Idus nudos Aurora Lupercos  
Adspicit: & Fauni sacra bicornis eunt.

Dicite, Pierides, sacrorum quæ sit origo:

Attigerint Latias unde petita domos. 270

Pana Deum pecoris veteres coluisse feruntur

Arcades. Arcadiis plurimus ille jugis.

Testis erit Pholoe, testes Stymphalides undæ;

Quique citis Ladon in mare currit aquis;

Cinctaque pinetis nemoris juga Nonacriini; 275

Altaque Cyllene, Parrhasiæque nives.

Pan erat armenti custos, Pan numen equarum:

Munus ob incolumes ille ferebat oves.

Transtulit Evander silvestra numina secum.

Hic, ubi nunc Urbs est, tum locus Urbis erat. 280

Inde Deum colimus, deestaque sacra Pelasgis.

Flamen ad hæc prisco more Dialis erat.

Cur igitur currant; & cur (sic currere mos est)

Nuda ferant positâ corpora veste, rogas?

Ipse Deus velox discurrere gaudet in altis 285

Montibus; & subitas concitat ille feras.

Ipse Deus nudus nudos jubet ire ministros:

Nec satis ad cursum commoda vestis erat.

Ante Jovem genitum terras habuisse feruntur

Arcades: & Lunâ gens prior illa fuit. 290

Vita feræ similis, nullos agitata per usus:

Artis adhuc expers & rude vulgus erant.

Pro domibus frondes norant, pro frugibus herbas:

Nectar erat palmis hausta duabus aqua.

Nullus anhelabat sub adunco vomere taurus: 295

Nulla sub imperio terra colentis erat:

Nullus adhuc erat usus equi. se quisque ferebat.

Ibat ovis lanâ corpus amicta suâ.

Sub Jove durabant, & corpora nuda gerebant,

Docta graves imbres & tolerare Notos. 300

Nunc quoque detecti referunt monumenta vetusti

Moris, & antiquas testificantur opes.

Sed, cur præcipue fugiat velamina Faunus,  
Traditur antiqui fabula plena joci.  
Forte comes dominæ juvenis Tiryntius ibat: 305  
Vidit ab excelso Faunus utrumque jugo.  
Vidit, & incaluit, Montanaque numina, dixit,  
Nil mihi vobiscum est; hæc meus ardor erit.  
Ibat odoratis humeros perfusa capillis  
Mæonis, aurato conspicienda sinu. 310  
Aurea pellebant rapidos umbracula soles;  
Quæ tamen Herculeæ sustinere manus.  
Jamque nemus Bacchi, Tmoli vineta, tenebat:  
Hesperus & fusco roscidus ibat equo.  
Antra subit, tophis laqueataque pumice vivo. 315  
Garrulus in primo limine rivus erat.  
Dumque parant epulas potandaque vina ministri;  
Cultibus Alciden instruit illa suis.  
Dat tennes tunicas, Gætulo murice tinctas:  
Dat teretem zonam, qua modo cincta fuit. 320  
Ventre minor zona est: tunicarum vincla relaxat,  
Ut possit vastas exseruisse manus.  
Fregerat armillas non illa ad brachia factas:  
Stringebant magnos vincula parva pedes.  
Ipsa capit clavamque gravem, spoliūque leonis, 325  
Conditaque in pharetrâ tela minora suâ.  
Sic epulis functi, sic dant sua corpora somno;  
Et positis juxta secubuerunt toris.  
Causa; repertori vitis pia sacra parabant,

Quæ facerent pure, cum foret orta dies. 330  
Noctis erat medium: quid non amor improbus audet?

Roscida per tenebras Faunus ad antra venit.  
Utque videt somno comites vinoque solutos;  
Spem capit in dominis esse soporis idem.  
Intrat; & huc illuc temerarius errat adulter: 335

Et præfert cautas subsequiturque manus.  
Venerat ad strati captata cubilia lecti;  
Et prima felix sorte futurus erat.  
Ut tetigit fulvi setis hirsuta leonis

Vellera, pertimuit, sustinuitque manum; 340  
Attonitusque metu rediit: ut sæpe viator  
Turbatum viso retulit angue pedem.

Inde tori, qui junctus erat, velamina tangit  
Mollia, mendaci decipiturque notâ.  
Adscendit; spondaque sibi propiore recumbit: 345  
Et rigido cornu durius inguen erat.

Interea tunicas ora subducit ab ima:  
Horrebant densis aspera crura pilis.  
Cetera tentantem cubito Tirynthius heros  
Repulit. e summo decidit ille toro. 350

Fit sonus: inclamat comites, & lumina poscit  
Mæonis. illatis ignibus acta patent.  
Ille gemit lecto graviter dejectus ab alto:  
Membraque de durâ vix sua tollit humo.

Ridet & Alcides, & qui videre jacentem: 355  
Ridet amatorem Lyda puella suum.



Veste Deus lusus fallentes lumina vestes

Non amat; & nudos ad sua sacra vocat.

Adde peregrinæ caussam, mea Musa, Latinam;

Inque suo noster pulvere currat equus. 360

Cornipedi Fauno cæsa de more capellâ,

Venit ad exiguas turba vocata dapes.

Dumque sacerdotes verubus transsuta salignis

Extâ parant, medias Sole tenente vias;

Romulus, & frater, pastoralisque juvenus 365

Solibus & campo corpora nuda dabant:

Cæstibus & jaculis, & ~~missi~~ pondere saxi

Brachia per lusus experienda dabant.

Pastor ab excelso, Per devia rura juvencos,

Romule, prædones, eripe, dixit, agunt. 370

Longum erat armari. diversis exit uterque

Partibus. accursu præda recepta Remi.

Ut rediit, verubus stridentia detrahit extâ:

Atque ait, Hæc certe non nisi victor edet.

Dicta facit, Fabiique simul. venit irritus illuc 375

Romulus, & mensas ossaque nuda videt.

Risit; & indoluit Fabios potuisse Remumque

Vincere: Quinctilios non potuisse suos.

Fama manet facti. posito velamine currunt:

Et memorem famam, quod bene cessit, habet. 380

Forsitan & quæras, cur sit locus ille Lupercal;

Quæve diem tali nomine caussa notet.

Ilia Vestalis cœlestia semina partu

Ediderat, Patruo regna tenente suo.

Is jubet auferri pueros, & in amne necari. 385

Quid facis? ex istis Romulus alter erit.

Jussa recusantes peragunt lacrimosa ministri.

Flent tamen, & geminos in loca jussa ferunt.

Albula, quem Thybrin mersus Tiberinus in unda

Reddidit, hibernis forte tumebat aquis. 390

Hic, ubi nunc Fora sunt, lintres errare videres;

Quaque jacent valles, Maxime Circe, tuæ.

Huc ubi venerunt, nec jam procedere possunt

Longius; ex illis unus, an alter, ait:

At quam sunt similes! at quam formosus uterque! 395

Plus tamen ex illis iste vigoris habet.

Si genus arguitur vultu; (ni fallit imago)

Nescio quem vobis suspicor esse Deum.

At si quis vestræ Deus esset originis auctor,

In tam præcipiti tempore ferret opem. 400

Ferret opem certe, si non ope mater egeret:

Quæ facta est uno mater & orba die.

Nata simul, peritura simul, simul ite sub undas

Corpora. desierat; deposuitque sinu.

Vagierunt clamore pari: sentire putares. 405

Hi redeunt udis in sua tecta genis.

Sustinet impositos summa cavus alveus unda.

Heu quantum fati parva tabella vehit!

Alveus in limo silvis adpulsus opacis,

Paullatim fluvio deficiente, sedet. 410

Arbor erat: remanent vestigia: quæque vocatur

Rumina nunc ficus, Romula ficus erat.

Venit ad expositos (mirum) lupa fœta gemellos.

Quis credat pueris non nocuisse feram?

Non nocuisse parum est: prodest quoque: quos lupa  
nutrit, 415

Prodere cognatæ sustinuere manus.

Constitit, & caudâ teneris blanditur alumnis,

Et fingit linguâ corpora bina suâ.

Marte satos scires; timor abfuit. ubera ducunt;

Nec sibi promissi lactis aluntur ope. 420

Illa loco nomen fecit; locus ipse Lupercis.

Magna dati nutrix præmia lactis habet.

Quid vetat Arcadio dictos a monte Lupercos?

Faunus in Arcadia templa Lyceus habet.

Nupta, quid exspectas? non tu pollentibus herbis, 425

Nec prece, nec magico carmine mater eris.

Excipe fecundæ patienter verbera dextræ:

Jam socer optati nomen habebit avi.

Nam fuit illa dies, durâ cum sorte maritæ

Reddebant uteri pignora rara sui. 430

Quid mihi, clamabat, prodest rapuisse Sabinas,

Romulus? (hoc illo sceptrâ tenente fuit)

Si mea non vires, sed bellum injuria fecit;

Utilius fuerat non habuisse nurus.

Monte sub Esquilio, multis incæduus annis, 435

Junonis magnæ nomine lucus erat.

Huc ubi venerunt, pariter nuptæque virique  
Suppliciter posito procubuere genu.

Cum subito motæ tremuere cacumina silvæ,

Et Dea per lucos mira locuta suos.

440

Italidas matres; inquit, caper hirtus inito.

Obstupuit dubio territa turba sono.

Augur erat: nomen longis intercidit annis.

Nuper ab Hetrusca venerat exsul humo.

Ille caprum mactat. jussæ sua terga maritæ

445

Pellibus exsectis percutienda dabant.

Luna resumebat decimo nova cornua motu:

Virque pater subito, nuptaque mater erat.

Gratia Lucinæ: dedit hæc tibi nomina lucus;

Aut quia principium tu, Dea, lucis habes.

450

Parce, precor, gravidis, facilis Lucina, puellis;

Maturumque utero molliter effer onus.

**O**Rta dies fuerit; tu desine credere ventis.

Perdedit illius temporis aura fidem.

Flamina non constant: & sex reserata diebus

455

Carceris Æolii janua laxa patet.

**J**AM levis obliqua subsidit Aquarius urna.

Proximus ætherios excipe, Piscis, equos.

Te memorant fratremque tuum (nam juncta micatis

Signa) duos tergo sustinuisse Deos.

460

Terribilem quondam fugiens Typhona Dione,

Tunc cum pro cœlo Juppiter arma tulit,  
Venit ad Euphratem comitata Cupidine parvo;  
Inque Palæstinæ margine sedit aquæ.  
Populus, & cannæ riparum summa tenebant: 465  
Spemque dabant salices, hos quoque posse tegi.  
Dum latet, intonuit vento nemos. illa timore  
Pallet; & hostiles credit adesse manus.  
Utque sinu natum tenuit, Succurrite Nymphæ;  
Et Dis auxilium ferte duobus, ait. 470  
Nec mora; prosiluit. Pisces subiere gemelli.  
Pro quo nunc ~~dignum sidera munus habent.~~  
Inde nefas ducunt genus hoc imponere mensis,  
Nec violant timidi piscibus ora Syri.

**P**roxima lux vacua est: at tertia dicta Quirino. 475  
Qui tenet hoc nomen, Romulus ante fuit.  
Sive quod hasta Curis priscis est dicta Sabinis:  
(Bellicus a telo venit in astra Deus)  
Sive suum Regi nomen posuere Quirites:  
Seu quia Romanis junxerat ille Cures. 480  
Nam pater armipotens, postquam nova mœnia vidit,  
Multaque Romuleâ bella peracta manu,  
Juppiter, inquit, habet Romana potentia vires;  
Sanguinis officio non eget illa mei.  
Redde patri natum: quamvis intercidit alter, 485  
Pro se, proque Remo, qui mihi restat, erit.  
Unus erit, quem tu tolles in cærula cœli;

Tu mihi dixisti: sint rata dicta Jovis.

Juppiter adnuerat. nutu tremefactus uterque

Est polus; & cœli pondera sensit Atlas. 490

Est locus: antiqui Capream dixere paludem.

Forte tuis illic, Romule, jura dabas.

Sol fugit; & remonent subeuntia nubila cœlum:

Et gravis effusus decedit imber aquis.

Hinc tonat, hinc missis abrumpitur ignibus æther. 495

Fit fuga: Rex patriis astra petebat equis.

Luctus erat, falsæque Patres in crimine cædis;

Hæsissetque animis forsitan illa fides.

Sed Proculus longâ veniebat Julius Albâ:

Lunaque fulgebat; nec facis usus erat. 500

Cum subito motu nubes crepuere sinistrae.

Retulit ille gradus; horrueruntque comæ.

Pulcher, & humano major, trabeaque decorus

Romulus in media visus adesse via:

Et dixisse simul, Prohibe lugere Quirites: 505

Nec violent lacrimis numina nostra suis.

Tura ferant, placentque novum pia turba Quirinum;

Et patrias artes militiamque colant.

Jussit: & in tenues oculis evanuit auras.

Convocat hic populos: jussaue verba refert. 510

Templa Deo fiunt. collis quoque dictus ab illo:

Et referunt certi sacra paterna dies.

Lux quoque cur eadem Stultorum festa vocetur,

Accipe: parva quidem caussa, sed apta subest.

Non habuit tellus doctos antiqua colonos: 515

Lassabant agiles aspera bella viros.

Plus erat in gladio, quam curvo laudis aratro:

Neglectus domino pauca ferebat ager.

Farra tamen veteres jaciebant, farra metebant:

Primitias Cereri farra resecta dabant. 520

Usibus admoniti flammis torrenda dedere;

Multaque peccato damna tulere suo.

Nam modo verrebant nigras pro farre favillas;

Nunc ipsas igni corripuere casas.

Facta Dea est Fornax: læti Fornace coloni 525

Orant, ut fruges temperet illa suas.

Curio legitimis nunc Fornacalia verbis

Maximus indicit; nec stata sacra facit.

Inque Foro, multa circum pendente tabella,

Signatur certâ Curia quæque notâ. 530

Stultaque pars populi, quæ sit sua Curia, nescit:

Sed facit extremâ sacra relata die.

**E**ST honor & tumulis. animas placate paternas;

Parvaque in extinctas munera ferte pyras.

Parva petunt Manes. pietas pro divite grata est 535

Munere. non avidos Styx habet ima Deos.

Tegula projectis satis est velata coronis;

Et sparsæ fruges, parcaque mica salis;

Inque mero mollita Ceres, violæque solutæ.

Hæc habeat mediâ testa relicta viâ, 540

Nec majora veto: sed & his placabilis umbra est.

Adde preces positis & sua verba focis.

Hunc morem Æneas, pietatis idoneus auctor,

Attulit in terras, juste Latine, tuas.

Ille patris Genio sollemnia dona ferebat; 545

Hinc populi ritus edidicere pios.

At quondam, dum longa gerunt pugnacibus armis

Bella, Parentales deseruere dies.

Non impune fuit. nam dicitur omine ab isto

Roma suburbanis incaluisse rogis. 550

Vix equidem credo: bustis exisse feruntur,

Et tacitæ questi tempore noctis avi.

Perque vias Urbis, Latiosque ululasse per agros

Deformes animas, vulgus inane, ferunt.

Post ea præteriti tumulis redduntur honores; 555

Prodigiisque venit funeribusque modus.

Dum tamen hæc fiunt, viduæ cessate puellæ:

Exspectet puros pinea tæda dies.

Nec tibi, quæ cupidæ matura videbere matri,

Comat virgineas hasta recurva comas. 560

Conde tuas, Hymenæe, faces; & ab ignibus atris

Aufer. habent alias mœsta sepulcra faces.

Dī quoque templorum foribus celentur opertis:

Ture vacent aræ: stentque sine igne foci.

Nunc animæ tenues, & corpora functa sepulcris 565

Errant: nunc posito pascitur umbra cibo.

Nec tamen hæc ultra, quam tot de mense supersint



Luciferi, quot habent carmina nostra pedes.  
Hanc, quia justa ferunt, dixere Feralia lucem.  
Ultima placandis Manibus illa dies. 570  
Ecce anus in mediis residens annosa puellis  
Sacra facit Tacitæ: vix tamen ipsa tacet.  
Et digitis tria tura tribus sub limine ponit,  
Quâ brevis occultum mus sibi fecit iter.  
Tum cantata ligat cum fusco licia rhombo; 575  
Et septem nigras versat in ore fabas.  
Quodque pice adstrinxit, quod acu trajecit athena  
Obsutum mænæ torret in igne caput:  
Vina quoque instillat. vini quodcumque relictum est,  
Aut ipsa, aut comites, plus tamen ipsa, bibit. 580  
Hostiles linguas inimicaque vinimus ora,  
Dicit discedens: ebriaque exit anus.  
Forsitan a nobis, quæ sit Dea Muta, requiras.  
Disce, per antiquos quæ mihi nota senes.  
Juppiter indomito Juturnæ captus amore 585  
Multa tulit, tanto non patienda Deo.  
Illa modo in silvis inter coryleta latebat:  
Nunc in cognatas desiliebat aquas.  
Convocat hic Nymphas, Latium, quodcumque tenebas:  
Et jacet in medio talia verba choro: 590  
Invidet ipsa sibi, vitatque, quod expedit illi,  
Vestra soror summo jungere membra Deo.  
Consulte ambobus: nam quæ mea magna voluptas,  
Utilitas vestræ magna sororis erit.

Vos illi in prima fugienti obsistite ripa, 595  
 Ne sua flumineâ corpora mergat aquâ.  
 Dixerat: adnuerunt omnes Tiberinides udæ,  
 Quæque colunt thalamos, Ilia diva, tuos.  
 Forte fuit Nais, Lara nomine: prima sed illi  
 Dicta bis antiquum syllaba nomen erat, 600  
 Ex vitio positum. sæpe illi dixerat Almo,  
 Nata, tene linguam; nec tamen illa tenet.  
 Quæ, simul ac tetigit Juturnæ stagna sororis,  
 Effuge, ait, ripas: dicta refertque Jovis.  
 Illa etiam Junonem adiit: miserataque nuptam, 605  
 Naida Juturnam vir tuus, inquit, amat.  
 Juppiter intumuit; quâque est non usa modeste,  
 Eripuit linguam: Mercuriunque vocat;  
 Duc ait, ad Manes: locus ille silentibus aptus.  
 Nympha, sed infernæ Nympha paludis, erit. 610  
 Jussa Jovis fiunt. accepit lucus cuntes.  
 Dicitur illa duci tum placuisse Deo.  
 Vim parat hic: vultu pro verbis illa precatur;  
 Et frustra muto nititur ore loqui.  
 Fitque gravis, geminosque parit, qui compita servant, 615  
 Et vigilant nostra semper in urbe, Lares.

**P**roxima cognati dixere Caristia cari,  
 Et venit ad socias turba propinqua dapes.  
 Scilicet a tumulis, &, qui periire, propinquis,  
 Protinus ad vivos ora referre juvat: 620

Postque

Postque tot amissos, quidquid de sanguine restat,  
Adspicere; & generis dinumerare gradus.  
Innocui veniant: procul hinc, procul impius esto  
Frater, & in partus mater acerba suos:  
Cui pater est vivax, qui matris digerit annos, 615  
Quæ premit invisam socrus iniqua nurum.  
Tantalidæ fratres absint, & Iasonis uxor,  
Et quæ ruricolis semina tosta dedit:  
Et Soror, & Progne, Tereusque duabus iniquus:  
Et quicumque suas per scelus auget opes. 630  
Dīs generis date tura bonis. Concordia fertur  
Illo præcipue mitis adesse die.  
Et libate dapes; ut grati pignus honoris  
Nutriat incinctos missa patella Lares.  
Jamque ubi suadebit placidos nox ultima somnos, 635  
Parca precaturæ sumite vina manus.  
Et, Bene nos, Patriæ, bene te, Pater, optime Cæsar,  
Dicite suffuso, per sacra verba, mero.

**N**OX ubi transierit, solito celebretur honore,  
Separat indicio qui Deus arva suo. 640  
Termine, sive lapis, sive es defossus in agro  
Stipes ab antiquis, sic quoque numen habes.  
Te duo diversa domini pro parte coronant;  
Binaque sarta tibi, binaque liba ferunt.  
Ara fit: huc ignem curto fert rustica testu 645  
Sumtum de tepidis ipsa colona focis:  
Ovidius T. III. E

Ligna senex minuit ; concisaque construit alte ;  
Et solida ramos figere pugnat humo.  
Dum sicco primas irritat cortice flammæ,  
Stat puer, & manibus lata canistra tenet. 650  
Inde, ubi ter fruges medios immisit in ignes,  
Porrigit incisos filia parva favos.  
Vina tenent alii: libantur singula flammis.  
Spectant, & linguis candida turba favent.  
Spargitur & cæsa communis Terminus agna: 655  
Nec queritur, lactens cum sibi porca datur.  
Conveniunt, celebrantque dapes vicinia simplex;  
Et cantant laudes, Termine sancte, tuas.  
Tu populos, urbesque, & regna ingentia finis:  
Omnis erit sine te litigiosus ager. 660  
Nulla tibi ambitio est: nullo corrumpere auro.  
Legitimâ servas credita rura fide.  
Si tu signasses olim Thyreatidæ terram,  
Corpora non leto missa trecenta forént:  
Nec foret Othryades congestis tectus in armis. 665  
O quantum patriæ sanguinis ille dedit!  
Quid nova cum fierent Capitolia? nempe Deorum  
Cuncta Jovi cessit turba, locumque dedit.  
Terminus (ut veteres memorant) conventus in æde  
Restitit: & magno cum Jove templa tenet. 670  
Nunc quoque, se supra ne quid nisi sidera cernat,  
Exiguum templi tecta foramen habent.  
Termine, post illud levitas tibi libera non est.

Qua positus fueris in statione, mane.  
Nec tu vicino quidquam concede roganti; 675  
Ne videre hominem præposuisse Jovi.  
Et seu vomeribus, seu tu pulsabere rastris,  
Clamato, Meus est hic ager, ille tuus.  
Est via, quæ populum Laurentes ducit in agros,  
Quondam Dardanio regna petita duci. 680  
Illac lanigeri pecoris tibi, Termine, fibris  
Sacra videt fieri sextus ab Urbe lapis.  
Gentibus est aliis tellus data limite certo;  
Romanæ spatium est Urbis & orbis idem.

**N**unc dicenda mihi Regis fuga. traxit ab illa 685  
Sextus ab extremo nomina mense dies.  
Ultima Tarquinius Romanæ gentis habebat  
Regna: vir injustus, fortis ad arma tamen.  
Ceperat hic alias, alias everterat urbes;  
Et Gabios turpi fecerat arte suos. 690  
Namque trium minimus, proles manifesta Superbi,  
In medios hostes nocte silente venit.  
Nudarant gladios: Occidite, dixit, inermem.  
Hoc cupiant fratres, Tarquiniusque pater,  
Qui mea crudeli laceravit verberare terga. 695  
(Dicere ut hoc posset, verbera passus erat.)  
Luna fuit. spectant juvenem, gladiosque recondunt;  
Tergaque, deductâ veste, notata vident.  
Flent quoque, &, ut secum tueatur bella, precantur.

- Callidus ignaris adnuit ille viris. 700  
Jamque potens, misso genitorem adpellat amico,  
Prodendi Gabios quod sibi monstret iter,  
Hortus odoratis suberat cultissimus herbis,  
Sectus humum rivo lene sonantis aquæ,  
Illic Tarquinius mandata latentia nati 705  
Accipit, & virgâ lilia summa metit.  
Nuntius ut rediit, decussaue lilia dixit;  
Filius, Agnosco jussa parentis, ait.  
Nec mora: Principibus cæsis ex urbe Gabina,  
Traduntur ducibus mœnia nuda suis. 710  
Ecce (nefas visu) mediis altaribus anguis  
Exit, & extinctis ignibus exta rapit.  
Consulitur Phœbus. sors est ita reddita: Matri,  
Qui dederit princeps oscula, victor erit.  
Oscula quisque suæ matri properata tulerunt, 715  
Non intellecto, credula turba Deo.  
Brutus erat stulti sapiens imitator, ut esset  
Tutus ab insidiis, dire Superbe, tuis.  
Ille tacens, pronus matri dedi oscula Terræ,  
Creditus offenso procubuisse pede. 720  
Cingitur interea Romanis Ardea signis,  
Et patitur lentas obsidione moras.  
Dum vacat, & metuunt hostes committere pugnam;  
Luditur in castris: otia miles agit.  
Tarquinius juvenis socios dapibusque meroque 725  
Accipit, atque illis Rege creatus ait:

Dum nos difficilis pigro tenet Ardea bello,  
Nec sinit ad patrios arma referre Deos;  
Ecquid in officio torus est socialis? & ecquid  
Conjugibus nostris mutua cura sumus? 730  
Quisque suam laudant. studiis certamina crescunt;  
Et fervent multo linguaque corque mero.  
Surgit, cui clarum dederat Collatia nomen;  
Non opus est verbis, credite rebus, ait.  
Nox superest: tollamur equis, Urbemque petamus. 735  
Dicta placent: frenis impediuntur equi.  
Pertulerant dominos. regalia protinus illi  
Tecta petunt: custos in fore nullus erat.  
Ecce nurum Regis fuis per colla coronis  
Inveniunt posito pervigilare mero. 740  
Inde cito passu petitur Lucretia. nebat.  
Ante torum calathi, lanaque mollis, erant.  
Lumen ad exiguum famulæ data pensa trahebant:  
Inter quas tenui sic ait ipsa sono:  
Mittenda est domino (nunc, nunc properate, puellæ) 745  
Quamprimum nostrâ facta lacerna manu.  
Quid tamen audistis? nam plura audire soletis.  
Quantum de bello dicitur esse super?  
Postmodo victa cades: melioribus, Ardea, restas,  
Improba; quæ nostros cogis abesse viros. 750  
Sint tantum reduces. sed enim temerarius ille  
Est meus; & stricto quolibet ense ruit.  
Mens abit, & morior, quoties pugnantis imago

Me subit: & gelidum pectora frigus habet.  
Desinit in lacrimas: intentaque fila remittit; 755  
In gremio vultum deposuitque suum.  
Hoc ipsum decuit: lacrimæ cecidere pudicæ;  
Et facies animo dignaque parque fuit.  
Pone metum, venio, conjux ait. illa revixit;  
Deque viri collo dulce pependit onus. 760  
Interea juvenis furiatos regius ignes  
Concipit, & cæco raptus amore furit.  
Forma placet, niveusque color, flavique capilli;  
Quique aderat nulla factus ab arte decor.  
Verba placent, & vox; & quod corrumpere non est: 765  
Quoque minor spes est, hoc magis ille cupit.  
Jam dederat cantum lucis prænuntius ales;  
Cum referunt juvenes in sua castra pedem.  
Carpitur attonitos absentis imagine sensus  
Ille: recordanti plura magisque placent. 770  
Sic sedit: sic culta fuit: sic stamina nevit:  
Neglectæ collo sic jacuere comæ:  
Hos habuit vultus: hæc illi verba fuere:  
Hic decor, hæc facies, hic color oris erat.  
Ut solet a magno fluctus languescere flatu, 775  
Sed tamen a vento, qui fuit, unda tumet;  
Sic, quamvis aberat placitæ præsentia formæ,  
Quem dederat præsens forma, manebat amor.  
Ardet; & injusti stimulis agitatus amoris  
Comparat indigno vimque dolumque toro. 780



Exitus in dubio est: audebimus ultima, dixit.

Viderit, audentes Forsne Deusne juvet.

Cepimus audendo Gabios quoque. talia fatus

Ense latus cingit; tergaque pressit equi.

Accipit æratâ juvenem Collatia portâ, 785

Condere jam vultus Sole parante suos.

Hostis, ut hospes, init penetralia Collatina:

Comiter excipitur: sanguine junctus erat.

Quantum animis erroris inest! parat inscia rerum

Infelix epulas hostibus illa suis. 790

Functus erat dapibus: poscunt sua tempora somni.

Nox erat; & totâ lumina nulla domo.

Surgit, & auratum vagina liberat ensem;

Et venit in thalamos, nupta pudica, tuos.

Utque torum pressit; Ferrum, Lucretia, mecum est, 795

Natus, ait, Regis, Tarquiniusque loquor.

Illa nihil: neque enim vocem viresque loquendi,

Aut aliquid toto pectore mentis habet.

Sed tremit, ut quondam stabulis deprensa relictis

Parva sub infesto cum jacet agna lupo. 800

Quid faciat? pugnet? vincetur femina pugnâ.

Clamet? at in dextra, qui necet, ensis adest.

Effugiat? positis urguetur pectora palmis;

Nunc primum externâ pectora tacta manu.

Instat amans hostis precibus, pretioque, minisque: 805

Nec prece, nec pretio, nec movet ille minis.

Nil agis; eripiam, dixit, pro crimine vitam:

Falsus adulterii testis adulter ero.

Interimam famulum; cum quo deprensa fereris.

Succubuit famæ victa puella metu. 810

Quid, victor, gaudes? hæc te victoria perdet.

Heu quanto regnis nox stetit una tuis!

Jamque erat orta dies: passis sedet illa capillis;

Ut solet ad nati mater itura rogam.

Grandævumque patrem fido cum conjuge castris 815

Evocat: & positâ venit uterque morâ.

Utque vident habitum; quæ luctûs caussa requirunt:

Cui paret exsequias, quove sit ista malo.

Illâ diu reticet, pudibundaque celat amictu

Ora. fluunt lacrimæ more perennis aquæ. 820

Hinc pater, hinc conjux lacrimas solantur, & orant

Indicet: & cæco flentque paventque metu.

Ter conata loqui, ter destitit: ausaque quarto,

Non oculos adeo sustulit illa suos.

Hoc quoque Tarquinio debemus? eloquar, inquit, 825

Eloquar infelix dedecus ipsa meum.

Quæque potest narrat. restabant ultima; flevit:

Et matronales erubere genæ.

Dant veniam factis genitor conjuxque coactis.

Quam, dixit, veniam vos datis, ipsa nego. 830

Nec mora; celato figit sua pectora ferro:

Et cadit in patrios sanguinolenta pedes.

Tunc quoque jam moriens, ne non procumbat honeste,

Respicit. hæc etiam cura cadentis erat.

Ecce super corpus communia damna gementes, 835

Obliti decoris, virque paterque jacent.

Brutus adest; tandemque animo sua nomina fallit:

Fixaque semanimi corpore tela rapit.

Stillantemque tenens generoso sanguine cultrum,

Edidit impavidos ore minante sonos: 840

Per tibi ego hunc juro fortem castumque cruorem,

Perque tuos Manes, qui mihi numen erunt:

Tarquinius pœnas profuga cum stirpe daturum.

Jam satis est virtus dissimulata diu.

Illa jacens ad verba oculos sine lumine movit; 845

Visaque concussâ dicta probare comâ.

Fertur in exsequias animi matrona virilis:

Et secum lacrimas invidiamque trahit.

Vulnus inane patet. Brutus clamore Quirites

Concitât, & Regis facta nefanda refert. 850

Tarquinius cum prole fugit. capit annua Consul

Jura. dies regnis illa suprema fuit.

**F**allimur? an veris prænuntia venit hirundo;

Et metuit, ne quâ versa recurrat hiems?

Sæpe tamen, Progne, nimium properasse quereris; 855

Virque tuo Tereus frigore lætus erit.

**J**amque duæ restant noctes de mense secundo,

Marsque suos junctis curribus urguet equos.

Ex vero positum permansit Equiria nomen:

Quæ Deus in campo prospicit ipse suo. 360

Jare venis, Gradive; locum tua tempora poscunt :

Signatusque tuo nomine mensis adest.

Venimus in portum, libro cum mense peracto.

Naviget hinc aliâ jam mihi linter aquâ.





P. OVIDII NASONIS  
**F A S T O R U M**  
*L I B E R III.*

**B**ellice, depositis clypeo paullisper & hasta,  
 Mars, ades; & nitidas casside solve comas.  
 Forsitan ipse roges, quid sit cum Marte poetæ.  
 A te, qui canitur, nomina mensis habet.  
 Ipse vides manibus peragi fera bella Minervæ. 5  
 Num minus ingenuis artibus illa vacat?  
 Palladis exemplo ponendæ tempora sume  
 Cuspidis. invenies & quod inermis agas.  
 Tum quoque inermis eras, cum te Romana sacerdos  
 Cepit; ut huic Urbi semina digna dares. 10  
 Ilia Vestalis (quid enim vetat inde moveri?)  
 Sacra lavaturas mane petebat aquas.  
 Ventum erat ad molli declivem tramine ripam:  
 Ponitur e summâ fictilis urna comâ.  
 Fessa resedit humi; ventosque accepit aperto 15

Pectore; turbatas restituitque comas.  
Dum sedet; umbrosæ salices, volucresque canoræ  
Fecerunt somnos, & leve murmur aquæ.  
Blânda quies victis furtim subrepat ocellis:  
Et cadit a mento languida facta manus. 10  
Mars videt hanc, visamque cupit, potiturque cupitam:  
Et sua divinâ furta fefellit ope.  
Somnus abit: jacet illa gravis. jam scilicet intra  
Viscera, Romanæ conditor Urbis, eras.  
Languida consurgit; nec scit cur languida surgat: 25  
Et peragit tales arbore nixa sonos:  
Utile sit faustumque, precor, quod imagine somni  
Vidimus. an somno clarius illud erat?  
Ignibus Iliacis aderam: cum lapsa capillis  
Decidit ante sacros lanea vitta focos. 30  
Inde duæ pariter (visu mirabile) palmæ  
Surgunt. ex illis altera major erat:  
Et gravibus ramis totum protexerat orbem;  
Contigeratque novâ sidera summa comâ.  
Ecce meus ferrum patruus molitur in illas. 35  
Terreor admonitu; corque timore micat.  
Marta, Picus, avis gemino pro stipite pugnant,  
Et Lupa. tuta per hos utraque palma fuit.  
Dixerat: & plenam non firmis viribus urnam  
Sustulit. implerat, dum sua visa refert. 40  
Interea crescente Remo, crescente Quirino,  
Cœlesti tumidus pondere venter erat.

Quo minus emeritis exiret cursibus annus,  
Restabant nitido jam duo signa Deo.  
Sylvia fit mater: Vestæ simulacra feruntur 45  
Virgineas oculis opposuisse manus.  
Ara Deæ certe tremuit, pariente ministra;  
Et subiit cineres territa flamma suos.  
Hæc ubi cognovit contemtor Amulius æqui;  
(Nam raptas fratri victor habebat opes) 50  
Amne jubet mergi geminos. scelus unda refugit.  
In sicca pueri destituuntur humo.  
Lacte quis infantes nescit crevisse ferino,  
Et Picum expositis sæpe tulisse cibos?  
Non ego te, tantæ nutrix Larentia gentis, 55  
Nec taceam vestras, Faustule pauper, opes.  
Vester honos veniet, cum Larentalia dicam:  
Acceptus geniis illa December habet.  
Marta ter senos proles adoleverat annos;  
Et suberat flavæ jam nova barba comæ. 60  
Omnibus agricolis armentorumque magistris  
Iliadæ fratres jura petita dabant.  
Sæpe domum veniunt prædonum sanguine læti,  
Et redigunt actos in sua rura boves.  
Ut genus audierunt, animos pater editus auget: 65  
Et pudet in paucis nomen habere casis:  
Romuleoque cadit trajectus Amulius ense:  
Regnaque longævo restituantur ayo.  
Mœnia conduntur: quæ, quamvis parva fuerunt,

- Non tamen expedit transiluisse Remo. 70  
Jam, modo quâ fuerant silvæ pecorumque recessus,  
Urbs erat. æternæ cum pater Urbis ait:  
Arbiter armorum, de cujus sanguine natus  
Credor; &, ut credar, pignora certa dabo:  
A te principium Romano ducimus anno: 75  
Primus de patrio nomine mensis eat.  
Vox rata fit; patrioque vocat de nomine mensem.  
Dicitur hæc pietas grata fuisse Deo.  
Et tamen ante omnes Martem coluere priores.  
Hoc dederat studiis bellica turba suis. 80  
Pallada Cecropidæ, Minoia Creta Dianam,  
Vulcanum tellus Hypsipylea colit,  
Junonem Sparte Pelopeiadesque Mycenæ,  
Pinigerum Fauni Mænalis ora caput.  
Mars Latio venerandus erat; quia præsidet armis. 85  
Arma feræ genti remque decusque dabant.  
Quod si forte vacas, peregriuos inspicere Fastos:  
Mensis in his etiam nomine Martis erit.  
Tertius Albanis, quintus fuit ille Faliscis,  
Sextus apud populos, Hernica terra, tuos. 90  
Inter Aricinos, Albanaque tempora constant  
Factaque Telegoni mœnia celsa manu.  
Quintum Laurentes, bis quintum Æquicolus asper,  
A tribus hunc primum turba Curensis habet.  
Et tibi cum proavis, miles Peligne, Sabinis 95  
Convenit: hic genti quartus utrique Deus.



Romulus, hos omnes ut vinceret ordine saltem,  
Sanguinis auctori tempora prima dedit.  
Nec totidem veteres, quot nunc, habuere Kalendas.  
Ille minor geminis mensibus annus erat. 100  
Nondum tradideras victas victoribus artes,  
Græcia, facundum, sed male forte genus.  
Qui bene pugnârat, Romanam noverat artem:  
Mittere qui poterat pila, disertus erat.  
Quis tunc aut Hyadas, aut Plejadas Atlanteas 105  
Senserat, aut geminos esse sub axe polos?  
Esse duas Arctos; quarum Cynosura petatur  
Sidoniis, Helicen Graja carina notet?  
Signaque quæ longo Frater percenseat anno,  
Ire per hæc uno mense sororis equos? 110  
Libera currebant, & inobservata per annum  
Sidera: constabat sed tamen esse Deos.  
Non illi cœlo labentia signa movebant,  
Sed sua: quæ magnum prodere crimen erat.  
Illaque de fœno. sed erat reverentia fœno, 115  
Quantam nunc Aquilas cernis habere tuas.  
Pertica suspensos portabat longa maniplos:  
Unde manipularis nomina miles habet.  
Ergo animi indociles & adhuc ratione carentes,  
Mensibus egerunt lustra minora decem. 120  
Annus erat, decimum cum Luna repleverat orbem.  
Hic numerus magno tunc in honore fuit.  
Seu quia tot digiti, per quos numerare soleimus;

Seu quia bis quino femina mense parit.

Seu quod adusque decem numero crescente venit; 125

Principium spatiis sumitur inde novis.

Inde pares centum denos secrevit in orbes

Romulus: Hastatos instituitque decem.

Et totidem Princeps, totidem Pilius habebat

Corpora: legitimo quique merebat equo. 130

Quin etiam partes totidem Titiensibus idem,

Quosque vocant Ramnes, Luceribusque dedit.

Adsueto igitur numeros servavit in anno.

Hoc luget spatio femina mœsta virum.

Nec dubites, primæ fuerint quin ante Kalendæ 135

Martis; ad hæc animum signa referre potes.

Laurea Flaminibus, quæ toto perstitit anno,

Tollitur: & frondes sunt in honore novæ.

Janua nunc Regis positâ viret arbore Phœbi:

Ante tuas fit idem, Curia Prisca, fores. 140

Vesta quoque ut folio niteat velata recenti,

Cedit ab Iliacis laurea cana focis.

Adde, quod arcana fieri novus ignis in æde

Dicitur; & vires flamma resecta capit.

Nec mihi parva fides, annos hinc fuisse priores; 145

Anna quod hoc cœpta est mense Perenna coli.

Hinc etiam veteres initi memorantur honores

Ad spatium belli, perfide Pœne, tui.

Denique quintus ab hoc fuerat Quintilis: & inde

Incipit, a numero nomina quisquis habet. 150

Primus,

Primus, oliviferis Romam deductus ab arvis,  
 Pompilius menses sensit abesse duos.  
 Sive hoc a Samio doctus, qui posse renasci  
 Nos putat; Egeria sive monente sua.  
 Sed tamen errabant etiamnum tempora; donec 155  
 Cæsaris in multis hæc quoque cura fuit.  
 Non hæc ille Deus, tantæque propaginis auctor,  
 Credidit officiis esse minora suis:  
 Promissumque sibi voluit prænoscere cælum:  
 Nec Deus ignotas hospes inire domos. 160  
 Ille moras Solis, quibus in sua signa rediret,  
 Traditur exactis disposuisse notis.  
 Is decies senos tercentum & quinque diebus  
 Junxit, & e pleno tempora quarta die.  
 Hic anni modus est. in lustrum accedere debet, 165  
 Quæ consummatur partibus, una dies.

**S**I licet occultos monitus audire Deorum  
 Vatibus; ut certe fama licere putat;  
 Cum sis officiis, Gradive, virilibus aptus;  
 Dic mihi, matronæ cur tua festa colant. 170  
 Sic ego: sic posita dixit mihi casside Mavors;  
 Sed tamen in dextra missilis hasta fuit:  
 Nunc primum studiis pacis, Deus utilis armis,  
 Advocor: & gressus in nova castra fero.  
 Nec piget incepti. juvat hac quoque parte morari: 175  
 Hoc solam ne se posse Minerva putet.  
 Ovidius T. III. F

Disce, Latinorum vates operose dierum,  
Quod petis: & memori pectore dicta nota.  
Parva fuit, si prima velis elementa referre,  
Roma: sed in parva spes tamen hujus erat. 180  
Mœnia jam stabant, populis angusta futuris:  
Credita sed turbæ tunc nimis ampla suæ.  
Quæ fuerit nostri si quæris regia nati;  
Adspice de canna straminibusque domum.  
In stipula placidi carpebat munera somni: 185  
Et tamen ex illo venit in astra toro.  
Jamque loco majus nomen Romanus habebat:  
Nec conjux illi, nec socer ullus erat.  
Spernebant generos inopes vicinia dives:  
Et male credebar sanguinis auctor ego. 190  
In stabulis habitasse, boves pavisse, nocebat;  
Jugeraque inculti pauca tenere soli.  
Cum pare quæque suo coeunt volucresque feræque:  
Atque aliquam, de qua procreet, anguis habet.  
Extremis dantur connubia gentibus: at, quæ 195  
Romano vellet nubere, nulla fuit.  
Indolui; patriamque dedi tibi, Romule, mentem.  
Tolle preces, dixi: quod petis, arma dabunt.  
Festa para Conso: Consus tibi cetera dicet;  
Ipso festa die dum sua sacra canes. 200  
Intumuere Cures, & quos dolor attigit idem.  
Tum primum generis intulit arma socer.  
Jamque fere raptæ matrum quoque nomen habebant;

Traſtaque erant longâ bella propinqua morâ.

Conveniunt nuptæ diſtam Junonis in ædem: 205

Quas inter mea ſic eſt nurus orſa loqui:

O pariter raptæ, (quoniam hoc commune tenemus)

Non ultra lente poſſumus eſſe piæ.

Stant acies: ſed utra Dî ſint pro parte rogandi,

Eligite; hinc conjux, hinc pater arma tenent. 210

Quærendum, viduæ fieri malimus an orbæ.

Conſilium vobis forte piumque dabo.

Conſilium dederat. parent, crinemque reſolvunt;

Mœſtaque funereâ corpora veſte tegunt.

Jam ſtabant acies ferro mortique paratæ; 215

Jam lituus pugnæ ſigna daturus erat:

Cum raptæ veniunt inter patreſque viroſque;

Inque ſinu natos, pignora cara, ferunt.

Ut medium campi paſſis tetigere capillîs, 220

In terram poſito procubuere genu. 210

Et, quaſi ſentirent, blando clamore nepotes

Tendebant ad avos brachia parva ſuos.

Qui poterat, clamabat avum, tum denique viſum;

Et qui vix poterat, poſſe coactus erat.

Tela viris animuſque cadunt: gladiiſque remotis 225

Dant ſoceri generis, accipiuntque, manuſ.

Laudaſque tenent nati; ſcutoque nepotem

Fert avuſ: hic ſcuti dulcior uſuſ erat.

Inde diem, quæ prima, meaſ celebrare Kalendaſ

Æbalideſ matreſ non leve munuſ habent. 230

An quia, committi strictis mucronibus ausæ,  
Finierant lacrimis Martia bella suis?  
Vel quod erat de me feliciter Ilia mater,  
Rite colunt matres sacra, diemque meum.  
Quid quod hiems, adoperta gelu, nunc denique cedit, 235  
Et pereunt victæ Sole tepente nives.  
Arboribus redeunt detonsæ frigore frondes;  
Uvidaque e tenero palmite gemma tumet.  
Quæque diu latuit, nunc se quâ tollat in auras,  
Fertilis occultas invenit herba vias. 240  
Nunc fecundus ager: pecoris nunc hora creandi:  
Nunc avis in ramo tecta laremque parat.  
Tempora jure colunt Latix fecunda parentes:  
Quarum militiam vota que partus habet.  
Adde, quod excubias Regi Romanus agebat; 245  
Quâ nunc Esquilias nomina collis habet.  
Illic a nuribus Junoni templa Latinis  
Hac sunt, si memini, publica facta die.  
Quid moror, & variis onero tua pectora caussis?  
Eminet ante oculos, quod petis, ecce tuos. 250  
Mater amat nuptas: Matris me turba frequentant.  
Hæc nos præcipue tam pia causa decet.  
Ferte Deæ flores: gaudet florentibus herbis  
Hæc Dea: de tenero cingite flore caput.  
Dicite, Tu lucem nobis, Lucina, dedisti. 255  
Dicite, Tu voto parturientis ades.  
Si qua tamen gravida est, resoluta crine precetur,

Ut solvat partus molliter illa suos.

**Q**uis mihi nunc dicat, quare cœlestia Martis  
Arma ferant Salii, Mamuriumque canant? 260  
Nympha, mone, nemori stagnoque operata Dianæ:  
Nympha, Numæ conjux, ad tua festa veni.  
Vallis Aricinæ silva præcinctus opaca  
Est lacus, antiqua religione sacer.  
Hic latet Hippolytus furiis direptus equorum: 265  
Unde nemus nullis illud initur equis:  
Licia dependent, longas velantia sepes,  
Et posita est meritæ multa tabella Deæ.  
Sæpe potens voti, frontem redimita coronis,  
Femina lucentes portat ab Urbe faces. 270  
Regna tenent fortesque manu, pedibusque fugaces:  
Et perit exemplo postmodo quisque suo.  
Defluit incerto lapidosus murmure rivus:  
Sæpe, sed exiguis haustibus, inde bibes.  
Egeria est, quæ præbet aquas, Dea grata Camenis. 275  
Illa Numæ conjux, consiliumque fuit.  
Principio nimium promptos ad bella Quirites  
Molliri placuit jure, Deûmque metu.  
Inde datæ leges; ne firmior omnia posset:  
Cœptaque sunt pure tradita sacra coli. 280  
Exsuitur feritas, armisque potentius æquum est:  
Et cum cive pudet conseruisse manus.  
Atque aliquis, modo trux, visâ jam vertitur arâ;

Vinaque dat tepidis salsaque farra focis.  
Ecce Deum genitor rutilas per nubila flammæ 285  
Spargit, & effusis æthera siccant aquis.  
Non alias missi cecidere frequentius ignes.  
Rex pavet; & vulgi pectora terror habet.  
Cui Dea, Ne nimium terrere: piabile fulmen  
Est, ait: & sævi flectitur ira Jovis. 290  
Sed poterunt ritum Picus Faunusque piandi  
Prodere, Romani numen uterque soli.  
Nec sine vi tradent. adhibeto vincula captis.  
Atque ita, qua possint, erudit, arte capi.  
Lucus Aventino suberat niger ilicis umbra, 295  
Quo posses viso dicere, Numen inest.  
In medio gramen, muscoque adoperta virenti  
Manabat saxo vena perennis aquæ.  
Inde fere soli Faunus Picusque bibebant.  
Huc venit, & Fonti rex Numa maculat ovem. 300  
Plenaque odorati Dis ponit pocula Bacchi;  
Cumque suis antro conditus ipse latet.  
Ad solitos veniunt silvestria numina fontes:  
Et relevant multo pectora sicca mero.  
Vina quies sequitur. gelido Numa prodit ab antro, 305  
Vinctaque sopitas addit in arta manus.  
Somnus ut abscessit, tentando vincula pugnant  
Rumpere: pugnantes fortius illa tenent.  
Tum Numa, Di nemorum, factis ignoscite nostris,  
Si scelus ingenio scitis abesse meo. 310



Quoque modo possit fulmen, monstrate, piari.

Sic Numa: sic quatiens cornua Faunus ait:

Magna petis; nec quæ monitu tibi discere nostro

Fas sit. habent fines numina nostra suos.

Dî sumus agrestes, & qui dominemur in altis 315

Montibus. arbitrium est in sua tela Jovi.

Hunc tu non poteris per te deducere cœlo:

At poteris nostra forsitan usus ope.

Dixerat hæc Faunus: par est sententia Pici.

Deme tamen nobis vincula, Picus ait. 320

Juppiter huc veniet, valida deductus ab arte.

Nubila promissi Styx mihi testis erit.

Emissi quid agant laqueis, quæ carmina dicant,

Quaque trahant superis sedibus arte Jovem,

Scire nefas homini. nobis concessa canantur; 325

Quæque pio disci vatis ab ore licet.

Eliciunt cœlo te, Juppiter. unde minores

Nunc quoque te celebrant, Eliciumque vocant.

Constat Aventinæ tremuisse cacumina silvæ:

Terraque subsedit pondere pressa Jovis. 330

Corda micant Regis; totoque e pectore sanguis

Fugit; & hirsutæ diriguere comæ.

Ut rediit animus, Da certa piamina, dixit,

Fulminis, aliorum Rexque Paterque Deûm.

Si tua contigimus manibus donaria puris: 335

Hoc quoque, quod petitur, si pia lingua rogat.

Adnuat oranti: sed verum ambage remotâ

Abdidit, & dubio terruit ore virum.

Cæde caput, dixit. cui Rex, Parebimus, inquit.

Cædenda est hortis eruta cepa meis. 340

Addit hic, Hominis: Summos, ait ille, capillos.

Postulat hic animam: cui Numa, Piscis, ait.

Risit: & His, inquit, facito mea tela procures,

O vir colloquio non abigende meo.

Sed tibi, protulerit cum totum crastinus orbem 345

Cynthus, imperii pignora certa dabo.

Dixit, & ingenti tonitru super æthera motum

Fertur, adorantem destituitque Numam.

Ille redit lætus, memoratque Quiritibus acta.

Tarda venit dictis difficilisque fides. 350

At certe credemur, ait, si verba sequatur

Exitus. en, audi crastina, quisquis ades.

Protulerit terris cum totum Cynthus orbem;

Juppiter imperii pignora certa dabit.

Discedunt dubii, promissaque tarda videntur; 355

Dependetque fides a veniente die.

Mollis erat tellus roratâ mane pruinâ;

Ante sui populus limina Regis adest.

Prodit, & in solio medius consedit acerno.

Innumeri circa stantque silentque viri. 360

Ortus erat summo tantummodo margine Phœbus:

Sollicitæ mentes speque metuque pavent.

Constitit, atque caput niveo velatus amictu,

Jam bene Dīs notas sustulit ille manus.

Atqua ita, Tempus adest promissi muneris, inquit. 365

Pollicitam diſtis, Juppiter, adde fidem.

Dum loquitur, totum jam Sol emerſerat orbem:

Et gravis ætherio venit ab axe fragor.

Ter tonuit ſine nube Deus, tria fulgura miſit.

Credite dicenti; mira, ſed acta, loquor. 370

A media cælum regione dehiscere cœpit:

Submiſere oculos cum duce turba ſuos.

Ecce levi ſcutum verſatum leniter aura

Decidit. a populo clamor ad aſtra venit.

Tollit humo mûnûs, cæſa prius ille juvenca, 375

Quæ dederat nulli colla premenda jugo.

Idque ancile vocat; quod ab omni parte reciſum eſt:

Quâque notes oculis, angulus omnis abeſt.

Tum, memor imperii ſortem conſiſtere in illo,

Conſilium multæ calliditatis init. 380

Plura jubet fieri ſimili cælata figurâ,

Error ut ante oculos inſidiantis eat.

Mamurius morum fabræne exactior artis,

Difficile eſt, illud, dicere, clauſit opus.

Cui Numa munificus, Faſti pete præmia, dixit: 385

Si mea nota fides; irrita nulla petes.

Jam dederat Saliis (a ſaltu nomina ducunt)

Armaque, & ad certos verba canenda modos.

Tum ſic Mamurius, Merces mihi gloria detur,

Nominaque extremo carmine noſtra ſonent. 390

Inde ſacerdotes operi promiſſa vetuſto

Præmia persolvunt, Mamuriumque vocant.  
 Nubere si qua voles, quamvis properabitis ambo,  
 Differ: habent parvæ commoda magna moræ.  
 Arma movent pugnam, pugna est aliena maritis. 395  
 Condita cum fuerint, aptius omen erit.  
 His etiam conjux apicati cincta Dialis  
 Lucibus impexas debet habere comas.

**T**ertia nox emersa suos ubi moverit ignes,  
 Conditus e geminis Piscibus alter erit. 400  
 Nam duo sunt: Austris hic est, Aquilonibus ille  
 Proximus. a vento nomen uterque tenet.

**C**UM croceis rorare genis Tithonia conjux  
 Cœperit, & quintæ tempora lucis aget;  
 Sive est Arctophylax, sive est piger ille Bootes; 405  
 Mergetur, visus effugietque tuos.  
 At non effugiet Vindemitor. hoc quoque caussam  
 Unde trahat sidus parva docere mora est.  
 Ampelon intonsum, Satyris Nymphaque creatum,  
 Fertur in Ismariis Bacchus amasse jugis. 410  
 (Tradidit huic vitem pendentem frondibus ulmi;  
 Quæ nunc de pueri nomine nomen habet.)  
 Dum legit in ramo pictas temerarius uvas,  
 Decidit: amissum Liber in astra vehit.

**S**extus ubi Oceano clivosum scandit Olympum 415

Phœbus, & alatis æthera carpit equis;  
 Quisquis ades, canæque colis penetralia Vestæ,  
 Cratera Iliacis turaquæ pone focis.  
 Cæsaris innumeris, quem maluit ille mereri,  
 Accessit titulis Pontificalis honos. 420  
 Ignibus æternis æterni numina præsent  
 Cæsaris. imperii pignora juncta vides.  
 De veteris Trojæ dignissima præda favillâ,  
 Qua gravis Æneas tutus ab hoste fuit:  
 Ortus ab Ænea tangit cognata sacerdos 425  
 Numina; cognatum, Vesta, tuere caput.  
 Quos sancta fovet ille manu, bene vivitis ignes.  
 Vivite inextincti; flammaque, Duxque, precor.

**U**NA nota est Marti: Nonis sacrata quod illis  
 Tempia putant lucos Vejovis ante duos. 430  
 Romulus ut saxo lucum circumdedit alto,  
 Cuilibet, Huc, inquit, confuge; tutus eris.  
 O quam de tenui Romanus origine crevit!  
 Turba vetus quam non invidiosa fuit!  
 Ne tamen ignaro novitas tibi nominis obstet, 435  
 Disce quis iste Deus, curve vocetur ita.  
 Juppiter est juvenis: juveniles adspice vultus.  
 Adspice deinde manum: fulmina nulla tenet.  
 Fulmina, post ausos cœlum adfectare Gigantas,  
 Sumta Jovi: primo tempore inermis erat. 440  
 Ignibus Ossa novis, & Pelion altior Ossa

Arsit, & in solida fixus Olympus humo.  
 Stat quoque Capra simul: Nymphæ pavisse feruntur  
 Cretides. infanti lac dedit illa Jovi.  
 Nunc vocor ad nomen. vegrandia farra colonæ, 445  
 Quæ male creverunt, vescaque parva vocant.  
 Vis ea si verbi est; cur non ego Vejovis ædem,  
 Ædem non magni suspicer esse Jovis?  
 Jamque, ubi cæruleum vallabunt sidera cœlum,  
 Suspice: Gorgonei colla videbis equi. 450  
 Creditur hic cæsæ grvida cervice Medusæ  
 Sanguine respersis prosiluisse jubis.  
 Huic supra nubes & subter sidera lapso  
 Cœlum pro terra, pro pede penna fuit.  
 Jamque indignanti nova frena receperat ore, 455  
 Cum levis Aonias ungula fodit aquas.  
 Nunc fruitur cœlo, quod pennis ante petebat:  
 Et nitidus stellis quinque decemque micat.

**P** Rotinus adspicies venienti nocte Coronam  
 Gnosida. Theseo crimine facta Dea est. 460  
 Jam bene perjuro mutarat conjuge Bacchum,  
 Quæ dedit ingrato fila legenda viro.  
 Sorte tori gaudens, Quem flebam rustica, dixit,  
 Utiliter nobis perfidus ille fuit.  
 Interea Liber, depexus crinibus, Indos 465  
 Vincit, & Eoo dives ab orbe redit.  
 Inter captivas facie præstante puellas

Grata nimis Baccho filia Regis erat.

Flebat amans conjux, spatiatæque litore curvo

Eddidit incultis talia verba comis: 470

En iterum similes, fluctus, audite querelas:

En iterum lacrimas accipe, arena, meas.

Dicebam, memini, perjure & perfide Theseu.

Ille abiit: eadem crimina Bacchus habet.

Nunc quoque nulla viro, clamabo, femina credat. 475

Nomine mutato caussa relata mea est.

O utinam mea sors, quâ primum cœperat, isset!

Jamque ego præsentî tempore nulla forem!

Quid me desertis perituram, Liber, arenis

Servabas? potui dedoluisse semel. 480

Bacche levis, leviorque tuis, quæ tempora cingunt,

Frondeb; in lacrimas cognite Bacche meas;

Ausus es ante oculos adducta pellice nostros

Tam bene compositum sollicitare torum?

Heu! ubi pacta fides? ubi, quæ jurare solebas? 485

Me miseram, quoties hæc ego verba loquor!

Thesea culpabas, fallacemque ipse vocabas:

Judicio peccas turpius ipse tuo.

Ne sciat hoc quisquam, tacitisque doloribus urar:

Ne toties falli digna fuisse puter. 490

Præcipue cupiam celari Thesea; ne te

Consortem culpæ gaudeat esse suæ.

At, puto, præposita est fuscæ mihi candida pellex,

Eveniat nostris hostibus ille color.

Quid tamen hoc refert, vitio si gravior ipso est? 495

Quid facis? amplexus inquinat illa tuos.

Bacche, fidem præsta; nec præfer amoribus ullam

Conjugis, adsuetae semper amare virum.

Ceperunt matrem formosi cornua tauri;

Me tua: at hic laudi est, ille pudendus amor. 500

Ne noceat quod amo: neque enim tibi, Bacche, nocebat,

Quod flammæ nobis fassus es ipse tuas.

Nec, quod nos uris, mirum facis. ortus in igne

Diceris, & patriâ raptus ab igne manu.

Illa ego sum, cui tu solitus promittere cælum. 505

Hei mihi, pro cælo qualia dona fero!

Dixerat: audibat jamdudum verba querentis

Liber, ut a tergo forte secutus erat.

Occupat amplexu, lacrimasque per oscula siccatur:

Et, Pariter cœli summa petamus, ait. 510

Tu mihi juncta toro, mihi juncta vocabula sume.

Jam tibi mutatae Libera nomen erit.

Sintque tuæ tecum faciam monumenta coronæ;

Vulcanus Veneri quam dedit, illa mihi.

Dicta facit: gemmasque novem transformat in ignes. 515

Aurea per stellas nunc micat illa novem.

**S**EX ubi sustulerit, totidem demerserit orbes,

Purpureum rapido qui vehit axe diem;

Altera gramineo spectabis Equiria campo,

Quem Thybris curvis in latus urguet aquis. 520



Qui tamen ejectâ si forte tenebitur undâ;  
Cœlius accipiat pulverulentus equos.

**I**Dibus est Annæ festum geniale Perennæ,  
Haud procul a ripis, advena Thybri, tuis.  
Plebs venit, ac virides passim disjecta per herbas 525  
Potat, & accumbit cum pare quisque sua.  
Sub Jove pars durat: pauci tentoria ponunt:  
Sunt, quibus e ramo frondea facta casa est.  
Pars ubi pro rigidis calamos statuere columnis,  
Desuper ~~extentas~~ imposuere togas. 530  
Sole tamen vinoque calent: annosque precantur,  
Quot sumant cyathos; ad numerumque bibunt.  
Invenies illic, qui Nestoris ebibat annos:  
Quæ sit per calices facta Sibylla suos.  
Illic & cantant, quidquid didicere theatri; 535  
Et jactant faciles ad sua verba manus:  
Et ducunt posito duras cratere choreas,  
Multaque diffusis saltat amica comis.  
Cum redeunt, titubant; & sunt spectacula vulgo:  
Et fortunatos obvia turba vocant. 540  
Occurri nuper, visa est mihi digna relatu  
Pompa: senem potum pota trahebat anus.  
Quæ tamen hæc Dea sit, (quoniam rumoribus errant)  
Fabula proposito nulla tacenda meo.  
Arserat Æneæ Dido miserabilis igne, 545  
Arserat exstructis in sua fata rogis.

Compositusque cinis, tumulique in marmore carmen

Hoc breve, quod moriens ipsa reliquit, erat:

Præbuit Æneas & caussam mortis & ensem:

Ipsa suâ Dido concidit usa manu. 550

Protinus invadunt Numidæ sine vindice regnum;

Et potitur captâ Maurus Iarba domo.

Seque memor spretum, Thalamis tamen, inquit, Elissæ

En ego, quem toties repulit illa, fruor.

Diffugiunt Tyrii, quo quemque agit error: ut olim 555

Amissa dubiæ rege vagantur apes.

Tertia nudandas acceperat area messes;

Inque cavos ierant tertia musta lacus;

Pellitur Anna domo: lacrimansque sororia linquit

Mœnia. germanæ justa dat ante suæ. 560

Mixta bibunt molles lacrimis unguenta favillæ;

Vertice libatas accipiuntque comas.

Terque, Vale, dixit: cineres ter ad ora relatos

Pressit, & est illis visa subesse soror.

Nacta ratem comitemque fugæ pede labitur æquo, 565

Mœnia respiciens, dulce sororis opus.

Fertilis est Melite sterili vicina Cosyræ

Insula, quam Libyci verberat unda freti.

Hanc petit hospitio Regis confisa vetusto.

Hospes opum dives Rex ibi Battus erat. 570

Qui postquam didicit casus utriusque sororis;

Hæc, inquit, tellus quantulacumque tua est.

Et tamen hospitii servasset ad ultima munus,

Sed

Sed timuit magnas Pygmalionis opes.

Signa recensuerat bis Sol sua: tertius ibat 575

Annus; & exsulis terra petenda nova est.

Frater adest, belloque petit. Rex arma perosus,

Nos sumus imbelles, tu fuge sospes, ait.

Jussa fugit; ventoque ratem committit & undis.

Asperior quovis æquore frater erat. 580

Est prope piscosos lapidosi Crathidis amnes

Purus ager: Cameren incola turba vocant.

Illuc cursus erat. nec longius abfuit inde,

Quam quantum novies mittere funda potest.

Vela cadunt primo, & dubia librantur ab aura. 585

Findite remigio, navita dixit, aquas.

Dumque parant torto subducere carbasa lino,

Percutitur rapido puppis adunca Noto:

Inque patens æquor, frustra pugnante magistro,

Fertur: & ex oculis visa refugit humus. 590

Adsiliunt fluctus, imoque a gurgite pontus

Vertitur, & canas alveus haurit aquas.

Vincitur ars vento: nec jam moderator habenis

Utitur, at votis: hîc quoque poscit opem.

Jaçtatur tumidas exsul Phœnissa per undas: 595

Humidaque oppositâ lumina veste tegit.

Tum primum Dido felix est dicta sorori,

Et quæcumque aliquam corpore pressit humum.

Figitur ad Laurens ingenti flamine litus

Puppis: &, expositis omnibus, hausta perit. 600

*Ovidius* T. III.

G

Jam pius Æneas regno nataque Latini  
Aucl̃us erat; populos miscueratque duos.  
Litore dotali, solo comitatus Achate,  
Secretum nudo dum pede carpit iter;  
Adspicit errantem, nec credere sustinet Annam 605  
Esse. quid in Latios illa veniret agros?  
Dum secum Æneas: Anna est, exclamat Achates.  
Ad nomen vultus sustulit illa suos.  
Quò fugiat? quid agat? quos terræ quærat hiatus?  
Ante oculos miseræ fata sororis erant. 610  
Sensit, & adloquitur trepidam Cythereius heros:  
Flet tamen admonitu mortis, Elissa, tuæ.  
Anna, per hanc juro, quam quondam audire solebas  
Tellurem fato prosperiore dari;  
Perque Deos comites, hac nuper sede locatos; 615  
Sæpe meas illos increpuisse moras.  
Nec timui de morte tamen: metus abfuit iste.  
Hei mihi! credibili fortior illa fuit.  
Ne refer. adspexi non illo pectore digna  
Vulnera, Tartareas ausus adire domos. 620  
At tu, seu ratio te nostris adpulit oris,  
Sive Deus; regni commoda carpe mei.  
Multa tibi memores, nil non debemus Elissæ.  
Nomine grata tuo, grata sororis, eris.  
Talia dicenti (neque enim spes altera restat) 625  
Credidit; errores exposuitque suos.  
Utque domum intravit Tyrios induta paratus,

Incipit Æneas: (cetera turba silet)

Hanc tibi cur tradam, pia caussa, Lavinia conjux,

Est mihi: consumsi naufragus hujus opes. 630

Orta Tyro, regnum Libyca possedit in ora:

Quam precor ut caræ more sororis ames.

Omnia promittit, falsumque Lavinia vulnus

Mente premit tacitâ, dissimulatque fremens.

Donaque cum videat præter sua lumina ferri 635

Multa palam; mitti clam quoque multa putat,

Non tamen exactum, quid agat. furialiter odit;

Et parat insidias, & cupit ulta mori.

Nox erat: ante torum visa est adstare sororis,

Squalenti Dido sanguinolenta comâ; 640

Et, Fuge, ne dubita, mœstum fuge, dicere, testum.

Sub verbum querulas impulit aura fores.

Exsilit; & velox humili super arva fenestrâ

Se jacit. audacem fecerat ipse timor.

Quâque metu rapitur, tunicâ velata recinctâ, 645

Currit, ut auditis territa dama lupis.

Corniger hanc cupidus rapuisse Numicius undis

Creditur, & stagnis occuluisse suis.

Sidonis interea magno clamore per agros

Quæritur. adparent signa notæque pedum. 650

Ventum erat ad ripas: inerant vestigia ripis.

Sustinuit tacitas conscius amnis aquas.

Ipsa loqui visa est, Placidi sum Nympha Numici:

Amne perenne latens Anna Perenna vocor.

Protinus erratis læti vescuntur in agris: 655

Et celebrant largo seque diemque inero.

Sunt quibus hæc Luna est, quia mensibus impleat annum:

Pars Themis, Inachiam pars putat esse bovem.

Invenies, qui te Nymphen Atlantida dicant;

Teque Jovi primos, Anna, dedisse cibos. 660

Hæc quoque, quam referam, nostras pervenit ad aures

Fama: nec a vera dissidet illa fide.

Plebs vetus, & nullis etiamnum tuta Tribunis,

Fugit, & in sacri vertice montis abit.

Jam quoque, quem secum tulerant, defecerat illos 665

Victus, & humanis usibus apta Ceres.

Orta suburbanis quædam fuit Anna Bovillis

Pauper, sed mundæ sedulitatis, anus.

Illa, levi mitrâ canos redimita capillos,

Fingebat tremulâ rustica liba manu. 670

Atque ita per populum fumantia mane solebat

Dividere. hæc populo copia grata fuit.

Pace domi facta signum posuere Perennæ,

Quod sibi defectis illa tulisset opem.

Nunc mihi, cur cantent, superest, obscæna puellæ, 675

Dicere: nam coeunt, certaque probra canunt.

Nuper erat Dea facta; venit Gradivus ad Annam,

Et cum sæductâ talia verba facit:

Mense meo coleris: junxi mea tempora tecum:

Pendet ab officio spes mihi magna tuo. 680

Armifer armiferæ correptus amore Minervæ

Uror: & hoc longo tempore vulnus alo.

Effice, Dî studio similes coeamus in unum.

Conveniunt partes hæ tibi, comis anus.

Dixerat. illa Deum promisso ludit inani; 685

Et stultam dubiâ spem trahit usque morâ.

Sæpius instanti, Mandata peregrinus, inquit:

Eviçtas precibus vix dedit illa manus.

Gaudet amans, thalamosque parat. deducitur illuc

Anna tegens vultus, ut nova nupta, suos. 690

Oscula sumturus subito Mars adspicit Annam;

Nunc pudor elusum, nunc subit ira, Deum.

Ridet amatorem caræ nova Diva Minervæ:

Nec res hac Veneri gratior ulla fuit.

Inde joci veteres obscænaque dicta canuntur: 695

Et juvat hanc magno verba dedisse Deo.

Præteriturus eram gladios in Principe fixos,

Cum sic a castis Vesta locuta focus:

Ne dubita meminisse: meus fuit ille Sacerdos.

Sacrilegæ telis me petiere manus. 700

Ipsa virum rapui, simulacraque nuda reliqui.

Quæ cecidit ferro, Cæsar's umbra fuit.

Ille quidem cælo positus Jovis atria servat;

Et tenet in Magno templa dicata Foro.

At quicumque nefas ausi, prohibente Deorum 705

Numine, polluerant Pontificale caput;

Morte jacent merita. testes estote Philippi,

Et quorum sparsis ossibus albet humus.

Hoc opus, hæc pietas, hæc prima elementa fuerunt  
Cæsaris; ulcisci justa per arma patrem. 710

**P**ostera cum teneras Aurora refecerit herbas,  
Scorprios a prima parte videndus erit.

**T**ertia post Idus lux est celeberrima Baccho.  
Bacche, fave vati; dum tua festa cano.  
Nec referam Semelen; ad quam nisi fulmina secum 715  
Iuppiter adferret, parvus inermis eras:  
Nec puer ut posses maturo tempore nasci,  
Expletum patrio corpore matris onus.  
Sithonas & Scythicos longum enumerare triumphos,  
Et domitas gentes, turifer Inde, tuas. 720  
Tu quoque Thebanæ mala præda tacebere matris;  
Inque tuum furiis, acle Lycurge, genu.  
Ecce libet subitos pisces Tyrrhenaque monstra  
Dicere. sed non est carminis hujus opus.  
Carminis hujus opus, caussas expromere; quare 725  
Vilis anus populos ad sua liba vocet.  
Ante tuos ortus aræ sine honore fuerunt,  
Liber, & in gelidis herba reperta focis.  
Te memorant Gange, totoque Oriente subacto  
Primitias magno seposuisse Jovi. 730  
Cinnama tu primus, captivaque tura dedisti,  
Deque triumphato viscera tosta bove.  
Nomine ab auctoris ducunt Libamina nomen,



Libaque: quod sacris pars datur inde focis.

Liba Deo fiunt: succis quia dulcibus ille 735

Gaudet, & a Baccho mella reperta ferunt.

Ibat arenoso Satyris comitatus ab Hebro:

(Non habet ingratos fabula nostra jocos)

Jamque erat ad Rhodopen Pangæaque florida ventum:

Æriferæ comitum concrepuere manus. 740

Ecce novæ coeunt volucres, tinnitibus actæ:

Quæque movent sonitus æra, sequuntur apes.

Colligit errantes, & in arbore claudit inani

Liber: & inventi præmia mellis habet.

Ut Satyri levisque senex tetigere saporem; 745

Quærebant flavos per nemus omne favos.

Audit in exesa stridorem examinis ulmo:

Adspicit & ceras, dissimulatque senex.

Utque piger pandi tergo residebat aselli,

Adplicat hunc ulmo corticibusque cavis. 750

Constitit ipse super ramoso stipite nixus:

Atque avidè trunco condita mella petit.

Millia crabronum coeunt; & vertice nudo

Spicula defigunt, oraque summa notant.

Ille cadit præceps, & calce feritur aselli: 755

Inclamatque suos, auxiliumque rogat.

Concurrunt Satyri, turgentiaque ora parentis

Rident: percusso claudicat ille genu.

Ridet & ipse Deus: limumque inducere monstrat.

Hic paret monitis, & linit ora luto. 760

- Melle pater fruitur: liboque infusa calenti  
Jure repertori candida mella damus.  
Femina cur presset, non est rationis opertæ.  
Femineos thyrsos concitat ille choros.  
Cur anus hoc faciat, quæris? vinosior ætas 765  
Hæc est, & gravidæ munera vitis amans.  
Cur hederâ cincta est? hederâ est gratissima Baccho.  
Hoc quoque cur ita sit, dicere nulla mora est.  
Nysiades Nymphæ, puerum quærente novercâ,  
Hanc frondem cunis adposuere novis. 770  
Restat, ut inveniam, quare toga libera detur  
Lucifero pueris, candide Bacche, tuo.  
Sive, quod ipse puer semper juvenisque videris;  
Et media est ætas inter utrumque tibi:  
Seu quia tu pater es, patres, sua pignora, natos 775  
Commendant curæ numinibusque tuis:  
Sive, quod es Liber, vestis quoque libera per te  
Sumitur, & vitæ liberioris iter.  
An quia, cum prisci colerent studiosius agros,  
Et patrio faceret rure Senator opus, 780  
Et caperet fasces a curvo Consul aratro,  
Nec crimen duras esset habere manus;  
Rusticus ad ludos populus veniebat in Urbem:  
Sed Dîs, non studiis ille dabatur honos.  
Luce sua ludos uvæ commentor habebat: 785  
Quos cum tædiferâ nunc habet ipse Deâ.  
Ergo, ut tironem celebrare frequentia possit,

Visa dies dandæ non aliena togæ.

Mite, Pater, caput huc placataque cornua vertas;

Et des ingenio vela secunda meo. 790

Itur ad Argeos, (qui sint, sua pagina dicet)

Hac, si commemini, præteritaque die:

Stella Lycaoniam vergit proclinis ad Arcton

Milvus. hæc illa nocte videnda venit.

Quid dederit volucris, si vis cognoscere, cælum; 795

Saturnus regnis ab Jove pulsus erat.

Concitatur iratus validos Titanas in arma,

Quæque fuit fatis debita, poscit opem.

Matre satus Terrâ, monstrum mirabile, taurus

Parte sui serpens posteriore fuit. 800

Hunc triplici muro lucis incluserat atris

Parcarum monitu Styx violenta trium.

Viscera qui tauri flammis adolenda dedisset,

Sors erat, æternos vincere posse Deos.

Immolat hunc Briareus facta ex adamante securi, 805

Et jam jam flammis exta daturus erat.

Juppiter alitibus rapere imperat. attulit illi

Milvus: & meritis venit in astra suis.

**U**NA dies media est; & sunt sacra Minervæ:

Nominaque a junctis quinque diebus habent. 810

Sanguine prima vacat: nec fas concurrere ferro.

Causa, quod est illa nata Minerva die.

Altera, tresque super stratâ celebrantur arenâ.

Ensibus exsertis bellica læta Dea est.

Pallada nunc pueri, teneræque ornatæ puellæ. 815

Qui bene placarit Pallada, doctus erit.

Pallade placata, lanam mollite, puellæ:

Discite jam plenas exonerare colos.

Illa etiam stantes radio percurrere telas

Erudit; & rarum pectine denset opus. 820

Hanc cole, qui maculas læsis de vestibus aufers:

Hanc cole, velleribus quisquis ahena paras.

Nec quisquam invitâ faciat bene vincula plantæ

Pallade, sit Tychio doctior ille licet.

Et licet antiquo manibus collatus Epeo 825

Sit prior, irritâ Pallade mancus erit.

Vos quoque, Phœbeâ morbos qui pellitis arte,

Munera de vestris pauca referte Deæ.

Nec vos turba feri censu fraudata magistri

Spernite. discipulos attrahit illa novos. 830

Quique moves cœlum, tabulamque coloribus uris;

Quique facis doctâ mollia saxa manu.

Mille Dea est operum; certe Dea carminis illa est.

Si mereor, studiis adsit amica meis.

Cœlius ex alto quâ mons descendit in æquum, 835

Hîc ubi non plana est, sed prope plana via est;

Parva licet videas Captæ delubra Minervæ,

Quæ Dea natali cœpit habere suo.

Nominis in dubio caussa est. capitale vocamus

Ingenium sollers: ingeniosa Dea est. 840

An, quia de capitis fertur sine matre paterni  
Vertice cum clypeo prosiluisse suo?

An, quia perdomitis ad nos captiva Faliscis  
Venit; & hoc ipsum litera prisca docet?

An, quod habet legem, capitis quæ pendere pœnas 845  
Ex illo jubeat furta reperta loco?

A quacumque trahis ratione vocabula, Pallas;  
Pro Ducibus nostris ægida semper habe.

Summa dies e quinque tubas lustrare canoras  
Admonet, & forti sacrificare Deæ. 850

Nunc potes ad Solem sublato dicere vultu;  
Hic here Phryxæ vellera pressit ovis.

Seminibus tostis sceleratæ fraude novercæ  
Sustulerat nullas, ut solet, herba comas.

Mittitur ad tripodas, certâ qui sorte reportet, 855  
Quam sterili terræ Delphicus edat opem.

Hic quoque corruptus, pro semine, nuntiat Helles  
Et juvenis Phryxi funera forte peti.

Utque recusantem cives, & tempus, & Ino  
Compulerunt regem jussa nefanda pati; 860

Et soror, & Phryxus velati tempora ramis  
Stant simul ante aras; junctaque fata gemunt.

Adspicit hos, ut forte pependerit æthere, mater;  
Et ferit attonitâ pectora nuda manu:

Inque draconigenam nimbis comitantibus urbem 865  
Desilit: & natos eripit inde suos.

Utque fugam rapiant, aries nitidissimus auro

Traditur, ille vehit per freta longa duos.  
Dicitur infirmâ cornu tenuisse sinistrâ,

Femina; cum de se nomina fecit aquæ. 870

Pene simul periit, dum vult succurrere lapsæ

Frater; & extentas porrigit usque manus.

Flebat, ut amissâ gemini consorte pericli,

Cæruleo junctam nescius esse Deo.

Litoribus tactis aries fit sidus: at hujus

875

Pervenit in Colchas aurea lana domos.

**T**Res ubi Luciferos veniens præmiserit Eos,  
Tempora nocturnis æqua diurna feres.

**I**Nde quater pastor saturos ubi clausurit hœdos,  
Canuerint herbæ rore recente quater; 880

Janus adorandus, cumque hoc Concordia mitis,

Et Romana Salus, araque Pacis erit.

**L**Una regit menses. hujus quoque tempora mensis  
Finit Aventino Luna colenda jugo.





P. OVIDII NASONIS  
**F A S T O R U M**  
 L I B E R IV.

**A**Lma, fave vati, geminorum mater Amorum.  
 Ad vatem vultus retulit illa suos.

Quid tibi, ait, mecum? certe majora canebas.

Num vetus in molli pectore vulnus habes?

Scis Dea, respondi, de vulnere. (risit: & æther ;

Protinus ex illa parte serenus erat.)

Saucius, an sanus, numquid tua signa reliqui?

Tu mihi propositum, tu mihi semper opus.

Quæ decuit, primis sine crimine lusimus annis:

Nunc teritur nostris area major equis. 10

Tempora cum caussis, Annalibus eruta priscis,

Lapsaque sub terras, ortaue signa cano.

Venimus ad quartum, quo tu celeberrima, mensem.

Et vatem, & mensem scis, Venus, esse tuos.

Mota Cytheriacâ leviter mea tempora myrto 15

Contigit: &, Cœptum perface, dixit, opus.

Sensimus; & subito caussæ patuere dierum.

Dum licet, & spirant flamina, navis eat.  
Si qua tamen pars te de Fastis tangere debet,

Cæsar, in Aprili, quo tenearis, habes. 20

Hic ad te magna descendit imagine mensis:

Et fit adoptiva nobilitate tuus.

Hoc pater Iliades, cum longum scriberet annum,

Vidit; & auctores retulit ipse suos.

Utque fero Marti primam dedit ordine sortem, 25

Quod sibi nascenti proxima causa fuit;

Sic Venerem gradibus multis in gente repertam

. Alterius voluit mensis habere locum.

Principiumque sui generis, revolutaque quærens

Secula, cognatos venit ad usque Deos. 30

Dardanon Electrâ nesciret Atlantide cretum

Scilicet; Electrâ concubuisse Jovi?

Hujus Erichthonius: Tros est generatus ab illo:

Assaracon creat, hic: Assaracusque Capyn.

Proximus Anchisen; cum quo commune parentis 35

Non dedignata est nomen habere Venus.

Hinc satus Æneas, pietas spectata per ignes,

Sacra, patremque humeris altera sacra, tulit.

Venimus ad felix aliquando nomen Iuli;

Unde domus Teucros Julia tangit avos. 40

Postumus huic: qui, quod silvis fuit ortus in altis,

Silvius in Latia gente vocatus erat.

Isque, Latine, tibi pater est: subit Alba Latinum:



Proximus est titulis Epitos, Alba, tuis.  
Ille dedit Capii recidiva vocabula Trojæ; 45  
Et tuus est idem, Calpete, factus avus.  
Cumque patris regnum post hunc Tiberinus haberet,  
Dicitur in Thuscæ gurgite mersus aquæ.  
Jam tamen Agrippan genitum, Remulumque nepotem  
Viderat: in Remulum fulmina missa ferunt. 50  
Venit Aventinus post hos: locus unde vocatus;  
Mons quoque. post illum tradita regna Procæ.  
Quem sequitur diri Numitor germanus Amul?  
Ilia cum Lauso de Numitore sati.  
Ense cadit patruo Lausus: placet Ilia Marti; 55  
Teque parit, gemino junctæ Quirine Remo.  
Ille suos semper Venerem Martemque parentes  
Dixit: & emeruit vocis habere fidem.  
Neve secuturi possent nescire nepotes,  
Tempora Dīs generis continuata dedit. 60  
Sed Veneris mensem Grajo sermone notatum  
Auguror: a spumis est Dea dicta maris.  
Nec tibi sit mirum Grajo rem nomine dici:  
Italia nam tellus Græcia major erat.  
Venerat Evander plena cum classe suorum: 65  
Venerat Alcides, Grajus uterque genus.  
Hospes Aventinis armentum pavit in herbis  
Claviger: & tanto est Albula pota Deo.  
Dux quoque Neritius. testes Læstrygones exstant:  
Et quod adhuc Circes nomina litus habet. 70

Et jam Telegoni, jam mœnia Tiburis udi  
 Stabant: Argolicæ quod posuere manus.  
 Venerat Atrides fatis agitatus Halesus;  
 A quo se diſtam terra Falisca putat.  
 Adjice Trojanæ suasorem Antenora pacis, 75  
 Et generum Cœniden, Appule Daune, tuum.  
 Serus ab Iliacis, & post Antenora, flammis  
 Attulit Æneas in loca nostra Deos.  
 Hujus erat Solimus, Phrygia comes exsul ab Ida:  
 A quo Sulmonis mœnia nomen habent; 80  
 Sulmonis gelidi patriæ, Germanice, nostræ.  
 Me miserum, Scythico quam procul illa solo est!  
 Ergo ego? tam longas sed supprime, Musa, querelas:  
 Non tibi sunt mœstâ sacra canenda lyrâ.  
 Quò non Livor abit? sunt qui tibi mensis honorem 85  
 Eripuisse velint, invideantque, Venus.  
 Nam, quia Ver aperit tunc omnia, densaque cedit  
 Frigoris asperitas, fœtaque terra patet;  
 Aprilem memorant ab aperto tempore diſtum:  
 Quem Venus injectâ vindicat alma manu. 90  
 Illa quidem totum dignissima temperat orbem:  
 Illa tenet nullo regna minora Deo:  
 Juraque dat cœlo, terræ, natalibus undis;  
 Perque suos initus continet omne genus.  
 Illa Deos omnes (longum enumerare) creavit: 95  
 Illa satis caussas arboribusque dedit:  
 Illa rudes animos hominum contraxit in unum;  
 Et

Et docuit jungi cum pare quemque suâ.

Quid genus omne creat volucrum, nisi blanda voluptas?

Nec coeant pecudes, si levis absit amor. 100

Cum mare trux aries cornu decertat: at idem

Frontem dilectæ lædere parcit ovis.

Deposita taurus sequitur feritate juvencam,

Quem toti saltus, quem nemus omne, tremunt.

Vis eadem, lato quodcumque sub æquore vivit, 105

Servat; & innumeris piscibus implet aquas.

Prima feros habitus homini detraxit: ab illa

Venerunt cultus mundaque cura sui.

Primus amans carmen vigilatum nocte negata

Dicitur ad clausas concinuisse fores: 110

Eloquiumque fuit duram exorare puellam:

Proque sua caussa quisque disertus erat.

Mille per hanc artes motæ: studioque placendi,

Quæ latuere prius, multa reperta ferunt.

Hanc quisquam titulo mensis spoliare secundi 115

Audeat? a nobis sit procul iste furor.

Quid, quod ubique potens, templisque frequentibus aucta,

Urbe tamen nostrâ jus Dea majus habet?

Pro Trojâ, Romane, tuâ Venus arma ferebat;

Cum gemuit teneram cuspide læsa manum; 120

Cœlestesque duas Trojano iudice vicit.

(Ah nolim victas hoc meminisse Deas!)

Assaracique nurus dicta est: ut scilicet olim

Magnus Iuleos Cæsar haberet avos.

Ovidius T. III.

H

Nec Veneri tempus, quam ver, erat aptius ullum. 125

Vere nitent terræ: vere remissus ager...

Nunc herbæ ruptâ tellure cacumina tollunt;

Nunc tumido gemmas cortice palmes agit.

Et formosa Venus formoso tempore digna est:

Utque solet, Marti continuata suo. 130

Vere monet curvas materna per æquora puppes

Ire, nec hibernas jam timuisse minas.

Rite Deam Latix colitis matresque nurusque;

Et vos, quîs vittæ longaque vestis abest.

Aurea marmoreo redimicula solvite collo: 135

Demite divitias: tota lavanda Dea est.

Aurea siccato redimicula reddite collo:

Nunc alii flores, nunc nova danda rosa est.

Vos quoque sub viridi myrto jubet illa lavari:

Caussaque, cur jubeat, (discite) certa subest. 140

Litore siccatbat rorantes nuda capillos.

Viderunt Satyri, turba proterva, Deam.

Sensit, & adpositâ textit sua corpora myrto.

Tuta fuit factò: vosque referre jubet.

Discite nunc, quare Fortunæ tura Virili 145

Detis eo, calidâ qui locus humet aquâ.

Accipit ille locus posito velamine cunctas;

Et vitium nudi corporis omne videt.

Ut tegat hoc, celetque viros, Fortuna Virilis

Præstat: & hoc parvo ture rogata facit. 150

Nec pigeat niveo tritum cum lacte papaver

Sumere, & expressis mella liquata favis.

Cum primum cupido Venus est deducta marito,

Hoc bibit. ex illo tempore nupta fuit.

Supplicibus verbis illam placate: sub illâ 155

Et forma, & mores, & bona fama manent.

Roma pudiciâ proavorum tempore lapsa est:

Cumâam, veteres, consulistis anum.

Templa jubet Veneri fieri: quibus ordine factis,

Inde Venus verso nomina corde tenet. 160

Semper ad Æneadas placido, pulcherrima, vultu

Respice: totque tuas, Diva, tuere nurus.

Dum loquor, elatæ metuendus acumine caudæ

Scorpios in virides præcipitatur aquas.

**N**OX ubi transierit, cælumque rubescere primò 165

Cœperit, & tactæ rore querentur aves;

Semustamque facem vigilata nocte viator

Ponet, & ad solitum rusticus ibit opus;

Pliades incipiunt humeros relevare paternos:

Quæ septem dici, sex tamen esse solent. 170

Seu quod in amplexum sex hinc venere Deorum:

Nam Steropen Marti concubuisse ferunt:

Neptuno Halcyonen, & te, formosa Celæno:

Majan, & Electran, Taygetenque Jovi:

Septima mortali Merope tibi, Sisyphe, nupsit. 175

Pœnitet; & facti sola pudore latet.

Sive quod Electra Trojæ spectare ruinas

Non tulit: ante oculos opposuitque manum.

**T**ER sine perpetuo cœlum versetur in axe;  
 Ter jungat Titan, terque resolvat equos; 180  
 Protinus inflexo Berecynthia tibia cornu  
 Flabit, & Idææ festa Parentis erunt.  
 Ibunt semimares, & inania tympana tudent;  
 Æraque tinnitus ære repulsa dabunt.  
 Ipsa sedens molli comitum cervice feretur 185  
 Urbis per medias exululata vias.  
 Scena sonat, Ludique vocant. spectate, Quirites;  
 Et Fora Marte suo litigiosa vacent.  
 Quærere multa libet: sed me sonus æris acuti  
 Terret, & horrendo lotos adunca sono. 190  
 Da, Dea, quas sciter, doctas, Cybeleia, neptes.  
 Audit; & has curæ jussit adesse meæ.  
 Pandite mandati memores, Heliconis alumnæ,  
 Gaudeat assiduo cur Dea Magna sono.  
 Sic ego; sic Erato: (mensis Cythereius illi 195  
 Cessit; quod teneri nomen Amoris habet:)  
 Reddita Saturno sors hæc erat; Optime regum,  
 A nato sceptris excutiere tuis.  
 Ille suam metuens, ut quæque erat edita, prolem  
 Devorat; immersam visceribusque tenet. 200  
 Sæpe Rhea quæsta est toties fecunda, nec umquam  
 Mater, & indoluit fertilitate sua.  
 Juppiter ortus erat. pro magnâ teste vetustas

Creditur. acceptam parce movere fidem.

Veste latens saxum cœlesti viscere sedit. 203

Sic genitor fatis decipiendus erat.

Ardua jam dudum resonat tinnitibus Ide;

Tutus ut infanti vagiat ore puer.

Pars clypeos rudibus, galeas pars tundit inanes:

Hoc Curetes habent, hoc Corybantes opus. 210

Res latuit patrem: priscique imitamina facti,

Æra Deæ comites raucaque terga movent.

Cymbala pro galeis, pro scutis tympana pulsant:

Tibia dat Phrygiōs, ut dedit ante, modos.

Desierat. cœpi: Cur huic, genus acre, leones, 215

Præbeat insolitas ad juga curvâ jubas?

Desieram. cœpit: Feritas mollita per illam

Creditur. id curru testificata suo est.

At cur turritâ caput est ornata coronâ?

An Phrygiis turres urbibus illa dedit? 220

Adnuat: Unde venit, dixi, sua membra secandi

Impetus? ut tacui, Pieris orsa loqui:

Phryx puer in silvis, facie spectabilis, Attis

Turrigeram casto vinxit amore Deam.

Hunc sibi servari voluit, sua templa tueri: 225

Et dixit, Semper fac puer esse velis.

Ille fidem jussis dedit; &, Si mentiar, inquit,

Ultima, quam fallam, sit Venus illa mihi.

Fallit: & in Nympha Sagaritide desinit esse,

Quod fuit, huic pœnas exigit ira Deæ. 230

Naida vulneribus succidit in arbore factis.

Illa perit. fatum Naidos arbor erat.

Hic furit: &, credens thalami procumbere tectum,

Effugit, & cursu Dindyma summa petit.

Et modo, Tolle faces; Remove, modo, verbera, clamat. 235

Sæpe Palæstinas jurat adesse Deas.

Ille etiam saxo corpus laniavit acuto;

Longaque in immundo pulvere tracta coma est.

Voxque fuit, Merui: meritas dem sanguine pœnas.

Ah pereant partes, quæ nocuere mihi! 240

Ah pereant! dicebat adhuc. onus inguinis aufert;

Nullaque sunt subito signa relicta viri.

Venit in exemplum furor hinc, mollesque ministri

Cædunt jactatis vilia membra comis.

Talibus Aoniæ facunda voce Camenæ 245

Reddita quæsitæ causa furoris erat.

Hoc quoque, dux operis, moneas, precor; unde petita

Venerit. an nostra semper in Urbe fuit?

Dindymon, & Cybelen, & amœnam fontibus Iden

Semper, & Iliacas Mater amavit opes. 250

Cum Trojam Æneas Italos portaret in agros,

Est Dea sacriferas pene secuta rates.

Sed nondum fatis Latio sua numina posci

Senserat; adsuētis substiteratque locis.

Post, ut Roma potens opibus jam secula quinque 255

Vidit, & edomito sustulit orbe caput;

Carminis Euboici fatalia verba sacerdos



Inspicit. inspectum tale fuisse ferunt:

Mater abest; Matrem jubeo, Romane, requiras.

Cum veniet, castâ est accipienda manu. 260

Obscuræ sortis Patres ambagibus errant:

Quæve parens absit, quove petenda loco.

Consulitur Pæan: Divûmque arcessite Matrem,

Inquit: in Idæo est invenienda jugo.

Mittuntur proceres. Phrygiæ tum sceptrâ tenebat 265

Attalus: Ausoniis rem negat ille viris.

Mira canam. longo tremuit cum murmure tellus:

Et sic est adytis Diva locuta suis:

Ipsa peti volui. ne sit mora: mitte volentem.

Dignus Roma locus, quod Deus omnis eat. 270

Ille soni terrore pavens, Proficiscere, dixit;

Nostra eris. in Phrygios Roma refertur avos.

Protinus innumeræ cædunt pineta secures

Illa, quibus fugiens Phryx pius usus erat.

Mille manus coeunt: & picta coloribus ustis 275

Cœlestum Matrem concava puppis habet.

Illa sui per aquas fertur tutissima nati;

Longaque Phryxæ stagna sororis adit:

Rhœteumque rapax, Sigeaque litora transit;

Et Tenedum, veteres Ectionis opes. 280

Cyclades excipiunt, Lesbo post terga relicta;

Quaque Caristeis frangitur unda vadis.

Transit & Icarium, lapsas ubi perdidit alas

Icarus, & vastæ nomina fecit aquæ.

Tum lævâ Creten, dextrâ Pelopeidas undas 285  
Deserit: & Veneri sacra Cythera petit.  
Hinc mare Trinacrium, candens ubi tingueret ferrum  
Brontesque, & Steropes, Acmonidesque solent:  
Æquoraque Afra legit, Sardoaque regna sinistris  
Prospicit a remis, Ausoniamque tenet. 290  
Ostia contigerat, quâ se Tiberinus in altum  
Dividit, & campo liberiore natat.  
Omnis Eques, mixtâque gravis cum Plebe Senatus,  
Obvius ad Thusci fluminis ora venit.  
Procedunt pariter matres, natæque, nurusque; 295  
Quæque colunt sanctos virginitate focos.  
Sedula fune viri contento brachia lassant.  
Vix subit adversas hospita navis aquas.  
Sicca diu tellus fuerat: sitis usserat herbas:  
Sedit limoso pressa carina vado. 300  
Quisquis adest operi, plus quam pro parte laborat;  
Adjuvat & fortes voce sonante manus.  
Illa velut medio stabilis sedet insula ponto.  
Attoniti monstro stantque paventque viri.  
Claudia Quinta genus Clauso referebat ab alto; 305  
Nec facies impar nobilitate fuit.  
Casta quidem; sed non & credita. rumor iniquus  
Læserat, & falsi criminis acta rea est.  
Cultus, & ornatis varie prodîsse capillis,  
Obfuit: ad rigidos promptaque lingua senes. 310  
Conscia mens recti famæ mendacia risit:

Sed nos in vitium credula turba sumus.

Hæc ubi castarum processit ab agmine matrum,

Et manibus puram fluminis hausit aquam;

Ter caput irrorat, ter tollit in æthera palmas. 315

Quicumque adspiciunt, mente carere putant.

Submissoque genu, vultus in imagine Divæ

Figit, & hos edit, crine jacente, sonos:

Supplicis, alma, tuæ, genetrix fecunda Deorum,

Accipe sub certa conditione preces. 320

Castâ negor. si tu damnas, meruisse fatebor.

Morte luam pœnas judice victa Deæ.

Sed, si crimen abest, tu nostræ pignora vitæ

Re dabis: & castas castâ sequere manus.

Dixit: & exiguo funem conamine traxit. 325

Mira, sed & scenâ testificata loquar.

Mota Dea est; sequiturque ducem, laudatque sequendo.

Index lætitiæ fertur in astra sonus.

Fluminis ad flexum veniunt: Tiberina priores

Ostia dixerunt, unde sinister abit. 330

Nox aderat: querno religant a stipite funem:

Dantque levi somno corpora functa cibo.

Lux aderat. querno solvunt a stipite funem:

Ante tamen posito tura dedere foco:

Ante coronatâ puppi sine labe juvencam 335

Maſtarunt, operum conjugiiſque rudem.

Est locus, in Tiberin quâ lubricus influit Almo,

Et nomen magno perdit ab amne minor.

Illic purpureâ canus cum veste sacerdos

Almonis Dominam sacraque lavit aquis. 340

Exululant comites, furiosaque tibia flatur;

Et feriunt molles taurea terga manus.

Claudia præcedit, læto celeberrima vultu;

Credita vix tandem teste pudica Deâ.

Ipsa sedens plastro portâ est invecta Capenâ: 345

Sparguntur junctæ flore recente boves.

Nasica accepit: templi tunc exstitit auctor.

Augustus nunc est: ante Metellus erat.

Substitit hic Erato. mora fit, si cetera quæram.

Dic, inquam, parvâ cur stipe quærat opes? 350

Contulit æs populus; de quo delubra Metellus

Fecit, ait. dandæ mos stipis inde manet.

Cur vicibus factis ineant convivia, quæro,

Tum magis, indictas concelebrentque dapes?

Quod bene mutarit sedem Berecynthia, dixit, 355

Captant mutatis sedibus omen idem.

Institeram, quare primi Megalesia ludi

Urbe forent nostrâ: cum Dea (sensit enim:)

Illa Deos, inquit, peperit. cessere parenti:

Principiumque dati Mater honoris habet. 360

Cur igitur Gallos, qui se excidère, vocamus?

Cum tanto Phrygiâ Gallica distet humus?

Inter, ait, viridem Cybelen altasque Celænas,

Amnis it insanâ, nomine Gallus, aquâ.

Qui bibit inde, furit. procul hinc discedite, quis est 365

Cura bonæ mentis. qui bibit inde, furit.

Non pudet herbosum, dixi, posuisse moretum

In Dominæ mensis? an sua caussa subest?

Lacte mero veteres usi memorantur & herbis;

Sponte suâ si quas terra ferebat, ait. 370

Candidus elisæ miscetur caseus herbæ;

Cognoscat priscos ut Dea prisca cibos.

**P**ostera cum cœlo motis Pallantias astris  
Fulserit, & niveos Luna levarit equos;

Qui dicet, Quondam sacrata est colle Quirini 375  
Hac Fortuna die Publica, verus erit.

**T**ertia lux (memini) Ludis erat. at mihi quidam  
Spectanti senior, contiguusque loco,

Hæc, ait, illa dies, Libycis qua Cæsar in oris

Perfida magnanimi contudit arma Jubæ. 380  
Dux mihi Cæsar erat, sub quo meruisse Tribunus

Glorior. officio præfuit ille meo.

Hanc ego militia sedem, tu pace parasti,

Inter bis quinos usus honore Viros.

Plura locuturi subito seducimur imbre. 385  
Pendula cœlestes Libra movebat aquas.

Ante tamen, quam summa dies spectacula sistat,

Ensifer Orion æquore mersus erit.

**P**roxima victricem cum Romam inspexerit Eos,

- Et dederit Phœbo stella fugata locum; 390  
Circus erit pompa celebr, numeroque Deorum:  
Primaque ventosis palma petetur equis.  
Hi Cereris Ludi: non est opus indice caussa.  
Sponte Deæ munus promeritumque patent.  
Messis erant primis virides mortalibus herbæ; 395  
Quas tellus nullo sollicitante dabat.  
Et modo carcebant vivaci cespite gramen;  
Nunc epulæ tenerâ fronde cacumen erant.  
Postmodo glans nata est. bene erat jam glande repertâ.  
Duraque magnificas quercus habebat opes. 400  
Prima Ceres homini ad meliora alimenta vocato  
Mutavit glandes utiliore cibo.  
Illa jugo tauros collum præbere coegit:  
Tum primum soles eruta vidit humus.  
Æs erat in pretio: chalybeia massa latebat. 405  
Heu quam perpetuo debuit illa tegi!  
Pace Ceres læta est. at vos optate, coloni,  
Perpetuam Pacem, perpetuumque Ducem.  
Farra Deæ micæque licet salientis honorem  
Detis, & in veteres turea grana focos. 410  
Et, si tura aberunt, unctas accendite tædas.  
Parva bonæ Cereri, sint modo casta, placent.  
A bove succincti cultros removete ministri.  
Bos aret: ignavam sacrificate suem.  
Apta jugo cervix non est ferienda securi. 415  
Vivat, & in dura sæpe laboret humo.

Exigit ipse locus, raptus ut virginis edam.

Plura recognosces: pauca docendus eris.

Terra tribus scopulis vastum procurrit in æquor

Trinacris; a positu nomen adepta loci. 410

Grata domus Cereri. multas ibi possidet urbes;

In quibus est culto fertilis Henna solo.

Frigida Cœlestum matres Aretusa vocarat.

Venerat ad sacras & Dea flava dapes.

Filia, consuetis ut erat comitata puellis, 425

Errabat nudo per sua prata pede.

Valle sub umbrosa locus est, adspergine multa

Uvidus ex alto desilientis aquæ.

Tot fuerant illic, quot habet natura, colores:

Pictaque dissimili flore nitebat humus. 430

Quam simul adspexit, Comites accedite, dixit;

Et mecum vestros flore replete sinus.

Præda puellares animos prolestat inanis,

Et non sentitur sedulitate labor.

Hæc implet lento calathos e vimine textos: 435

Hæc gremium, laxos degravat illa sinus.

Illa legit calthas: huic sunt violaria curæ:

Illa papavereas subsecat ungue comas.

Has, Hyacinthe, tenes; illas, Amarante, moraris:

Pars thyma, pars casiam, pars meliloton amant. 440

Plurima lecta rosa est; & sunt sine nomine flores,

Ipsa crocos tenues, liliaque alba legit.

Carpendi studio paullatim longius itur;

Et dominam casu nulla secuta comes.  
Hanc videt, & visam patruus velociter aufert; 445  
Regnaque cæruleis in sua portat equis.  
Illa quidem clamabat, Io, carissima mater,  
Auferor. ipsa suos abscideratque sinus.  
Panditur interea Diti via: jamque diurnum  
Lumen inadsueti vix patiuntur equi. 450  
At chorus æqualis, cumulatis flore canistris,  
Persephone, clamant, ad tua dona veni.  
Ut clamata silet, montes ululatibus implent;  
Et feriunt mœstæ pectora nuda manus.  
Attonita est plangore Ceres; modo venerat Hennam: 455  
Nec mora, Me miseram, filia, dixit, ubi es?  
Mentis inops rapitur. quales audire solemus  
Threicias fusis Mænadas ire comis.  
Ut vitulo mugit sua mater ab ubere raptō,  
Et quærit fœtus per nemus omne suos; 460  
Sic Dea: nec retinet gemitus, & concita cursu  
Fertur, & e campis incipit, Henna, tuis.  
Inde puellaris nacta est vestigia plantæ,  
Et pressam noto pondere vidit humum.  
Forsitan illa dies errori summa fuisset, 465  
Si non turbassent signa reperta sues.  
Jamque Leontinos Amenanaque flumina cursu  
Præterit, & ripas, herbifer Aci, tuas:  
Præterit & Cyanen, & fontem lenis Anapi;  
Et te, vorticibus non adeunde Gela. 470



Liquerat Ortygien, Megareaque, Pantagienque,  
 Quâque Simetheas accipit æquor aquas,  
 Antraque Cyclopum, positis exusta caminis,  
 Quique locus curvæ nomina falcis habet:  
 Himeraque, & Didymen, Acragantaque, Taurome-  
 nonque; 475

Sacrorumque Melan pascua læta boum.  
 Hinc Camerinan adit, Thapsonque & Heloria tempe;  
 Quâque patet Zephyro semper apertus Eryx.  
 Jamque Peloriaden, Lilybeaque, jamque Pachynon  
 Lustrarat, terræ cornua trina suæ. 480  
 Quacumque ingreditur, miseris loca cuncta querelis  
 Implet. ut amissum cum gemit ales Ityn.  
 Perque vices modo, Persephone, modo, Filia, clamat.  
 Clamat, & alternis nomen utrumque ciet.  
 Sed neque Persephone Cererem, neque filia matrem 485

Audit: & alternis nomen utrumque petit.  
 Unaque, pastorem vidisset, an arva colentem,  
 Vox erat, Hac gressus si qua puella tulit?  
 Jam color unus inest rebus, tenebrisque teguntur  
 Omnia: jam vigiles conticuere canes. 490

Alta jacet vasti super ora Typhoeos Ætne,  
 Cujus anhelatis ignibus ardet humus.  
 Illic accendit geminas pro lampade pinus:  
 Hinc Cereris sacris nunc quoque tæda datur.  
 Est specus exesi structura pumicis asper; 495  
 Non homini regio, non adeunda feræ:

Quò simul ac venit, frenatos curribus angues  
 Jungit, & æquoreas sicca pererrat aquas.  
 Effugit & Syrtes, & te, Zancleæ Charybdi;  
 Et vos, Nisæi, naufraga monstra, canes; 500  
 Hadriacumque patens late, bimaremque Corinthon.  
 Sic venit ad portus, Attica terra, tuos.  
 Hic primum sedit gelido mœstissima saxo.  
 Illud Cecropidæ nunc quoque triste vocant. -  
 Sub Jove duravit multis immota diebus, 505  
 Et Lunæ patiens, & pluvialis aquæ.  
 Fors sua cuique loco est. quo nunc Cerealis Eleusin,  
 Dicitur hoc Celei rura fuisse senis.  
 Ille domum glandes excussaque mora rubetis  
 Portat, & arsuris arida ligna focis. 510  
 Filia parva duas redigebat rupe capellas;  
 Et tener in cunis filius æger erat.  
 Mater, ait virgo, (mota est Dea nomine matris)  
 Quid facis in solis incommitata jugis?  
 Restitit & senior, quamvis onus urguet: & orat 515  
 Tectæ suæ subeat quantulacumque casæ.  
 Illa negat: (simularat anum) mitrâque capillos  
 Presserat. instanti talia dicta refert:  
 Sospes eas, semperque parens: mihi filia rapta est.  
 Heu melior quanto sors tua sorte meâ! 520  
 Dixit: & ut lacrimæ, (neque enim lacrimare Deorum est)  
 Decidit in tepidos lucida gutta sinus.  
 Flent pariter, molles animi, virgoque senexque.  
 E qui-

E quibus hæc justi verba fuere senis:

Sic tibi, quam raptam quereris, sit filia sospes: 525

Surge: nec exiguæ despice tecta casæ.

Cui Dea, Duc, inquit: scisti, quâ cogere posses.

Seque levat saxo, subsequiturque senem.

Dux comiti narrat, quam sit sibi filius æger;

Nec capiat somnos, invigiletque malis. 530

Illa soporiferum, parvos initura penates,

Colligit agresti lene papaver humo.

Dum legit, oblito fertur gustasse palato,

Longamque imprudens exsoluisse famem.

Quæ quia principio posuit jejunia noctis; 535

Tempus habent Mystæ sidera visa cibi.

Limen ut intravit, luctûs videt omnia plena.

Jam spes in puero nulla salutis erat.

Matre salutata (mater Metanira vocatur)

Jungere dignata est os puerile suo. 540

Pallor abit, subitæque vigent in corpore vires.

Tantus cœlesti venit ab ore vigor.

Tota domus læta est. hoc est, materque, paterque,

Nataque: tres illi tota fuere domus.

Mox epulas ponunt, liquefacta coagula lacte, 545

Pomaque, & in teneris aurea mella favis.

Abstinet alma Ceres, somnique papavera caussas

Dat tibi cum tepido lacte bibenda, puer.

Noctis erat medium, placidique silentia somni;

Triptoleum gremio sustulit illa suo: 550

*Ovidius T. III.*

Terque manu permulsit eum: tria carmina dixit;

Carmina mortali non referenda sono.

Inque foco pueri corpus vivente favilla

Obruit, humanum purget ut ignis onus.

Excutitur somno stulte pia mater: & amens, 555

Quid facis? exclamat: membraque ab igne rapit.

Cui Dea, Dum non es, dixit, scelerata fuisti:

Irrita materno sunt mea dona metu.

Iste quidem mortalis erit: sed primus arabit,

Et seret, & cultâ præmia tollet humo. 560

Dixit: & egrediens nubem trahit, inque dracones

Transit, & aligero tollitur axe Ceres.

Sunion expositum, Piræaque tuta recessu

Linquit, & in dextrum quæ jacet ora latus.

Hinc init Ægæum, quo Cycladas adspicit omnes; 565

Ioniumque rapax, Icariumque legit.

Perque urbes Asiæ longum petit Hellespontum:

Diversumque locis alta pererrat iter.

Nam modo turilegos Arabas, modo despicit Indos:

Hinc Libys, hinc Meroe, siccaque terra subest. 570

Nunc adit Hesperios, Rhenum, Rhodanumque, Padumque,

Teque future parens, Thybri, potentis aquæ.

Quò feror? immensum est erratas dicere terras:

Præteritus Cereri nullus in orbe locus.

Errat & in cœlo: liquidique immunia ponti 575

Adloquitur gelido proxima signa polo.

Parrhasides stellæ, (namque omnia nosse potestis,

Æquoreas numquam cum subeatis aquas)

Persephonen miseræ natam monstrate parenti.

Dixerat. huic Helice talia verba refert: 580

Crimine nox vacua est. Solem de virgine rapta

Consule; qui late facta diurna videt.

Sol aditus, Quam quæris, ait, ne vana labores,

Nupta Jovis fratri tertia regna tenet.

Questa diu secum sic est adfata Tonantem: 585

(Maximaque in vultu signa dolentis erant)

Si memor es, de quo mihi sit Proserpina nata;

Dimidium curæ debet habere tuæ.

Orbe pererrato, sola est injuria facti

Cognita: commissi præmia raptor habet. 590

At neque Persephone digna est prædone marito,

Nec gener hoc nobis more parandus erat.

Quid gravius victore Gyge captiva tulissem;

Quam nunc, te cœli sceptrâ tenente, tuli?

Verum impune ferat: nos hæc patiamur inultæ. 595

Reddat, & emendet facta priora novis.

Juppiter hanc lenit, factumque excusat amore;

Nec gener est nobis ille pudendus, ait.

Non ego nobilior. posita est mihi regia cœlo:

Possidet alter aquas: alter inane Chaos. 600

Sed si forte tibi non est mutabile pectus,

Statque semel juncti rumpere vincla tori;

Hoc quoque tentemus, siquidem jejuna remansit:

Sin minus; inferni conjugis uxor erit.

Tartara jussus adit sumtis Caducifer alis: 605  
 Speque redit citius, visaque certa refert.  
 Rapta tribus, dixit, solvit jejunia granis,  
 Punica quæ lento cortice poma tegunt.  
 Haud secus indoluit, quam si modo rapta fuisset,  
 Mœsta parens; longâ vixque resecta morâ est. 610  
 Atque ita, Nec nobis cœlum est habitabile, dixit:  
 Tænariâ recipi me quoque valle jube.  
 Et factura fuit: pactus nisi Juppiter esset,  
 Bis tribus ut cœlo mensibus illa foret.  
 Tum demum vultusque Ceres animumque recepit; 615  
 Imposuitque suæ spicea sarta comæ.  
 Largaque provenit cessatis messis in arvis;  
 Et vix congestas area cepit opes.  
 Alba decent Cererem: vestes Cerealibus albas  
 Sumite. nunc pulli velleris usus abest. 620

**O**ccupat Apriles Idus cognomine Victor  
 Juppiter: hac illi sunt data templa die.  
 Hac quoque, ni fallor, populo dignissima nostro  
 Atria Libertas cœpit habere sua.

**L**uce secutura tutos pete, navita, portus: 625  
 Ventus ab occasu grandine mixtus erit.  
 Sit licet ut fuerit; tamen hac Mutinensia Cæsar  
 Grandine militiâ contudit arma suâ.

**T**ertia post Veneris cum lux surrexerit Idus,  
Pontifices fordâ sacra litate bove. 630  
Forda ferens bos est, fecundaque dicta ferendo:  
Hinc etiam fœtus nomen habere putant.  
Nunc gravidum pecus est: gravidæ nunc semine terræ.  
Telluri plenæ victima plena datur.  
Pars cadit arce Jovis: ter denas Curia vaccas 635  
Accipit; & largo sparsa cruore madet.  
Ast ubi visceribus vitulos rapuere ministri,  
Sectaque fumosis extra dedere focis;  
Igne cremat vitulos, quæ natu maxima Virgo;  
Luce Palis populos purget ut ille cinis. 640  
Rege Numa, fructu non respondente labori,  
Irrita decepti vota colentis erant.  
Nam modo siccus erat gelidis Aquilonibus annus;  
Nunc ager assidua luxuriabat aqua.  
Sæpe Ceres primis dominum fallebat in herbis; 645  
Et levis obsesso stabat avena solo:  
Et pecus ante diem partus edebat acerbos:  
Agnæque nascendo sæpe necabat ovem.  
Silva vetus, nullaque diu violata securi,  
Stabat, Mænalia sacra relicta Deo. 650  
Ille dabat tacitis animo responsa quieto  
Noctibus. hîc geminas rex Numa maculat oves.  
Prima cadit Fauno; leni cadit altera Somno.  
Sternitur in duro vellus utrumque solo.

Bis caput intonsum fontana spargitur unda: 655  
     Bis sua fagineâ tempora fronde premit.  
 Usus abest Veneris: nec fas animalia mensis  
     Ponere: nec digitis annulus ullus inest.  
 Veste rudi tectum supra nova vellera corpus  
     Ponit, adorato per sua verba Deo. 660  
 Interea placidam redimita papavere frontem  
     Nox venit; & secum somnia nigra trahit.  
 Faunus adest; oviumque premens pede vellera duro,  
     Edidit a dextro talia dicta toro:  
 Morte boum tibi, Rex, tellus placanda duarum: 665  
     Det sacris animas una necata duas.  
 Excutitur terrore quies; Numa visa revolvit;  
     Et secum ambages cæcæque jussa refert.  
 Expedit errantem nemori gratissima conjux;  
     Et dixit, Gravidæ posceris exta bovis. 670  
 Exta bovis dantur gravidæ: felicior annus  
     Provenit, & fructum terra pecusque ferunt.  
 Hanc quondam Cytherea diem properantius ire  
     Jussit, & ætherios præcipitavit equos;  
 Ut titulum imperii quam primum luce sequenti 675  
     Augusto juveni prospera bella darent.

**S**ED jam præteritas quartus tibi Lucifer Idus  
     Respicit. hac Hyades Dorida nocte petunt.

**T**ertia post Hyadas cum lux erit orta remotas,



Carcere partitos Circus habebit equos.

630

Cur igitur missæ vinctis ardentia tædis

Terga ferant vulpes, caussa docenda mihi.

Frigida Carseoli, nec olivis apta ferendis

Terra, sed ad segetes ingeniosus ager.

Hac ego Pelignos, natalia rura, petebam;

635

Parva, sed assiduis uvida semper aquis.

Hospitis antiqui solitas intravimus ædes.

Demserat emeritis jam juga Phœbus equis.

Is mihi multa quidem, sed & hæc, narrare solebat,

Unde meum præsens instrueretur opus:

690

Hoc, ait, in campo (campumque ostendit) habebat

Rus breve cum duro parca colona viro.

Ille suam peragebat humum: sive usus aratri,

Sivæ cavæ falcis, sive bidentis erat.

Hæc modo verrebat stantem tibicine villam:

695

Nunc matris plumis ova fovenda dabat.

Aut virides malvas, aut fungos colligit albos:

Aut humilem grato calfacit igne focum.

Et tamen assiduis exercet brachia telis;

Adversumque minas frigoris arma parat.

700

Filius hujus erat primo lascivus in ævo;

Addideratque annos ad duo lustra duos.

Is capit extremi vulpem sub valle salicti:

Abstulerat multas illa cohortis aves.

Captivam stipula sænoque involvit, & ignes

705

Admovet. urentes effugit illa manus.

Quâ fugit, incendit vestitos messibus agros:

Damnosis vires ignibus aura dabat.

Factum abiit: monumenta manent. nam vivere captam

Nunc quoque lex vulpem Carseolana vetat. 710

Utque luat pœnas gens hæc, Cerealibus ardet:

Quoque modo segetes perdidit, ipsa perit.

**P**Ostera cum veniet terras visura patentes

Memnonis in roseis lutea mater equis;

E duce lanigeri pecoris, qui prodidit Hellen, 715

Sol abit: egresso victima major adest.

Vacca sit an taurus, non est cognoscere promptum:

Pars prior adparet: posteriora latent.

Seu tamen est taurus, sive est hoc femina signum;

Junone invita munus amoris habet. 720

**N**OX abiit, oriturque Aurora. Palilia poscor.

Non poscor frustra, si favet alma Pales.

Alma Pales, faveas pastoria sacra canenti;

Prosequor officio si tua festa pio.

Certe ego de vitulo cinerem stipulasque fabales 725

Sæpe tuli plenâ, februa casta, manu.

Certe ego transilui positas ter in ordine flammæ;

Virgaque roratas laurea misit aquas.

Mota Dea est; operique favet. navalibus exi,

Puppis: habent ventos jam tua vela suos. 730

I, pete virginea, populus, suffimen ab ara:

Vesta dabit. Vestæ munere purus eris.

Sanguis equi suffimen erit, vitulique favilla;

Tertia res, duræ culmen inane fabæ.

Pastor, oves saturas ad prima crepuscula lustra. 735

Uda prius spargat, virgaque verrat humum.

Frondebis & fixis decorentur ovilia ramis;

Et tegat ornatas longa corona fores.

Cærulei fiant vivo de sulfure fumi;

Tactaque fumanti sulfure balet ovis. 740

Ure mares oleas, tædamque, herbasque Sabinas;

Et crepet in mediis laurus adusta focis.

Libaque de milio milii fiscella sequatur:

Rustica præcipue quo Dea læta cibo est.

Adde dapes multæramque suas: dapibusque reseclis 745

Silvicolam tepido lacte precare Palen.

Consule, dic, pecori pariter pecorisque magistris:

Effugiat stabulis noxa repulsa meis.

Sive sacro pavi, sedive sub arbore sacra;

Pabulaque in bustis inscia carpsit ovis: 750

Seu nemus intravi vetitum, nostrisve fugatæ

Sunt oculis Nymphæ, semicaperve Deus:

Seu mea falx ramo lucum spoliavit opaco,

Unde data est ægre fiscina frondis ovi:

Da veniam culpæ: nec, dum degrandinat, obsit 755

Agresti fano supposuisse pecus.

Nec noceat turbasse lacus. ignoscite, Nymphæ,

Mota quod obscuras ungula fecit aquas.

Tu, Dea, pro nobis Fontes fontanaque placa  
Numina; tu sparsos per nemus omne Deos. 760  
Nec Dryadas, nec nos videamus labra Dianæ,  
Nec Faunum, medio cum premit arva die.  
Pelle procul morbos. valeant hominesque gregesque,  
Et valeant vigiles, provida turba, canes.  
Neve minus multo redigam, quam mane fuerunt; 765  
Neve gemam referens vellera rapta lupo.  
Absit iniqua fames. herbæ frondesque supersint:  
Quæque lavent artus, quæque bibantur, aquæ.  
Ubra plena premam. referat mihi caseus æra.  
Dentque viam liquido vimina rara sero. 770  
Sitque salax aries; conceptaque semina conjux  
Reddat; & in stabulo multa sit agna meo.  
Lanaque proveniat, nullas læsura puellas,  
Mollis, & ad teneras quamlibet apra manus.  
Quæ precor, eveniant: & nos faciamus ad annum 775  
Pastorum dominæ grandia liba Pali.  
His Dea placandâ est: hæc tu conversus ad ortus  
Dic ter, & in vivo prolue rore manus.  
Tum licet, adpositâ, veluti cratere, camellâ,  
Lac niveum potes, purpureamque sapam. 780  
Moxque per ardentes stipulæ crepitantis acervos  
Trajicias celeri strenua membra pede.  
Expositus mos est. moris mihi restat origo.  
Turba facit dubium, cœptaque nostra tenet.  
Omnia purgat edax ignis, vitiumque metallis 785

Excoquit. idcirco cum duce purgat oves.

An, quia cunctarum contraria semina rerum

Sunt duo, discordes ignis & unda Dei,

Junxerunt elementa Patres; aptumque putarunt

Ignibus & sparsa tangere corpus aqua? 790

An, quod in his vitæ caussa est; hæc perdidit exsul:

His nova fit conjux: hæc duo magna putant?

Vix equidem credo; sunt qui Phaethonta referri

Credant, & nimias Deucalionis aquas.

Pars quoque, cum saxis pastores saxa terebant, 795

Scintillam subito prosiluisse ferunt.

Prima quidem periit: stipulis excepta secunda est.

Hoc argumenti flamma Palilis habet.

An magis hunc morem pietas Æneia fecit,

Innocuum victo cui dedit ignis iter? 800

Num tamen est vero propius; cum condita Roma est,

Transferri jussos in nova tecta Lares?

Mutantesque domum tectis agrestibus ignem,

Et cessaturæ supposuisse casæ?

Per flammæ saluisse pecus, saluisse colonos? 805

Quod fit natali nunc quoque, Roma, tuo.

Ipse locus caussas vati facit. Urbis origo

Venit. ades festis, magne Quirine, tuis.

Jam luerat pœnas frater Numitoris, & omne

Pastorum gemino sub duce vulgus erat. 810

Contrahere agrestes, & mœnia ponere utrique

Convenit. ambigitur mœnia ponat uter.

Nil opus est, dixit, certamine, Romulus, ullo.

Magna fides avium est: experiamur aves.

Res placet. alter init nemorosi saxa Palatī: 815

Alter Aventinum mane cacumen adit.

Sex Remus, hic volucres bis sex videt ordine: pacto

Statur; & arbitrium Romulus Urbis habet.

Apta dies legitur, qua mœnia signet aratro.

Sacra Palis suberant: inde movetur opus. 820

Fossa fit ad solidum: fruges jaciuntur in ima,

Et de vicino terra petita solo.

Fossa repletur humo, plenæque imponitur ara;

Et novus accenso fungitur igne focus.

Inde premens stivam designat mœnia sulco: 825

Alba jugum niveo cum bove vacca tulit.

Vox fuit hæc Regis, Condenti Juppiter Urbem,

Et genitor Mavors, Vestaque mater ades:

Quosque pium est adhibere Deos, advertite cuncti:

Auspicius vobis hoc mihi surgat opus. 830

Longa sit huic ætas, dominæque potentia terræ;

Sitque sub hac oriens occiduusque dies.

Ille precabatur. tonitru dedit omina lævo

Juppiter: & lævo fulmina missa polo.

Augurio læti jaciunt fundamina cives; 835

Et novus exiguo tempore murus erat.

Hoc Celer urguet opus, quem Romulus ipse vocarat;

Sintque, Celer, curæ, dixerat, ista tuæ.

Neve quis aut muros, aut factam vomere fossam

Transeat, audentem talia dede neci. 340

Quod Remus ignorans, humiles contemnere muros

Cœpit, & His populus, dicere, tutus erit?

Nec mora; transiluit. rutro Celer occupat ausum.

Ille premit duram sanguinolentus humum.

Hæc ubi Rex didicit; lacrimas introrsus obortas 345

Devorat, & clausum pectore vulnus habet.

Flere palam non vult, exemplaque fortia servat:

Sicque meos muros transeat hostis, ait.

Dat tamen exsequias: nec jam suspendere fletum

Sustinet, & pietas dissimulata patet. 350

Osculaque adplicuit posito suprema feretro:

Atque ait; Invito frater ademte, vale.

Arsurosque artus unxit: fecere, quod ille,

Faustulus, & mæstas Acca soluta comas.

Tum juvenem nondum facti flere Quirites: 355

Ultima plorato subdita flamma rogo.

Urbs oritur (quis tunc hoc ulli credere posset?)

Victorem terris impositura pedem.

Cuncta regas: & sis magno sub Cæsare semper:

Sæpe etiam plures nominis hujus habe. 360

Et quoties steteris domito sublimis in orbe,

Omnia sint humeris inferiora tuis.

**D**icta Pales nobis. idem Vinalia dicam.

Una tamen media est inter utramque dies.

Numina vulgares Veneris celebrate puellæ. 365

Multa professorum quæstibus apta Venus.  
Poscite ture dato formam, populique favorem:  
Poscite blanditias, dignaque verba joco.  
Cumque sua dominæ date grata sisymbria myrto,  
Textaque compositâ juncea vincla rosâ. 870  
Templa frequentari Collinæ proxima portæ  
Nunc decet: a Siculo nomina colle tenent.  
Utque Syracusas Arethusidas abstulit armis  
Claudius, & bello te quoque cepit, Eryx;  
Carmine vivacis Venus est translata Sibyllæ; 875  
Inque suæ stirpis maluit urbe coli.  
Cur igitur Veneris festum Vinalia dicant,  
Quæritis; & quare sit Jovis ista dies?  
Turnus, an Æneas Latiae gener esset Amatae,  
Bellum erat. Hetruscas Turnus adoptat opes. 880  
Clarus erat, sumtisque ferox Mezentius armis:  
Et vel equo magnus, vel pede major erat.  
Quem Rutuli Turnusque suis adsciscere tentant  
Partibus. hæc contra dux ita Thuscus ait:  
Stat mihi non parvo virtus mea. vulnera testes, 885  
Armaque, quæ sparsi sanguine sæpe meo.  
Qui petis auxilium, non grandia divide mecum  
Præmia, de lacubus proxima musta tuis.  
Nulla mora est operæ. vestrum dare, vincere nostrum est.  
Quam velit Æneas ista negata mihi! 890  
Adnuerant Rutuli. Mezentius induit arma:  
Induit Æneas; adloquiturque Jovem.



Hostica Tyrrheno vota est vindemia Regi;  
 Juppiter, e Latio palmite musta feras.  
 Vota valent meliora: cadit Mezentius ingens, 895  
 Atque indignanti pectore plangit humum,  
 Venerat Autumnus, calcatis sordidus uvis.  
 Redduntur merito debita vina Jovi.  
 Dicta dies hinc est Vinalia. Juppiter illam  
 Vindicat, & festis gaudet inesse suis. 900

**S**EX ubi, quæ restant, lucas Aprilis habebit;  
 In medio cursu tempora veris erunt.  
 Et frustra pecudem quæres Athamantidos Helles:  
 Signaque dant imbres: exoriturque Canis.  
 Hac mihi Nomento Romam cum luce redirem, 905  
 Obstitit, in mediâ candida pompa viâ.  
 Flamen in antiquæ lucum Robiginis ibat,  
 Extâ canis flammis, extâ daturus ovis.  
 Protinus accessi, ritûs ne nescius essem.  
 Edidit hæc Flamen verba, Quirine, tuus: 910  
 Aspera Robigo, parcas Cerealibus herbis;  
 Et tremat in summa leve cacumen humo.  
 Tu sata sideribus cœli nutrita secundi  
 Crescere, dum fiant falcibus apta, sinas.  
 Vis tua non levis est. quæ tu frumenta notasti, 915  
 Mœstus in amissis illa colonus habet.  
 Nec venti tantum Cereri nocuere, nec imbres;  
 Nec sic marmoreo pallet adusta gelu;

Quantum, si culmos Titan incalfacit udos.

Tum locus est iræ, Diva timenda, tuæ. 910

Parce, precor, scabrasque manus a messibus aufer;

Neve noce cultis: posse nocere sat est.

Nec teneras segetes, sed durum contere ferrum:

Quodque potest alios perdere, perde prior.

Utilius gladios & tela nocentia carpes. 925

Nil opus est illis: otia mundus agit.

Sarcula nunc, durusque bidens, & vomer aduncus,

Ruris opes niteant: inquinet arma situs.

Conatusque aliquis vagina ducere ferrum,

: Adstrictum longa sentiat esse mora. 930

At, tu ne viola Cererem: semperque colonus

Absenti possit solvere vota tibi.

Dixerat. a dextra villis mantele solutis,

Cumque meri paterâ turis acerra fuit.

Tura focus vinumque dedit, fibrasque bidentis, 935

Turpiaque obscænæ (vidimus) exta canis.

Tum mihi, Cur detur sacris nova victima, quæris?

(Quæsieram) caussam percipe, Flamen ait:

Est Canis, (Icarium dicunt) quo sidere moto

Tosta sitit tellus, præciditurque seges. 940

Pro cane sidereo canis hic imponitur aræ:

Et, quare pereat, nil nisi nomen habet.

**C**UM Phrygis Assaraci Titania fratre relicto  
Sustulit immenso ter iubar orbe suum;

Mille

Mille venit variis florum Dea nexa coronis: 945

Scena joci morem liberioris habet.

Exit & in Majas sacrum Florale Kalendas.

Tunc repetam: nunc me grandius urguet opus;

Aufert Vesta diem: cognato Vesta recepta est

Limine. sic jussi constituere patres. 950

Phœbus habet partem; Vestæ pars altera cessit:

Quod superest illis, tertius ipse tenet.

State Palatinæ laurus, prætextaque quercu

Stet domus. æternos tres habet una Deos.





P. OVIDII NASONIS  
**F A S T O R U M**  
 L I B E R V.

**Q**Uæritis, unde putem Majo data nomina mensi?  
 Non satis est liquido cognita caussa mihi.  
 Ut stat, & incertus quâ sit sibi nescit eundum,  
 Cum videt ex omni parte viator iter;  
 Sic, quia posse datur diversas reddere caussas, 5  
 Quâ ferar ignoro: copiaque ipsa nocet.  
 Dicite, quæ fontes Aganippidos Hippocrenes  
 Grata Medusæi signa tenetis equi.  
 Dissensere Deæ. quarum Polyhymnia cœpit  
 Prima. silent aliæ; dictaque mente notant. 10  
 Post chaos, ut primum data sunt tria corpora mundo,  
 Inque novas species omne recessit opus;  
 Pondere terra suo subsedit, & æquora traxit:  
 At cœlum levitas in loca summa tulit.  
 Sol quoque cum stellis nulla gravitate retentus, 15

Et vos Lunares exsiluistis equi.

Sed neque terra diu cœlo, nec cetera Phœbo

Sidera cedebant: par erat omnis honos.

Sæpe aliquis solio, quod tu, Saturne, tenebas,

Ausus de media plebe sedere Deus. 20

Et latus Oceano quisquam Deus advena junxit:

Tethys & extremo sæpe recepta loco est.

Donec Honos, placidoque decens Reverentia vultu

Corpora legitimis imposuere toris.

Hinc sata Majestas; hos est Dea censa parentes: 25

Quaque die partu est edita, magna fuit.

Nec mora; consedit medio sublimis Olympo,

Aurea, purpureo conspicienda sinu.

Consedere simul Pudor & Metus. omne videres

Numen ad hanc cultus composuisse suos. 30

Protinus intravit mentes suspectus honorum.

Fit pretium dignis; nec sibi quisque placet.

Hic status in cœlo multos permansit in annos:

Dum senior fatis excidit arce Deus.

Terra feros partus, immania monstra, Gigantas 35

Edidit, ausuros in Jovis ire domum.

Mille manus illis dedit, & pro cruribus angues:

Atque ait, In magnos arma movete Deos.

Exstruere hi montes ad sidera summa parabant,

Et magnum bello sollicitare Jovem. 40

Fulmina de cœli jaculatus Juppiter arce,

Vertit in auctores pondera vasta suos.

His bene Majestas armis defensa Deorum

Restat: & ex illo tempore firma manet.

Adsidet illa Jovi: Jovis est fidissima custos: 45

Et præstat sine vi sceptrâ tremenda Jovi.

Venit & in terras: coluerunt Romulus illam,

Et Numa: mox alii, tempore quisque suo.

Illa patres in honore pio matresque tuetur:

Illa comes pueris virginibusque venit. 50

Illa datos fasces commendat, eburque curule:

Illa coronatis alta triumphat equis.

Finierat voces Polyhymnia. dicta probarunt

Clioque, & curvæ scita Thalia lyræ.

Excipit Uranie: fecere silentia cunctæ; 55

Et vox audiri nulla, nisi illa, potest.

Magna fuit quondam capitis reverentia cani,

Inque suo pretio ruga senilis erat.

Martis opus juvenes animosaque bella gerebant:

Et pro Dîs aderant in statione suis. 60

Viribus illa minor, nec habendis utilis armis,

Consilio patriæ sæpe ferebat opem.

Nec nisi post annos patuit tunc Curia seros:

Nomen & ætatis mite Senatus erat.

Jura dabat populo senior: finitaque certis 65

Legibus est ætas, unde petatur honos.

Et medius juvenum, non indignantibus ipsis,

Ibat: & interior, si comes unus erat.

Verba quis auderet coram sene digna rubore

Dicere? censuram longa senecta dabat. 70

Romulus hoc vidit: selectaque pectora, Patres

Dixit. ad hos Urbis summa relata novæ.

Hinc sua majores posuisse vocabula Majo

Tangor, & ætati consuluisse suæ.

Et Numitor dixisse potest, Da, Romule, mensem 75

Hunc senibus, nec avum sustinuisse nepos.

Nec leve præpositi pignus successor honoris

Junius, a juvenum nomine dictus, habet.

Tum sic, neglectos hederâ redimita capillos,

Prima sui cœpit Calliopea chori: 80

Duxerat Oceanus quondam Titanida Tethyn,

Qui terram liquidis, quâ patet, ambit aquis.

Hinc sata Pleione cum cœlifero Atlante

Jungitur, ut fama est; Pleiadasque parit.

Quarum Maja suas formâ superasse sorores 85

Traditur, & summo concubuisse Jovi.

Hæc enixa jugo cupressiferæ Cyllenes

Ætherium volucris qui pede carpit iter.

Arcades hunc, Ladonque rapax, & Mænalos ingens

Rite colunt, Lunâ credita terra prior. 90

Exsul ab Arcadiis Latios Evander in agros

Venerat; impositos attuleratque Deos.

Hic, ubi nunc Roma est orbis caput, arbor, & herbæ,

Et paucæ pecudes, & casa rara fuit.

Quod postquam ventum; Consistite, præscia mater, 95

Nam locus imperii rus erit istud, ait.

Et matri & vati paret Nonacrius heros;

Inque peregrina constitit hospes humo.

Sacraque multa quidem, sed Fauni prima bicornis

Has docuit gentes, alipedisque Dei. 100

Semicaper, coleris cinctus, Faune, Lupercis;

Cum lustrant celebres vellera secta vias.

At tu materno donasti nomine mensem,

Inventor curvæ, furibus apte, fidis.

Nec pietas hæc prima tua est: septena putaris, 105

Pleiadum numerum, fila dedisse lyræ.

Hæc quoque desierat; laudataque voce sororum est.

Quid faciam? turbæ pars habet omnis idem.

Gratia Pieridum nobis æqualiter adsit;

Nullaque laudetur plusve minusve mihi. 110

**A**B Jove surgat opus. primâ mihi nocte videnda  
Stella est in cunas officiosa Jovis.

Nascitur Oleniæ signum pluviale Capellæ:

Illa dati cælum præmia lactis habet.

Nais Amalthea Cretæâ nobilis Idæ 115

Dicitur in silvis oculuisse Jovem.

Huic fuit hædorum mater formosa duorum,

Inter Dictæos conspicienda greges;

Cornibus aeriis, atque in sua terga recurvis;

Ubere, quod nutrix posset habere Jovis. 120

Lac dabat illa Deo. sed fregit in arbore cornu:

Truncaque dimidiâ parte decoris erat.



Sustulit hoc Nymphæ; cinctumque recentibus herbis,

Et plenum pomis ad Jovis ora tulit.

Ille, ubi res cœli tenuit, solioque paterno. 125

Sedit, & invicto nil Jove majus erat,

Sidera nutricem, nutricis fertile cornu,

Fecit; quod dominæ nunc quoque nomen habet.

Præstitibus Majæ Laribus videre Kalendæ

Aram constitui, signaque parva Deûm. 130

Voverat illa quidem Curius; sed multa vetustas

Destruit, & saxo longa senectâ nocet.

Causa tamen positi fuerat cognominis illis,

Quod præstant oculis omnia tuta suis.

Stant quoque pro nobis, & præsumt mœnibus Urbis; 135

Et sunt præsentæ, auxiliumque ferunt.

At canis ante pedes, saxo fabricatus eodem,

Stabat. quæ standi cum Lare causa fuit?

Servat uterque domum, domino quoque fidus uterque.

Compita grata Deo: compita grata cani. 140

Exagitant & Lar, & turba Diania, fures:

Pervigilantque Lares, pervigilantque canes.

Bina gemellorum quærebam signa Deorum

Viribus annosæ facta caduca moræ,

Mille Lares, Geniumque Ducis, qui tradidit illos, 145

Urbs habet; & vici numina trina colunt.

Quò feror? Augustus mensis mihi carminis hujus

Jus dabit. interea Diva canenda Bona est.

Est moles nativa: loco res nomina fecit.

Adpellant saxum: pars bona montis ea est. 150  
Huic Remus institerat frustra, quo tempore fratri

Prima Palatinæ signa dedistis aves.

Templa Patres illic, oculos exosa viriles,

Leniter adclivi constituere iugo.

Dedicat hæc veteris Clausorum nominis heres, 155

Virgineo nullum corpore passa virum.

Livia restituit; ne non imitata maritum

Esset, & ex omni parte secuta virum.

**P**ostera cum roseam pulsas Hyperionis astris  
In matutinis lampada tollit equis;

160

Frigidus Argestes summas mulcebit aristas,

Candidaque a Calabris vela dabuntur aquis.

At simul inducunt obscura crepuscula noctem,

Pars Hyadum toto de grege nulla latet.

Ora micant Tauri septem radiantia flammis, 165

Navita quas Hyadas Grajus ab imbre vocat.

Pars Bacchum nutrisse putat: pars credidit esse

Tethyos has neptes, Oceanique senis.

Nondum stabat Atlas, humeros oneratus Olympo,

Cum satus est forma conspiciendus Hyas. 170

Hunc stirps Oceani maturis nisibus Æthra

Edidit, & Nymphas: sed prior ortus Hyas.

Dum nova lanugo, pavidos formidine cervos

Terret: & est illi præda benigna lepus.

At postquam virtus annis adolevit, in apros 175

Audet; & hirsutas cominus ire leas.

Dumque petit latebras sc̃etæ catulosque leænæ,

Ipse fuit Libycæ præda cruenta feræ.

Mater Hyan, & Hyan mœstæ flevere sorores,

Cervicemque polo suppositurus Atlas. 180

Victus uterque parens tamen est pietate sororum.

Illa dedit cœlum: nomina fecit Hyas.

Mater, ades, florum, ludis celebranda jocosis:

Distuleram partes mense priore tuas.

Incipis Aprili: transis in tempora Maji. 185

Alter te fugiens, cum venit alter, habet.

Cum tua sint, cedantque tibi confinia mensum,

Convenit in laudes ille vel ille tuas.

Circus in hunc exit, clamataque palma Theatris:

Hoc quoque cum Circi munere carmen eat. 190

Ipsa doce quæ sis. hominum sententia fallax.

Optima tu proprii nominis auctor eris.

Sic ego; sic nostris respondit Diva rogatis:

Dum loquitur, vernas efflat ab ore rosas.

Chloris eram, quæ Flora vocor: corrupta Latino 195

Nominis est nostri litera Græca sono.

Chloris eram Nymphæ campi felicitis, ubi audis

Rem fortunatis ante fuisse viris.

Quæ fuerit mihi forma, grave est narrare modestæ:

Sed generum matri reperit illa Deum. 200

Ver erat: errabam. Zephyrus conspexit; abibam.

Insequitur; fugio. fortior ille fuit.

Et dederat fratri Boreas jus omne rapinæ,  
 Ausus Erechtheâ præmia ferre domo.  
 Vim tamen emendat dando mihi nomina nuptæ: 205  
 Inque meo non est ulla querela toro.  
 Vere fruor semper: per me nitidissimus annus.  
 Arbor habet frondes, pabula semper humus.  
 Est mihi fecundus dotalibus hortus in agris:  
 Aura fovet; liquidæ fonte rigatur aquæ. 210  
 Hunc meus implevit generoso flore maritus;  
 Atque ait, Arbitrium tu, Dea, floris habe.  
 Sæpe ego digestos volui numerare colores,  
 Nec potui: numero copia major erat.  
 Roscida cum primum foliis excussa pruina est, 215  
 Et variæ radiis intepuere comæ;  
 Conveniunt pictis incinctæ vestibus Horæ,  
 Inque leves calathos munera nostra legunt.  
 Protinus arripiunt Charites; nectuntque coronas,  
 Sertaque cœlestes implicitura comas. 220  
 Prima per immensas sparsi nova semina gentes:  
 Unius tellus ante coloris erat.  
 Prima Therapnæo feci de sanguine florem:  
 Et manet in folio scripta querela suo.  
 Tu quoque nomen habes cultos, Narcisse, per hortos: 225  
 Infelix, quod non alter & alter eras!  
 Quid Crocon, aut Attin referam, Cinyraque creatum;  
 De quorum per me vulnere surgit honor?  
 Mars quoque, si nescis, per nostras editus artes.

Juppiter hoc ut adhuc nesciat, usque precor. 230  
 Sancta Jovem Juno, natâ sine matre Minervâ,

Officio doluit non eguisse suo.

Ibat, ut Oceano quereretur furta mariti:

Restitit ad nostras fessa labore fores.

Quam simul adpexi; Quid te, Saturnia, dixi, 235

Attulit? exponit, quem petat, illa locum.

Addidit & caussam. verbis solabar amicis.

Non, inquit, verbis cura levanda mea est.

Si pater est factus neglecto conjugis usu;

Juppiter, & nomen solus utrumque tenet; 240

Cur ego desperem fieri sine conjuge mater,

Et parere intacto, dummodo casta, viro?

Omnia tentabo latis medicamina terris;

Et freta, Tartareos excutiamque sinus.

Vox erat in cursu: vultum dubitantis habebam. 245

Nescio quid, Nymphæ, posse videris, ait.

Ter volui promittere opem, ter lingua retenta est:

Ira Jovis magni caussa timoris erat.

Fer, precor, auxilium, dixit; celabitur auctor:

Et Stygiæ numen testificatur aquæ. 250

Quod petis, Oleniis, inquam, mihi missus ab arvis

Flos dabit. est hortis unicus ille meis.

Qui dabat, Hoc, dixit, sterilem quoque tange juvencam;

Mater erit. tetigi. nec mora; mater erat.

Protinus hærentem decerpsi pollice florem. 255

Tangitur; & tacto concipit illa sinu.

Jamque gravis Thracen, & læva Propontidos intrat :

Fitque potens voti; Marsque creatus erat.

Qui memor accepti per me natalis, Habeto

Tu quoque Romulea, dixit, in Urbe locum. 260

Forsitan in teneris tantum mea regna coronis

Esse putes. tangunt numen & arva meum.

Si bene floruerint segetes; erit area dives.

Si bene floruerit vinea; Bacchus erit.

Si bene floruerint oleæ; nitidissimus annus: 265

Pomaque proventum temporis hujus habent.

Flore semel læso pereunt viciæque fabæque,

Et pereunt lentes, advena Nile, tuæ.

Vina quoque in magnis operose condita cellis

Florent: & nebulæ dolia summa tegunt. 270

Mella meum munus. volucres ego mella daturas

Ad violam, & cythisos, & thyma cana voco.

Nos quoque idem facimus: tunc cum juvenilibus annis

Luxuriant animi, corporaque ipsa virent.

Talia dicentem tacitus mirabar. at illa, 275

Jus tibi discendi, si qua requiris, ait.

Dic, Dea, Ludorum, respondi, quæ sit origo.

Vix bene desieram; retulit illa mihi.

Cetera luxuriæ nondum instrumenta vigeabant.

Aut pecus, aut latam dives habebat humum. 280

Hinc etiam locuples, hinc ipsa pecunia dicta est.

Sed jam de vetito quisque parabat opes.

Venerat in morem populi depascere saltus: . . .

- Idque diu licuit, pœnaque nulla fuit.  
Vindice servabant nullo sua publica vulgus; 285  
Jamque in privato pascere inertis erat.  
Plebis ad Ædiles delata licentia talis  
Publicios: animus defuit ante viris.  
Rem populus recipit: multam subiere nocentes.  
Vindicibus laudi publica cura fuit. 290  
Multâ data est ex parte mihi: magnoque favore  
Vîctores Ludos instituere novos.  
Parte locant clium, qui tunc erat ardua rupes.  
Utile nunc iter est; Publiciumque vocant.  
Annua credideram spectacula facta; negavit: 295  
Addidit & dictis altera verba suis.  
Nos quoque tangit honor. festis gaudemus & aris:  
Turbaque Cœlestes ambitiosa sumus.  
Sæpe Deos aliquis peccando fecit iniquos:  
Et pro delictis hostia blanda fuit. 300  
Sæpe Jovem vidi, cum jam sua mittere vellet  
Fulmina, ture dato sustinuisse manum.  
At si negligimur, magnis injuria pœnis  
Solvitur: & justum præterit ira modum.  
Respice Thestiaden: flammis absentibus arsit. 305  
Causa est, quod Phœbes ara sine igne fuit.  
Respice Tantaliden: eadem Dea vela tenebat.  
Virgo est; & spretos bis tamen ulta focos.  
Hippolyte infelix, velles coluisse Dionen,  
Cum consternatis diripereris equis. 310

Longa referre mora est correcta oblivia damnis.

Me quoque Romani præteriere Patres.

Quid facerem? per quod fierem manifesta doloris?

Exigerem nostræ qualia damna notæ?

Excidit officium tristi mihi. nulla tuebar 315

Rura: nec in pretio fertilis hortus erat.

Lilia deciderant: violas arere videres,

Filaque punicei languida facta croci.

Sæpe mihi Zephyrus, Dotes corrumpere noli

Ipsa tuas, dixit: dos mihi vilis erat. 320

Florebant oleæ; venti nocuere protervi.

Florebant segetes; grandine læsa Ceres.

In spe vitis erat: cælum nigrescit ab Austris,

Et subita frondes decutiuntur aqua.

Nec volui fieri, nec sum crudelis in ira: 325

Cura repellendi sed mihi nulla fuit.

Convenere Patres: &, si bene floreat annus,

Numinibus nostris annua festa vovent.

Adnuimus voto. Consul cum Consule Ludos

Postumio Lænas persolvere mihi. 330

Quærere conabar, quare lascivia major

His foret in Ludis, liberiorque jocus:

Sed mihi succurrit, numen non esse severum;

Aptaque deliciis munera ferre Deam.

Tempora sutilibus cinguntur tota coronis; 335

Et latet injecta splendida mensa rosâ.

Ebrius incinctis philyrâ conviva capillis



Saltat, & imprudens utitur arte meri.  
Ebrius ad durum formosæ limen amicæ  
Cantat. habent unctæ mollia sarta comæ. 340  
Nulla coronatâ peraguntur seria fronte;  
Nec liquidæ vinctis flore bibuntur aquæ.  
Donec eras mixtus nullis, Acheloe, racemis,  
Gratia sumendæ non erat ulla rosæ.  
Bacchus amat flores: Baccho placuisse coronam 345  
Ex Ariadnæo sidere nosse potes.  
Scena levis decet hanc: non est, mihi credite, non est  
Illa cothurnatas inter habenda Deas.  
Turba quidem cur hos celebrent meretricia Ludos,  
Non ex difficili caussa petenda subest. 350  
Non est de tetricis, non est de magna professis:  
Vult sua plebejo sacra patere choro.  
Et monet ætatis specie, dum floreat, uti;  
Contemni spinam, cum cecidere rosæ.  
Cur tamen, ut dantur vestes Cerealibus albæ, 355  
Sic est hæc cultu versicolore decens?  
An quia maturis albescit messis aristis,  
Et color & species floribus omnis inest?  
Adnuit; & motis flores cecidere capillis:  
Accidere in mensas ut rosa missa solet. 360  
Lumina restabant; quorum me caussa latebat.  
Cum sic errores abstulit illa meos.  
Vel quia purpureis collucent floribus agri,  
Lumina sunt nostros visa decere dies:

Vel quia nec flos est hebeti, nec flamma, colore; 369

Atque oculos in se splendor uterque trahit:

Vel quia deliciis nocturna licentia nostris

Convenit. a vero tertia caussa venit.

Est breve præterea, de quo mihi quærere restat,

Si liceat, dixi. dixit & illa, Licet. 370

Cur tibi pro Libycis claudantur rete Leænis

Imbelles capræ, sollicitusque lepus.

Non sibi, respondit, silvas cessisse; sed hortos,

Arvaque pugnaci non adeunda feræ.

Omnia finierat: tenues secessit in auras. 375

Mansit odor. posses scire fuisse Deam.

Floreat ut toto carmen Nasonis in ævo,

Sparge, precor, donis pectora nostra tuis.

**N**octe minus quartâ promet sua sidera Chiron

Semivir, & flavi corpore mixtus equi. 380

Pelion Hæmonix mons est obversus in Austros:

Summa virent pinu: cetera quercus habet.

Phillyrides tenuit. saxo stant antra vetusto,

Quæ justum memorant incoluisse senem.

Ille manus, olim missuras Heclores leto, 385

Creditur in lyricis detinuisse modis.

Venerat Alcides exacta parte laborum;

Jussaque restabant ultima pene viro.

Stare simul casu Trojæ duo fata videres:

Hinc puer Æacides, hinc Jove natus erat. 390

Exci-

Excipit hospitio juvenem Philyreius heros;  
Et caussam adventûs hic rogat, ille docet.  
Perspicit interea clavam spoliūque leonis:  
Virque, ait, his armis, armaque dignā viro.  
Nec se, quin horrens auderent tangere setis 395  
Vellus, Achilleæ continuere manus.  
Dumque senex tractat squalentia tela venenis;  
Excidit, & lævo fixa sagitta pede est.  
Ingemuit Chiron, traxitque e corpore ferrum:  
Adgemit Alcides, Hæmoniusque puer. 400  
Ipse tamen lectas Pagasæis collibus herbas  
Temperat, & variâ vulnera mulcet ope.  
Virus edax superabat opem: penitusque recepta  
Ossibus, & toto corpore pestis erat.  
Sanguine Centauri Lernææ sanguis Echidnæ 405  
Mixtus ad auxilium tempora nulla dabant.  
Stabat, ut ante patrem, lacrimis perfusus Achilles:  
Sic flendus Peleus, si moreretur, erat.  
Sæpe manus ægras manibus fingebat amicis:  
(Morum, quos fecit, præmia doctor habet.) 410  
Oscula sæpe dedit. dixit quoque sæpe jacenti:  
Vive, precor; nec me, care, relinque, pater.  
Nona dies aderat; cum tu, justissime Chiron,  
Bis septem stellis corpora cinctus eras.

**H**Unc lyra curva sequi cuperet; sed idonea nondum 415  
Est via. nox aptum tertia tempus erit.

*Ovidius* T. III.

L

**S**Corpios in cælo, cum cras lucescere Nonas  
Dicimus, a media parte notandus erit.

**H**Inc ubi protulerit formosa ter Hesperus ora,  
Ter dederint Phœbo sidera victa locum; 420  
Ritus erit veteris, nocturna Lemuria, sacri:  
Inferias tacitis Manibus illa dabunt.  
Annus erat brevior; nec adhuc pia Februa norant:  
Nec tu dux mensum, Jane biformis, eras.  
Jam tamen extincto cineri sua dona ferebant; 425  
Compositique nepos busta piabat avi.  
Mensis erat Majus, majorum nomine dictus,  
Qui partem prisci nunc quoque moris habet.  
Nox ubi jam media est, somnoque silentia præbet,  
Et canis, & variæ conticuistis aves; 430  
Ille memor veteris ritûs, timidusque Deorum,  
Surgit: habent gemini vincula nulla pedes.  
Signaque dat digitis medio cum pollice junctis,  
Occurrat tacito ne levis umbra sibi.  
Terque manus puras fontanâ perluit undâ; 435  
Vertitur, & nigras accipit ante fabas.  
Aversusque jacet: sed dum jacet, Hæc ego mitto;  
His, inquit, redimo meque meosque fabis.  
Hoc novies dicit, nec respicit. umbra putatur  
Colligere, & nullo terga vidente sequi. 440  
Rursus aquâ tangit, Temesæaque concrepat æra:

Et rogat, ut tectis exeat umbra suis.  
Cum dixit novies, Manes exite paterni,  
Respicit, & pure sacra peracta putat.  
Dicta sit unde dies, quæ nominis exstet origo, 443  
Me fugit. ex aliquo est invenienda Deo.  
Plejade nate, mone, virga venerande potenti:  
Sæpe tibi Stygii regia visa Jovis.  
Venit adoratus Caducifer: accipe caussam  
Nominis. ex ipso cognita caussa Deo est. 450  
Romulus ut tumulo fraternas condidit umbras,  
Et male veloci justa soluta Remo;  
Faustulus infelix, & passis Acca capillis  
Spangebant lacrimis ossa perusta suis.  
Inde domum redeunt sub prima crepuscula mæsti; 455  
Utque erat, in duro procubuerunt toro.  
Umbra cruenta Remi visa est adsistere lecto,  
Atque hæc exiguo murmure verba loqui:  
En ego dimidium vestri, parsque altera voti,  
Cernite sim qualis; qui modo qualis eram! 460  
Qui modo si volucres habuissem regna jubentes,  
In populo potui maximus esse meo;  
Nunc elapsa rogi flammis, & inanis imago.  
Hæc est ex illo forma relicta Remo.  
Heu! ubi Mars pater est? si vos modo vera locuti; 465  
Uberaque expositis ille ferina dedit.  
Quem lupa servavit, manus hunc temeraria civis  
Perdedit. & quanto mitior illa fuit!

Sæve Celer, crudelem animam per vulnera reddas:

Utque ego, sub terras sanguinolentus eas. 470

Noluit hoc frater. pietas æqualis in illo est.

Quod potuit, lacrimas in mea fata dedit.

Hunc vos per lacrimas, per vestra alimenta rogate,

Ut celebrem festo signet honore diem.

Mandantem amplecti cupiunt, & brachia tendunt. 475

Lubrica prensantes effugit umbra manus.

Ut secum fugiens somnos abduxit imago,

Ad regem voces fratris uterque ferunt.

Romulus obsequitur, lucemque Remuria dixit

Illam, qua positis justa feruntur avis. 480

Aspera mutata est in lenem tempore longo

Litera, quæ toto nomine prima fuit.

Mox etiam Lemures animas dixere silentum.

Is verbi sensus, vis ea vocis erat.

Fana tamen veteres illis clausere diebus; 485

Ut nunc ferali tempore aperta vides.

Nec viduæ tædis eadem, nec virginis apta

Tempora. quæ nupsit, non diuturna fuit.

Hac quoque de caussa (si te proverbia tangunt)

Mense malas Majo nubere vulgus ait. 490

Sed tamen hæc tria sunt sub eodem tempore festa

Inter se nullo continuata die.

**Q**uorum si mediis Bæoton Oriona quæres,  
Falsus eris. signi caussa canenda mihi.

Juppiter, &, lato qui regnat in æquore, frater, 495

Carpebant socias, Mercuriusque, vias.

Tempus erat, quo versa jugo referuntur aratra,

Et primum saturæ lac bibit agnus ovis.

Forte senex Hyrieus, angusti cultor agelli,

Hos videt, exiguum stabat ut ante casam. 500

Atque ita, Longa via est, nec temporalonga supersunt,

Dixit; & hospitibus janua nostra patet.

Addidit & vultum verbis; iterumque rogavit.

Parent promissis; dissimulantque Deos.

Tecta senis subeunt, nigro deformia fumo: 505

Ignis in hesterno stipite parvus erat.

Ipsæ genu posito flammæ exsuscitat aura,

Et promittit quassas comminuitque faces.

Stant calices. minor inde fabas, olus alter habebant:

Et fumant testu pressus uterque suo. 510

Dumque mora est, tremulâ dat vina rubentia dextrâ.

Accipit æquoreus pocula prima Deus.

Quæ simul exhaustit; Da nunc bibat ordine, dixit,

Juppiter. audito palluit ille Jove.

Ut rediit animus, cultorem pauperis agri 515

Immolat, & magno torret in igne bovem.

Quæque puer quondam primis diffuderat annis,

Prodit fumoso condita vina cado.

Nec mora: flumineam lino celantibus ulvam,

Sic quoque non altis, incubuere toris. 520

Nunc dape, nunc posito mensæ nituere Lyæo.

Terra rubens crater, pocula fagus erant.  
 Verba fuere Jovis: Si quid fert impetus, opta;  
 Omne feres. placidi verba fuere senis:  
 Cara fuit conjux, primæ mihi cura juventæ 525  
 Cognita; nunc ubi sit quæritis? urna tegit.  
 Huic ego juratus, vobis in verba vocatis,  
 Conjugio dixi sola fruire meo.  
 Et dixi, & servo; sed enim diversa voluntas  
 Est mihi: nec conjux, & pater esse volo. 530  
 Adnuerant omnes: omnes ad terga juvencæ  
 Constiterant. pudor est ulteriora loqui.  
 Tum superinjectâ texere madentia terrâ.  
 Jamque decem menses; & puer ortus erat.  
 Hunc Hyrieus, quia sic genitus, vocat Uriona: 535  
 Perdidit antiquum litera prima sonum.  
 Creverat immensum: comitem sibi Delia sumsit.  
 Ille Deæ custos, ille satelles erat.  
 Verba movent iras non circumspecta Deorum.  
 Quam nequeam, dixit, vincere, nulla fera est. 540  
 Scorpion immisit Tellus. fuit impetus illi  
 Curva gemelliparæ spicula ferre Deæ.  
 Obstitit Orion. Latona nitentibus astris  
 Addidit: &, Meriti præmia, dixit, habe.  
**S**ED quid & Orion, & cetera sidera mundo 545  
 Cedere festinant, noxque coartat iter?  
 Quid solito citius liquido jubar æquore tollit



Candida, Lucifero præveniente, dies?

Fallor? an armasonant? non fallimur: arma sonabant:

Mars venit; & veniens bellica signa dedit. 350

Ultor ad ipse suos cœlo descendit honores,

Templaque in Augusto conspicienda Foro.

Et Deus est ingens, & opus. debebat in Urbe

Non aliter nati Mars habitare sui.

Digna Giganteis hæc sunt delubra tropæis: 355

Hinc fera Gradivum bella movere decet;

Seu quis ab Eoo nos impius orbe lacesset,

Seu quis ab occiduo Sole domandus erit.

Prospicit armipotens operis fastigia summi:

Et probat invictos summa tenere Deos. 360

Prospicit in foribus diversæ tela figuræ,

Armaque terrarum milite victa suo.

Hinc videt Ænean oneratum pondere sacro,

Et tot Iulæ nobilitatis avos.

Hinc videt Iliaden humeris ducis arma ferentem, 365

Claraque dispositis acta subesse viris.

Speñat & Augusto prætextum nomine templum,

Et visum, lecto Cæsare, majus opus.

Voverat hoc juvenis tunc, cum pia sustulit arma.

A tantis Princeps incipiendus erat. 370

Ille inanus tendens, hinc stanti milite justo,

Hinc conjuratis, talia dicta dedit:

Si mihi bellandi pater est, Vestæque sacerdos

Auctor, & ulcisci numen utrumque paro;

Mars, ades; & satia scelerato sanguine ferrum: 575

Stetque favor caussa pro meliore tuus.

Templa feres, & me victore vocaberis Ultor.

Voverat; & fuso lætus ab hoste redit.

Nec satis est meruisse semel cognomina Marti:

Persequitur Parthâ signa retenta manu. 580

Gens fuit & campis, & equis, & tuta sagittis;

Et circumfusus invia fluminibus.

Addiderant animos Crassorum funera genti;

Cum periit miles, signaque, duxque simul.

Signa, decus belli, Parthus Romana tenebat; 585

Romanæque aquilæ signifer hostis erat.

Isque pudor mansisset adhuc, nisi fortibus armis

Cæsaris Ausoniæ protegerentur opes.

Ille notas veteres, & longi dedecus ævi

Sustulit. agnorunt signa recepta suos. 590

Quid tibi nunc solitæ mitti post terga sagittæ,

Quid loca, quid rapidi profuit usus equi?

Parthe, refers aquilas: victos quoque porrigis arcus.

Pignora jam nostri nulla pudoris habes.

Rite Deo templumque datum nomenque bis ulto; 595

Et meritis votis debita solvit honos.

Sollemni Ludos Circo celebrate, Quirites:

Non visa est fortem scena decere Deum.

**P** Lejadas adspicies omnes, totumque sororum

Agmen, ubi ante Idus nox erit una super. 600

Tum mihi non dubiis auctoribus incipit æstas;  
Et tepidi finem tempora veris habent.

**I**Dibus ora prior stellantia tollere Taurum  
Indicat: huic signo fabula nota subest.  
Præbuit, ut taurus, Tyriæ sua terga puellæ 605  
Juppiter, & falsâ cornua fronte tulit.  
Illa jubam dextrâ, lævâ retinebat amictus;  
Et timor ipse novi caussa decoris erat.  
Aura sinus implet: flavos movet aura capillos.  
Sidoni, sic fueras accipienda Jovi. 610  
Sæpe puellares subducit ab æquore plantas;  
Et metuit tactus adsilientis aquæ.  
Sæpe Deus prudens tergum demittit in undas,  
Hæreat ut collo fortius illa suo.  
Litoribus tactis stabat sine cornibus ullis 615  
Juppiter: inque Deum de bove versus erat.  
Taurus init cælum. te, Sidoni, Juppiter implet:  
Parsque tuum terræ tertia nomen habet.  
Hoc alii signum Phariam dixere juvencam;  
Quæ bos ex homine est, ex bove facta Dea. 620  
Tum quoque priscorum virgo simulacra virorum  
Mittere roboreo scirpea ponte solet.  
Corpora post decies senos qui credidit annos  
Missa neci, sceleris crimine damnat avos.  
Fama vetus: tum cum Saturnia terra vocata est, 625  
Taliam fatidici dicta fuere Dei:

Falcifero libata seni duo corpora, gentes,

Mittite; quæ Thuscis excipiantur aquis.

Donec in hæc venit Tirynthius arva, quotannis

Tristia Leucadio sacra peracta modo: 630

Illum stramineos in aquam misisse Quirites:

Herculis exemplo corpora falsa jaci.

Pars putat, ut ferrent juvenes suffragia soli,

Pontibus infirmos præcipitasse senes.

Thybrî, doce verum: tua ripa vetustior Urbe. 635

Principium ritûs tu bene nosse potes.

Thybris arundiferum medio caput extulit alveo;

Raucaque dimovit talibus ora sonis:

Hæc loca desertas vidi sine mœnibus herbas:

Pascebat sparsos utraque ripa boves. 640

Et quem nunc gentes Tiberin noruntque timentque,

Tunc etiam pecori despiciendus eram.

Arcadis Evandri nomen tibi sæpe refertur:

Ille meas remis advena torsit aquas.

Venit & Alcides, turba comitatus Achiva. 645

Albula, si memini, tunc mihi nomen erat.

Excipit hospitio juvenem Pallantius heros:

Et tandem Caco debita pœna venit.

Victor abit, secumque boves, Erytheida prædam,

Abstrahit, at comites longius ire negant. 650

Magnaue pars horum desertis venerat Argis:

Montibus his ponunt spemque Laremque suum.

Sæpe tamen patriæ dulci tanguntur amore;

Atque aliquis moriens hoc breve mandat opus:  
 Mittite me Tiberi: Tiberinis vectus ut undis 655  
 Litus ad Inachium pulvis inanis eam.  
 Displicet heredi mandati cura sepulcri:  
 Mortuus Ausonia conditur hospes humo.  
 Scirpea pro domino Tiberi jactatur imago,  
 Ut repetat Grajas per freta longa domus. 660  
 Hastenus: ut vivo subiit rorantia saxo  
 Antra, leves cursum sustinuistis aquæ.

**C**Lare nepos Atlantis, ades: quem montibus olim  
 Edidit Arcadiis Pleias una Jovi.  
 Pacis & armorum Superis imisque Deorum 665  
 Arbiter, alato qui pede carpis iter:  
 Læte lyræ pulsu, nitida quoque læte palæstra;  
 Quo didicit culte lingua favente loqui.  
 Templa tibi posuere Patres spectantia Circum  
 Idibus. ex illo est hæc tibi festa dies. 670  
 Te, quicumque suas profitetur vendere merces,  
 Ture dato, tribuas ut sibi lucra, rogat.  
 Est aqua Mercurii portæ vicina Capenæ:  
 Si juvat expertis credere, numen habet.  
 Huc venit incinctus tunicas mercator; & urnâ 675  
 Purus suffitâ, quam ferat, haurit aquam.  
 Uda fit hinc laurus: lauro sparguntur ab uda  
 Omnia, quæ dominos sunt habitura novos.  
 Spargit & ipse suos lauro rorante capillos:

Et peragit solitâ fallere voce preces. 680  
 Ablue præteriti perjurâ temporis, inquit.  
 Ablue præteritâ perfida verba die.  
 Sive ego te feci testem, falsove citavi  
 Non audituri numina magna Jovis;  
 Sive Deum prudens alium Divamve fefelli; 685  
 Abstulerint celeres improba dicta Noti.  
 Et pereant veniente die perjurâ nobis:  
 Nec curent Superi, si qua locutus ero.  
 Da modo lucra mihi, da factô gaudia lucro:  
 Et face, ut emtori verba dedisse juvet. 690  
 Talia Mercurius poscentem ridet ab alto,  
 Se memor Ortygias surripuisse boves.

**A**T mihi pande, precor, tanto meliora petenti,  
 In Geminos ex quo tempore Phœbus eat.  
 Cum totidem de mense dies superesse videbis, 695  
 Quot sunt Herculei facta laboris, ait.  
 Dic, ego respondi, caussam mihi sideris hujus.  
 Caussam facundo prodidit ore Deus.  
 Abstulerant raptas Phœben Phœbesque sororem  
 Tyndaridæ fratres, hic eques, ille pugil. 700  
 Bella parant, repetuntque suas & frater & Idas,  
 Leucippo fieri pactus uterque gener.  
 His amor, ut repetant, illis, ut reddere nolint,  
 Suadet: & ex caussa pugnat uterque pari.  
 Effugere Cebalidæ cursu potuere sequentes: 705

Sed visum celeri vincere turpe fuga.

Liber ab arboribus locus est, apta area pugnæ.

Constiterant illic: nomen Aphidna loco.

Pectora trajectus Lynceo Castor ab ense

Non expectato vulnere pressit humum. 710

Ultor adest Pollux; & Lyncea perforat hastâ,

Quâ cervix humeros continuata premit.

Ibat in hunc Idas, vixque est Jovis igne repulsus:

Tela tamen dextræ fulmine rapta negant.

Jamque tibi cœlum, Pollux, sublime patebat; 715

Cum, Mea, dixisti, percipe verba, Pater.

Quod mihi das uni, cœlum partire duobus:

Dimidium toto munere majus erit.

Dixit, & alterna fratrem statione redemit:

Utile sollicitæ sidus uterque rati. 720

Ad Janum redeat, qui quærit Agonia quid sint.

Quæ tamen in Fastis hoc quoque tempus habent.

Nocte sequente diem canis Erigoneius exit.

Est alio signi reddita caussa loco.

**P**roxima Vulcani lux es; Tubilustria dicunt. 725

Lustrantur puræ, quas facit ille, tubæ.

**Q**uatuor inde notis locus est; quibus ordine lectis  
Vel mos sacrorum, vel Fuga Regis inest.

**N**EC te prætereo, populi Fortuna potentis

Publica; cui templum luce sequente datum. 730  
Hanc ubi dives aquis acceperit Amphitrite,  
Grata Jovi fulvæ rostra videbis avis.

**A**uferat ex oculis veniens Aurora Booten;  
Continuæque die sidus Hyantis erit.







P. OVIDII NASONIS  
**F A S T O R U M**  
*L I B E R VI.*

**H**IC quoque mensis habet dubias in nomine causas:  
 Quæ placeant, positis omnibus, ipse leges.  
 Facta canam; sed erunt, qui me finxisse loquantur:  
 Nullaque mortali numina visa putent.  
 Est Deus in nobis: agitante calescimus illo. 5  
 Impetus hic sacræ semina mentis habet.  
 Fas mihi præcipue vultus vidisse Deorum:  
 Vel quia sum vates; vel quia sacra cano.  
 Est nemus arboribus densum, secretus ab omni  
 Voce locus; si non obstreperetur aquis. 10  
 Hic ego quærebam, cœpti quæ mensis origo  
 Esset, & in cura nominis hujus eram.  
 Ecce Deas vidi: non quas præceptor arandi  
 Viderat, Ascræas cum sequeretur oves.  
 Nec quas Priamides in aquosæ vallibus Idæ 15  
 Contulit. ex illis sed tamen una fuit.

Ex illis fuit una, sui germana mariti.

Hæc erat, agnovi, quæ stat in arce Jovis.

Horrueram, tacitoque animum pallore fatebar;

Cum Dea, quos fecit, sustulit ipsa metus: 20

Namque, ait, O vates, Romani conditor anni,

Ause per exiguos magna referre modos;

Jus tibi fecisti numen cœleste videndi,

Cum placuit numeris condere festa tuis.

Ne tamen ignores, vulgique errore traharis, 25

Junius a nostro nomine nomen habet.

Est aliquid nupsisse Jovi, Jovis esse sororem.

Fratre magis, dubito, glorier, anne viro.

Si genus adspicitur, Saturnum prima parentem

Feci: Saturni sors ego prima fui. 30

A patre dicta meo quondam Saturnia Roma est:

Hæc illi a cœlo proxima terra fuit.

Si torus in pretio est, dicor matrona Tonantis;

Junctaque Tarpejo sunt mea templa Jovi.

An potuit Majo pellex dare nomina mensi? 35

Hic honor in nobis invidiosus erit?

Cur igitur Regina vocor, Princepsque Dearum?

Aurea cur dextræ sceptrâ dedere meæ?

An faciant mensem luces, Lucinaque ab illis

Dicar; & a nullo nomina mense traham? 40

Tum me pœniteat posuisse fideliter iras

In genus Electræ, Dardaniamque domum.

Causa duplex iræ. raptō Ganymede dolebam:

Forma

Forma quoque Idæo judice victa mea est.

Pœniteat, quod non foveo Carthaginis arces; 45

Cum mea sint illo currus & arma loco.

Pœniteat Sparten, Argosque, measque Mycenâs,

Et veterem Latio supposuisse Samon.

Adde senem Tatium, Junonicolasque Faliscos;

Quos ego Romanis succubuisse tuli. 50

Sed neque pœniteat: nec gens mihi carior ulla est.

Hîc colar, hîc teneam cum Jove templa meo.

Ipse mihi Mavors, Commendo mœnia, dixit,

Hæc tibi: tu pollens Urbe nepotis eris. 55

Dicta fides sequitur. centum celebramur in aris: 55

Nec levior quovis est mihi mensis honor.

Nec tamen hunc nobis tantummodo præstat honorem

Roma: suburbani dant mihi munus idem.

Inspice, quos habeat nemoralis Aricia Fastos,

Et populus Laurens, Lanuviumque meum: 60

Est illic mensis Junonius. inspicere Tibur,

Et Prænestinæ mœnia sacra Deæ:

Junonale leges tempus. nec Romulus illas

Condidit: at nostri Roma nepotis erat. 65

Finierat Juno. respeximus. Herculis uxor 65

Stabat; & in vultu signa dolentis erant.

Non ego, si toto mater me cedere cœlo

Jusserit, invitâ matre morabor, ait.

Nunc quoque non luctor de nomine temporis hujus.

Blandior; & partes pene rogantis ago. 70

Ovidius T. III.

M

Remque mei juris malim tenuisse precando;  
Et faveas causæ forsitan ipse meæ.  
Aurea possedit socio Capitolia templo  
Mater, &, ut debet, cum Jove summa tenet.  
At decus omne mihi contingit origine mensis. 75  
Unicus est, de quo sollicitamur, honor.  
Quid grave, si titulum mensis, Romane, dedistis  
Herculis uxori, posteritasque memor?  
Hæc quoque terra aliquid debet mihi nomine magni  
Conjugis. huc captas adpulit ille boves. 80  
Hic male defensus flammis & dote paterna  
Cacus Aventinam sanguine tinxit humum.  
Ad propiora vocor. populum digessit ab annis  
Romulus, in partes distribuitque duas.  
Hæc dare consilium, pugnare paratior illa est: 85  
Hæc ætas bellum suadet, at illa gerit.  
Sic statuit, mensesque nota secrevit eadem.  
Junius est juvenum; qui fuit ante, senum.  
Dixit: & in litem studio certaminis issent;  
Atque irâ pietas dissimulata foret. 90  
Venit Apollineâ longas Concordia lauro  
Nexa comas, placidi numen opusque Ducis.  
Hæc ubi narravit Tatium, fortemque Quirinum,  
Binaque cum populis regna coisse suis,  
Et Lare communi soceros generosque receptos; 95  
His nomen junctis Junius, inquit, habet.  
Dicta triplex causa est. at vos ignoscite, Divæ:

Res est arbitrio non dirimenda meo.

Ite pares a me. perierunt iudice formæ

Pergama: plus lædunt, quam juvet una, duæ. 100

**P**rima dies tibi, Carna, datur. Dea cardinis hæc est.

Numine clausa aperit, claudit aperta suo.

Unde datas habeat vires, obscurior ævo

Fama: sed e nostro carmine certus eris.

Adjacet antiqui Tiberino lucus Helerni: 105

Pontifices illuc nunc quoque sacra ferunt.

Inde sata est Nymphæ (Grænen dixere priores)

Nequicquam multis sæpe petita procis.

Rura sequi, jaculisque feras agitare solebat;

Nodosasque cava tendere valle plagas. 110

Non habuit pharetram: Phœbi tamen esse sororem

Credebant. nec erat, Phœbe, pudenda tibi.

Huic aliquis juvenum dixisset amantia verba;

Reddebat tales protinus illa sonos:

Hæc loca lucis habent nimis, & cum luce pudoris. 115

Si secreta magis ducis in antra, sequor.

Credulus antra subit. frutices hæc nacta resistit:

Et latet, & nullo est invenienda modo.

Viderat hanc Janus; visæque cupidine captus

Ad duram verbis mollibus usus erat. 120

Nympha jubet quæri de more remotius antrum;

Utque comès sequitur, destituitque ducem.

Stulta, videt Janus quæ post sua terga gerantur.

Nil agis en: latebras respicit ille tuas.

Nil agis en, dixi. nam te sub rupe latentem 125

Occupat amplexu; speque potitus ait:

Jus pro concubitu nostro tibi cardinis esto.

Hoc pretium positæ virginitatis habe.

Sic fatus, spinam, qua tristes pellere posset

A foribus noxas, (hæc erat alba) dedit. 130

Sunt avidæ volucres; non quæ Phineia mensis

Guttura fraudabant: sed genus inde trahunt.

Grande caput: stantes oculi: rostra apta rapinæ:

Canities pennis, unguibus hamus inest.

Nocte volant, puerosque petunt nutricis egentes; 135

Et vitiant cunis corpora rapta suis.

Carpere dicuntur lactentia viscera rostris;

Et plenum poto sanguine guttur habent.

Est illis strigibus nomen: sed nominis hujus

Caussa, quod horrenda stridere nocte solent. 140

Sive igitur nascuntur aves, seu carmine fiunt,

Næniaque in volucres Marsa figurat anus;

In thalamos venere Procæ. Proca, natus in illis,

Præda recens avium quinque diebus erat.

Pectoraque exsorbent avidis infantia linguis. 145

At puer infelix vagit, opemque petit.

Territa voce sui nutrix adcurrit alumni;

Et rigido sæclas invenit ungue genas.

Quid faceret? color oris erat, qui frondibus olim

Esse solet seris, quas nova læsit hiems. 150

Pervenit ad Granen, & rem docet. illa, Timorem

Pone; tuus sospes, dixit, alumnus erit.

Venerat ad cunas: flebant materque paterque.

Sistite vos lacrimas, ipsa medebor, ait.

Protinus arbuteâ postes ter in ordine tangit 155

Fronde: ter arbuteâ limina fronde notat.

Spargit aquis aditus, sed quæ medicamen habebant:

Extaque de porcâ cruda bimestre tenet.

Atque ita, Noctis aves, extis puerilibus, inquit,

Parcite: pro parvo victima parva cadit. 160

Cor pro corde, precor, pro fibris sumite fibras.

Hanc animam vobis pro meliore damus:

Sic ubi libavit, prosecta sub æthere ponit:

Quique sacris adsunt, respicere illa vetat.

Virgaque Janalis de spinâ sumitur albâ: 165

Qua lumen thalamis parva fenestra dabat.

Post illud nec aves cunas violasse feruntur;

Et rediit puero, qui fuit ante, color.

Pingua cur illis gustentur larda Kalendis,

Mixtaque cur calido sit faba farre, rogas? 170

Prisca Dea est, aliturque cibus, quibus ante solebat:

Nec petit adscitas luxuriosa dapes.

Piscis adhuc illi populo sine fraude natabat:

Ostreaque in conchis tuta fuere suis:

Nec Latium norat, quam præbet Ionia dives, 175

Nec quæ Pygmæo sanguine gaudet, avem.

Et præter pennas nihil in pavone placebat:

Nec tellus captas miserat ante feras.

Sus erat in pretio: cæsâ sue festa colebant.

Terra fabas tantum, duraque farra dabat. 180

Quæ duo mixta simul sextis quicumque Kalendis

Ederit, huic lædi viscera posse negant.

Arce quoque in summa Junoni templa Monetæ

Ex voto memorant facta, Camille, tuo.

Ante domus Manli fuerant; qui Gallica quondam 185

A Capitolino repulit arma Jove.

Quam bene (Dî magni) pugna cecidisset in illa

Defensor solii, Juppiter alte, tui!

Vixit, ut occideret damnatus crimine regni.

Hunc illi titulum longa senectâ dabat. 190

Lux eadem Marti festa est; quem prospicit extra

Adpositum Tectæ porta Capena viæ.

Te quoque, Tempestas, meritam delubra fatemur;

Cum pene est Corsis obruta classis aquis.

Hæc hominum monumenta patent, si quæritis astra; 195

Tunc oritur magni præpes adunca Jovis.

**P**ostera lux Hyadas Taurinæ cornua frontis  
Evocat: & multâ terra madescit aquâ.

**M**ane ubi bis fuerit, Phœbusque iteraverit ortus,  
Factaque erit posito rore bis uda seges; 200  
Hac sacrata die Thusco Bellona duello  
Dicitur: & Latio prospera semper adest.



Appius est auctor: Pyrrho qui pace negata  
 Multum animo vidit; lumine captus erat.  
 Prospicit a templo summum brevis area Circum. 205  
 Est ibi non parvæ parva columna notæ.  
 Hinc solet hasta manu, belli prænuntia, mitti;  
 In Regem & gentes cum placet arma capi.

**A**Ltera pars Circi custode sub Hercule tuta est:  
 Quod Deus Euboico carmine munus habet. 210  
 Muneris est tempus, qui Nonas Lucifer ante est.  
 Si titulos quæris, Sylla probavit opus.

**Q**Uærebam Nonas Sanco Fidione referrem,  
 An tibi, Semo pater; cum mihi Sancus ait:  
 Cuicumque ex illis dederis, ego munus habebo. 215  
 Nomina rina fero: sic voluere Cures.  
 Hunc igitur veteres donarunt æde Sabini:  
 Inque Quirinali constituere iugo.

**E**ST mihi (sitque, precor, nostris diuturnior annis)  
 Filia: qua felix sospite semper ero. 220  
 Hanc ego cum vellem genero dare, tempora tædis  
 Apta requirebam, quæque cavenda forent.  
 Tum mihi post sacras monstratur Junius Idus  
 Utilis & nuptis, utilis esse viris.  
 Primaque pars hujus thalamis aliena reperta est. 225  
 Nam mihi sic conjux sancta Dialis ait:

Donec ab Iliacâ placidus purgamina Vestâ  
 Detulerit flavis in mare Thybris aquis;  
 Non mihi detonsos crines depectere buxo,  
 Non ungues ferro subsecuisse licet: 230  
 Non tetigisse virum; quamvis Jovis ille sacerdos,  
 Quamvis perpetua sit mihi lege datus.  
 Tu quoque ne propera: melius tua filia nubet,  
 Ignea cum purâ Vesta nitebit humo.

**T**ertia post Nonas remove Lycaona Phœbe 235  
 Fertur: & a tergo non habet Ursa metum.  
 Tunc ego me memini Ludos in gramine Campi  
 Adspicere; & didici, lubrice Thybri, tuos.  
 Festa dies illis, qui lina madentia ducunt,  
 Quique tegunt parvis æra recurva cibus. 240

**M**ens quoque numen habet. Menti delubra videmus  
 Vota metu belli, perfide Pœne, tui.  
 Pœne, rebellaras; & leto Consulis omnes  
 Attoniti Mauras pertimuerunt manus.  
 Spem metus expulerat; cum Menti vota Senatus 245  
 Suscipit; & melior protinus illa venit.  
 Adspicit instantes mediis sex lucibus Idus  
 Illa dies, qua sunt vota soluta Deæ.

**V**esta, fave: tibi nunc operata resolvimus ora:  
 Ad tua si nobis sacra venire licet. 250

In prece totus eram. cœlestia numina sensi;  
Lætæque purpureâ luce refulsit humus.  
Non equidem vidi (valeant mendacia vatum)  
Te, Dea; nec fueras adspicienda viro.  
Sed quæ nescieram, quorumque errore tenebar, 255  
Cognita sunt nullo præcipiente mihi.  
Dena quater memorant habuisse Palilia Romam,  
Cum flammæ custos æde recepta suâ est.  
Regis opus placidi, quo non metuentius ullum  
Numinis ingenium terra Sabina tulit. 260  
Quæ nunc ære vides, stipulâ tunc tecta videres:  
Et paries lento vimine textus erat.  
Hic locus exiguus, qui sustinet atria Vestæ,  
Tunc erat intonsi regia magna Numæ.  
Forma tamen templi, quæ nunc manet, ante fuisse 265  
Dicitur: & formæ caussa probanda subest.  
Vestæ eadem est, quæ Terra: subest vigil ignis utrique.  
Significant sedem terra focusque suam.  
Terra pilæ similis, nullo fulcimine nixa,  
Aere subjecto tam grave pendet onus. 270  
Ipsa volubilitas libratum sustinet orbem:  
Quique premat partes, angulus omnis abest.  
Cumque sit in media rerum regione locata,  
Et tangat nullum plusve minusve latus;  
Ni convexa foret, parti vicinior esset: 175  
Nec medium terram mundus haberet onus.  
Arte Syracosia suspensus in aere clauo

Stat globus, immensi parva figura poli.  
Et quantum a summis, tantum secessit ab imis  
Terra: quod ut fiat, forma rotunda facit. 280  
Pār facies templi: nullus procurrit in illo  
Angulus. a pluvio vindicat imbre tholus.  
Cur sit virgineis, quæris, Dea culta ministris?  
Inveniam caussas hac quoque parte suas.  
Ex Ope Junonem memorant Cereremque creatas 285  
Semine Saturni: tertia Vesta fuit.  
Utraque nupserunt; ambæ peperisse feruntur:  
De tribus impatiens restitit una viri.  
Quid mirum, virgo si virgine læta ministrâ  
Admittit castas in sua sacra manus? 290  
Nec tu aliud Vestam, quam vivam intellige flammam.  
Nataque de flamma corpora nulla vides.  
Jure igitur virgo est, quæ semina nulla remittit,  
Nec capit: & comites virginitatis habet.  
Esse diu stultus Vestæ simulacra putavi: 295  
Mox didici curvo nulla subesse tholo.  
Ignis inextinctus templo celatur in illo.  
Effigiem nullam Vesta, nec ignis, habent.  
Stat vi terra suâ: vi stando Vesta vocatur.  
Caussaque par Graji nominis esse potest. 300  
At focus a flammis, & quod fovet omnia dictus:  
Qui tamen in primis ædibus ante fuit.  
Hinc quoque vestibulum dici reor: inde precando  
Adfamur Vestam, Quæ loca prima tenes.

Ante focos olim longis considerare scamnis 305

Mos erat, & mensæ credere adesse Deos.

Nunc quoque, cum fiunt antiquæ sacra Vacunæ,

Ante Vacunales stantque sedentque focos.

Venit in hos annos aliquid de more vetusto:

Fert missos Vestæ pura patella cibos. 310

Ecce, coronatis panis dependet asellis;

Et velant scabras florida sarta molas.

Sola prius furnis torrebant farra coloni;

Et Fornacali sunt sua sacra Deæ.

Suppositum cineri panem focus ipse parabat; 315

Strataque erat tepido tegula quassa solo.

Inde focum servat pistor, dominamque focorum,

Et quæ pumiceas versat asella molas.

Præteream, referamne tuum, rubicunde Priape,

Dedecus? est multi fabula plena joci. 320

Turrigerâ frontem Cybele redimita coronâ

Convocat æternos ad sua festa Deos.

Convocat & Satyros, &, rustica numina, Nymphas.

Silenus, quamvis nemo vocarat, adest.

Nec licet, & longum est epulas narrare Deorum: 325

In multo nox est pervigilata mero.

Hi temere errabant in opacæ vallibus Idæ:

Pars jacet, & molli gramine membra levat.

Hi ludunt; hos somnus habet; pars brachia nectit,

Et viridem celeri ter pede pulsat humum. 330

Vesta jacet, placidamque capit segura quietem,

Sicut erat positum cespite fulta caput.  
At, ruber hortorum custos Nymphasque Deasque  
Captat; & errantes fertque refertque pedes.  
Adspicit & Vestam; dubium, Nymphamne putarit, 335  
An scierit Vestam: scisse sed ipse negat.  
Spem capit obscænam, furtimque accedere tentat;  
Et fert suspensos, corde micante, gradus.  
Forte senex, quo veltus erat, Silenus asellum  
Liquerat ad ripas lene sonantis aquæ. 340  
Ibat, ut inciperet longi Deus Hellesponti;  
Intempestivo cum rudit ille sono.  
Territa voce gravi surgit Dea. convolat omnis  
Turba. per infestas effugit ille manus.  
(Lampsacos hoc animal solita est mactare Priapo: 345  
Apta asini flammis indicis exta damus.)  
Quem tu, Diva memor, de pane monilibus ornas.  
Cessat opus: vacuæ conticuere molæ.  
Nomine, quam pretio celebratior, arce Tonantis,  
Dicam Pistoris quid velit ara Jovis. 350  
Cincta premebantur trucibus Capitolia Gallis:  
Fecerat obsidio jam diuturna famem.  
Juppiter ad solium Superis regale vocatis,  
Incipe, ait Marti. protinus ille refert:  
Scilicet ignotum est, quæ sit fortuna meorum, 355  
Et dolor hic animi voce querentis eget?  
Si tamen, ut referam breviter mala juncta pudori,  
Exigis: Alpino Roma sub hoste jacet.

Hæc est, cui fuerat promissa potentia rerum,  
 Juppiter? hanc terris impositurus eras? 360  
 Jamque Suburbanos, Hetruscaque contudit arma.  
 Spes erat in cursu. nunc Lare pulsa suo est.  
 Vidimus ornatos, ærata per atria, pictâ  
 Veste, triumphales occubuisse senes.  
 Vidimus Iliacæ transferri pignora Vestæ 365  
 Sede. putant aliquos scilicet esse Deos?  
 At si respicerent, qua vos habitatis in arce,  
 Totque domos vestras obsidione premi;  
 Nil opis in cura scirent superesse Deorum,  
 Et data sollicitâ tura perire manu. 370  
 Atque utinam pugnæ pateat locus! arma capessant;  
 Et, si non poterunt exsuperare, cadant.  
 Nunc inopes victûs, ignavaque fata timentes,  
 Monte suo clausos barbara turba premit.  
 Tum Venus, & lituo pulcher trabeaque Quirinus, 375  
 Vestaque pro Latio multa locuta suo.  
 Publica, respondit, cura est pro mœnibus istis,  
 Juppiter: & pœnas Gallia victa dabit.  
 Tu modo, quæ desunt fruges, superesse putentur,  
 Effice: nec sedes desere, Vesta, tuas. 380  
 Quodcumque est Cereris solidæ, cava machina frangat;  
 Mollitamque manu duret in igne focus.  
 Jusserat: & fratri virgo Saturnia jussit  
 Adnuit; & mediæ tempora noctis erant.  
 Jam ducibus somnum dederat labor. increpat illos 385

Juppiter: & sacro, quid velit, ore docet:  
Surgite, & in medios de summis arcibus hostes  
Mittite, quam minime perdere vultis, opem.  
Somnus abit, quæruntque novis ambagibus acti,  
Perdere quam nolint, & jubeantur, opem. 390  
Ecce, Ceres visa est. jaciunt Cerealia dona.  
Jacta super galeas scutaque longa sonant.  
Posse fame vinci spes excidit. hoste repulso  
Candida Pistori ponitur ara Jovi.  
Forte revertebar sacris Vestalibus illac, 395  
Quâ Nova Romano nunc Via juncta Foro est.  
Huc pede matronam vidi descendere nudo:  
Obstupui, tacitus sustinuique gradum.  
Sensit anus vicina loci: jussumque sedere  
Adloquitur, quatiens, voce tremente, caput. 400  
Hoc, ubi nunc fora sunt, udæ tenuere paludes:  
Amne redundatis fossa madebat aquis.  
Curtius ille lacus, siccas qui sustinet aras,  
Nunc solida est tellus, sed lacus ante fuit.  
Quâ Velabra solent in Circum ducere pompas, 405  
Nil præter salices cassaque canna fuit.  
Sæpe suburbanas rediens conviva per undas  
Cantat, & ad nautas ebria verba jacit.  
Nondum conveniens diversis iste figuris  
Nomen ab averso ceperat amne Deus. 410  
Hic quoque lucus erat, juncis & arundine densus,  
Et pede velato non adeunda palus.



Stagna recesserunt, & aquas sua ripa coercent:

Siccaque nunc tellus. mos tamen inde manet.

Reddiderat caussam. Valeas, anus optima, dixi: 415

Quod superest ævi, molle sit omne, tui.

Cetera jam pridem didici puerilibus annis;

Non tamen idcirco prætereunda mihi.

Mœnia Dardanides nuper nova fecerat Ilus:

Ilus adhuc Asiæ dives habebat opes. 420

Creditur armiferæ signum cœleste Minervæ

Urbis in Iliacæ desiluisse juga.

Cura videre fuit: vidi templumque locumque.

Hoc superest illi: Pallada Roma tenet.

Consulitur Smintheus: lucoque obscurus opaco 425

Hos non mentito reddidit ore sonos:

Ætheriam servate Deam; servabitis Urbem:

Imperium secum transferet illa laci.

Servat, & inclusam summa tenet Ilus in arce:

Curaque ad heredem Laomedonta venit. 430

Sub Priamo servata parum. sic ipsa volebat:

Ex quo iudicio forma revicta suo est.

Seu genus Adrasti, seu furtis aptus Ulixes,

Seu pius Æneas, eripuisse datur.

Auctor in incerto. res est Romana: tuetur 435

Vesta, quod assiduo lumine cuncta videt.

Heu quantum timuere Patres, quo tempore Vesta

Arsit, & est adytis obruta pene suis!

Flagrabant sancti sceleratis ignibus ignes:

Mixtaque erat flammæ flamma profana piæ. 440  
Attonitæ flebant, demisso crine, ministræ:

Abstulerat vires corporis ipse timor.

Provolat in medium, & magna, Succurrite, voce,  
Non est auxilium flere, Metellus ait.

Pignora virgineis fatalia tollite palmis: 445

Non eâ sunt voto, sed rapienda manu.

Me miserum! dubitatis? ait. dubitare videbat,

Et pavidas posito procubuisse genu.

Haurit aquas: tollensque manus, Ignoscite, dixit,

Sacra: vir intrabo non adeunda viro. 450

Si scelus est; in me commissi pœna redundet.

Sit capitis damno Roma soluta mei.

Dixit, & irrupit: factum Dea rapta probavit;

Pontificisque sui munere tuta fuit.

Nunc bene lucetis sacræ sub Cæsare flammæ: 455

Ignis in Iliacis nunc erit, estque, focis.

Nullaque dicetur vittas temerasse sacerdos

Hoc Duce: nec vivâ defodietur humo.

Sic incesta perit: quia quam violavit, in illam

Conditur: & Tellus Vestaque numen idem est. 460

Tum sibi Callaico Brutus cognomen in hoste

Fecit, & Hispanam sanguine tinxit humum.

Scilicet interdum miscentur tristia lætis;

Ne populum toto pectore festa juvent.

Grassus ad Euphraten Aquilas, natumque, suosque 465

Perdidit: & leto est ultimus ipse datus.

Parthe,

Parthe, quid exsultas? dixit Dea. signa remittes:  
 Quique necem Crassi vindicet, ultor erit.

**A**T simul auritis violæ demuntur asellis,  
 Et Cereris fruges aspera saxa terunt; 470  
 Navita puppe sedens, Delphina videbimus, inquit,  
 Humida cum pulso nox erit orta die.

**J**AM, Phryx, a nupta quæreris, Tithone, relinqui;  
 Et vigil Eois Lucifer exit aquis.  
 Ite, bonæ matres, (vestrum Matralia festum) 475  
 Flavaque Thebanæ reddite liba Deæ.  
 Pontibus & magno juncta est celeberrima Circo  
 Area: quæ posito de bove nomen habet.  
 Hac ibi luce ferunt Matutæ sacra parenti  
 Scepтрiferas Servî templa dedisse manus. 480  
 Quæ Dea sit: quare famulas a limine templi  
 Arceat, (arcet enim) libaque tosta petat;  
 Bacche, racemiferos hedera redimite capillos,  
 (Si domus illa tua est) dirige navis iter.  
 Arserat obsequio Semele Jovis. accipit Ino 485  
 Te, puer; & summâ sedula nutrit ope.  
 Intumuit Juno, raptâ quod pellice natum  
 Educet. at sanguis ille sororis erat.  
 Hinc agitur furiis Athamas, & imagine falsa:  
 Tuque cadis patria, parve Learchæ, manu. 490  
 Mœsta Learchæas mater tumulaverat umbras;

*Ovidius* T. III.

N

Et dederat miseris omnia justa rogis.  
 Hæc quoque, funestos ut erat laniata capillos,  
 Prosilit; & cunis te, Melicerta, rapit.  
 Est spatio contracta brevi, freta bina repellit, 495  
 Unaque pulsatur terra duabus aquis.  
 Huc venit insanis natum complexa lacertis;  
 Et secum e celso mittit in alta jugo.  
 Excipit illæsos Panope centumque sorores;  
 Et placido lapsu per sua regna ferunt. 500  
 Nondum Leucothee, nondum puer ille Palæmon  
 Vorticibus densi Thybridis ora tenent.  
 Lucus erat: dubium Semelæ Stimulæne vocetur;  
 Mænadas Ausonias incoluisse ferunt.  
 Quærit ab his Ino, quæ gens foret. Arcadas esse 505  
 Audit, & Evandrum sceptrâ tenere loci.  
 Dissimulata Deam Latias Saturnia Bacchas  
 Instimulat fictis insidiosa sonis:  
 O nimium faciles, o toto pectore captæ,  
 Non venit hæc nostris hospes amica choris. 510  
 Fraude petit; sacrique parat cognoscere ritum.  
 Quo possit pœnas pendere, pignus habet.  
 Vix bene desierat; complent ululâibus auras  
 Thyades effusis per sua colla comis:  
 Injiciuntque manus, puerumque revellere pugnant. 515  
 Quos ignorat adhuc, invocât illa Deos:  
 Dique, Deæque loci, miseræ succurrite matri.  
 Clamor Aventini saxa propinqua ferit.

Adpulerat ripæ vaccas *Ætæus* Iberas.

Audit; & ad vocem concitus urguet iter. 520

Herculis adventu, quæ vim modo ferre parabant,

Turpia femineæ terga dedere fugæ.

Quid petis hinc, (cognorat enim) matertera *Bacchi*?

An numen quod me, te quoque vexat, ait?

Illâ docet partim; partim præsentia nati 525

Continet: & furiis in scelus îsse pudet.

Rumor (ut est velox) agitatîs pervolat alis:

Estque frequens, *Ino*, nomen in ore tuum.

Hospita *Carmentis* fidos intrasse penates

Diceris, & longam deposuisse famem. 530

Liba suâ properata manu *Tegeea* sacerdos

Traditur in subito cocta dedisse foco.

Nunc quoque liba juvant festis *Matralibus* illam.

Rustica sedulitas gratior arte fuit.

Nunc, ait, o vates, venientia fata resigna, 535

Quâ licet: hospitîis hoc, precor, adde meis.

Parva mora est: cœlum vates ac numina sensit,

Fitque sui toto pectore plena *Dei*.

Vix illam subito posses cognoscere; tanto

Sanctior, & tanto, quam modo, major erat. 540

Læta canam: gaude, defuncta laboribus, *Ino*,

Dixit; & huic populo dextera semper ades.

Numen eris pelagi: natum quoque pontus habebit.

In vestris aliud sumite numen aquis.

*Leucotheæ* Grajis, *Matuta* vocabere nostris. 545

In portus nato jus erit omne tuo.

Quem nos Portunum, sua lingua Palæmona dicet:

Ite, precor, nostris æquus uterque locis.

Adnuerant: promissa fides: posuere labores.

Nomina mutarunt: hic Deus, illa Dea est. 550

Cur vetet ancillas accedere, quæritis? odit.

Principiumque odii, si sinat ipsa, canam.

Una ministrarum solita est, Cadmei, tuarum

Sæpe sub amplexus conjugis ire tui.

Improbis hanc Athamas furtim dilexit: ab illa 555

Comperit agricolis semina tosta dari.

Ipsa quidem fecisse negat, sed fama recepit.

Hoc est cur odio sit tibi serva manus.

Non tamen hanc pro stirpe suâ pia mater adoret.

Ipsa parum felix visa fuisse parens. 560

Alterius prolem melius mandabitis illi.

Utilior Baccho, quam fuit ipsa suis.

Hanc tibi, Quò properas, memorant dixisse, Rutili?

Luce mea Marso Consul ab hoste cades.

Exitus accessit verbis: flumenque Tolenum 565

Purpureo mixtis sanguine fluxit aquis.

Proximus annus erat: Pallantide cæsus eadem

Didius hostiles ingeminavit opes.

Lux eadem, Fortuna, tua est, auctorque, locusque.

Sed superinjectis quis latet æde togis? 570

Servius est: hoc constat enim. sed caussa latendi

Discrepat; & dubium me quoque mentis habet.

Dum Dea furtivos timide profitetur amores,  
 Cœlestemque homini concubuisse pudet;  
 (Arsit enim magnâ correpta cupidine Regis, 575  
 Cæaque in hoc uno non fuit illa viro)  
 Nocte domum parvâ solita est intrare fenestrâ:  
 Unde Fenestellæ nomina porta tenet.  
 Nunc pudet, & vultus velamine celat amatos:  
 Oraque sunt multâ regia tecta togâ. 580  
 An magis est verum, post Tullî funera plebem  
 Confusam placidi morte fuisse ducis?  
 Nec modus ullus erat: crescebat imagine luctus;  
 Donec eam positis occuluere togis.  
 Tertia caussa mihi spatio majore canenda est: 585  
 Nos tamen adductos intus agemus equos.  
 Tullia, conjugio, sceleris mercede, peracto,  
 His solita est dictis extimulare virum:  
 Quid juvat esse pares, te nostræ cæde sororis,  
 Meque tui fratris, si pia vita placet? 590  
 Vivere debuerant & vir meus, & tua conjux,  
 Si nullum ausuri majus eramus opus.  
 Et caput & regnum facio dotale parentis.  
 Si vir es, i, dictas exige dotis opes.  
 Regia res scelus est. socero cape regna necato: 595  
 Et nostras patrio sanguine tingue manus.  
 Talibus instinctus solio privatus in alto  
 Sederat. attonitum vulgus ad arma ruit.  
 Hinc cruor, hinc cædes: infirmaque vincitur ætas.

Sceptra gener socero rapta Superbus habet. 600  
Ipse sub Esquiliis, ubi erat sua regia, cæsus  
Concidit in dura sanguinolentus humo.  
Filia, carpento patrios initura penates,  
Ibat per medias alta feroxque vias.  
Corpus ut adspexit, lacrimis auriga profusus 605  
Restitit. hunc tali corripit illa sono:  
Vadis, an exspectas pretium pietatis amarum?  
Duc, inquam, invitas ipsa per ora rotas.  
Certa fides facti: dictus Sceleratus ab illa  
Vicus, & æternâ res ea pressa notâ. 610  
Post tamen hoc ausa est templum, monumenta parentis,  
Tangere: mira quidem, sed tamen acta loquar.  
Signum erat in solio residens sub imagine Tulli:  
Dicitur hoc oculis opposuisse manum.  
Et vox audita est, Vultus abscondite nostros, 615  
Ne natæ videant ora nefanda meæ.  
Veste data tegitur: vetat hanc Fortuna moveri:  
Et sic e templo est ipsa locuta suo:  
Ore revelato qua primum luce patebit  
Servius, hæc positi prima pudoris erit. 620  
Parcite, matronæ, vetitas attingere vestes:  
Sollemni satis est voce movere preces:  
Sitque caput semper Romano tectus amictu,  
Qui Rex in nostra septimus Urbe fuit.  
Arserat hoc templum: signo tamen ille pepercit 625  
Ignis: opem nato Mulciber ipse tulit.



Namque pater Tullī Vulcanus, Oeresia mater,

Præsignis facie, Corniculana fuit.

Hanc secum Tanaquil, sacris de more paratis,

Jussit in ornatum fundere vina focum. 630

Hic inter cineres obscæni forma virilis

Aut fuit, aut visa est; sed fuit illa magis.

Jussa loco captiva fovet. conceptus ab illa

Servius a cœlo semina gentis habet.

Signa dedit genitor, tum cum caput igne corusco 635

Contigit, inque coma flammeus arsit apex.

Te quoque magnificâ, Concordia, dedicat æde

Livia, quam caro præstitit illa viro.

Disce tamen, veniens ætas, ubi Livia nunc est

Porticus, immensæ tecta fuisse domûs. 640

Urbis opus domus una fuit: spatiumque tenebat,

Quo brevius muris oppida multa tenent.

Hæc æquata solo est, nullo sub crimine regni,

Sed quia luxuriâ visa nocere suâ.

Sustinuit tantas operum subvertere moles, 645

Totque suas heres perdere Cæsar opes.

Sic agitur censura, & sic exempla parantur;

Cum vindex, alios quod monet, ipse facit.

Nulla nota est veniente die, quam ducere possis.

Idibus invicto sunt data templa Jovi. 650

Et jam Quinquatrus jubeor narrare minores.

Nunc ades o cœptis, flava Minerva, meis.

Cur vagus incedit tota tibicen in Urbe?

Quid sibi personæ, quid stola longa, volunt?  
 Sic ego: sic positâ Tritonia cuspide dixit. 655  
 Pace velim doctæ verba referre Deæ.  
 Temporibus veterum tibicinis usus avorum  
 Magnus, & in magno semper honore fuit.  
 Cantabat fanis, cantabat tibia ludis,  
 Cantabat mœstis tibia funeribus. 660  
 Dulcis erat mercede labor: tempusque secutum,  
 Quod subito Grajæ frangeret artis opus.  
 Adde quod Ædilis, pompam qui funeris irent,  
 Artifices solos jusserat esse decem.  
 Exsilio mutant Urbem, Tiburque recedunt: 665  
 (Exsiliū quodam tempore Tibur erat:)  
 Quæritur in scena cava tibia; quæritur aris:  
 Ducit supremos nænia nulla toros.  
 Servierat quidam, quantolibet ordine dignus,  
 Tibure: sed longo tempore liber erat. 670  
 Rure dapes parat ille suo; turbamque canoram  
 Convocat. ad festas convenit illa dapes.  
 Nox erat; & vinis oculique animique natabant:  
 Cum præcomposito nuntius ore venit.  
 Atque ita, Quid cessas convivia solvere? dixit: 675  
 Auctor vindictæ jam venit, ecce, tuæ.  
 Nec mora; convivæ valido titubantia vino  
 Membra movent: dubii stantque labantque pedes.  
 At dominus, Discedite, ait. plastroque morantes  
 Sustulit. in plastro sirpea lata fuit. 680

Adliciunt somnos tempus, motusque, merumque;

Potaque se Tibur turba redire putat.

Jamque per Esquilias Romanam intraverat urbem;

Et mane in medio plaustra fuere Foro.

Plautius, ut possent specie numeroque Senatū 685

Fallere, personis imperat ora tegi.

Admiscetque alios: &, ut hunc tibicina cœtum

Augeat, in longis vestibus ire jubet.

Sic reduces bene posse tegi: ne forte notentur

Contra collegæ jussa redisse sui. 690

Res placuit: cultuque novo libet Idibus uti,

Et canere ad veteres verba jocosa modos.

Hæc ubi perdocuit, Superest mihi discere, dixi,

Cur sit Quinquatrus illa vocata dies.

Martius, inquit, agit tali mea nomine festa: 695

Estque sub inventis hæc quoque turba meis.

Prima terebrato per rara foramina buxo,

Ut daret effeci tibia longa sonos.

Vox placuit: liquidis faciem referentibus undis

Vidi virgineas intumuisse genas. 700

Ars mihi non tanti est; valeas, mea tibia, dixit.

Excipit abjectam cespite ripa suo.

Inventam Satyrus primum miratur: at usum

Nescit, & inflatam sentit habere sonum.

Et modo dimittit digitis, modo concipit auras: 705

Jamque inter Nymphas arte superbus erat.

Provocat & Phœbum. Phœbo superante, pendit:

Cæsa recesserunt a cute membra suâ.  
 Sum tamen inventrix auctorque ego carminis hujus:  
 Hoc est cur nostros ars colat ista dies. 710

**T**ertia lux veniat, qua tu, Dodoni Thyene,  
 Stabis Agenorei fronte videnda bovis.  
 Hæc est illa dies, qua tu purgamina Vestæ,  
 Thybri, per Etruscas in mare mittis aquas.

**S**i qua fides ventis, Zephyro date carbasa, nautæ: 715  
 Cras veniet vestris ille secundus aquis.

**A**t pater Heliadum, radios ubi tinxerit undis,  
 Et cinget geminos stella serena polos;  
 Tollet humo validos proles Hyriea lacertos:  
 Continua Delphin nocte videndus erit. 720  
 Scilicet hic olim Volscos Æquosque fugatos  
 Viderat in campis, Algida terra, tuis.  
 Unde suburbano clarus, Tuberte, triumpho,  
 Vectus es in niveis, Postume, victor equis.

**J**am sex, & totidem luces de mense supersunt: 725  
 Huic unum numero tu tamen adde diem.  
 Sol abit e Geminis, & Cancri signa rubescunt:  
 Cœpit Aventinâ Pallas in arce coli.

**J**am tua, Laomedon, oritur nurus: orta que noctem

Pellit, & e pratis uda pruina fugit. 730  
 Reddita, quisquis is est, Summano templa feruntur,  
 Tum, cum Romanis, Pyrrhe, timendus eras.

**H**Anc quoque cum patriis Galatea receperit undis,  
 Plenaque securæ terra quietis erit;

Surgit humo juvenis, telis afflatus avitis; 735

Et gemino nexas porrigit angue manus.

Notus amor Phædræ, nota est injuria Thesei:

Devovit natum credulus ille suum.

(Non impune pius juvenis Træzena petebat.

Dividit obstantes pectore taurus aquas.) 740

Solliciti terrentur equi, frustra que retenti

Per scopulos dominum duraque saxa trahunt.

Exciderat curru, lorisque morantibus artus

Hippolytus lacero corpore raptus erat.

Edideratque animam, multum indignante Diana. 745

Nulla, Coronides, caussa doloris, ait.

Namque pio juveni vitam sine vulnere reddam;

Et cedent arti tristia fata meæ.

Gramina continuo loculis depromit eburnis:

Profuerant Glauci Manibus illa prius: 750

(Tunc, cum observatas augur descendit in herbas;

Usus & auxilio est anguis ab angue dato.)

Pectora ter tetigit, ter verba salubria dixit:

Depositum terra sustulit ille caput.

Lucus eum, nemorisque tui, Dictynna, recessus 755

Celat: Aricino Virbius ille lacu.

At Clymenus Clothoque dolent, hæc fila reneri,

Hic fieri regni jura minora sui.

Juppiter exemplum veritus direxit in illum

Fulmina, qui nimis moverat artis opem. 760

Phœbe, querebaris. Deus est: placare parenti.

Propter te, fieri quod vetat, ipse facit.

**N**ON ego te, quamvis properabis vincere, Cæsar,  
Si vetet auspiciū, signa movere velim.

Sint tibi Flaminius Thrasymenaeque litora testes, 765  
Per volucres æquos multa monere Deos.

Tempora si veteris quæris temeraria damni,

Quartus ab extremo mense bis ille dies.

**P**Ostera lux melior. superat Masinissa Syphacem;  
Et cecidit telis Hasdrubal ipse suis. 770

**T**Empora labuntur, tacitisque senescimus annis;  
Et fugiunt, freno non remorante, dies.

Quam cito venerunt Fortunæ Fortis honores!

Post septem lucas Junius actus erit.

Ite, Deam læti Fortem celebrate, Quirites: 775

In Tiberis ripâ munera Regis habet.

Pars pede, pars etiam celeri decurrite cymba.

Nec pudeat potos inde redire domum.

Ferte coronatæ juvenum convivia lintres;

Multaque per medias vina bibantur aquas. 780  
 Plebs colit hanc: quia, qui posuit, de plebe fuisse  
 Fertur, & ex humili sceptrâ tulisse loco.  
 Convenit & servis: servâ quia Tullius ortus  
 Constituit dubiæ templa propinqua Deæ.

**E**Cce, suburbana rediens male sobrius æde, 785  
 Ad stellas aliquis talia verba jacit.  
 Zona latet tua nunc, & cras fortasse latebit:  
 Dehinc erit, Orion, adspicienda mihi.  
 At si non esset potus, dixisset eadem  
 Venturum tempus solstitiale die. 790

**L**ucifero subeunte Lares delubra tulerunt,  
 Hic ubi fit doctâ multa corona manu.  
 Tempus idem Stator ædis habet, quam Romulus olim  
 Ante Palatini condidit ora jugi.

**T**OT restant de mense dies, quot nomina Parcis, 795  
 Cum data sunt trabeæ templa, Quirine, tuæ.

**T**Empus Iuleis cras est natale Kalendis:  
 Pierides, cœptis addite summa meis.  
 Dicite Pierides, quis vos adjunxerit isti,  
 Cui dedit invitas victa noverca manus. 800  
 Sic ego: sic Clio, Clari monumenta Philippi  
 Adspicis: unde trahit Marcia casta genus.

Marcia sacrificio deductum nomen ab Anco;

In qua par facies nobilitate suâ.

Par animo quoque forma suo respondet in illa; 805

Et genus, & facies, ingeniumque simul.

Nec quod laudamus formam, tam turpe putâris.

Laudamus magnas hac quoque parte Deas.

Nupta fuit quondam matertera Cæsaris illi.

O decus, o sacra femina digna domo! 810

Sic cecinit Clio: doctæ adsensere sorores.

Adnuit Alcides, increpuitque lyram.





P. OVIDII NASONIS

TRISTIUM

*LIBRI V.*





P. OVIDII NASONIS  
 TRISTIUM  
 LIBER I.

---

ELEGIA I.

**P** Arve, (nec invideo) sine me, Liber, ibis in Urbem :  
 (Hei mihi!) quò domino non licet ire tuo.  
 Vade, sed incultus; qualem decet exsulis esse.  
 Infelix, habitum temporis hujus habe.  
 Nec te purpureo velent vaccinia fuco: 5  
 Non est conveniens ludibus ille color:  
 Nec titulus minio, nec cedro charta notetur:  
 Candida nec nigrâ cornua fronte geras.  
 Felices ornent hæc instrumenta libellos.  
 Fortunæ memorem te decet esse meæ. 10  
 Nec fragili geminæ poliantur pumice frontes;  
 Hirsutus passis ut videare comis.  
 Neve liturarum pudeat. qui viderit illas,  
 Ovidius T. III. O

De lacrimis factas sentiet esse meis.

Vade, Liber, verbisque meis loca grata saluta. 15

Contingam certe quo licet illa pede.

Si quis, ut in populo, nostri non immemor illic,

Si quis, qui, quid agam, forte requirat, erit;

Vivere me dices: salvum tamen esse negabis:

Id quoque, quod vivam, munus habere Dei. 20

Atque ita te tacitus, quærenti plura, legendum,

Ne, quod non opus est, forte loquare, dabis.

Protinus admonitus repetet mea crimina lector;

Et peragar populi publicus ore reus.

Neu, cave, defendas, quamvis mordebere dictis. 25

Causa patrocínio non bona pejor erit.

Invenies aliquem, qui me suspiret ademptum,

Carmina nec siccis perlegat ista genis:

Et tacitus secum, ne quis malus audiat, optet,

Sit mea, lenito Cæsare, pœna minor. 30

Nos quoque, quisquis erit, ne sit miser ille, precamur,

Placatos misero qui volet esse Deos.

Quæque volet, rata sint; ablataque Principis ira

Sedibus in patriis det mihi posse mori.

Ut peragas mandata, Liber, culpabere forsân; 35

Ingeniique minor laude ferere mei.

Judicis officium est, ut res, ita tempora rerum

Quærere. quæsito tempore tutus eris.

Carmina proveniunt animo deducta sereno:

Nubila sunt subitis tempora nostra malis. 40

Carmina secessum scribentis & otia quærunt:

Me mare, me venti, me fera jactat hiems.

Carminibus metus omnis abest: ego perditus ensem

Hæsurum jugulo jam puto jamque meo.

Hæc quoque quod facio, judex mirabitur æquus; 45

Scriptaque cum veniâ qualiacumque leget.

Da mihi Mæoniden, & tot circumspice casus;

Ingenium tantis excidet omne malis.

Denique securus famæ, Liber, ire memento;

Nec tibi sit lecto displicuisse pudor. 50

Non ita se nobis præbet Fortuna secundam;

Ut tibi sit ratio laudis habenda tuæ.

Donec eram sospes, tituli tangebar amore;

Quærendique mihi nominis ardor erat. 55

Carmina nunc si non studiumque, quod obfuit, odi, 55

Sit satis. ingenio sic fuga parta meo.

I tamen, i, pro me tu, cui licet, adspice Romam.

Dî facerent, possem nunc meus esse Liber.

Nec te, quod venias magnam peregrinus in Urbem,

Ignotum populo posse venire puta. 60

Ut titulo careas, ipso noscère colore:

Dissimulare velis; te liquet esse meum.

Clam tamen intrato; ne te mea carmina lædant.

Non sunt, ut quondam plena favoris erant.

Si quis erit, qui te, quia sis meus, esse legendum 65

Non putet, e gremio rejiciatque suo;

Inspice, dic, titulum. non sum præceptor Amoris.

Quas meruit, pœnas jam dedit illud opus.  
Forsitan exspectes, ut in alta palatia missum  
Scandere te jubeam, Cæsareamque domum. 70  
Ignoscant augusta mihi loca, Dique locorum:  
Venit in hoc illa fulmen ab arce caput.  
Esse quidem memini mitissima sedibus illis  
Numina: sed timeo, qui nocuere, Deos.  
Terretur minimo pennæ stridore columba, 75  
Unguibus, accipiter, saucia facta tuis.  
Nec procul a stabulis audet secedere, si qua  
Excussa est avidi dentibus agna lupi.  
Vitaret cœlum Phaethon, si viveret; & quos  
Optârat stulte, tangere nolle equos. 80  
Me quoque, quæ sensi, fateor Jovis arma timere:  
Me reor infesto, cum tonat, igne peti.  
Quicumque Argolicâ de classe Capharea fugit,  
Semper ab Euboicis vela retorquet aquis.  
Et mea cymba, semel vastâ percussa procellâ, 85  
Illum, quo læsa est, horret adire locum.  
Ergo, care Liber, timida circumspice mente;  
Et satis a media sit tibi plebe legi.  
Dum petit infirmis nimium sublimia pennis  
Icarus, Icaris nomina fecit aquis. 90  
Difficile est tamen, hîc remis utaris an aura,  
Dicere. consilium resque locusque dabunt.  
Si poteris vacuo tradi; si cuncta videbis  
Mîtia; si vires fregerit ira suas;

Si quis erit, qui te dubitantem & adire timentem 95

Tradat, & ante tamen pauca loquatur; adi.

Luce bona, dominoque tuo felicior ipse

Pervenias illuc; & mala nostra leves.

Namque ea vel nemo, vel qui mihi vulnera fecit,

Solus Achilleo tollere more potest. 100

Tantum ne noceas, dum vis prodesse, videto.

Nam spes est animi nostra timore minor.

Quæque quiescebat, ne mota resæviat ira,

Et pœnæ tu sis altera caussa, cave.

Cum tamen in nostrum fueris penetrare receptus, 105

Contigerisque tuam, scrinia curva, domum;

Adspicies illic positos ex ordine fratres,

Quos studium cunctos evigilavit idem.

Cetera turba palam titulos ostendet apertos;

Et sua detectâ nomina fronte geret. 110

Tres procul obscura latitantes parte videbis:

Hi quoque, quod nemo nescit, amare docent.

Hos tu vel fugias, vel, si satis oris habebis,

Ædipodas facito Telegonosque voces.

Deque tribus, moneo, si quæ tibi cura parentis, 115

Ne quemquam, quamvis ipse docebit, ames.

Sunt quoque mutatæ ter quinque volumina formæ,

Nuper ab exsequiis carmina rapta meis:

His mando dicas, inter mutata referri

Fortunæ vultum corpora posse meæ. 120

Namque ea dissimilis subito est effecta priori:

Flendaque nunc, aliquo tempore læta fuit.  
 Plura quidem mandare tibi, si quæris, habebam;  
 Sed vereor tardæ caussa fuisse moræ.  
 Quod si, quæ subeunt, tecum, Liber, omnia ferres, 125  
 Sarcina laturo magna futurus eras.  
 Longa via est: propera. nobis habitabitur orbis  
 Ultimus; a terrâ terra remota meâ.

## E L E G I A II.

**D**î maris & cœli, (quid enim nisi vota supersunt?)  
 Solvere quassatæ parcite membra ratis:  
 Neve, precor, magni subscribite Cæsaris iræ.  
 Sæpe, premente Deo, fert Deus alter opem.  
 Mulciber in Trojam, pro Troja stabat Apollo: 5  
 Æqua Venus Teucris, Pallas iniqua fuit.  
 Oderat Ænean propior Saturnia Turno:  
 Ille tamen Veneris numine tutus erat.  
 Sæpe ferox cautum petiit Neptunus Ulixem:  
 Eripuit patruo sæpe Minerva suo. 10  
 Et nobis aliquod, quamvis distamus ab illis,  
 Quid vetat irato numen adesse Deo?  
 Verba miser frustra non proficientia perdo:  
 Ipsa graves spargunt ora loquentis aquæ.  
 Terribilisque Notus jactat mea dicta; precesque, 15



Ad quos mittuntur, non sinit ire Deos.

Ergo fidei venti, ne caussa lædar in una,

Velaque nescio quò, votaue nostra ferunt?

Me miserum, quanti montes volvuntur aquarum!

Jam jam tacturos sidera summa putes. 20

Quantæ diducto subsidunt æquore valles!

Jam jam tacturas Tartara nigra putes.

Quocumque adspicias, nihil est nisi pontus & aer,

Fluctibus hic tumidus, nubibus ille minax.

Inter utrumque fremunt immani turbine venti. 25

Nescit, cui domino pareat, unda maris.

Nam modo purpureo vires capit Eurus ab ortu:

Nunc Zephyrus sero vespere missus adest:

Nunc gelidus sicca Boreas bacchatur ab Arcto:

Nunc Notus adversâ prœlia fronte gerit. 30

Rektor in incerto est: nec quid fugiatve petatve

Invenit. ambiguis ars stupet ipsa malis.

Scilicet occidimus, nec spes, nisi vana, salutis:

Dumque loquor, vultus obruit unda meos.

Opprimet hanc animam fluctus: frustraue precanti 35

Ore necaturas accipiemus aquas.

At pia nil aliud quam me dolet exsule conjux:

Hoc unum nostri scitque gemitque mali.

Nescit in immenso jactari corpora ponto:

Nescit agi ventis: nescit adesse necem. 40

Dî bene, quod non sum mecum conscendere passus,

Ne mihi mors misero bis patienda foret!

At nunc, ut peream, quoniam caret illa periclo,  
Dimidia certe parte superstes ero.

Hei mihi, quam celeri micuerunt nubila flammâ! 45

Quantus ab ætherio personat axe fragor!

Nec levius tabulæ laterum feriuntur ab undis,

Quam grave balistæ mœnia pulsat onus.

Qui venit hic fluctus, fluctus supereminet omnes;

Posterior nono est, undecimoque prior. 50

Nec letum timeo: genus est miserabile leti.

Demite naufragium; mors mihi munus erit.

Est aliquid, fatove suo ferrove cadentem

In solida moriens ponere corpus humo:

Et mandare suis aliquid, sperare sepulcra, 55

Et non æquoreis piscibus esse cibum.

Fingite me dignum tali nece: non ego solus

Hic vehor. immeritos cur mea pœna trahit?

Prô Superi, viridesque Dei, quibus æquora curæ!

Utraque jam vestras sistite turba minas. 60

Quamque dedit vitam mitissima Cæsaris ira,

Hanc sinite infelix in loca jussa feram.

Si, quam promerui, pœnam me pendere vultis,

Culpa mea est, ipso iudice, morte minor.

Mittere me Stygias si jam voluisset ad undas 65

Cæsar, in hoc vestra non eguisset ope.

Est illi nostri non invidiosa cruoris

Copia: quodque dedit, cum volet, ipse feret.

Vos modo, quos nullo certe puto crimine læsos,

Contenti nostris, Dī, precor, este malis. 70  
Nec tamen, ut cuncti miserum servare velitis,  
Quod periit, salvum jam caput esse potest.  
Ut mare considat, ventisque ferentibus utar,  
Ut mihi parcatis, num minus exsul ero?  
Non ego, divitias avidus sine fine parandi, 75  
Latum mutandis mercibus æquor aro:  
Nec peto, quas petii, quondam studiosus, Athenas,  
Oppida non Asiæ, non loca visa prius:  
Non ut, Alexandri claram delatus in urbem,  
Delicias videam, Nile jocose, tuas. 80  
Quod faciles opto ventos, (quis credere possit?)  
Sarmatis est tellus, quam mea vota petunt.  
Obligor, ut tangam lævi fera litora Ponti;  
Quodque sit a patria tam fuga tarda, queror.  
Nescio quo videam positos ut in orbe Tomitas, 85  
Exilem facio per mea vota viam.  
Seu me diligitis, tantos compescite fluctus;  
Pronaque sint nostræ numina vestra rati:  
Seu magis odistis, jussæ me advertite terræ.  
Supplicii pars est in regione mei. 90  
Ferte (quid hîc facio?) rapidi mea carbasa venti.  
Ausonios fines cur mea vela vident?  
Noluit hoc Cæsar: quid, quem fugat ille, tenetis?  
Adspiciat vultus Pontica terra meos.  
Ex jubet, & merui. nec, quæ damnaverit ille, 95  
Crimina defendi jusve piumve puto.

Si tamen acta Deos numquam mortalia fallunt,  
 A culpa facinus scitis abesse mea.  
 Immo ita; vos scitis; si me meus abstulit error,  
 Stultaque mens nobis, non scelerata, fuit; 100  
 Quamlibet e minimis, domui si favimus illi;  
 Si satis Augusti publica jussa mihi;  
 Hoc Duce si dixi felicia secula; proque  
 Cæsare tura pius Cæsaribusque dedi;  
 Si fuit hic animus nobis, ita parcite, Divi. 105  
 Sin minus, alta cadens obruat unda caput.  
 Fallor? an incipiunt gravidæ vanescere nubes,  
 Visitaque mutati frangitur ira maris?  
 Non casus, sed vos sub conditione vocati,  
 Fallere quos non est, hanc mihi fertis opem. 110

## E L E G I A III.

**C**UM subit illius tristissima noctis imago,  
 Quæ mihi supremum tempus in Urbe fuit;  
 Cum repeto noctem, qua tot mihi cara reliqui,  
 Labitur ex oculis nunc quoque gutta meis.  
 Jam prope lux aderat, qua me discedere Cæsar 5  
 Finibus extremæ jusserat Ausoniæ.  
 Nec mens, nec spatium fuerant satis apta paranti:  
 Torpuerant longâ pectora nostra morâ.

Non mihi servorum, comitis non cura legendi,  
Non aptæ profugo vestis opisve fuit. 10  
Non aliter stupui, quam qui Jovis ignibus ictus  
Vivit, & est vitæ nescius ipse suæ.  
Ut tamen hanc animo nubem dolor ipse removit,  
Et tandem sensus convaluere mei;  
Adloquor extremum mæstos abiturus amicos, 15  
Qui modo de multis unus & alter erant.  
Uxor amans flentem flens acrius ipsa tenebat,  
Imbre per indignas usque cadente genas.  
Nata procul Libycis aberat diversa sub oris;  
Nec poterat fati certior esse mei. 20  
Quodcumque adspiceres, luctus gemitusque sonabant:  
Formaque non taciti funeris intus erat.  
Femina, virque, meo pueri quoque funere mœrent:  
Inque domo lacrimas angulus omnis habet.  
Si licet exemplis in parvo grandibus uti, 25  
Hæc facies Trojæ, cum caperetur, erat.  
Jamque quiescebant voces hominumque canumque,  
Lunaque nocturnos alta regebat equos.  
Hanc ego suspiciens, & ab hac Capitolia cernens,  
Quæ nostro frustra juncta fuere Lari; 30  
Numina vicinis habitantia sedibus, inquam,  
Jamque oculis numquam templa videnda meis,  
Dîque relinquendi, quos Urbs habet alta Quirini,  
Este salutati tempus in omne mihi.  
Et quamquam sero clypeum post vulnera sumo, 35

Attamen hanc odiis exonerate fugam;  
Cœlestique viro, quis me deceperit error,  
Dicite; pro culpa ne scelus esse putet:  
Ut, quod vos scitis, pœnæ quoque sentiat auctor.  
Placato possum non miser esse Deo. 40  
Hac prece adoravi Superos ego; pluribus uxor,  
Singultu medios præpediente sonos.  
Illa etiam ante Lares passis prostrata capillis  
Contigit extinctos ore tremante focos.  
Multaque in aversos effudit verba Penates, 45  
Pro deplorato non valitura viro.  
Jamque moræ spatium nox præcipitata negabat,  
Versaque ab axe suo Parrhasis Arcios erat.  
Quid facerem? blando patriæ retinebar amore:  
Ultima sed jussæ nox erat illa fugæ. 50  
Ah quoties aliquo dixi properante, Quid urges?  
Vel, quò festines ire, vel unde, vide.  
Ah quoties certam me sum mentitus habere  
Horam, propositæ quæ foret apta viæ.  
Ter limen tetigi; ter sum revocatus; & ipse 55  
Indulgens animo pes mihi tardus erat.  
Sæpe, Vale dicto, rursus sum multa locutus;  
Et quasi discedens oscula summa dedi.  
Sæpe eadem mandata dedi: meque ipse fefelli,  
Respiciens oculis pignora cara meis. 60  
Denique, Quid propero? Scythia est, quò mittimur,  
inquam:

Roma relinquenda est. utraque justa mora.  
Uxor in æternum vivo mihi viva negatur,  
Et domus, & fidæ dulcia membra domûs,  
Quosque ego fraterno dilexi more, sodales: 65  
O mihi Thesea pectora juncta fide!  
Dum licet, amplectar: numquam fortasse licebit  
Amplius. in lucro, quæ datur hora, mihi est.  
Nec mora; sermonis verba imperfecta relinquo,  
Complectens animo proxima quæque meo. 70  
Dum loquor, & flemus, cœlo nitidissimus alto,  
Stella gravis nobis, Lucifer ortus erat.  
Dividor haud aliter, quam si mea membra relinquam:  
Et pars abrumpi corpore visa suo est.  
(Sic Priamus doluit, tunc cum in contraria versus 75  
Ultiores habuit proditiōis equus.)  
Tum vero exoritur clamor gemitusque meorum;  
Et feriunt mœstæ pectora nuda manus.  
Tum vero conjux humeris abeuntis inhærens,  
Miscuit hæc lacrimis tristia dicta suis: 80  
Non potes avelli. simul ah, simul ibimus; inquit!  
Te sequar; & conjux exsulis exsul ero.  
Et mihi facta via est: & me capit ultima tellus.  
Accedam profugæ sarcina parva rati.  
Te jubet e patria discedere Cæsaris ira; 85  
Me pietas. pietas hæc mihi Cæsar erit.  
Talia tentabat: sic & tentaverat ante;  
Vixque dedit victas utilitate manus.

Egredior (sive illud erat sine funere ferri)  
 Squalidus immissis hirta per ora comis. 90  
 Illa dolore gravis, tenebris narratur abortis  
 Semianimis mediâ procubuisse domo.  
 Utque resurrexit, fœdatis pulvere turpi  
 Grinibus, & gelidâ membra levavit humo;  
 Se modo, desertos modo complorasse Penates; 95  
 Nomen & erepti sæpe vocasse viri:  
 Nec gemuisse minus, quam si natæve meumve  
 Vidisset structos corpus habere rogos:  
 Et voluisse mori; & moriendo ponere sensus;  
 Respectuque tamen non posuisse mei. 100  
 Vivat: & absentem, quoniam sic fata tulerunt,  
 Vivat, & auxilio sublevet usque suo.

## ELEGIA IV.

**T** Inguitur Oceano custos Erymanthidos Ursæ,  
 Æquoreasque suo sidere turbat aquas:  
 Nos tamen Ionium non nostra findimus æquor  
 Sponte: sed audaces cogimur esse metu.  
 Me miserum, quantis increscunt æquora ventis; 5  
 Erutaque ex imis ferveret arena vadis!  
 Monte nec inferior proræ puppique recurvæ  
 Insilit, & pictos verberat unda Deos.



Pinea texta sonant: pulsi stridore rudentes:

Adgemit & nostris ipsa carina malis. 10

Navita, confessus gelido pallore timorem,

Jam sequitur victam, non regit arte, ratem.

Utque parum validus non proficientia rector

Cervicis rigidæ frena remittit equo;

Sic non quò voluit, sed quò rapit impetus undæ, 15

Aurigam video vela dedisse rati.

Quod nisi mutatas emisit Æolus auras,

In loca jam nobis non adeunda ferar.

Nam procul, Illyriis læva de parte relictis,

Interdicta mihi cernitur Italia. 20

Desinat in vetitas quæso contendere terras,

Et mecum magno pareat aura Deo.

Dum loquor, & cupio pariter timeoque revelli,

Increpuit quantis viribus unda latus!

Parcite, cærulei, vos parcite, numina ponti; 25

Infestumque mihi sit satis esse Jovem.

Vos animam sævæ fessam subducite morti:

Si modo, qui perit, non periisse potest.

## E L E G I A V.

**O** Mihi post ullos numquam memorande sodales,  
 O cui præcipue sors mea visa sua est;

Attonitum qui me, (memini) carissime, primus

Ausus es adloquio sustinuisse tuo;

Qui mihi consilium vivendi mite dedisti, 5

Cum foret in misero pectore mortis amor;

Scis bene, cui dicam, positis pro nomine signis;

Officium nec te fallit, amice, tuum.

Hæc mihi semper erunt imis infixæ medullis;

Perpetuusque animæ debitor hujus ero. 10

Spiritus & vacuas prius hic tenuandus in auras

Ibit, & in tepido deseret ossa rogo;

Quam subeant animo meritorum oblivia nostro,

Et longâ pietas excidat ista die.

Dî tibi sint faciles, & opis nullius egentem 15

Fortunam præstent, dissimilemque meæ.

Si tamen hæc navis vento ferretur amico,

Ignoraretur forsitan ista fides.

Thesea Pirithous non tam sensisset amicum,

Si non infernas vivus adisset aquas. 20

Ut foret exemplum veri Phoceus amoris,

Fecerunt Furia, tristis Oresta, tuæ.

Si non Euryalus Rutulos cecidisset in hostes,

Hyrtacida Niso gloria nulla foret.

Scilicet ut fulvum spectatur in ignibus aurum, 25

Tempore sic durò est inspicienda fides.

Dum juvat, & vultu ridet Fortuna sereno;

Indelibatas cuncta sequuntur opes.

At simul intonuit, fugiunt: nec noscitur ulli,

Agmi-

Agminibus comitum qui modo cinctus erat. 30  
Atque hæc exemplis quondam collecta priorum,  
Nunc mihi sunt propriis cognita vera malis.  
Vix duo tresve mihi de tot superestis amici.  
Cetera Fortunæ, non mea, turba fuit.  
Quo magis, o pauci, rebus succurrite lapsis, 35  
Et date naufragio litora tuta meo.  
Neve metu falso nimium trepitate, timentes,  
Hac offendatur ne pietate Deus.  
Sæpe fidem adversis etiam laudavit in armis;  
Inque suis amat hanc Cæsar, in hoste probat. 40  
Causa mea est melior, qui non contraria fovi  
Arma; sed hanc merui simplicitate fugam.  
Invigiles igitur nostris pro casibus oro;  
Diminui si quâ numinis ira potest.  
Scire meos si quis casus desideret omnes, 45  
Plus, quam quod fieri res sinit, ille petat.  
Tot mala sum passus, quot in æthere sidera lucent;  
Parvaque quot siccus corpora pulvis habet.  
Multaque credibili tulimus majora: ratamque,  
Quamvis acciderint, non habitura fidem. 50  
Pars etiam mecum quædam moriatur oportet:  
Meque velim possit dissimulante tegi.  
Si vox infragilis, pectus mihi firmitus ære,  
Pluraque cum linguis pluribus ora forent;  
Non tamen idcirco complecterer omnia verbis, 55  
Materia vires exsuperante meas.

Pro duce Neritio docti mala nostra Poetæ

Scribite: Neritio nam mala plura tuli.

Ille brevi spatio multis erravit in annis

Inter Dulichias Iliacasque domos:

60

Nos freta sideribus notis distantia mensos

Sors tulit in Geticos Sarmaticosque sinus.

Ille habuit fidamque manum, sociosque fideles:

Me profugum comites deseruere mei.

Ille suam lætus patriam victorque petebat:

65

A patria fugio victus & exsul ego.

Nec mihi Dulichium domus est, Ithaceve, Sameve:

(Pœna quibus non est grandis abesse locis.)

Sed quæ de septem totum circumspicit orbem

Montibus, imperii Roma Desumque locus.

70

Illi corpus erat durum patiensque laborum:

Invalidæ vires ingenuæque mihi.

Ille erat assidue sævis agitatus in armis:

Adsuetus studiis mollibus ipse fui.

Me Deus oppressit, nullo mala nostra levante:

75

Bellatrix illi Diva ferebat opem.

Cumque minor Jove sit tumidis qui regnat in undis,

Illum Neptuni, me Jovis ira premit.

Adde, quod illius pars maxima fista laborum est;

Ponitur in nostris fabula nulla malis.

80

Denique quæritos tetigit tamen ille Penates;

Quæque diu petiit, contigit arva tamen.

At mihi perpetuo patria tellure carendum est,

Ni fuerit læsi mollior ira Dei.

---

## ELEGIA VI.

**N**EC tantum Clario Lyde dilecta poetæ,  
Nec tantum Coö Battis amata suo est:  
Pectoribus quantum tu nostris, Uxor, inhæres;  
Digna minus misero, non meliore viro.  
Te mea, suppositâ veluti trabe, fulta ruina est.  
Si quid adhuc ego sum, muneris omne tui est.  
Tu facis, ut spoliū ne sim, neu nuder ab illis,  
Naufragii tabulas qui petiere mei.  
Utque rapax, stimulante fame, cupidusque cruoris  
Incustoditum captat ovile lupus:  
Aut ut edax vultur corpus circumspicit ecquod  
Sub nulla positum cernere possit humo:  
Sic mea nescio quis, rebus malâ fidus acerbis,  
In bona venturus, si paterere, fuit.  
Hunc tua per fortes virtus submovit amicos,  
Nulla quibus reddi gratia digna potest.  
Ergo quam misero, tam vero, teste probaris:  
Hic aliquod pondus si modo testis habet.  
Nec probitate tua prior est aut Hæctoris uxor,  
Aut comes extincto Laodamia viro.  
Tu si Mæonium vatem sortita fuisses,

Penelopes esset fama secunda tuæ!  
 Sive tibi hoc debes, nullâ pia facta magistrâ;  
 Cumque nova mores sunt tibi luce dati:  
 Femina seu princeps, omnes tibi culta per annos, 25  
 Te docet exemplum conjugis esse bonæ:  
 Adsimilemque sui longa aduetudine fecit:  
 Graudia si parvis adsimilare licet.  
 Hei mihi, non magnas quod habent mea carmina vires,  
 Nostraque sunt meritis ora minora tuis! 30  
 Si quid & in nobis vivi fuit ante vigoris,  
 Exinctum longis occidit omne malis.  
 Prima locum sanctas heroidas inter haberes:  
 Prima bonis animi conspicerere tui.  
 Quantumcumque tamen præconia nostra valebunt, 35  
 Carminibus vives tempus in omne meis.

## E L E G I A VII.

**S**I quis habes nostri similes in imagine vultus,  
 Deme meis hederas, Bacchia sarta, comis.  
 Ista decent lætos felicia signa poetas.  
 Temporibus non est apta corona meis.  
 Hæc tibi dissimulas, sentis tamen, optime, dici, 5  
 In digito qui me fersque refersque tuo.  
 Effigiemque meam fulvo complexus in auro.

Cara relegati, quâ potes, ora vides:  
Quæ quoties spectas, subeat tibi dicere forsân,  
Quam procul a nobis Naso sôdalis abest!  
Grata tua est pietas: sed carmina major imago  
Sunt mea; quæ mando qualiacumque legas;  
Carmina mutatas hominûm dicentia formas:  
Infelix domini quod fuga rupit opus.  
Hæc ego discedens, sicut bene multa meorum,  
Ipsa meâ posui. mœstus in igne manu.  
Utque cremasse suum fertur sub stipite natum  
Thestias, & melior matre fuisse soror;  
Sic ego non meritos, mecum peritura libellos,  
Imposui rapidis viscera nostra rogis.  
Vel quod eram Musas, ut crimina nostra, perosus:  
Vel quod adhuc crescens & rude carmen erat.  
Quæ quoniam non sunt penitus sublata, sed exstant;  
Pluribus exemplis scripta fuisse reor.  
Nunc precor ut vivant, & non ignava legentum  
Otia delectent, admoneantque mei.  
Nec tamen illa legi poterunt patienter ab ullo;  
Nesciet his summam si quis abesse manum.  
Ablatum mediis opus est incudibus illud:  
Defuit & scriptis ultima lima meis.  
Et veniam pro laude peto: laudatus abunde,  
Non fastiditus si tibi, Lector, ero.  
Hos quoque sex versus, in prima fronte libelli,  
Si præponendos esse putabis, habe.

Orba parente suo quicumque volumina tangis, 35  
 His saltem vestra detur in Urbe locus.  
 Quoque magis faveas, non sunt hæc edita ab ipso,  
 Sed quasi de domini funere rapta sui.  
 Quidquid in his igitur vitii rude carmen habebit,  
 Emendaturus, si licuisset, eram. 40

## E L E G I A VIII.

**I**N caput alta suum labentur ab æquore retro  
 Flumina: conversis Solque recurret equis:  
 Terra feret stellas: cœlum findetur aratro:  
 Unda dabit flammæ: & dabit ignis aquas.  
 Omnia naturæ præpostera legibus ibunt: 5  
 Parsque suum mundi nulla tenebit iter.  
 Omnia jam fient, fieri quæ posse negabam:  
 Et nihil est, de quo non sit habenda fides.  
 Hæc ego vaticinor; quia sum deceptus ab illo,  
 Laturum misero quem mihi rebar opem. 10  
 Tantane te, fallax, cepere oblivia nostri?  
 Adflctumne fuit tantus adire pudor?  
 Ut neque respiceres, nec solarere jacentem,  
 Dure? neque exsequias prosequerere meas?  
 Illud amicitiz sanctum ac venerabile nomen 15  
 Re tibi pro vili sub pedibusque jacet?



Quid fuit, ingenti prostratum mole sodalem  
Visere, & adloquii parte levare tui?  
Inque meos si non lacrimam dimittere casus,  
Pauca tamen ficto verba dolore queri? 20  
Idque, quod ignoti faciunt, vale dicere saltem;  
Et vocem populi publicaque ora sequi?  
Denique lugubres vultus, numquamque videndos  
Cernere supremo, dum licuitque, die?  
Dicendumque semel toto non amplius ævo 25  
Accipere, & parili reddere voce, Vale?  
At fecere alii nullo mihi fœdere juncti;  
Et lacrimas animi signa dedere sui.  
Quid, nisi convictu caussisque valentibus essem,  
Temporis & longi victus amore tibi? 30  
Quid, nisi tot lusus & tot mea seria nosses,  
Tot nossem lusus seriaque ipse tua?  
Quid, si duntaxat Romæ mihi cognitus esses,  
Adscitus toties in genus omne loci?  
Cunctane in æquoreos abierunt irrita ventos? 35  
Cunctane Lethæis mersa feruntur aquis?  
Non ego te placida genitum reor urbe Quirini;  
Urbe, meo quæ jam non adeunda pede est:  
Sed scopulis, Ponti quos hæc habet ora sinistri,  
Inque feris Scythiæ Sarmaticisque jugis. 40  
Et tua sunt silicis circum præcordia venæ;  
Et rigidum ferri semina pectus habent.  
Quæque tibi quondam, tenero ducenda palato,

Plena dedit nutrix ubera, tigris erat.  
 At mala nostra minus, quam nunc, aliena putasses; 45  
 Duritiæque mihi non agerere reus.  
 Sed quoniam accedit fatalibus hoc quoque damnis,  
 Ut careant numeris tempora prima suis;  
 Effice, peccati ne sim memor hujus; & illo  
 Officium laudem, quo queror, ore tuum. 50

## E L E G I A IX.

**D**etur inoffensæ metam tibi tangere vitæ,  
 Qui legis hoc nobis non inimicus opus.  
 Atque utinam pro te possint mea vota valere,  
 Quæ pro me duros non tetigere Deos!  
 Donec eris felix, multos numerabis amicos: 5  
 Tempora si fuerint nubila, solus eris.  
 Adspicis, ut veniant ad candida testæ columbæ,  
 Accipiat nullas sordida turris aves.  
 Horrea formicæ tendunt ad inania numquam,  
 Nullus ad amissas ibit amicus opes. 10  
 Utque comes radios per Solis euntibus umbra,  
 Cum latet hic pressus nubibus, illa fugit;  
 Mobile sic sequitur Fortunæ lumina vulgus:  
 Quæ simul inductâ nocte teguntur, abit.  
 Hæc precor ut semper possint tibi falsa videri: 15

Sunt tamen eventu vera fatenda meo.  
Dum stetimus, turbæ quantum satis esset, habebat  
Nota quidem, sed non ambitiosa, domus.  
At simul impulsa est, omnes timuere ruinam:  
Cautaque communi terga dedere fugæ. 20  
Sæva nec admiror metuunt si fulmina, quorum  
Ignibus adflari proxima quæque vident.  
Sed tamen in duris remanentem rebus amicum  
Quamlibet in viso Cæsar in hoste probat.  
Nec solet irasci, (neque enim moderatior alter) 25  
Cum quis in adversis, si quid amavit, amat.  
De comite Argolici postquam cognovit Orestæ,  
Narratur Pyladen ipse probasse Thoas.  
Quæ fuit Actioridæ cum magno semper Achille,  
Laudari solita est Hectoris ore fides. 30  
Quod pius ad manes Theseus comes îsset amico,  
Tartareum dicunt indoluisse Deum.  
Euryali Nisique fide tibi, Turne, relata,  
Credibile est lacrimis immaduisse genas.  
Est etiam miseris pietas, & in hoste probatur. 35  
Hei mihi, quam paucos hæc mea dicta movent!  
Hic status, hæc rerum nunc est fortuna mearum,  
Debeat ut lacrimis nullus adesse modus.  
At mea sunt, proprio quamvis mœstissima casu,  
Pectora processu facta serena tuo. 40  
Hoc eventurum jam tum, carissime, vidi,  
Ferret adhuc istam cum minor aura ratem.

Sive aliquod morum, seu vitæ labe carentis  
Est pretium, nemo pluris habendus erit.  
Sive per ingenuas aliquis caput extulit artes, 45  
Quælibet eloquio fit bona caussa tuo.  
His ego commotus, dixi tibi protinus ipsi;  
Scena manet dotes grandis, amice, tuas.  
Hæc mihi non ovium fibræ, tonitrusve sinistri,  
Linguave servatæ, pennave dixit avis. 50  
Augurium ratio est, & conjectura futuri:  
Hac divinavi, notitiamque tuli.  
Quæ quoniam vera est, tota mihi mente tibi que  
Gratulor, ingenium non latuisse tuum.  
At nostrum tenebris utinam latuisset in imis! 55  
Expedit in studio lumen abesse meo.  
Utque tibi prosunt artes, facunde, severæ;  
Dissimiles illis sic nocuere mihi.  
Vita tamen tibi nota mea est: scis artibus illis  
Auctoris mores abstinnisse sui. 60  
Scis vetus hoc juveni lusum mihi carmen; & istos,  
Ut non laudandos, sic tamen esse jocos.  
Ergo ut defendi nullo mea posse colore,  
Sic excusari crimina posse puto.  
Quâ potes, excusa: nec amici desere caussam. 65  
Quo bene cœpisti, sic pede semper eas.

## ELEGIA X.

**E**ST mihi, sitque, precor, flavæ tutela Minervæ  
Navis; & a picta casside nomen habet.  
Sive opus est velis; minimam bene currit ad auram:  
Sive opus est remo; remige carpit iter.  
Nec comites volucris contenta est vincere cursu: 5  
Occupat egressas quamlibet ante rates.  
Et patitur fluctus, fertque adsilientia longe  
Æquora, nec sævis ista fatiscit aquis.  
Illa, Corinthiacis primum mihi cognita Cenchris,  
Fida manet trepidæ duxque comesque fugæ. 10  
Perque tot eventus, & iniquis concita ventis  
Æquora, Palladio numine tuta fuit.  
Nunc quoque tuta precor vasti secet ostia Ponti;  
Quasque petit, Getici litoris intret aquas.  
Quæ simul Æoliæ mare me deduxit in Helles, 15  
Et longum tenui limite fecit iter;  
Fleximus in lævum cursus: & ab Hectoris urbe  
Venimus ad portus, Imbria terra, tuos.  
Inde levi vento Zerynthia litora nactis,  
Threiciam tetigit fessa carina Samon. 20  
Saltus ab hac terrâ brevis est Tempyra petenti.  
Hac dominum tenus est illa secuta suum.  
Nam mihi Bistonios placuit pede carpere campos:  
Hellespontiacas illa relegit aquas;

Dardaniamque petit auctoris nomen habentem; 25

Et te ruricolâ, Lampsacæ, tuta Deo.

Quâque per angustas vectæ male virginis undas

Seston Abydena separat urbe fretum.

Hincque Propontiacis hærentem Cyzicon oris;

Cyzicon, Hæmonix nobile gentis opus: 30

Quâque tenent Ponti Byzantia litora fauces.

(Hic locus est gemini janua vasta maris.)

Hæc precor evincat, propulsaque fortibus Austris

Transeat instabiles strenua Cyaneas:

Thynniacosque sinus, & ab his per Apollinis urbem 35

Acta, sub Anchiali mœnia tendat iter.

Inde Mesembriacos portus, & Odesson, & arces

Prætereat dictas nomine, Bacche, tuo:

Et quos Alcathoi memorant a mœnibus ortos

Sedibus his profugum constituisse Larem. 40

A quibus adveniat Miletida sospes ad urbem,

Offensi quò me compulit ira Dei.

Hanc si contigerit, meritæ cadet agna Minervæ.

Non facit ad nostras hostia major opes.

Vos quoque Tyndaridæ, quos hæc colit insula, fratres, 45

Mite, precor, duplici numen adeste viæ.

Altera namque parat Symplegadas ire per artas,

Scindere Bistonias altera puppis aquas.

Vos facite, ut ventos, loca cum diversa petamus,

Illa suos habeat, nec minus illa suos. 50

## ELEGIA XI.

**L**itera quæcumque est toto tibi lecta libello,  
Est mihi sollicitæ tempore facta viæ.  
Aut hanc me, gelidi tremere cum mense Decembris,  
Scribentem mediis Hadria vidit aquis:  
Aut, postquam bimarem cursu superavimus Isthmon;  
Alteraque est nostræ sumta carina fugæ.  
Quod facerem, versus inter fera murmura ponti,  
Cycladas Ægeas obstupuisse puto.  
Ipse ego nunc miror, tantis animique marisque:  
Fluctibus ingenium non cecidisse meum. 10  
Seu stupor huic studio, sive est insania nomen,  
Omnis ab hac curâ mens relevata mea est.  
Sæpe ego nimboris dubius jactabar ab Hædis:  
Sæpe, minax Steropes sidere pontus erat.  
Fuscabatque diem custos Erymanthidos Ursæ; 15  
Aut Hyadas seris auxerat Auster aquis:  
Sæpe maris pars intus erat; tamen ipse trementi  
Carmina ducebam qualiacumque manu.  
Nunc quoque contenti stridunt Aquilone rudentes;  
Inque modum tumuli concava surgit aqua. 20  
Ipse gubernator tollens ad sidera palmas  
Exposcit votis, immemor artis, opem.  
Quocumque adspicio, nihil est, nisi mortis imago;  
Quam dubia timeo mente, timensque precor.

Attigero portum, portu terrebor ab ipso. 25  
Plus habet infestâ terra timoris aquâ.  
Nam simul insidiis hominum pelagique laboro;  
Et faciunt geminos ensis & unda metus.  
Ille meo vereor ne speret sanguine prædam;  
Hæc titulum nostræ mortis habere velit. 30  
Barbara pars læva est, avidæ succincta rapinæ,  
Quam cruor, & cædes, bellaque semper habent.  
Cumque sit hibernis agitatam fluctibus æquor,  
Pectora sunt ipso turbidiora mari.  
Quo magis his debes ignoscere, candide lector, 35  
Si spe sunt, ut sunt, inferiora tuâ.  
Non hæc in nostris, ut quondam, scribimus hortis:  
Nec consuecte meum, lectule, corpus habes.  
Jactor in indomito brumali luce profundo:  
Ipsaque cæruleis charta feritur aquis. 40  
Improba pugnat hiems, indignaturque, quod ausim  
Scribere, se rigidas incutiente minas.  
Vincat hiems hominem. sed eodem tempore, quæso,  
Ipse modum statuam carminis, illa sui.







P. OVIDII NASONIS  
**TRISTIUM**  
*LIBER II.*

---

ELEGIA I.

**Q**uid mihi vobiscum est, infelix cura, libelli,  
 Ingenio perii qui miser ipse meo?  
 Cur modo damnatas repeto, mea crimina, Musas?  
 An semel est pœnam commeruisse parum?  
 Carmina fecerunt, ut me cognoscere vellent  
 Omine non fausto femina virque, mea.  
 Carmina fecerunt, ut me moresque notaret  
 Jam demum visa Cæsar ab Arte meos.  
 Deme mihi studium; vitæ quoque crimina demes.  
 Acceptum refero versibus, esse nocens.  
 Hoc pretium curæ vigilatorumque laborum  
 Cepimus. ingenio pœna reperta meo.

Si saperem, doctas odissem jure sorores,  
Numina cultori pernicioso suo.

At nunc (tanta meo comes est insania morbo) 15  
Saxa (malum!) refero rursus ad ista pedem.

Scilicet & victus repetit gladiator arenam;

Et redit in tumidas naufraga puppis aquas.

Forsitan, ut quondam Teuthrantia regna tenenti,

Sic mihi res eadem vulnus opemque feret: 20

Musaque, quam movit, motam quoque leniet iram:

Exorant magnos carmina sæpe Deos.

Ipse quoque Ausonias Cæsar matresque nurusque

Carmina turrigeræ dicere jussit Opi.

Jusserat & Phœbo dici, quo tempore ludos 25

Fecit, quos ætas adspicit una semel.

His precor exemplis tua nunc, mitissime Cæsar,

Fiat ab ingenio mollior ira meo.

Illa quidem justa est, nec me meruisse negabo.

Non adeo nostro fugit ab ore pudor. 30

Sed, nisi peccassem, quid tu concedere posses?

Materiam veniæ sors tibi nostra dedit.

Si, quoties peccant homines, sua fulmina mittat

Juppiter; exiguo tempore inermis erit.

Hic ubi detonuit, strepituque exterruit orbem, 35

Purum discussis aera reddit aquis.

Jure igitur genitorque Deum rectorque vocatur:

Jure capax mundus nil Jove majus habet.

Tu quoque, cum Patriæ rector dicare, Patèrque,

Utère

Utere more Dei nomen habentis idem. 40  
Idque facis: nec te quisquam moderatius umquam  
Imperii potuit frena tenere sui.  
Tu veniam parti superatæ sæpe dedisti,  
Non concessurus quam tibi victor erat.  
Divitiis etiam multos & honoribus auctos 45  
Vidi, qui tulerant in caput arma tuum.  
Quæque dies bellum, belli tibi sustulit iram:  
Parsque simul templis utraque dona tulit.  
Utque tuus gaudet miles, quod vicerit hostem;  
Sic, victum cur se gaudeat, hostis habet. 50  
Causa mea est melior; qui nec contraria dicor  
Arma, nec hostiles esse secutus opes.  
Per mare, per terras, per tertia numina juro,  
Per te, præsentem conspicuumque Deum,  
Hunc animum favisse tibi, Vir maxime: inque, 55  
Qua sola potui, mente fuisse tuum.  
Optavi peteres cœlestia sidera tarde;  
Parsque fui turbæ parva precantis idem.  
Et pia tura dedi pro te: cumque omnibus unus  
Ipse quoque adjuvi publica vota meis. 60  
Quid referam libros illos quoque, crimina nostra,  
Mille locis plenos nominis esse tui?  
Inspice majus opus, quod adhuc sine fine reliqui,  
In non credendos corpora versa modos;  
Invenies vestri præconia nominis illic: 65  
Invenies animi pignora multa mei.  
Ovidius T. III. Q

Non tua carminibus major fit gloria, nec quo,  
Ut major fiat, crescere possit, habet.  
Fama Jovi superest. tamen hunc sua facta referri,  
Et se materiam carminis esse, juvat: 70  
Cumque Gigantei memorantur prœlia belli,  
Credibile est lætum laudibus esse suis.  
Te celebrant alii quanto decet ore, tuasque  
Ingenio laudes uberiore canunt.  
Sed tamen, ut fuso taurorum sanguine centum, 75  
Sic capitur minimo turis honore Deus.  
Ah ferus, & nobis nimium crudeliter hostis,  
Delicias legit qui tibi cumque meas!  
(Carmina ne nostris sic te venerantia libris  
Judicio possint candidiore legi.) 80  
Esse sed irato quis te mihi posset amicus?  
Vix tunc ipse mihi non inimicus eram.  
Cum cœpit quassata domus subsidere, partes  
In proclinas omne recumbit onus:  
Cunctaque Fortunâ rimam faciente dehiscunt. 85  
Ipsa suo quondam pondere tecta ruunt.  
Ergo hominum quæsitum odium mihi carmine: quâque  
Debuit, est vultus turba secuta tuos.  
At (memini) vitamque meam moresque probabas  
Illo, quem dederas, prætereuntis equo. 90  
(Quod si non prodest, & honesti gratia nulla  
Redditur; at nullum crimen adeptus eram.)  
Nec male commissa est nobis fortuna reorum,

Lisque decem decies inspicienda viris.

Res quoque privatas statui sine crimine iudex: 95

Deque meâ fassa est pars quoque victa fide.

Me miserum! potui, si non extrema nocerent,

Judicio tutus non semel esse tuo.

Ultima me perdunt: imoque sub æquore mergit

Incolumem toties una procella ratem. 100

Nec mihi pars nocuit de gurgite parva: sed omnes

Pressere hoc fluctus, Oceanusque caput.

Cur aliquid vidi? cur noxia lumina feci?

Cur imprudenti cognita culpa mihi?

Inscius Aëæon vidit sine veste Dianam: 105

Præda fuit canibus non minus ille suis.

Scilicet in Superis etiam fortuna luenda est;

: Nec veniam, læso numine, casus habet.

Illâ namque die, qua me malus abstulit error,

Parva quidem periit, sed sine labe, domus. 110

Sic quoque parva tamen, patrio dicatur ut ævo

Clara, nec ullius nobilitate minor:

Et neque divitiis, nec paupertate notanda:

Unde fit in neutrum conspiciendus eques.

Sit quoque nostra domus vel censu parva, vel ortu; 115

Ingenio certe non latet illa meo.

Quo videar quamvis nimium juveniliter usus,

Grande tamen toto nomen ab orbe fero.

Turbaque doctorum Nasonem novit, & audet

Non fastiditis adnumerare viris. 120

Corruit hæc igitur Musis accepta, sub uno,  
Sed non exiguo, crimine lapsa domus.  
Atque ea sic lapsa est, ut surgere, si modo læsi  
Ematuruerit Cæsaris ira, queat.  
Cujus in eventu pœnæ clementia tanta est, 125  
Ut fuerit nostro lenior illa metu.  
Vita data est, citraque necem tua constitit ira,  
O Princeps parce viribus use tuis.  
Insuper accedunt, te non adimente, paternæ  
(Tamquam vita parum muneris esset) opes. 130  
Nec mea decreto damnasti facta Senatûs:  
Nec mea selecto iudice jussa fuga est.  
Tribus invecus verbis (ita Principe dignum).  
Ultus es offensas, ut decet, ipse tuas.  
Adde, quod edictum, quamvis immane minaxque, 135  
Attamen in pœnæ nomine lene fuit:  
Quippe relegatus, non exsul dicor in illo;  
Parcaque fortunæ sunt data verba meæ.  
Nulla quidem sano gravior mentisque potenti  
Pœna est, quam tanto displicuisse viro. 140  
Sed solet interdum fieri placabile numen:  
Nube solet pulsâ candidus ire dies.  
Vidi ego pampineis oneratam vitibus ulmum,  
Quæ fuerat sævo fulmine tacta Jovis.  
Ipse licet sperare vetes, sperabimus: atque 145  
Hoc unum fieri, te prohibente, potest.  
Spes mihi magna subit, cum te, mitissime Princeps,

Spes mihi, respicio cum mea fata, cadit.  
Ac veluti ventis agitantibus æquora non est  
    Æqualis rabies, continuusque furor; 150  
Sed modo subsidunt, intermissique silesunt,  
Vimque putes illos deposuisse suam;  
Sic abeunt, redeuntque mei, variantque timores:  
Et spem placandi dantque negantque tui.  
Per Superos igitur, qui dent tibi longa, dabuntque, 155  
    Tempora, Romanum si modo nomen amant;  
Per Patriam, quæ te tuta & segura Parente est;  
Cujus, ut in populo, pars ego nuper eram;  
Sic tibi, quem semper factis animoque mereris,  
    Reddatur gratæ debitus Urbis amor. 160  
Livia sic tecum sociales compleat annos,  
Quæ, nisi te, nullo conjuge digna fuit.  
Quæ si non esset, cælebs te vita deceret:  
Nullaque, cui posses esse maritus, erat.  
Sospite sic te sit natus quoque sospes; & olim 165  
Imperium regat hoc cum seniore senex:  
Utque tui faciunt, sidus juvenile, nepotes,  
Per tua, perque sui facta parentis eant.  
Sic adsueta tuis semper Victoria castris  
Nunc quoque se præstet, notaque signa petat: 170  
Ausoniumque Ducem solitis circumvolet alis:  
Ponat & in nitidâ laurea sarta comâ.  
Per quem bella geris, cujus nunc corpore pugnas;  
Auspicium cui das grande, Deosque tuos:

Dimidioque tui præsens hanc respicis Urbem: 175

Dimidio procul es, sævaque bella geris.

Hic tibi sic redeat superato victor ab hoste;

Inque coronatis fulgeat altus equis.

Parce, precor: fulmenque tuum, fera tela, reconde,

Heu nimium misero cognita tela mihi! 180

Parce, Pater Patriæ: nec nominis immemor hujus

Olim placandi spem mihi tolle tui.

Nec precor, ut redeam: quamvis majora petitis.

Credibile est magnos sæpe dedisse Deos.

Mitius exsilium si das, propiusque roganti, 185

Pars erit e pœnâ magna levata meâ.

Ultima perpetior, mediøs projectus in hostes:

Nec quisquam patria longius exsul abest.

Solus ad egressus missus septemplex Istri,

Parrhasiæ gelido virginis axe premor. 190

Jazyges, & Colchi, Metereaue turba, Getæque,

Danubii mediis vix prohibentur aquis.

Cumque alii caussa tibi sint graviore fugati,

Ulterior nulli, quam mihi, terra data est.

Longius hac nihil est, nisi tantum frigus & hostis, 195

Et maris adstricto quæ coit unda gelu.

Hactenus Euxini pars est Romana sinistri:

Proxima Basternæ Sauromatæque tenent.

Hæc est Ausonio sub jure novissima, vixque

Hæret in imperii margine terra tui. 200

Unde precor supplex, ut nos in tuta releges:



Ne sit cum patria pax quoque demta mihi:  
Ne timeam gentes, quas non bene submovet Ister:  
Neve tuus possim civis ab hoste capi.  
Fas prohibet Latio quemquam de sanguine natum, 205  
Cæsaribus salvis, barbara vincla pati.  
Perdiderint cum me duo crimina, carmen & error,  
Alterius facti culpa silenda mihi.  
Nam non sum tanti, ut renovem tua vulnera, Cæsar;  
Quem nimio plus est indoluisse semel. 210  
Altera pars superest: qua turpi crimine tactus  
Arguor obscæni doctor adulterii.  
Fas ergo est aliquâ cœlestia pectora falli;  
Et sunt notitiâ multa minora tuâ?  
Utque Deos, cœlumque simul sublime tuenti 215  
Non vacat exiguis rebus adesse Jovi;  
A te pendentem sic dum circumspicis orbem,  
Effugiunt curas inferiora tuas.  
Scilicet imperii, Princeps, statione relicta,  
Imparibus legeres carmina facta modis? 220  
Non ea te moles Romani nominis arguet,  
Inque tuis humeris tam leve fertur onus,  
Lusibus ut possis advertere numen ineptis,  
Excultasque oculis otia nostra tuis.  
Nunc tibi Pannonia est, nunc Illyris ora domanda: 225  
Rætica nunc præbent Thraciaque arma metum.  
Nunc petit Armenius pacem: nunc porrigit arcus  
Parthus eques, timidâ captaque signa manu.

Nunc te prole tua juvenem Germania sentit;  
: Bellaque pro magno Cæsare Cæsar obit. 230  
Denique, ut in tanto, quantum non exstitit unquam,  
Corpore, pars nulla est quæ labet imperii;  
Urbs quoque te & legum lassat tutela tuarum,  
Et morum, similes quos cupis esse tuis.  
Nec tibi contingunt, quæ gentibus otia præstas; 235  
Bellaque cum multis irrequieta geris.  
Mirer in hoc igitur tantarum pondere rerum  
Numquam te nostros evoluisse jocos?  
At si (quod mallet) vacuus fortasse fuisses,  
Nullum legisses crimen in Arte mea. 240  
Illa quidem fateor fronti non esse severæ  
Scripta, nec a tanto Principe digna legi:  
Non tamen idcirco legum contraria jussis  
Sunt ea; Romanas erudiuntque nurus.  
Neve quibus scribam possis dubitare, libellus 245  
Quatuor hos versus e tribus unus habet:  
Este procul, vittæ tenues, insigne pudoris;  
Quæque tegis medios instita longa pedes:  
Nil, nisi legitimum, concessaque furta, canemus;  
Inque meo nullum carmine crimen erit. 250  
Ecquid ab hac omnes rigide submovimus Arte,  
Quas stola contingi vittaque sumta vetat?  
At matrona potest alienis artibus uti;  
Quoque trahat, quamvis non doceatur, habet.  
Nil igitur matrona legat: quia carmine ab omni 255

Ad delinquendum doctior esse potest.  
Quodcumque attigerit, si qua est studiosa sinistri,  
Ad vitium mores instruet inde suos.  
Sumserit Annales; (nihil est hirsutius illis)  
Facta sit unde parens Ilia nempe leget. 260  
Sumserit, Æneadum genetrix ubi prima; requiret,  
Æneadum genetrix unde sit alma Venus.  
Persequar inferius, (modo si licet ordine ferri)  
Posse nocere animis carminis omne genus.  
(Non tamen idcirco crimen liber omnis habebit. 265  
Nil prodest, quod non lædere possit idem.)  
Igne quid utilius? si quis tamen urere tecta  
Comparat, audaces instruit igne manus.  
Eripit interdum, modo dat medicina salutem:  
Quæque juvans monstrat, quæque sit herba nocens. 270  
Et latro, & cautus præcingitur ense viator:  
Ille sed insidias, hic sibi portat opem.  
Discitur, innocuas ut agat, facundia, caussas:  
Protegit hæc sontes, immeritosque premit.  
Sic igitur carmen, recta si mente legatur, 275  
Constabit nulli posse nocere meum.  
At quiddam vitii quicumque hinc concipit, errat;  
Et nimium scriptis abrogat ille meis.  
Ut tamen hoc fatear, ludi quoque semina præbent  
Nequitiae. tolli tota theatra jube: 280  
Peccandi causam quæ multis sæpe dederunt,  
Martia cum durum sternit arena solum.

Tollatur Circus; non tuta licentia Circi:

Hic sedet ignoto juncta puella viro.

Cum quædam spatientur in hac, ut amator eâdem 285

Conveniat, quare porticus ulla patet?

Quis locus est templis augustior? hæc quoque vitet,

In culpam si qua est ingeniosa suam.

Cum steterit Jovis æde, Jovis succurret in æde,

Quam multas matres fecerit ille Deas. 290

Proxima adoranti Junonia templa subibit,

Pellicibus multis hanc doluisse Deam.

Pallade conspecta, natum de crimine virgo

Sustulerit quare, quæret, Erichthonium.

Venerit in magni templum, tua munera, Martis; 295

Stat Venus Ultori juncta viro ante fores.

Isidis æde sedens, cur hanc Saturnia, quæret,

Egerit Ionio Bosporioque mari.

In Venere Anchises, in Luna Latmius heros,

In Cerere Iasion, qui referatur, erit. 300

Omnia perversas possunt corrumpere mentes.

Stant tamen illa suis omnia tuta locis.

At procul ab scripta solis meretricibus Arte

Submovet ingenuas pagina prima nurus.

Quæcumque irrumpit, quod non sinit ire sacerdos, 305

Protinus hoc vetiti criminis acta rea est.

Nec tamen est facinus molles evolvere versus:

Multa licet castæ non facienda legant.

Sæpe supercilii nudas matrona severi

- Et Veneris stantes ad genus omne videt. 310  
Corpora Vestales oculi meretricia cernunt:  
Nec domino pœnæ res ea caussa fuit.  
At cur in nostrâ nimia est lascivia Musâ?  
Curve meus cuiquam suadet amare liber?  
Nil nisi peccatum, manifesta que culpa, fatendum est: 315  
Pœnitet ingenii judicii que mei.  
Cur non, Argolicis potius quæ concidit armis,  
Vexata est iterum carmine Troja meo?  
Cur tacui Thebas, & mutua vulnera fratrum?  
Et septem portas, sub duce quamque suos? 320  
Nec mihi materiam bellatrix Roma negabat:  
Et pius est, patriæ facta referre, labor.  
Denique, cum meritis impleveris omnia, Cæsar,  
Pars mihi de multis una canenda fuit.  
Utque trahunt oculos radiantia lumina Solis, 325  
Traxissent animum sic tua facta meum.  
Arguor immerito. tenuis mihi campus aratur:  
Illud erat magnæ fertilitatis opus.  
Non ideo debet pelago se credere, si quæ  
Audet in exiguo ludere cymba lacu. 330  
Forsan (& hoc dubitem) numeris levioribus aptus  
Sim satis; in parvos sufficiamque modos.  
At si me jubeas domitos Jovis igne Gigantas  
Dicere, conantem debilitabit onus.  
Divitis ingenii est immania Cæsaris acta 335  
Condere; materia ne superetur opus.

Et tamen ausus eram: sed detractare videbar,  
Quodque nefas, damno viribus esse tuis.  
Ad leve rursus opus, juvenilia carmina, veni;  
Et falso movi pectus amore meum. 340  
Non equidem vellem: sed me mea fata trahebant,  
Inque meas pœnas ingeniosus eram.  
Hei mihi, quod didici! quod me docuere parentes,  
Litteraque est oculos ulla morata meos!  
Hæc tibi me invisum lascivia fecit, ob Artes, 345  
Quas ratus es vetitos sollicitasse toros.  
Sed neque me nuptæ didicerunt furta magistro:  
Quodque parum novit, nemo docere potest.  
Sic ego delicias, & mollia carmina feci,  
Strinxerit ut nomen fabula nulla meum. 350  
Nec quisquam est adeo media de plebe maritus,  
Ut dubius vitio sit pater ille meo.  
Credere mihi; mores distant a carmine nostro.  
Vita verecunda est, Musa jocosa, mihi.  
Magnaque pars operum mendax & ficta meorum 355  
Plus sibi permisit compositore suo.  
Nec liber indicium est animi, sed honesta voluptas,  
Plurima mulcendis auribus apta ferens.  
Accius esset atrox; conviva Terentius esset;  
Essent pugnaces, qui fera bella canunt. 360  
Denique composui teneros non solus amores:  
Composito pœnas solus amore dedi.  
Quid, nisi cum multo Venerem confundere vino

Præcepit Lyrici Teia Musa senis?

Lesbia quid docuit Sappho, nisi amare puellas? 365

Tuta tamen Sappho, tutus & ille fuit.

Nec tibi, Battiade, nocuit, quod sæpe legenti

Delicias versu fassus es ipse tuas.

Fabula jucundi nulla est sine amore Menandri:

Et solet hic pueris virginibusque legi. 370

Ilias ipsa quid est, nisi turpis adultera, de qua

Inter amatorem pugna virumque fuit?

Quid prius est illi flammâ Chryseidos? utque

Fecerit iratos rapta puella duces?

Aut quid Odyssea est, nisi femina, propter amorem, 375

Dum vir abest, multis una petita procis?

Quis nisi Mæonides Venerem Martemque ligatos

Narrat, in obscæno corpora presa toro?

Unde, nisi indicio magni sciremus Homeri,

Hospitis igne duas incaluisse Deas? 380

Omne genus scripti gravitate Tragædia vincit:

Hæc quoque materiam semper amoris habet.

Nam quid in Hippolyto, nisi cæcæ flamma novercæ?

Nobilis est Canace fratris amore sui.

Quid? non Tantalides, agitante Cupidine currus, 385

Pisæam Phrygiis vexit eburnus equis?

Tingueret ut ferrum natorum sanguine mater,

Concitus a læso fecit amore dolor.

Fecit amor subitas volucres, cum pellice regem,

Quæque suum luget nunc quoque mater Ityn. 390

Si non Æeropen frater sceleratus amasset,  
 Aversos Solis non legeremus equos.  
 Impia nec tragicos tetigisset Scylla cothurnos,  
 Nî patrium crinem descuisset amor.  
 Qui legis Electra, & egentem mentis Oresten, 395  
 Ægysthi crimen Tyndaridosque legis.  
 Nam quid de tetrico referam domitore Chimææ,  
 Quem leto fallax hospita pene dedit?  
 Quid loquor Hermionen? quid te, Schœneia virgo?  
 Teque, Mycenæo Phœbas amata duci? 400  
 Quid Danaen, Danaesque nurum, matremque Lyæi?  
 Hæmonaque, & noctes cui coiere duæ?  
 Quid Generum Pelîæ? quid Thesea? quidve Pelasgum,  
 Iliacam tetigit qui rate primus humum?  
 Huc Iole, Pyrrhique parens, huc Herculis uxor, 405  
 Huc accedat Hylas, Iliadesque puer.  
 Tempore deficiat, tragicos si persequar ignes;  
 Vixque meus capiat nomina nuda liber.  
 Est & in obscænos deflexa Tragœdia risus,  
 Multaque præteriti verba pudoris habet. 410  
 Nec nocet auctori, mollem qui fecit Achillem,  
 Infregisse suis fortia facta modis.  
 Junxit Aristides Milesia crimina secum:  
 Pulsus Aristides nec tamen urbe sua.  
 Nec, qui descripsit corrumpi semina matrum, 415  
 Eubius, impuræ conditor historiæ.  
 Nec, qui composuit nuper Sybaritida, fugit:



Nec quæ concubitus non tacuere suos.  
 Suntque ea doctorum monumentis mixta virorum,  
 Muneribusque Ducum publica facta patent. 420  
 Neve peregrinis tantum defendar ab armis,  
 Et Romanus habet multa jocosa liber.  
 Utque suo Martem cecinit gravis Ennius ore,  
 Ennius ingenio maximus, arte rudis;  
 Explicat ut caussas rapidi Lucretius ignis, 425  
 Casurumque triplex vaticinatur opus;  
 Sic sua lascivo cantata est sæpe Catullo  
 Femina, cui falsum Lesbia nomen erat.  
 Nec contentus ea, multos vulgavit amores,  
 In quibus ipse suum fassus adulterium est. 430  
 Par fuit exigui similisque licentiâ Calvi,  
 Detexit variis qui sua furta modis.  
 Quid referam Tucidæ, quid Memmi carmen, apud quos  
 Rebus abest nomen, nominibusque pudor?  
 Cinna quoque his comes est, Cinnaque procacior Anser: 435  
 Et leve Cornifici, parque Catonis opus.  
 Et quorum libris modo dissimulata Perillæ  
 Nomine, nunc legitur dicta Metella suo.  
 Is quoque, Phasiacas Argo qui duxit in undas,  
 Non potuit Veneris furta tacere suæ. 440  
 Nec minus Hortensi, nec sunt minus improba Servi  
 Carmina. quis dubitet nomina tanta sequi?  
 Vertit Aristiden Sisena: nec obfuit illi  
 Historiæ turpes inseruisse jocos.

Nec fuit opprobrio celebrasse Lycorida Gallo, 445

Sed linguam nimio non tenuisse mero.

Credere juranti durum putat esse Tibullus;

Sic etiam de se quod neget illa viro.

Fallere custodem demum docuisse fatetur;

Seque sua miserum nunc ait arte premi. 450

Sæpe velut gemmam dominæ signumve probaret,

Per caussam meminit se tetigisse manum.

Utque refert, digitis sæpe est nutuque locutus,

Et tacitam mensæ duxit in orbe notam.

Et quibus e succis abeat de corpore livor, 455

Impresso fieri qui solet ore, docet.

Denique ab incauto nimium petit ille marito,

Se quoque uti servet, peccet ut illa minus.

Scit cui latretur, cum solus obambulat ille;

Cur toties clausas excreet ante fores. 460

Multaque dat talis furti præcepta: docetque

Qua nuptæ possint fallere ab arte viros.

Nec fuit hoc illi fraudi; legiturque Tibullus,

Et placet, & jam te Principe notus erat.

Invenies eadem blandi præcepta Properti: 465

Districtus minima nec tamen ille nota est.

His ego successi, quoniam præstantia candor

Nomina vivorum dissimulare jubet.

Non timui, fateor, ne, quâ tot iere carinæ,

Naufraga, servatis omnibus, una foret. 470

Sunt aliis scriptæ, quibus alea luditur, artes,

Hæc

Hæc est ad nostros non leve crimen avos.  
Quid valeant tali; quo possis plurima jactu  
Fingere; damnosos effugasve canes.  
Tessera quot numeros habeat: distante vocato 475  
Mittere quo deceat, quo dare missa modo.  
Discolor ut recto grassetur limite miles,  
Cum medius gemino calculus hoste perit.  
Ut mage velle sequi sciat, & revocare priorem,  
Ne tuto fugiens incommitatus eat. 480  
Parva sed & ternis instructa tabella lapillis;  
In qua vicisse est, continuasse suos.  
Quique alii lusus (neque enim nunc persequar omnes)  
Perdere rem caram, tempora nostra, solent.  
Ecce canit formas alias jactusque pilarum. 485  
Hic artem nandi præcipit, ille trochi.  
Composita est aliis fucandi cura coloris:  
Hic epulis leges hospitioque dedit.  
Alter humum, de qua fingantur pocula, monstrat:  
Quæque docet liquido testa sit apta mero. 490  
Talia fumosi luduntur mense Decembris;  
Quæ damno nulli composuisse fuit.  
His ego deceptus non tristia carmina feci;  
Sed tristis nostros pœna secuta jocos.  
Denique nec video de tot scribentibus unum, 495  
Quem sua perdiderit Musa: repertus ego.  
Quid? si scripsissem mimos, obscæna jocantes,  
Qui semper ficti crimen amoris habent?  
Ovidius T. III. R

In quibus assidue cultus procedit adulter;  
Verbaque dat stulto callida nupta viro. 500  
Nubilis hos virgo, matronaque, virque, puerque  
Spectat; & e magna parte Senatus adest.  
Nec satis incestis temerari vocibus aures:  
Adsuescunt oculi multa pudenda pati.  
Cumque fefellit amans aliquâ novitate maritum, 505  
Plauditur; & magno palma favore datur.  
Quoque minus prodest, scena est lucrosa poetæ:  
Tantaque non parvo crimina Prætor emit.  
Inspice ludorum sumtus, Auguste, tuorum:  
Emta tibi magno talia multa leges. 510  
Hæc tu spectasti, spectandaque sæpe dedisti.  
Majestas adeo comis ubique tua est.  
Luminibusque tuis, totus quibus utimur orbis,  
Scenica vidisti lentus adulteria.  
Scribere si fas est imitantes turpia mimos; 515  
Materiæ minor est debita pœna meæ.  
An genus hoc scripti faciunt sua pulpita tutum;  
Quodque libet, mimis scena licere dedit?  
Et mea sunt populo saltata poemata sæpe:  
Sæpe oculos etiam detinuere tuos. 520  
Scilicet in domibus vestris, ut prisca virorum  
Artifici fulgent corpora picta manu;  
Sic, quæ concubitus varios Venerisque figuras  
Exprimat, est aliquo parva tabella loco.  
Utque sedet vultu fassus Telamonius iram, 525

Inque oculis facinus barbara Mater habet;  
Sic madidos siccant digitis Venus uda capillos;  
Et modo maternis tecta videtur aquis.  
Bella sonant alii, telis instructa cruentis:  
Parsque tui generis, pars tua facta canunt. 530  
Invida me spatio Natura coercuit arto,  
Ingenio vires exiguasque dedit.  
Et tamen ille, tuæ felix Æneidos auctor,  
Contulit in Tyrios arma virumque toros:  
Nec legitur pars ulla magis de corpore toto, 535  
Quam non legitimo fœdere junctus amor.  
Phyllidis hic idem tenerosque Amaryllidis ignes  
Bucolicis juvenis luserat ante modis.  
Nos quoque jampridem scripto peccavimus uno.  
Supplicium patitur non nova culpa novum. 540  
Carminaque edideram, cum te delicta notantem  
Præterii toties jure quietus eques.  
Ergo, quæ juveni mihi non nocitura putavi  
Scripta parum prudens, nunc nocuere seni?  
Sera redundavit veteris vindicta libelli; 545  
Distat & a meriti tempore pœna sui.  
Ne tamen omne in eum credas opus esse remissum,  
Sæpe dedi nostræ grandia vela rati.  
Sex ego Fastorum scripsi totidemque libellos;  
Cumque suo finem mense volumen habet. 550  
Idque tuo nuper scriptum sub nomine, Cæsar,  
Et tibi sacratum sors mea rupit opus.

Et dedimus tragicis scriptum regale cothurnis:

Quæque gravis debet verba cothurnus habet.

Distaque sunt nobis (quamvis manus ultima cæpto 555

Defuit) in facies corpora versa novas.

Atque utinam revoces animum paullisper ab ira,

Et vacuo jubeas hinc tibi pauca legi!

Pauca, quibus prima surgens ab origine mundi,

In tua deduxi tempora, Cæsar, opus: 560

Adspicias, quantum dederis mihi pectoris ipse;

Quoque favore animi teque tuosque canam.

Non ego mordaci destrinxi carmine quemquam;

Nec meus ullius crimina versus habet.

Candidus a salibus suffusis felle refugi: 565

Nulla venenato litera mixta joco est.

Inter tot populi, tot scripti millia nostri,

Quem mea Calliope læserit, unus ego.

Non igitur nostris ullum gaudere Quiritem

Auguror, at multos indoluisse malis. 570

Nec mihi credibile est quemquam insultasse jacenti;

Gratia candori si qua relata meo est.

His precor atque aliis possint tua numina flecti,

O Pater, o Patriæ cura salusque tuæ.

Non ut in Ausoniam redeam, nisi forsitan olim, 575

Cum longo pœnæ tempore victus eris.

Tutius exsilium, paulloque quietius, oro:

Ut par delicto sit mea pœna suo.



P. OVIDII NASONIS  
 TRISTIUM  
 LIBER III.

---

ELEGIA I.

**M**issus in hanc venio timidi liber exsulis urbem:

Da placidam fesso, lector amice, manum;  
 Neve reformida, ne sim tibi forte pudori.

Nullus in hac charta versus amare docet.  
 Nec domini fortuna mei est, ut debeat illam 5  
 Infelix ullis dissimulare jocis.

Id quoque, quod viridi quondam male lusit in ævo,  
 Heu nimium sero damnat & odit opus.

Inspice quid portem: nihil hîc nisi triste videbis,  
 : Carmine temporibus conveniente suis. 10

Clauda quod alterno subsidunt carmina versu,  
 Vel pedis hoc ratio, vel via longa facit.

Quod neque sum cedro flavus, nec pumice levis,

R 3

Erubui domino cultior esse meo.

Litera suffusas quod habet maculosa lituras, 15

Læsit opus lacrimis ipse poeta suum.

Si qua videbuntur casu non dicta Latine,

In qua scribebat, barbara terra fuit.

Dicite, lectores, si non grave, quâ sit eundum;

Quasque petam sedes hospes in Urbe liber. 20

Hæc ubi sum lingua furtim titubante locutus,

Qui mihi monstraret, vix fuit unus, iter.

Dî tibi dent, nostro quod non tribuere parenti,

Molliter in patria vivere posse tua.

Duc age: namque sequor. quamvis terraque marique 25

Longinquo referam lassus ab orbe pedem.

Paruit; & ducens, Hæc sunt Fora Cæsaris, inquit:

Hæc est a Sacris quæ via nomen habet.

Hic focus est Vestæ, qui Pallada servat & ignem:

Hic fuit antiqui regia parva Numæ. 30

Inde petens dextram, Porta est, ait, ista Palatî:

Hic Stator: hoc primùm condita Roma loco est.

Singula dum miror, video fulgentibus armis

Conspicuos postes, tectaque digna Deo.

An Jovis hæc, dixi, domus est? quod ut esse putarem, 35

Augurium menti querna corona dabat.

Cujus ut accepi dominum, Non fallimur, inquam:

Et magni verum est hanc Jovis esse domum.

Cur tamen adpositâ velatur janua lauro,

Cingit & augustas arbor opaca fores? 40



Num quia perpetuos meruit domus una triumphos?

An quia Leucadio semper amata Deo?

Ipsane quod festa est, an quod facit omnia festa?

Quam tribuit terris, Pacis an ista nota est?

Utque viret semper laurus, nec fronde caduca 45

Carpitur; æternum sic habet illa decus?

Causa, superpositæ scripto testata coronæ,

Servatos cives indicat hujus ope.

Adjice servatis unum, Pater optime, civem,

Qui procul extremo pulsus in orbe jacet: 50

In quo pœnarum, quas se meruisse fatetur,

Non facinus caussam, sed suus error habet.

Me miserum, vereorque locum, venerorque potentem,

Et quaticur trepido litera nostra metu.

Adspicis exsanguì chartam pallere colore? 55

Adspicis alternos intremuisse pedes?

Quandocumque, precor, nostro placata parenti,

Îsdem sub dominis adspiciare domus.

Inde tenore pari gradibus sublimia celsis

Ducor ad intonsi candida templa Dei; 60

Signa peregrinis ubi sunt alterna columnis

Belides, & stricte barbarus ense pater:

Quæque viri docto veteres cepere novique

Pectore, lecturis inspicienda patent.

Quærebam fratres, exceptis scilicet illis, 65

Quos suus optaret non genuisse parens.

Quærentem frustra custos me, sedibus illis.

Præpositus, sancto jussit abire loco.

Altera templa peto, vicino juncta theatro:

Hæc quoque erant pedilus non adeunda meis. 70

Nec me, quæ doctis patuerunt prima libellis,

Atria Libertas tangere passa sua est.

In genus auctoris miseri fortuna redundat;

Et patimur nati, quam tulit ipse, fugam.

Forsitan & nobis olim minus asper, & illi 75

Evisus longo tempore Cæsar erit.

Dî, precor, atque adeo, (neque enim mihi turba  
roganda est)

Cæsar, ades voto, maxime Dive, meo.

Interea, statio quoniam mihi publica clausa est,

Privato liceat delituisse loco. 80

Vos quoque, si fas est, confusa pudore repulsæ

Sumite plebejæ carmina nostra manus.

## E L E G I A II.

**E**Rgo erat in fatis Scythiam quoque visere nostris,

Quæque Lycaonio terra sub axe jacet?

Nec vos, Pierides, nec stirps Latoia, vestro

Docta sacerdoti turba tulistis opem?

Nec mihi, quod lusi vero sine crimine, prodest; 5

Quodque magis vitâ Musa jocosa mea est;

Plurima sed pelago terraque pericula passum

Ustus ab assiduo frigore Pontus habet.

Quique fugax rerum, securaque in otia natus,

Mollis & impatiens ante laboris eram; 10

Ultima nunc patior. nec me mare portubus orbum

Perdere, diversæ nec potuere viæ.

Suffecitque malis animus. nam corpus ab illo

Accepit vires; vixque ferenda tulit.

Dum tamen & ventis dubius jactabar & undis, 15

Fallebat curas ægraque corda labor.

Ut via finita est, & opus requievit eundi,

Et pœnæ tellus est mihi tacta meæ;

Nil nisi flere libet. nec nostro parciore imber

Lumine, de vernâ quam nive manat aqua. 20

Roma domusque subit, desideriumque locorum,

Quidquid & amissa restat in Urbe mei.

Hei mihi, quod nostri toties pulsata sepulcri

Janua, sed nullo tempore aperta fuit!

Cur ego tot gladios fugi, totiesque minata 25

Obruit infelix nulla procella caput?

Dî, quos experior nimium constanter iniquos,

Participes iræ quos Deus unus habet;

Extimulate, precor, cessantia fata; meique

Interitus clausas esse vetate fores. 30

## E L E G I A III.

**H**ÆC mea, si casu miraris, epistola quare  
Alterius digitis scripta sit; æger eram.  
Æger in extremis ignoti partibus orbis,  
Incertusque meæ pene salutis eram.  
Quid mihi nunc animi dira regione jacenti 5  
Inter Sauromatas esse Getasque putes?  
Nec cœlum patimur, nec aquis adsuevimus istis:  
Terraque nescio quo non placet ipsa modo.  
Non domus apta satis: non hîc cibus utilis ægro:  
Nullus, Apollinea qui levet arte malum. 10  
Non qui soletur, non qui labentia tarde  
Tempora narrando fallat, amicus adest.  
Lassus in extremis jaceo populisque locisque:  
Et subit adfecto nunc mihi, quidquid abest.  
Omnia cum subeant, vincis tamen omnia, conjux: 15  
Et plus in nostro pectore parte tenes.  
Te loquor absentem: vox te mea nominat unam:  
Nulla venit sine te nox mihi, nulla dies.  
Quin etiam sic me dicunt aliena locutum,  
Ut foret amenti nomen in ore tuum. 20  
Si jam deficiat suppresso lingua palato,  
Vix instillato restituenda mero;  
Nuntiet huc aliquis dominam venisse; resurgam:  
Spesque tui nobis caussa vigoris erit.

Ergo ego sum vitæ dubius: tu forsitan illic 25  
Jucundum nostri nescia tempus agis?  
Non agis, adfirmo: liquet, o carissima, nobis,  
Tempus agi sine me non nisi triste tibi.  
Si tamen implevit mea sors, quos debuit, annos,  
Et mihi vivendi tam cito finis adest; 30  
Quantum erat, o magni, perituro parcere, Divi;  
Ut saltem patria contumularer humo?  
Vel pœna in mortis tempus dilata fuisset,  
Vel præcepisset mors properata fugam.  
Integer hanc potui nuper bene reddere lucem: 35  
Exsul ut occiderem, nunc mihi vita data est.  
Tam procul ignotis igitur moriemur in oris;  
Et fient ipso tristia fata loco?  
Nec mea consueto languescent corpora lecto?  
Depositum nec me qui fleat, ullus erit? 40  
Nec, dominæ lacrimis in nostra cadentibus ora,  
Accedent animæ tempora parva meæ?  
Nec mandata dabo? nec cum clamore supremo  
Labentes oculos condet amica manus?  
Sed sine funeribus caput hoc, sine honore sepulcri 45  
Indeploratum barbara terra teget?  
Ecquid, ut audieris, tota turbabere mente;  
Et feries pavidâ pectora fida manu?  
Ecquid, in has frustra tendens tua brachia partes,  
Clamabis miseri nomen inane viri? 50  
Parce tamen lacerare genas; nec scinde capillos.

Non tibi nunc primum, lux mea, raptus ero.  
Cum patriam amisi, tum me periisse putato:  
Et prior & gravior mors fuit illa mihi.  
Nunc, si forte potes, sed non potes, optima conjux, 53  
Finitis gaude tot mihi morte malis.  
Quam potes, extenua forti mala corde ferendo,  
Ad quæ jampridem non rude pectus habes.  
Atque utinam percant animæ cum corpore nostræ,  
Effugiatque avidos pars mihi nulla rogos! 60  
Nam si morte carens vacuum volat altus in auram  
Spiritus, & Samii sunt rata dicta senis;  
Inter Sarmaticas Romana vagabitur umbras,  
Perque feros manes hospita semper erit.  
Ossa tamen facito parvâ referantur in urnâ. 65  
Sic ego non etiam mortuus exsul ero.  
Nec vetat hoc quisquam. fratrem Thebana peremtum  
Supposuit tumulo, Rege vetante, soror.  
Atque ea cum foliis & Amomi pulvere misce:  
Inque suburbano condita pone solo. 70  
Quosque legat versus oculo properante viator,  
Grandibus in tumuli marmore cæde notis.  
Hic ego qui jaceo, tenerorum lusor amorum,  
Ingenio perii Naso poeta meo.  
At tibi qui transis, ne sit grave, quisquis amasti, 75  
Dicere, Nasonis molliter ossa cubent.  
Hoc satis in titulo est. etenim majora libelli,  
Et diuturna magis sunt monumenta mei.

Quos ego confido, quamvis nocuere, daturos  
Nomen, & auctori tempora longa suo. 80  
Tu tamen extincto feralia munera ferto;  
Deque tuis lacrimis humidaserta dato.  
Quamvis in cinerem corpus mutaverit ignis,  
Sentiet officium mœsta favilla pium.  
Scribere plura libet: sed vox mihi fessa loquendo 85  
Distandi vires, siccaque lingua, negat.  
Accipe supremo dictum mihi forsitan ore,  
Quod, tibi qui mittit, non habet ipse, Vale.

---

## E L E G I A IV.

**O** Mihi care quidem semper, sed tempore duro  
Cognite, res postquam procubuere meæ;  
Usibus edocto si quidquam credis amico,  
Vive tibi, & longe nomina magna fuge.  
Vive tibi, quantumque potes prælustria vita: 5  
Sævum prælustri fulmen ab arce venit.  
Nam quamquam soli possunt prodesse potentes,  
Non prosit potius, si quis obesse potest.  
Effugit hibernas demissa antenna procellas,  
Lataque plus parvis vela timoris habent. 10  
Adspicis, ut summa cortex levis innatet unda,  
Cum grave nexa simul retia mergat onus.

Hæc ego si monitor monitus prius ipse fuisset,  
In qua debueram forsitan Urbe forem.  
Dum tecum vixi, dum me levis aura ferebat, 15  
Hæc mea per placidas cymba cucurrit aquas.  
Qui cadit in plano, (vix hoc tamen evenit ipsum)  
Sic cadit, ut tacta surgere possit humo:  
At miser Elpenor tecto delapsus ab alto  
Occurrit Regi debilis umbra suo. 20  
Quid fuit, ut tutas agitarit Dædalus alas,  
Icarus immensas nomine signet aquas?  
Nempe quod hic alte, demissius ille volabat.  
Nam pennas ambo non habuere suas?  
Crede mihi; bene qui latuit, bene vixit: & intra 25  
Fortunam debet quisque manere suam.  
Non foret Eumedes orbus, si filius ejus  
Stultus Achilleos non adamasset equos.  
Nec natum in flamma vidisset, in arbore natus,  
Cepisset genitor si Phaethonta Merops. 30  
Tu quoque formida nimium sublimia semper;  
Propositique memor contrahe vela tui.  
Nam pede inoffenso spatium decurrere vitæ  
Dignus es, & fato candidiore frui.  
Quæ pro te ut voveam miti pietate mereris, 35  
Hæsuræque mihi tempus in omne fide.  
Vidi ego te tali vultu mea fata gementem,  
Qualem credibile est ore fuisse meo.  
Nostra tuas vidi lacrimas super ora cadentes;



Tempore quas uno, fidaque verba, bibi. 40  
Nunc quoque submotum studio defendis amicum;  
Et mala, vix ullà parte levanda, levas.  
Vive sine invidia, mollesque inglorius annos  
Exige: amicitias & tibi junge pares:  
Nasonisque tui, quod adhuc non exulat unum, 45  
Nomen ama. Scythicus cetera Pontus habet.  
Proxima sideribus tellus Erymanthidos Ursæ  
Me tenet; adstricto terra perusta gelu.  
Bosporos & Tanais superant, Scythicæque paludes;  
Vixque satis noti nomina pauca loci. 50  
Ulterius nihil est, nisi non habitabile frigus.  
Heu quam vicina est ultima terra mihi!  
At longe patria est, longe carissima conjux:  
Quidquid & hæc nobis post duo dulce fuit.  
Sic tamen hæc absunt; ut quæ contingere non est 55  
Corpore, sint animo cuncta videnda meo.  
Ante oculos errant domus, urbs, & forma locorum;  
Succeduntque suis singula facta locis.  
Conjugis ante oculos, sicut præsentis, imago est.  
Illa meos casus ingravat, illa levat. 60  
Ingravat hoc, quod abest; levat hoc, quod præstat amorem;  
Impositumque sibi firma tuetur onus.  
Vos quoque pectoribus nostris hæretis, amici;  
Dicere quos cupio nomine quemque suo.  
Sed timor officium cautus compescit; & ipsos 65  
In nostro poni carmine nolle puto.

Ante volebatis; gratique erat instar honoris,  
 Versibus in nostris nomina vestra legi.  
 Quod quoniam est anceps, intra mea pectora quemque  
 Adloquar: & nulli caussa timoris ero. 70  
 Nec meus indicio latitantes versus amicos  
 Protrahet. occulte si quis amavit, amet.  
 (Scite tamen, quamvis longa regione remotus  
 Absim, vos animo semper adesse meo.)  
 Et, quam quisque potest, aliquâ mala nostra levate: 75  
 Fidam projecto neve negate manum.  
 Prospera sic vobis maneat Fortuna: nec umquam  
 Contacti simili sorte rogetis opem.

## E L E G I A V.

U Sus amicitiae tecum mihi parvus, ut illam  
 Non ægre posses dissimulare, fuit:  
 Nî me complexus vinclis propioribus esses,  
 Nave mea vento forsân eunte suo.  
 Ut cecidi, cunctique metu fugere ruinæ, 5  
 Versaque amicitiae terga dedere meæ;  
 Ausus es igne Jovis percussum tangere corpus,  
 Et deploratæ limen adire domûs.  
 Idque recens præstas, nec longo cognitus usu,  
 Quod veterum misero vix duo tresve mihi. 10  
 Vidi

Vidi ego confusos vultus, visosque notavi,  
Osque madens fletu, pallidiusque meo:  
Et lacrimas cernens in singula verba cadentes,  
Ore meo lacrimas, auribus illa bibi:  
Brachiaque accepi mæsto pendentia collo, 15  
Et singultatis oscula mixta sonis.  
Sum quoque, Care, tuis defensus viribus absens:  
Scis Carum veri nominis esse loco.  
Multaque præterea manifesti signa favoris  
Pectoribus teneo non abitura meis. 20  
Dî tibi, posse tuos, tribuant, defendere semper,  
Quos in materia prosperiore juves.  
Si tamen interea, quid in his ego perditus oris,  
(Quod te credibile est quærere) quæris, agam:  
Spe trahor exigua (quam tu mihi demere noli) 25  
Tristia leniri numina posse Dei.  
Seu temere exspecto, sive id contingere fas est;  
Tu mihi, quod cupio, fas (precor) esse proba.  
Quæque tibi linguæ est facundia, confer in illud,  
Ut doceas votum posse valere meum. 30  
Quo quis enim major, magis est placabilis iræ;  
Et faciles motus mens generosa capit.  
Corpora magnanimo satis est prostrasse leoni:  
Pugna suum finem, cum jacet hostis, habet.  
At lupus, & turpes instant morientibus ursi; 35  
Et quæcumque minor nobilitate fera est.  
Majus apud Trojam forti quid habemus Achille?  
Ovidius T. III. S

Dardanii lacrimas non tulit ille senis.  
 Quæ ducis Emathii fuerit clementia, Poros,  
 Præclarique docent funeris exsequiæ. 40  
 Neve hominum referam flexas ad mitius iras,  
 Junonis gener est, qui prius hostis erat.  
 Denique non possum nullam sperare salutem,  
 Cum pœnæ non sit caussa cruenta meæ.  
 Non mihi quærenti pessum dare cuncta, petitem 45  
 Cæsareum caput est, quod caput orbis erat.  
 Non aliquid dixi, violentaque lingua locuta est;  
 Lapsaque sunt nimio verba profana mero.  
 Inscia quod crimen viderunt lumina, plector:  
 Peccatumque oculos est habuisse meum. 50  
 Non equidem totam possum defendere culpam:  
 Sed partem nostri criminis error habet.  
 Spes igitur superest, facturum ut molliat ipse,  
 Mutati pœnam conditione loci.  
 Hunc utinam nitidi Solis prænuntius ortum 55  
 Adferat admisso Lucifer albus equo.

---

### E L E G I A VI.

**F**œdus amicitiae nec vis, carissime, nostræ,  
 Nec, si forte velis, dissimulare potes.  
 Donec enim licuit, nec te mihi carior alter,

Nec tibi me tota juncior Urbe fuit.

Isque erat usque adeo populo testatus, ut esset. 5

Pene magis quam tu, quamque ego, notus amor.

Quique erat in caris animi tibi candor amicis,

Cognitus est illi, quem colis ipse, viro.

Nil ita celabas, ut non ego conscius essem;

Pectoribusque dabas multa tegenda meis. 10

Cuique ego narrabam secreti quidquid habebam,

Excepto quod me perdidit, unus eras.

Id quoque si scisses, salvo fruerere sodali;

Consilioque forem sospes, amice, tuo.

(Sed mea me in pœnam nimirum fata trahebant: 15

Omne bonæ claudunt utilitatis iter.)

Sive malum potui tamen hoc vitare cavendo,

Seu ratio fatum vincere nulla valet;

Tu tamen, o nobis usu junctissime longo,

Pars desiderii maxima pene mei, 20

Sis memor: & si quas fecit tibi gratia vires,

Illas pro nobis experiare, rogo.

Numinis ut læsi fiat mansuetior ira,

Mutatoque minor sit mea pœna loco.

Idque ita, si nullum scelus est in pectore nostro, 25

Principiumque mei criminis error habet.

Nec leve, nec tutum est, quo sint mea, dicere, casu

Lumina funesti conscia facta mali.

Mensque reformidat, veluti sua vulnera, tempus

Illud: & admonitu fit novus ipse dolor. 30

Et quæcumque adeo possunt adferre pudorem,  
 Illa tegi cæcâ condita nocte decet.  
 Nil igitur referam, nisi me peccasse; sed illo  
 Præmia peccato nulla petita mihi:  
 Stultitiamque meum crimen debere vocari; 35  
 Nomina si factò reddere vera velis.  
 Quæ si non ita sunt; alium, quo longius absim,  
 Quære, suburbana hæc sit mihi terra, locum.

## E L E G I A VII.

**V** Ade salutatum subito perarata Perillam  
 Litera, sermonis fida ministra mei.  
 Aut illam invenies dulci cum matre sedentem,  
 Aut inter libros Pieridasque suas.  
 Quidquid aget, cum te scierit venisse, relinquet: 5  
 Nec mora; quid venias, quidve, requireret, agam.  
 Vivere me dices; sed sic, ut vivere nolim:  
 Nec mala tam longâ nostra levata morâ.  
 Et tamen ad Musas, quamvis nocuere, reverti;  
 Aptaque in alternos cogere verba pedes. 10  
 Tu quoque, dic, studiis communibus ecquid inhæres,  
 Doctaque non patrio carmina more canis?  
 Nam tibi cum Fatis mores Natura pudicos,  
 Et raras dotes ingeniumque dedit.

Hoc ego Pegasidas deduxi primus ad undas, 15  
Ne male fecundæ vena periret aquæ.  
Primus id adspexi teneris in virginis annis:  
Utque patet, venæ duxque comesque fui.  
Ergo, si remanent ignes tibi pectoris idem,  
Sola tuum vates Lesbia vincet opus. 20  
Sed vereor, ne te mea nunc Fortuna retardet;  
Postque meos casus sit tibi pectus iners.  
Dum licuit, tua sæpe mihi, tibi nostra legebam:  
Sæpe tui iudex; sæpe magister eram.  
Aut ego præbebam factis modo versibus aures, 25  
Aut ubi cessâras, caussa ruboris eram.  
Forsitan exemplo, quia me læsere libelli,  
Tu quoque sis pænæ fata secuta meæ.  
Pone, Perilla, metum. tantummodo femina non sit  
Devia, nec scriptis discat amare tuis. 30  
Ergo desidiæ remove, doctissima, caussas:  
Inque bonas artes & tua sacra redi.  
Ista decens facies longis vitiabitur annis:  
Rugæque in antiquâ fronte senilis erit:  
Injicietque manum formæ damnosa senectus, 35  
Quæ strepitum passu non faciente venit.  
Cumque aliquis dicet, Fuit hæc formosa; dolebis:  
Et speculum mendax esse querere tuum.  
Sunt tibi opes modicæ, cum sis dignissima magnis:  
Finge sed immensis censibus esse pares. 40  
Nempe dat id cuicumque libet Fortuna, rapitque:

Irus & est subito, qui modo Cræsus erat.  
 Singula quid referam? nil non mortale tenemus,  
 Pectoris exceptis ingeniique bonis.  
 En ego, cum patria caream, vobisque, domoque, 45  
 Raptaque sint, adimi quæ potuere, mihi;  
 Ingenio tamen ipse meo comitorque fruorque:  
 Cæsar in hoc potuit juris habere nihil.  
 Quilibet hanc sævo vitam mihi finiat ense;  
 Me tamen extincto fama superstes erit. 50  
 Dumque suis victrix omnem de montibus orbem  
 Prospiciet domitum Martia Roma, legar.  
 Tu quoque, quam studii maneat felicius usus,  
 Effuge venturos, quâ potes, usque rogos.

## E L E G I A VIII.

**N**unc ego Triptolemi cuperem conscendere currus,  
 Misit in ignotam qui rude semen humum:  
 Nunc ego Medæ vellem frenare dracones,  
 Quos habuit fugiens arce, Corinthe, tua:  
 Nunc ego jactandas optarem sumere pennas, 5  
 Sive tuas, Perseu; Dædale, sive tuas:  
 Ut tenerâ nostris cedente volatibus aurâ  
 Adspicerem patriæ dulce repente solum:  
 Desertæque domûs vultum, memoresque sodales,



Caraque præcipue conjugis ora mihi. 10  
Stulte, quid ô frustra votis puerilibus optas,  
Quæ non ulla tibi fertque, feretque, dies?  
Si semel optandum est, Augustum numen adora:  
Et quem sensisti, rite precare, Deum.  
Ille tibi pennasque potest currusque volucres 15  
Tradere. det redditum; protinus ales eris.  
Si precer hæc, (neque enim possim majora precari)  
Ne mea sint timeo vota modesta parum.  
Forsitan hoc olim, cum se satiaverit ira,  
Tum quoque sollicita mente rogandus erit. 20  
Quod minus interea est, instar mihi muneris ampli,  
Ex his me jubeat quolibet ire locis.  
Nec cœlum, nec aquæ faciant, nec terra, nec auræ;  
Et mihi perpetuus corpora languor habet.  
Seu vitiant artus ægræ contagia mentis; 25  
Sive mei caussa est in regione mali:  
Ut tetigi Pontum, vexant insomnia, vixque  
Ossa tegit macies; nec juvat ora cibus.  
Quique per autumnum percussis frigore primo  
Est color in foliis, quæ nova læsit hiems; 30  
Is mea membra tenet. nec viribus adlevor ullis;  
Et numquam queruli caussa doloris abest.  
Nec melius valeo, quam corpore, mente; sed ægra est  
Utraque pars æque, binaque damna fero.  
Hæret, & ante oculos, veluti spectabile corpus, 35  
Adstat Fortunæ forma legenda meæ.

Cumque locum, moresque hominum, cultusque, sonumque

Cernimus; & quid sim, quid fuerimque subit;  
 Tantus amor necis est, querar ut cum Cæsaris ira,  
 Quod non offensas vindicet ense suas. 40  
 At quoniam semel est odio civiliter usus,  
 Mutato levior sit fuga nostra loco.

# ELEGIA IX.

**H**ic quoque sunt igitur Grajæ (quis crederet?) urbes,  
 Inter inhumanæ nomina barbariæ.  
 Huc quoque Mileto missi venere coloni,  
 Inque Getis Grajas constituere domos.  
 Sed vetus huic nomen, positaque antiquius urbe, 5  
 Constat ab Absyrti cæde fuisse, loco.  
 Nam rate, quæ curâ pugnacis facta Minervæ,  
 Per non tentatas prima cucurrit aquas,  
 Impia desertum fugiens Medea parentem,  
 Dicitur his remos adplicuisse vadis. 10  
 Quem procul ut vidit tumulo speculator ab alto;  
 Hospes, ait, nosco, Colchide, vela, venit.  
 Dum trepidant Minyæ, dum solvitur aggere funis,  
 Dum sequitur celeres anchora tracta manus;  
 Conscia percussit meritorum pectora Colchis, 15

Ausâ atque ausurâ multa nefandâ manu.  
Et, quamquam superest ingens audacia menti,  
Pallor in attonito virginis ore sedet.  
Ergo ubi prospexit venientia vela, Tenemur,  
Et pater est aliqua fraude morandus, ait. 20  
Dum quid agat quærit, dum versat in omnia vultus;  
Ad fratrem casu lumina flexa tulit.  
Cujus ut oblata est præsentia, Vincimus, inquit.  
Hic mihi morte suâ caussa salutis erit.  
Protinus ignari, nec quidquam tale timentis, 25  
Innocuum rigido perforat ense latus.  
Atque ita divellit, divulsaque membra per agros  
Dissipat, in multis invenienda locis.  
Neu pater ignoret, scopulo proponit in alto  
Pallentesque manus, sanguineumque caput. 30  
Ut genitor luctuque novo tardetur, & artus  
Dum legit extinctos, triste moretur iter.  
Inde Tomis dictus locus hic; quia fertur in illo  
Membra soror fratris consecuisse sui.

---

## E L E G I A X.

**S**I quis adhuc istic meminit Nasonis adempti,  
Et superest sine me nomen in Urbe meum;  
Suppositum stellis numquam tangentibus æquor

Me sciat in media vivere barbarie.

Sauromatæ cingunt, fera gens, Bessique, Getæque: 5

Quam non ingenio nomina digna meo!

Dum tamen aura tepet, medio defendimur Istro.

Ille suis liquidus bella repellit aquis.

At cum tristis hiems squalentia protulit ora,

Terraque marmoreo candida facta gelu est: 10

(Dum patet & Boreas & nix injecta sub Arcto;

Tum liquet has gentes axe tremente premi.)

Nix jacet: & jactam nec Sol pluviae resolvunt:

Indurat Boreas, perpetuamque facit.

Ergo, ubi delicit nondum prior, altera venit: 15

Et solet in multis bima manere locis.

Tantaque commoti vis est Aquilonis, ut altas

Æquet humo turres, tectaque raptâ ferat.

Pellibus, & sutis arcent male frigora braccis;

Oraque de toto corpore sola patent. 20

Sæpe sonant moti glacie pendente capilli,

Et nitet inducto candida barba gelu:

Udaque consistunt, formam servantia testæ,

Vina: nec hausta meri, sed data frusta bibunt.

Quid loquar, ut vincti concrecant frigore rivi, 25

Deque lacu fragiles effodiantur aquæ?

Ipsæ, papyrifero qui non angustior amne,

Miscetur vasto multa per ora freto,

Cæruleos ventis latices durantibus, Ister

Congelat, & tectis in mare serpit aquis. 30

Quæque rates ierant, pedibus nunc itur: & undas  
Frigore concretas ungula pulsat equi.  
Perque novos pontes subter labentibus undis  
Ducunt Sarmatici barbara plaustra boves.  
Vix equidem credar: sed cum sint præmia falsi 35  
Nulla, ratam testis debet habere fidem.  
Vidimus ingentem glacie consistere pontum;  
Lubricaque immotas testa premebat aquas.  
Nec vidisse sat est. durum calcavimus æquor:  
Undaque non udo sub pede summa fuit. 40  
Si tibi tale fretum quondam, Leandre, fuisset,  
Non foret angustæ mors tua crimen aquæ.  
Tum neque se pandi possunt delphines in auras  
Tollere; conantes dura coercet hiems.  
Et quamquam Boreas jactatis insonet alis, 45  
Fluctus in obsesso gurgite nullus erit.  
Inclusæque gelu stabunt, ut marmore, puppes:  
Nec poterit rigidas findere remus aquas.  
Vidimus in glacie pisces hæreere ligatos:  
Et pars ex illis tum quoque viva fuit. 50  
Sive igitur nimii Boreæ vis sæva marinas,  
Sive redundatas flumine cogit aquas;  
Protinus, æquato siccis Aquilonibus Istro,  
Invehitur celeri barbarus hostis equo:  
Hostis equo pollens, longeque volante sagitta, 55  
Vicinam late depopulatur humum.  
Diffugiunt alii; nullisque tuentibus agros,

Incustoditæ diripiuntur opes.

Ruris opes parvæ, pecus, & stridentia plaustra;

Et quas divitias incola pauper habet. 60

Pars agitur vinctis post tergum capta lacertis,

Respiciens frustra rura Laremque suum.

Pars cadit hamatis misere confixa sagittis:

Nam volucris ferro tinctile virus inest.

Quæ nequeunt secum ferre aut abducere, perdunt; 65

Et cremat insontes hostica flamma casas.

Tum quoque, cum pax est, trepidant formidine belli:

Nec quisquam presso vomere sulcat humum.

Aut videt, aut metuit locus hic, quem non videt, hostem.

Cessat iners rigido terræ relicta situ. 70

Non hæc pampineâ dulcis latet uva sub umbrâ;

Nec cumulant altos fervida musta lacus.

Poma negat regio: nec haberet Acontius, in quo

Scriberet hæc dominæ verba legenda suæ.

Adspiceres nudos sine fronde, sine arbore, campos. 75

Heu loca felici non adeunda viro!

Ergo, tam late pateat cum maximus orbis,

Hæc est in pœnam terra reperta meam?

## E L E G I A XI.

**S**I quis es, insultes qui casibus, improbe, nostris,  
Meque reum, demto fine, cruentus agas;  
Natus es e scopulis, nutritus lacte ferino;  
Et dicam silices pectus habere tuum.  
Quis gradus ulterior, quo se tua porrigat ira, 5  
Restat? quidve meis cernis abesse malis?  
Barbara me tellus, & inhospita litora Ponti,  
Cumque suo Borea Mænalis ursa videt.  
Nulla mihi cum gente ferâ commercia linguæ:  
Omnia solliciti sunt loca plena metus. 10  
Utque fugax avidis cervus deprensus ab ursis,  
Cinctave montanis ut pavet agna lupis;  
Sic ego belligeris a gentibus undique septus  
Terreor, hoste meum pene premente latus.  
Utque sit exiguum pœnæ, quod conjuge cara, 15  
Quod patria careo, pignoribusque meis;  
Ut mala nulla feram, nisi nudam Cæsaris iram;  
Nuda parum nobis Cæsaris ira mali est?  
Et tamen est aliquis, qui vulnera cruda retractet;  
Solvat & in mores ora diserta meos. 20  
In caussa facili cuivis licet esse diserto:  
Et minimæ vires frangere quassa valent.  
Subruere est arces & stantia mœnia virtus:  
Quamlibet ignavi præcipitata ruunt.

Non sum ego quod fueram. quid inanem proteris umbram? 25

Quid cinerem saxis bustaque nostra premis?

Hector erat, tunc cum bello certabat; at idem

Vinctus ad Hæmonios non erat Hector equos.

Me quoque, quem noras olim, non esse memento.

Ex illo superant hæc simulacra viro. 30

Quid simulacra, ferox, dictis incessis amaris?

Parce, precor, Manes sollicitare meos.

Omnia vera puta mea crimina. nil sit in illis,

Quod magis errorem, quam scelus, esse putes.

Pendimus en profugi (satia tua pectora) pœnas, 35

Exsilioque graves, exsiliique loco.

Carnifici Fortuna potest mea flenda videri:

Te tamen est uno iudice mœsta parum.

Sævior es tristi Busiride: sævior illo,

Qui falsum lento torruit igne bovem. 40

Quique bovem Siculo fertur donasse tyranno,

Et dictis artes conciliasse suas.

Munere in hoc, Rex, est usus, sed imagine major:

Nec sola est operis forma probanda mei.

Adspicis a dextra latus hoc adapertile tauri? 45

Huc tibi, quem perdes, conjiciendus erit.

Protinus inclusum lentis carbonibus ure.

Mugiet, & veri vox erit illa bovis.

Pro quibus inventis, ut munus munere penses,

Da, precor, ingenio præmia digna meo. 50

Dixerat. at Phalaris, Pœnæ mirande repletor,



Ipse tuum præsens imbue, dixit, opus.  
Nec mora; monstratis crudeliter ignibus ustus  
Exhibuit querulos ore gemente sonos.  
Quid mihi cum Siculis inter Scythiamque Getasque? 55  
Ad te, quisquis is es, nostra querela redit.  
Utque sitim nostro possis explere cruore,  
Quantaque vis, avido gaudia corde feras;  
Tot mala sum fugiens tellure, tot æquore passus,  
Te quoque ut auditis posse dolere putem. 60  
Crede mihi, si sit nobis collatus Ulixes,  
Neptuni minor est, quam Jovis ira fuit.  
Ergo quicumque es, rescindere vulnera noli,  
Deque gravi duras ulcere tolle manus:  
Utque meæ famam tenuent oblivia culpæ, 65  
Fata cicatricem ducere nostra sine.  
Humanæque memor sortis, quæ tollit eosdem,  
Et premit, incertas ipse verere vices.  
Et quoniam, fieri quod numquam posse putavi,  
Est tibi de rebus maxima cura meis: 70  
Non est quod timeas. Fortuna miserrima nostra est.  
Omne trahit secum Cæsar's ira malum.  
Quod magis ut liqueat, neve hoc tibi fingere credar,  
Ipse velim pœnas experiare meas.

## E L E G I A XII.

**F** Rigora jam Zephyri minuunt; annoque peracto  
Longior antiquis visa Mæotis hiems:  
Impositamque sibi qui non bene pertulit Hellen,  
Tempora nocturnis æqua diurna facit.  
Jam violam puerique legunt hilaresque puellæ, 5  
Rustica quam nullo terra serente gerit.  
Prataque pubescunt variorum flore colorum,  
Indocilique loquax gutture vernat avis.  
Utque malæ crimen matris deponat hirundo,  
Sub trabibus cunas parvaque testâ facit. 10  
Herbaque, quæ latuit Cerealibus obruta sulcis,  
Exserit e tepida molle cacumen humo.  
Quoque loco est vitis, de palmite gemma movetur:  
Nam procul a Getico litore vitis abest.  
Quoque loco est arbor, turgescit in arbore ramus: 15  
Nam procul a Geticis finibus arbor abest.  
Otia nunc istic: junctisque ex ordine ludis  
Cedunt verbosi garrula bella fori.  
Usus equi nunc est, levibus nunc luditur armis:  
Nunc pila, nunc celeri volvitur orbe trochus. 20  
Nunc, ubi perfusa est oleo labente juvenus,  
Defessos artus Virgine tinguit aquâ.  
Scena viget, studiisque favor distantibus ardet:  
Proque tribus resonant terna Theatra Foris.  
O qua-

O quater, & quoties non est numerare, beatum, 25

Non interdicta cui licet Urbe frui!

At mihi sentitur nix verno sole soluta,

Quæque lacu duro vix fodiantur aquæ.

Nec mare concrevit glacie: nec, ut ante, per Istrum

Stridula Sauromates plaustra bubulcus agit. 30

Incipient aliquæ tamen huc adnare carinæ,

Hospitaque in Ponti litore puppis erit;

Sedulus occurram nautæ; dictaque salute,

Quid veniat, quæram, quisve, quibusve locis.

Ille quidem mirum, nî de regione propinqua 35

Non nisi vicinas tutus ararit aquas.

Rarus ab Italia tantum mare navita transit:

Litora rarus in hæc portubus orba venit.

Sive tamen Graja scierit, sive ille Latina

Voce loqui, certe gratior hujus erit. 40

Fac quoque ab ore freti longæque Propontidos undis

Huc aliquem certo vela dedisse Noto.

Quisquis is est, memori rumorem voce referre,

Et fieri famæ parsque gradusque potest.

Is precor auditos possit narrare triumphos 45

Cæsar, & Latio reddita vota Jovi:

Teque rebellatrix tandem, Germania, magni

Triste caput pedibus supposuisse Ducis.

Hæc mihi qui referet, quæ non vidisse dolebo,

Ille meæ domui protinus hospes erit. 50

Hei mihi! jamne domus Scythico Nasonis in orbe?

*Ovidius* T. III.

T

Jamque suum mihi dat pro Lare pœna locum?  
 Dî faciant, Cæsar non hîc penetrabile domumque,  
 Hospitium pœnæ sed velit esse meæ.

---

## E L E G I A XIII.

**E**Cce supervacuus (quid enim fuit utile gigni?)  
 Ad sua natalis tempora noster adest.  
 Dure, quid ad miseros veniebas exulis annos?  
 Debueras illis imposuisse modum.  
 Si tibi cura mei, vel si pudor ullus inesset, 5  
 Non ultra patriam me sequerere meam.  
 Quoque loco primum tibi sum male cognitus infans,  
 Illo tentasses ultimus esse mihi.  
 Jamque relinquenda (quod idem fecere sodales)  
 Tu quoque dixisses tristis in Urbe, Vale. 10  
 Quid tibi cum Ponto? num te quoque Cæsar's ira  
 Extremam gelidi misit in orbis humum?  
 Scilicet exspectes soliti tibi moris honorem,  
 Pendeat ex humeris vestis ut alba meis?  
 Fumida cingatur florentibus ara coronis? 15  
 Micaque sollemni turis in igne sonet?  
 Libaque dem pro me genitale notantia tempus?  
 Concipiamque bonas ore favente preces?  
 Non ita sum positus: nec sunt ea tempora nobis,

Adventu possim lætus ut esse tuo.

20

Funeris ara mihi ferali cincta cupresso

Convenit, & structis flamma parata rogis.

Nec dare tura libet nihil exorantia Divos:

In tantis subeunt nec bona verba malis.

Si tamen est aliquid nobis hac luce petendum, 25

In loca ne redeas amplius ista, precor:

Dum me, terrarum pars pene novissima, Pontus,

Euxini falso nomine dictus, habet.

---

#### ELEGIA XIV.

**C**ultor & antistes doctorum sancte virorum,

Qui facis ingenio semper amice meo;

Ecquid, ut incolumem quondam celebrare solebas,

Nunc quoque, ne videar totus abesse, caves?

Suscipis exceptis ecquid mea carmina solis

5

Artibus, artifice quæ nocuere suo?

Immo ita fac, vatum, quæso, studiose novorum;

Quæque potes, retine corpus in Urbe meum.

Est fuga dicta mihi, non est fuga dicta libellis,

Qui domini pœnam non meruere pati.

10

Sæpe per extremas profugus pater exsulat oras;

Urbe tamen natis exsulis esse licet.

Palladis exemplo, de me sine matre creata

Carmina sunt. stirps hæc progeniesque mea est.  
Hanc tibi commendo: quæ quo magis orba parente, 15

Hoc tibi tutori sarcina major erit.

Tres mihi sunt nati contagia nostra secuti:

Cetera fac curæ sit tibi turba palam.

Sunt quoque mutatæ ter quinque volumina formæ,

Carmina de domini funere rapta sui. 20

Illud opus potuit, si non prius ipse perissem,

Certius a summa nomen habere manu.

Nunc incorrectum populi pervenit in ora:

In populi quidquam si tamen ore meum est.

Hoc quoque nescio quid nostris adpone libellis, 25

Diverso missum quod tibi ab orbe venit.

Quod quicumque leget, (si quis leget) æstimet ante

Compositum quo sit tempore, quoque loco.

Æquus erit scriptis; quorum cognoverit esse

Exsilium tempus, barbariemque locum. 30

Inque tot adversis carmen mirabitur ullum

Ducere me tristi sustinuisse manu.

Ingenium fregere meum mala: cujus & ante

Fons infecundus, parvaque vena fuit.

Sed quæcumque fuit, nullo exercente, refugit, 35

Et longo periit arida facta situ.

Non hîc librorum, per quos inviter alarque,

Copia. pro libris arcus & arma sonant.

Nullus in hac terra, recitem si carmina, cujus.

Intellecturis auribus utar, adest. 40

Nec, quo secedam, locus est. custodia muri

Submovet infestos, clausaque porta, Cetas.

Sæpe aliquod verbum quæro, nomenque, locunque:

Nec quisquam est, a quo certior esse queam.

Dicere sæpe aliquid conanti (turpe fateri) 45

Verba mihi desunt; dedidicique loqui.

Threicio Scythicoque fere circumsonor ore:

Et videor Geticis scribere posse modis.

Crede mihi, timeo ne sint immixta Latinis,

Inque meis scriptis Pontica verba legas. 50

Qualemcumque igitur venia dignare libellum:

Sortis & excusa conditione meæ.





P. OVIDII NASONIS  
 TRISTIUM  
 LIBER IV.

---

ELEGIA I.

**S**I qua meis fuerint, ut erunt, vitiosa libellis,  
 Excusata suo tempore, lector, habe.  
 Exsul eram; requiesque mihi, non fama petita est:  
 Mens intenta suis ne foret usque malis.  
 Hoc est, cur cantet vinctus quoque compede fossor, §  
 Indocili numero cum grave molliit opus;  
 Cantet &, innitens limosæ pronus arenæ,  
 Adverso tardam qui trahit amne ratem;  
 Quique ferens pariter lentos ad pectora remos,  
 In numerum pulsâ brachia versat aquâ. 10  
 Fessus ut incubuit baculo, saxove resedit  
 Pastor, arundineo carmine mulcet oves.  
 Cantantis pariter, pariter data pensa trahentis



Fallitur ancillæ decipiturque labor.

Fertur & abducta Lyrnesside tristis Achilles 15

Hæmonia curas attenuasse lyra.

Cum traheret silvas Orpheus & dura canendo

Saxa, bis amissa conjuge mœstus erat.

Me quoque Musa levat Ponti loca jussa petentem.

Sola comes nostræ perstitit illa fugæ. 20

Sola nec insidias hominum, nec militis ensem,

Nec mare, nec ventos, barbariemque timet.

Scit quoque, cum perii, quis me deceperit error:

Et culpam in facto, non scelus esse, meo.

Scilicet hoc ipso nunc æqua, quod obfuit ante, 25

Cum mecum juncti criminis acta rea est.

Non equidem vellem, quoniam nocitura fuerunt,

Pieridum sacris imposuisse manum.

Sed nunc quid faciam? vis me tenet ipsa Sororum:

Et carmen demens carmine læsus amo. 30

Sic nova Dulichio lotos gustata palato,

Illo, quo nocuit, grata sapore fuit.

Sentit amans sua damna fere; tamen hæret in illis;

Materiam culpæ persequiturque suæ.

Nos quoque delectant, quamvis nocuere, libelli: 35

Quodque mihi telum vulnera fecit, amo.

Forsitan hoc studium possit furor esse videri:

Sed quiddam furor hic utilitatis habet.

Semper in obtutu mentem vetat esse malorum;

Præsentis casûs immemoremque facit. 40

Utque suum Bacchis non sentit saucia vulnus,

Dum stupet Edonis exululata jugis;

Sic, ubi mota calent viridi mea pectora thyrsos,

Altior humano spiritus ille malo est.

Ille nec exilium, Scythici nec litora ponti, 45

Ille nec iratos sentit adesse Deos.

Utque soporiferæ biberem si pocula Lethes,

Temporis adversi sic mihi sensus hebet.

Jure Deas igitur veneror mala nostra levantes;

Sollicitæ comites ex Helicone fugæ: 50

Et partim pelago, partim vestigia terræ,

Vel rate dignatas, vel pede, nostra sequi.

Sint precor hæc saltem faciles mihi: namque Deorum

Cetera cum magno Cæsare turba facit.

Meque tot adversis cumulant, quot litus arenas, 55

Quotque fretum pisces, ovaque piscis habet.

Vere prius flores, æstu numerabis aristas,

Poma per autumnum, frigoribusque nives;

Quam mala, quæ toto patior jactatus in orbe,

Dum miser Euxini litora læva peto. 60

Nec tamen, ut veni, levior fortuna malorum est:

Huc quoque sunt nostras fata secuta vias.

Hæc quoque cognosco natalis stamina nostri;

Stamina de nigro vellere facta mihi.

Utque nec insidias, capitisque pericula narrem, 65

Vera quidem, verâ sed graviora fide;

Vivere quam miserum est inter Bessosque Getasque

Illi, qui populi semper in ore fuit!  
Quam miserum, porta vitam muroque tueri,  
Vixque sui tutum viribus esse loci! 70  
Aspera militiæ juvenis certamina fugi,  
Nec nisi lusurâ movimus arma manu.  
Nunc senior gladioque latus scutoque sinistram,  
Canitiem galeæ subjicioque meam.  
Nam dedit e specula custos ubi signa tumultûs, 75  
Induimur trepidâ protinus arma manu.  
Hostis, habens arcus imbutaque tela veneno,  
Sævus anhelanti mœnia lustrat equo.  
Utque rapax pecudem, quæ se non texit ovili,  
Per sata, per silvas, fertque trahitque lupus; 80  
Sic, si quem nondum portarum sepe receptum  
Barbarus in campis reperit hostis, agit.  
Aut sequitur captus, conjectaque vincula collo  
Accipit; aut telo virus habente cadit.  
Hîc ego sollicitæ jaceo novus incola sedis. 85  
Heu nimium fati tempora longa mei!  
Et tamen ad numeros antiquaque sacra reverti  
Sustinet in tantis hospita Musa malis.  
Sed neque cui recitem quisquam est mea carmina; nec qui  
Auribus accipiat verba Latina suis. 90  
Ipse mihi (quid enim faciam?) scriboque legoque:  
Tutaque judicio litera nostra suo est.  
Sæpe tamen dixi, Cui nunc hæc cura laborat?  
An mea Sauromatæ scripta Getæque legent?

Sæpe etiam lacrimæ me sunt scribente profusæ, 95

Humidaque est fletu litera facta meo.

Corque vetusta meum, tamquam nova, vulnera sentit;

Inque sinum mœstæ labitur imber aquæ.

Cum vice mutata quid sim fuerimque recordor,

Et tulerit quò me casus, & unde, subit; 100

Sæpe manus demens, studiis irata malignis,

Misit in arsuos carmina nostra focos.

Atque ita de multis, quoniam non multa supersunt,

Cum venia facito, quisquis es, ista legas.

Tu quoque non melius, quam sunt mea tempora,

carmen

105

Interdicta mihi consule Roma boni.

## E L E G I A II.

**J**AM fera Cæsaribus Germania, totus ut orbis,  
Victa potes flexo procubuisse genu;

Altaque velentur fortasse Palatia sertis;

Turaque in igne sonent, inficiantque diem;

Candidaque adductâ collum percussa securi 5

Victima purpureo sanguine tinguat humum;

Donaque amicorum templis promissa Deorum

Reddere victores Cæsar uterque parent:

Et qui Cæsareo juvenes sub nomine crescunt,

- Perpetuo terras ut domus ista regat: 10  
Cumque bonis nuribus pro sospite Livia nato  
Munera det meritis, sæpe datura, Deis:  
Et pariter matres, & quæ sine crimine castos  
Perpetua servant virginitate focos.  
Plebs pia, cumque pia lætentur Plebe Senatus; 15  
Parvaeque cujus eram pars ego nuper, Eques.  
Nos procul expulsos communia gaudia fallunt:  
Famaque tam longe non nisi parva venit.  
Ergo omnis poterit populus spectare triumphos,  
Cumque ducum titulis oppida capta leget: 20  
Vinclaque captivâ Reges cervice gerentes  
Ante coronatos ire videbit equos:  
Et cernet vultus aliis pro tempore versos,  
Terribiles aliis immemoresque sui.  
Quorum pars caussas, & res, & nomina quæret: 25  
Pars referet, quamvis noverit ipsa parum:  
Is, qui Sidonio fulget sublimis in ostro,  
Dux fuerat belli: Proximus ille duci.  
Hic, qui nunc in humo lumen miserabile figit,  
Non isto vultu, cum tulit arma, fuit. 30  
Ille ferox, oculis & adhuc hostilibus ardens,  
Hortator pugnæ consiliumque fuit.  
Perfidus hic nostros inclusit fraude locorum,  
Squalida promissis qui tegit ora comis.  
Illo, qui sequitur, dicunt mactata ministro 35  
Sæpe recusanti corpora capta Deo.

Hic lacus, hi montes, hæc tot castella, tot amnes,  
Plena feræ cædis, plena cruoris erant.

Drusus in his quondam meruit cognomina terris,  
Quæ bona progenies digna parente fuit. 40

Cornibus hic fractis viridi male testus ab ulva,  
Decolor ipse suo sanguine, Rhénus erit.

Crinibus en etiam fertur Germania passis,  
Et Ducis invicti sub pede mœsta sedet.

Collaque Romanæ præbens animosa securi 45  
Vincula fert illâ, qua tulit arma, manu.

Hos super in curru, Cæsar, victore veheris  
Purpureus populi rite per ora tui:

Quâque ibis, manibus circumplaudere tuorum,  
Undique jactato flore tegente vias. 50

Tempora Phœbeâ lauro cingetur; Ioque,  
Miles, io, magna voce, Triumphe, canet.

Ipse sono plausuque simul fremituque canentum  
Quadrijugos cernes sæpe resistere equos.

Inde petes arcem, delubra faventia votis, 55  
Et dabitur merito laurea vota Jovis.

Hæc ego submotus, qua possum, mente videbo:  
Erepti nobis jus habet illa loci.

Illâ per immensas spatiatur libera terras:  
In cælum celeri pervenit illa fugâ. 60

Illâ meos oculos mediam deducit in Urbem;  
Immunes tantî nec sinit esse boni.

Invenietque viam, qua currus spectet eburnos.

Sic certe in patria per breve tempus ero.  
Vera tamen populus capiet spectacula felix: 65  
Lætaque erit præsens cum Duce turba suo.  
At mihi fingenti tantum, longeque remoto,  
Auribus hic fructus percipiendus erit.  
Atque procul Latio diversum missus in orbem  
Qui narret cupido, vix erit, ista mihi. 70  
Is quoque jam serum referet veteremque triumphum.  
Quo tamen audiero tempore, lætus ero.  
Illa dies veniet, mea qua lugubria ponam;  
Caussa que privatâ publica major erit.

---

## ELEGIA III.

**M**agna minorque feræ, quarum regis altera Grajas,  
Altera Sidonias, utraque sicca, rates:  
Omnia cum summo positæ videatis in axe,  
Et maris occiduas non subeatis aquas,  
Ætheriamque suis cingens amplexibus arcem 5  
Vester ab intacta circulus exstet humo;  
Adspicite illa, precor, quæ non bene mœnia quondam  
Dicitur Iliades transiluisse Remus.  
Inque meam nitidos dominam convertite vultus:  
Sitque memor nostri necne, referte mihi. 10  
Hei mihi! cur, nimium quæ sunt manifesta, requiro?

Cur labat ambiguo spes mihi mixta metu?  
Crede quod est, quod vis; ac desine tuta vereri:  
Deque fide certâ sit tibi certa fides.  
Quodque polo fixæ nequeunt tibi dicere flammæ, 15  
Non mentitura tu tibi voce refer;  
Esse tui memorem, de qua tibi maxima cura est;  
Quodque potest, secum nomen habere tuum.  
Vultibus illa tuis, tamquam præsentis, inhæret,  
Teque remota procul, si modo vivit, amat. 20  
Ecquid, ut incubuit justo mens ægra dolori,  
Lenis ab admonito pectore somnus abit?  
Tunc subeunt curæ, dum te lectusque locusque  
Tangit, & oblitam non sinit esse mei.  
Et veniunt æstus, & nox immensa videtur; 25  
Fessaque jactati corporis ossa dolent.  
Non equidem dubito, quin hæc & cetera fiant;  
Detque tuus casti signa doloris amor:  
Nec cruciari minus, quam cum Thebana cruentum  
Hæciora Thessalico vidit ab axe rapi. 30  
Quid tamen ipse precer dubito: nec dicere possum,  
Adfectum quem te mentis habere velim.  
Tristis es? indignor, quod sum tibi caussa doloris:  
Non es? ut amisso conjuge digna fores.  
Tu vero tua damna dole, mitissima conjux; 35  
Tempus & a nostris exige triste malis:  
Fleque meos casus. est quædam flere voluptas.  
Expletur lacrimis egeriturque dolor.



Atque utinam lugenda tibi non vita, sed esset

Mors mea: morte fores sola relicta meâ! 40

Spiritus hic per te patrias exisset in auras!

Sparsissent lacrimæ pectora nostra piæ!

Supremoque die notum spectantia cœlum

Texissent digiti lumina nostra tui!

Et cinis in tumulo positus jacuisset avito! 45

Tactaque nascenti corpus haberet humus!

Denique &, ut vixi, sine crimine mortuus essem!

Nunc mea supplicio vita pūdenda suo est.

Me miserum, si tu, cum diceris exsulis uxor,

Avertis vultus, & subit ora rubor! 50

Me miserum, si turpe putas mihi nupta videri!

Me miserum, si te jam pudet esse meam!

Tempus ubi est illud, quo te jactare solebas.

Conjuge, nec nomen dissimulare viri?

Tempus ubi est, quo te (nisi si fugis illa referre) 55

Et dici memini, juvit & esse meam?

Utque probæ dignum est, omni tibi dote placebam.

Addebat veris multa faventis amor.

Nec quem præferres, (ita res tibi magna videbar)

Quemve tuum malles esse, vir alter erat. 60

Nunc quoque ne pudeat, quod sis mihi nupta: tuusque

Non dolor hinc debet, debet abesse pudor.

Cum cecidit Capaneus subito temerarius iclu,

Num legis Evadnen erubuisse viro?

Nec, quia Rex mundi compescuit ignibus ignes, 65

Ipse tuis, Phaethon, inficiendus eras.  
 Nec Semele Cadmo facta est aliena parenti,  
 Quod precibus periit ambitiosa suis.  
 Nec tibi, quod sævis ego sum Jovis ignibus ictus,  
 Purpureus molli fiat in ore rubor: 70  
 Sed magis in nostri curam consurge tuendi,  
 Exemplumque mihi conjugis esto bonæ:  
 Materiamque tuis tristem virtutibus imple.  
 Ardua per præceps gloria vadat iter.  
 Hæctora quis nosset, si felix Troja fuisset? 75  
 Publica Virtuti per mala facta via est.  
 Ars tua, Tiphys, jacet, si non sit in æquore fluctus:  
 Si valeant homines, ars tua, Phœbe, jacet.  
 Quæ latet, inque bonis cessat non cognita rebus,  
 Adparet virtus arguiturque malis. 80  
 Dat tibi nostra locum tituli Fortuna; caputque,  
 Conspicuum pietas qua tua tollat, habet.  
 Utere temporibus, quorum nunc munere freta es.  
 En patet in laudes area lata tuas.

## E L E G I A IV.

**O** Qui, nominibus cum sis generosus avitis,  
 Exsuperas morum nobilitate genus:  
 Cujus inest animo patrii candoris imago,  
 Non

Non careat nervis candor ut iste suis:  
Cujus in ingenio patriæ facundia linguæ est, 5  
Qua prior in Latio non fuit ulla Foro:  
Quod minime volui, positis pro nomine signis  
Dictus es. ignoscas laudibus ista tuis.  
Nil ego peccavi. tua te bona cognita produnt.  
Si, quod es, adpares, culpa soluta mea est. 10  
Nec tamen officium nostro tibi carmine factum,  
Principe tam justo, posse nocere puta.  
Ipse Pater Patriæ (quid enim civilius illo?)  
Sustinet in nostro carmine sæpe legi.  
Nec prohibere potest, quia res est publica Cæsar; 15  
Et de communi pars quoque nostra bono est.  
Juppiter ingeniis præbet sua numina vatum;  
Seque celebrari quolibet ore sinit.  
Causa tua exemplo Superorum tuta duorum est:  
Quorum hic conspicitur, creditur ille Deus. 20  
Ut non debuerim, tamen hoc ego crimen amabo:  
Non fuit arbitrii litera nostra tui.  
Nec nova, quod tecum loquor, est injuria; nostro  
Incolumis cum quo sæpe locutus eram.  
Quo vereare minus, ne sim tibi crimen amicus; 25  
Invidiam, si qua est, auctor habere potest.  
Nam tuus est primis cultus mihi semper ab annis  
(Hoc noli certo dissimulare) pater:  
Ingeniumque meum (potes hoc meminisse) probabat:  
Plus etiam, quam me iudice dignus eram. 30  
Ovidius T. III. V

Deque meis illo referebat versibus ore,

In quo pars altæ nobilitatis erat.

Non igitur tibi nunc, quod me domus ista recepit,

Sed prius auctori sunt data verba tuo.

Nec data sunt, mihi crede, tamen: sed in omnibus actis, 35

Ultima si demas, vita tuenda mea est.

Hanc quoque, qua perii, culpam scelus esse negabis,

Si tanti series sit tibi nota mali.

Aut timor, aut error nobis, prius obfuit error.

Ah sine me fati non meminisse mei! 40

Neve retrahendo nondum coeuntia rumpam

Vulnera; vix illis proderit ipsa quies.

Ergo ut jure damus pœnas, sic abfuit omne

Peccato facinus consiliumque meo.

Idque Deus sentit: pro quo nec lumen ademptum est, 45

Nec mihi detractas possidet alter opes.

Forsitan hanc ipsam (vivat modo) finiet olim,

Tempore cum fuerit lenior ira, fugam.

Nunc precor hinc aliò jubeat discedere; si non

Nostra verecundo vota pudore carent. 50

Mitius exsilium, paulloque propinquius opto;

Quique sit a sævo longius hoste, locum.

Quantaque in Augusto clementia; si quis ab illo

Hoc peteret pro me, forsitan ille daret.

Frigida me cohibent Euxini litora Ponti: 55

.. Dictus ab antiquis Axenus ille fuit.

Nam neque jaçantur moderatis æquora ventis:

Nec placidos portus hospita navis adit.  
Sunt circa gentes, quæ prædam sanguine quærant:  
Nec minus infidâ terra timetur aquâ. 60  
Illi, quos audis hominum gaudere cruore,  
Pene sub ejusdem sideris axe jacent.  
Nec procul a nobis locus est, ubi Taurica dirâ  
Cæde pharetrata pascitur ara Deæ.  
Hæc prius, ut memorant, non invidiosa nefandis, 65  
Nec cupienda bonis, regna Thoantis erant.  
Hic pro suppositâ virgo Pelopeia cervâ  
Sacra Deæ coluit qualiacumque suæ.  
Quò postquam, dubium pius an sceleratus, Orestes  
Exactus furiis venerat ipse suis, 70  
Et comes exemplum veri Phoeus amoris,  
Qui duo corporibus, mentibus unus erant;  
Protinus evincti Triviæ ducuntur ad aram,  
Quæ stabat geminas ante cruenta fores.  
Nec tamen hunc sua mors, nec mors sua terruit illum: 75  
Alter ob alterius funera mæstus erat.  
Et jam constiterat stricte mucrone sacerdos;  
Cinxerat & Grajas barbara vitta comas:  
Cum vice sermonis fratrem cognovit, & illi  
Pro nece complexus Iphigenia dedit. 80  
Læta Deæ signum, crudelia sacra perosæ,  
Transtulit ex illis in meliora locis.  
Hæc igitur regio, magni pars ultima mundi,  
Quam fugere homines Dique, propinqua mihi est.

Atque meam terram prope sunt funebria sacra, 85  
 Si modo Nasoni barbara terra sua est.  
 O utinam venti, quibus est ablatas Orestes,  
 Placato referant & mea vela Deo!

## E L E G I A V.

O Mihi dilectos inter sors prima sodales,  
 Unica fortunis ara reperta meis:  
 Cujus ab adloquiis anima hæc moribunda revixit,  
 Ut vigil infusâ Pallade flamma solet:  
 Qui veritus non es portus aperire fideles, 5  
 Fulmine percussæ confugiumque rati:  
 Cujus eram censu non me sensurus gentem,  
 Si Cæsar patrias eripuisset opes:  
 Temporis oblitum dum me rapit impetus hujus,  
 Excidit heu nomen quam mihi pene tuum! 10  
 Te tamen agnoscis: tractusque cupidine laudis,  
 Ille ego sum, cuperes dicere posse palam.  
 Certe ego, si sineres, titulum tibi reddere vellem,  
 Et raram Famæ conciliare fidem.  
 Ne noceam grato vereor tibi carmine; neve 15  
 Intempestivus nominis obstet honos.  
 Quod licet & tutum est, intra tua pectora gaude,  
 Meque tui memorem, teque fuisse mei.

Utque facis, remis ad opem luctare ferendam,  
 Dum veniat placido mollior aura Deo: 20  
 Et tutare caput nulli servabile; si non  
 Qui mersit Stygiâ, sublevet illud, aquâ.  
 Teque, quod est rarum, præsta constanter ad omne  
 Indeclinatæ munus amicitæ.  
 Sic tua processus habeat Fortuna perennes, 25  
 Sic ope non egeas ipse, juvesque tuos.  
 Sic æquet tua nupta virum bonitate perenni;  
 Incidat & vestro rara querela toro.  
 Diligat & semper socius te sanguinis illo,  
 Quo pius adfectu Castora frater amat. 30  
 Sic juvenis, similisque tibi sit natus, & illum  
 Moribus agnoscat quilibet esse tuum.  
 Sic socerum faciat tædâ te nata jugali;  
 Nec tardum juveni det tibi nomen avi.

---

## ELEGIA VI.

**T**empore ruricolæ patiens fit taurus aratri,  
 Præbet & incurvo colla premenda iugo.  
 Tempore paret equus lentis animosus habenis,  
 Et placido duos accipit ore lupos.  
 Tempore Pœnorum compescitur ira leonum; 5  
 Nec feritas animo, quæ fuit ante, manet.

Quæque sui monitis obtemperat Inda magistri  
Bellua, servitium tempore victa subit.  
Tempus, ut extentis tumeat facit uva racemis,  
Vixque merum capiant grana, quod intus habent. 10  
Tempus & in canas semen producit aristas;  
Et ne sint tristi poma sapore facit.  
Hoc tenuat dentem terras renovantis aratri,  
Hoc rigidas silices, hoc adamanta terit.  
Hoc etiam sævas paullatim mitigat iras: 15  
Hoc minuit luctus, mœstaque corda levat.  
Cuncta potest igitur tacito pede lapsa vetustas,  
Præterquam curas attenuare meas.  
Ut patriâ careo, bis frugibus area trita est,  
Dissiluit nudo pressa bis uva pede. 20  
Nec quæsita tamen spatio patientia longo est;  
Mensque mali sensum nostra recentis habet.  
Scilicet & veteres fugiunt juga curva iuveni:  
Et domitus freno sæpe repugnat equus.  
Tristior est etiam præsens ærumna priore: 25  
Ut sit enim sibi par, crevit, & aucta morâ est.  
Nec tam nota mihi, quam sunt, mala nostra fuerunt:  
Sed magis hoc, quo sunt cognitiora, gravant.  
Est quoque non minimum, vires adferre recentes,  
Nec præconsumptum temporis esse malis. 30  
Fortior in fulva novus est luctator arena,  
Quam cui sunt tardâ brachia fessa morâ.  
Integer est melior nitidis gladiator in armis,



Quam cui tela suo sanguine tincta rubent.  
Fert bene præcipites navis modo facta procellas: 35  
Quamlibet exiguo solvitur imbre vetus.  
Nos quoque, quæ ferimus, tulimus patientius ante;  
Et mala sunt longo multiplicata die.  
Credite, deficio, nostroque a corpore quantum  
Auguror, accedent tempora parva malis. 40  
Nam neque sunt vires, neque qui color ante solebat:  
Vixque habeo tenuem, quæ tegat ossa, cutem.  
Corpore sed mens est ægro magis ægra, malique  
In circumspectu stat sine fine sui.  
Urbis abest facies, absunt, mea cura, sodales: 45  
Et, qua nulla mihi carior, uxor abest.  
Vulgus adest Scythicum, braccataque turba Getarum,  
Sic male quæ video, non videoque, nocent.  
Una tamen spes est, quæ me soletur in istis;  
Hæc fore morte meâ non diuturna mala. 50

---

## E L E G I A VII.

**B**IS me Sol adiit gelidæ post frigora brumæ,  
Bisque suum tacto Pisce peregit iter.  
Tempore tam longo cur non tua dextera, versus  
Quamlibet in paucos, officiosa fuit?  
Cur tua cessavit pietas, scribentibus illis, 5

Exiguus nobis cum quibus usus erat?  
Cur, quoties alicui chartæ sua vincula demsi,  
    Illam speravi nomen habere tuum?  
Dī faciant, ut sæpe tuā sit epistola dextrā  
    Scripta, sed e multis reddita nulla mihi! 10  
Quod precor, esse liquet. credam prius ora Medusæ  
    Gorgonis anguineis cincta fuisse comis:  
Esse canes utero sub virginis: esse Chimæram,  
    A truce quæ flammis separet angue leam:  
Quadrupesque hominum cum pectore pectora junctos: 15  
    Tergeminumque virum, tergeminiūque canem:  
Sphingaque, & Harpyias, serpentipedesque Gigantas:  
    Centimanumque Gygen, semibovemque virum.  
Hæc ego cuncta prius, quam te, carissime, credam  
    Mutatum curam deposuisse mei. 20  
Innumeri montes inter me teque, viæque,  
    Fluminaque, & campi, nec freta pauca jacent.  
Mille potest caussis, a te quæ litera sæpe  
    Missa sit, in nostras nulla venire manus.  
Mille tamen caussas scribendo vince frequenter: 25  
    Excusem ne te semper, amice, mihi.

## ELEGIA VIII.

**J**AM mea cygneas imitantur tempora plumas,  
Inficit & nigras alba senectæ comas:  
Jam subeunt anni fragiles, & inertior ætas:  
Jamque parum firmo me mihi ferre grave est.  
Nunc erat, ut posito deberem fine laborum 5  
Vivere, me nullo sollicitante metu:  
Quæque meæ semper placuerunt otia menti,  
Carpere; & in studiis molliter esse meis:  
Et parvam celebrare domum, veteresque Penates;  
Et quæ nunc domino rura paterna carent: 10  
Inque sinu dominæ, carisque nepotibus, inque  
Securus patria consenuisse mea.  
Hæc mea sic quondam peragi speraverat ætas:  
Hos ego sic annos ponere dignus eram.  
Non ita Dīs visum: qui me terraque marique 15  
Actum Sarmaticis exposuere locis.  
In cava ducuntur quassæ navalia puppes,  
Ne temere in mediis dissoluantur aquis.  
Ne cadat, & multas palmas inhonestet adeptas,  
Languidus in pratis gramina carpit equus. 20  
Miles, ut emeritis non est satis utilis annis,  
Ponit ad antiquos, quæ tulit arma, Lares.  
Sic igitur, tarda vires minuente senectæ,  
Me quoque donari jam rude, tempus erat.

Tempus erat, nec me peregrinum ducere cœlum, 25  
Nec siccam Getico fonte levare sitim:  
Sed modo, quos habui, vacuum secedere in hortos:  
Nunc hominum visu rursus & Urbe frui.  
Sic animo quondam non divinante futura  
Optabam placide vivere posse senex. 30  
Fata repugnarunt: quæ, cum mihi tempora prima  
Mollia præbuerint, posteriora gravant.  
Jamque, decem lustris omni sine labe peractis,  
Parte premor vitæ deteriore meæ.  
Nec procul a metis, quas pene tenere videbar, 35  
Curriculo gravis est facta ruina meo.  
Ergo illum demens in me sævire coegi,  
Mitius immensus quo nihil orbis habet?  
Ipsaque delictis victa est clementia nostris:  
Nec tamen errori vita negata meo? 40  
Vita procul patriâ peragenda sub axe Boreo,  
Quâ maris Euxini terra sinistra jacet.  
Hoc mihi si Delphi, Dodonaque diceret ipsa,  
Esse viderentur vanus uterque locus.  
Nil adeo validum est, adamas licet adliget illud, 45  
Ut maneat rapido firmius igne Jovis.  
Nil ita sublime est, supraque pericula tendit,  
Non sit ut inferius suppositumque Deo.  
Nam quamquam vitio pars est contracta malorum,  
Plus tamen exitii numinis ira dedit. 50  
At vos admoniti nostris quoque casibus este,

Æquantem Superos emeruisse virum.

---

## ELEGIA IX.

**S**I licet, & pateris, nomen facinusque tacebo,  
Et tua Lethæis acta dabuntur aquis:  
Nostraque vincetur lacrimis clementia seris.  
Fac modo te pateat pœnituisse tui.  
Fac modo te damnes, cupiasque eradere vitæ 5  
Tempora, si possis, Tisiphonæa tuæ.  
Sin minus, & flagrant odio tua pectora nostro,  
Induet infelix arma coacta dolor.  
Sim licet extremum, sicut sum, missus in orbem,  
Nostra suas istuc porriget ira manus. 10  
Omnia, si nescis, Cæsar mihi jura reliquit:  
Et sola est patriâ pœna carere meâ.  
Et patriam, modo sit sospes, speramus ab illo.  
Sæpe Jovis telo quercus adusta viret.  
Denique vindictæ si sit mihi nulla facultas, 15  
Pierides vires, & sua tela, dabunt.  
Ut Scythicis habitem longe submotus in oris,  
Siccaque sint oculis proxima signa meis;  
Nostra per immensas ibunt præconia gentes;  
Quodque querar, notum, quâ patet orbis, erit. 20  
Ibit ad occasum, quidquid dicemus, ab ortu:

Testis & Hesperiae vocis Eous erit.  
 Trans ego tellurem, trans latas audiar undas:  
 Et gemitus vox est magna futura mei.  
 Nec tua te sontem tantummodo sæcula nôrint: 25  
 Perpetuæ crimen posteritatis eris.  
 Jam feror in pugnas, & nondum cornua sumsi.  
 Nec mihi sumendi caussa sit ulla velim:  
 Circus adhuc cessat: spargit tamen acer arenam  
 Taurus, & infesto jam pede pulsat humum. 30  
 Hoc quoque, quam volui, plus est. cane, Musa, receptus;  
 Dum licet huic nomen dissimulare suum.

---

## E L E G I A X.

**I**lle ego, qui fuerim, tenerorum lusor amorum,  
 Quem legis, ut nôris, accipe, Posteritas.  
 Sulmo mihi patria est, gelidis uberrimus undis,  
 Millia qui novies distat ab Urbe decem.  
 Editus hîc ego sum: necnon, ut tempora nôris; 5  
 Cum cecidit fato Consul uterque pari.  
 Si quid id est, usque a proavis vetus ordinis heres;  
 Non modo Fortunæ munere factus eques.  
 Nec stirps prima fui, genito jam fratre creatus;  
 Qui tribus ante quater mensibus ortus erat. 10  
 Lucifer amborum natalibus adfuit idem:

Una celebrata est per duo liba dies.

Hæc est armiferæ festis de quinque Minervæ,

Quæ fieri pugnâ prima cruenta solet.

Protinus excolimur teneri, curaque parentis 15

Imus ad insignes Urbis ab arte viros.

Frater ad eloquium viridi tendebat ab ævo,

Fortia verbosi natus ad arma Fori.

At mihi jam puero cœlestia sacra placebant;

Inque suum furtim Musa trahebat opus. 20

Sæpe pater dixit, Studium quid inutile tentas?

Mæonides nullas ipse reliquit opes.

Motus eram dictis: totoque Helicone relicto,

Scribere conabar verba soluta modis.

Sponte sua numeros carmen veniebat ad aptos: 25

Et, quod tentabam dicere, versus erat.

Interea, tacito passu labentibus annis,

Liberior fratri sumta, mihique, toga est.

Induiturque humeris cum lato purpura clavo;

Et studium nobis, quod fuit ante, manet. 30

Yamque decem vitæ frater geminaverat annos,

Cum perit; & cœpi parte carere mei.

Cepimus & teneræ primos ætatis honores;

Eque viris quondam pars tribus una fui.

Curia restabat: clavi mensura coacta est. 35

Majus erat nostris viribus illud onus.

Nec patiens corpus, nec mens fuit apta labori,

Sollicitæque fugax ambitionis erant:

Et petere Aoniæ suadebant tuta Sorores  
Otia, judicio semper amata meo. 40  
Temporis illius colui fovique poetas;  
Quotque aderant vates, rebar adesse Deos.  
Sæpe suas volucres legit mihi grandior ævo,  
Quæque necet serpens, quæ juvet herba, Macer.  
Sæpe suos solitus recitare Propertius ignes; 45  
Jure sodalitio qui mihi junctus erat.  
Ponticus Heroo, Bassus quoque clarus Iambo,  
Dulcia conviciûs membra fuere mei.  
Et tenuit nostras numerosus Horatius aures;  
Dum ferit Ausoniâ carmina culta lyrâ. 50  
Virgilium vidi tantum: nec amara Tibullo  
Tempus amicitiae fata dedere meæ.  
Successor fuit hic tibi, Galle; Propertius illi.  
Quartus ab his serie temporis ipse fui.  
Utque ego majores, sic me coluere minores: 55  
Notaque non tarde facta Thalia mea est.  
Carmina cum primum populo juvenilia legi,  
Barba resecta mihi bisve semelve fuit.  
Moverat ingenium, totam cantata per Urbem,  
Nomine non vero dicta Corinna mihi. 60  
Multa quidem scripsi: sed quæ vitiosa putavi,  
Emendaturis ignibus ipse dedi.  
Tum quoque, cum fugerem, quædam placitura cremavi,  
Iratus studio carminibusque meis.  
Molle, Cupidineis nec inexpugnabile telis 65



Cor mihi, quodque levis caussa moveret, erat.  
 Cum tamen hoc essem, minimoque accenderer igni;  
 Nomine sub nostro fabula nulla fuit.  
 Pene mihi puero nec digna, nec utilis uxor  
 Est data: quæ tempus perbreve nupta fuit. 70  
 Illi successit, quamvis sine crimine, conjux;  
 Non tamen in nostro firma futura toro.  
 Ultima, quæ mecum seros permansit in annos,  
 Sustinuit conjux exsulis esse viri.  
 Filia me mea bis primâ fecunda juventâ, 75  
 Sed non ex uno conjuge, fecit avum.  
 Et jam complêrat genitor sua fata; novemque  
 Addiderat lustris altera lustra novem.  
 Non aliter flevi, quam me fleturus ademtum  
 Ille fuit. matri proxima justa tuli. 80  
 Felices ambo, tempestiveque sepultos,  
 Ante diem pœnæ quod periere meæ!  
 Me quoque felicem, quod non viventibus illis  
 Sum miser; & de me quod doluere nihil!  
 Si tamen extinctis aliquid, nisi nomina, restat, 85  
 Et gracilis structos effugit umbra rogos;  
 Fama, parentales, si vos mea contigit, umbræ,  
 Et sunt in Stygio crimina nostra foro;  
 Scite, precor, caussam (nec vos mihi fallere fas est)  
 Errorem jussæ, non scelus, esse fugæ. 90  
 Manibus id satis est. ad vos studiosa revertor  
 Pectora, qui vitæ quæritis acta meæ.

Jam mihi canities, pulsus melioribus annis,  
Venerat, antiquas miscueratque comas:  
Postque meos ortus Pisæa vinctus oliva 95  
Abstulerat decies præmia victor equus;  
Cum maris Euxini positos ad læva Tomitas  
Quærere me læsi Principis ira jubet.  
Causa meæ cunctis nimium quoque nota ruinæ  
Indicio non est testificanda meo. 100  
Quid referam comitumque nefas, famulosque nocentes?  
Ipsâ multa tuli non leviora fugâ.  
Indignata malis meas est succumbere; seque  
Præstitit invictam viribus usa suis;  
Oblitusque togæ, ductæque per otia vitæ, 105  
Insolitâ cepi temporis arma manu.  
Totque tuli terra casus pelagoque, quot inter  
Occultum stellæ conspicuumque polum.  
Tacta mihi tandem longis erroribus acta  
Juncta pharetratis Sarmatis ora Getis. 110  
Hic ego, finitimis quamvis circumsoner armis,  
Tristia, quo possum, carmine fata levo.  
Quod, quamvis nemo est, cujus referatur ad aures,  
Sic tamen absumo decipioque diem.  
Ergo, quod vivo, durisque laboribus obsto, 115  
Nec me sollicitæ tædia lucis habent,  
Gratia, Musa, tibi: nam tu solatia præbes;  
Tu curæ requies, tu medicina mali.  
Tu dux, tu comes es: tu nos abducis ab Istro;  
In

In medioque mihi das Helicone locum. 120  
Tu mihi (quod rarum) vivo sublime dedisti  
Nomen, ab exsequiis quod dare Fama solet.  
Nec, qui detrectat præsentia, Livor iniquo  
Ullum de nostris dente momordit opus.  
Nam tulerint magnos cum secula nostra poetas, 125  
Non fuit ingenio Fama maligna meo.  
Cumque ego præponam multos mihi, non minor illis  
Dicor: & in toto plurimus orbe legor.  
Si quid habent igitur vatum præsagia veri,  
Protinus ut moriar, non ero, terra, tuus. 130  
Sive favore tuli, sive hanc ego carmine famam,  
Jure tibi grates, candide lector, ago.





P. OVIDII NASONIS  
 TRISTIUM  
 LIBER V.

---

ELEGIA I.

**H**unc quoque de Getico, nostri studiose, libellum  
 Litore, præmissis quatuor adde meis.  
 Hic quoque talis erit, qualis Fortuna poetæ.  
 Invenies toto carmine dulce nihil.  
 Flebilis ut noster status est, ita flebile carmen, 5  
 Materiæ scripto conveniente suæ.  
 Integer & lætus læta & juvenilia lusi:  
 Illa tamen nunc me composuisse piget.  
 Ut cecidi, perago subiti præconia casus;  
 Sumque argumenti conditor ipse mei. 10  
 Utque jacens ripâ deflere Caystrius ales  
 Dicitur ore suam deficiente necem;

Sic ego, Sarmaticas longe projectus in oras,

Efficio tacitum ne mihi funus eat.

Delicias si quis lascivaque carmina quærit, 15

Præmoneo numquam scripta quod ista legat.

Aptior huic Gallus, blandique Propertius oris,

Aptior, ingenium come, Tibullus erit.

Atque utinam numero ne nos essenus in isto!

Hei mihi! cur umquam Musa jocata mea est? 20

Sed dedimus pœnas: Scythicique in finibus Istri

Ille pharetrati lusor Amoris abest.

Quod superest, animos ad publica carmina flexi;

Et memores jussi nominis esse sui.

Si tamen e vobis aliquis tam multa requiret, 25

Unde dolenda canam; multa dolenda tuli.

Non hæc ingenio, non hæc componimus arte.

Materia est propriis ingeniosa malis.

Et quota Fortunæ pars est in carmine nostræ?

Felix, qui patitur, quæ numerare valet! 30

Quot frutices silvæ, quot flavas Thybris arenas,

Mollia quot Martis gramina campus habet;

Tot mala pertulimus: quorum medicina quiesque

Nulla, nisi in studio, Pieridumque morâ est.

Quis tibi, Naso, modus lacrimosi carminis? inquis. 35

Idem, Fortunæ qui modus hujus erit.

Quod querar, illa mihi pleno de fonte ministrat:

Nec mea sunt, fati verba sed ista mei.

At mihi si cara patriam cum conjuge reddas,

Sint vultus hilares, sinque quod ante fui. 40  
Lenior invicti si sit mihi Cæsaris ira,  
Carmina lætitiæ jam tibi plena dabo.  
Nec tamen ut lusit, rursus mea litera ludet:  
Sit semel illa meo luxuriata malo.  
Quod probet Ipse, canam: pœnæ modo parte levata 45  
Barbariem, rigidos effugiamque Getas.  
Interea nostri quid agant, nisi triste, libelli?  
Tibia funeribus convenit ista meis.  
At poteras, inquis, melius mala ferre silendo,  
Et tacitus casus dissimulare tuos. 50  
Exigis, ut nulli gemitus tormenta sequantur;  
Acceptoque gravi vulnere flere vetas.  
Ipse Perilleo Phalaris permisit in ære  
Edere mugitus, & bovis ore queri.  
Cum Priami lacrimis offensus non sit Achilles, 55  
Tu fletus inhibes, durior hoste, meos.  
Cum faceret Nioben orbam Latoia proles,  
Non tamen & siccas jussit habere genas.  
Est aliquid, fatale malum per verba levare:  
Hoc querulam Prognen Halcyonenque facit. 60  
Hoc erat, in gelido quare Pæantius antro  
Voce fatigaret Lemnia saxa suâ.  
Strangulat inclusus dolor, atque exæstuat intus:  
Cogitur & vires multiplicare suas.  
Da veniam potius; vel totos tolle libellos; 65  
Hoc, mihi quod prodest, si tibi, lector, obest.

Sed neque obesse potest: ulli nec scripta fuerunt

Nostra, nisi auctori perniciosa suo.

At mala sunt fateor. quis te mala sumere cogit?

Aut quis deceptum ponere sumta vetat? 70

Ipsæ nec emendo: sed ut hîc deducta legantur,

Non sunt illa suo barbariora loco.

Nec me Roma suis debet conferre poetis.

Inter Sauromatas ingeniosus ero.

Denique nulla mihi captatur gloria, quæque 75

Ingenio stimulos subdere Fama solet.

Nolumus assiduis animum tabescere curis:

Quæ tamen irrumpunt, quodque vetantur, eunt.

Cur scribam docui: cur mittam, quæritis, istos?

Vobiscum cupiam quolibet esse modo. 80

## ELEGIA II.

**E**Cquid, ut e Ponto nova venit epistola, palles;  
Et tibi sollicitâ solvitur illa manu?

Pone metum; valeo. corpusque, quod ante laborum

Impatiens nobis invalidumque fuit,

Sufficit, atque ipso vexatum induruit usu. 5

An magis infirmo non vacat esse mihi?

Mens tamen ægra jacet, nec tempore robora sumsit:

Adfectusque animi, qui fuit ante, manet;

Quæque morâ spatioque suo coitura putavi

Vulnera, non aliter, quam modo facta, dolent. 10

Scilicet exiguis prodest annosa vetustas,

Grandibus accedunt tempore damna malis.

Pene decem totis alujt Pæantius annis

Pestiferum tumido virus ab angue datum.

Telephus æterna consumtus tabe perisset,

15

Si non, quæ nocuit, dextra tulisset opem.

Et mea, si facinus nullum commisimus, opto

Vulnera qui fecit, facta levare velit.

Contentusque mei jam tandem parte laboris,

Exiguum pleno de mare demat aquæ.

20

Detrahat ut multum, multum restabit acerbi:

Parsque meæ poenæ totius instar erit.

Litora quot conchas, quot amœna rosaria flores,

Quotve soporiferum grana papaver habet;

Silva feras quot alit, quot piscibus unda natatur; 25

Quot tenerum pennis aera pulsat avis;

Tot premor adversis, quæ si comprehendere coner,

Icariæ numerum dicere coner aquæ.

Utque viæ casus, ut amara pericula ponti,

Ut taceam strictas in mea fata manus;

30

Barbara me tellus, orbisque novissima magni

Sustinet, & sævo cinctus ab hoste locus.

Hinc ego trajicerer, (neque enim mea culpa cruenta est)

Esset, quæ debet, si tibi cura mei:

Ille Deus, bene quo Romana potentia nixa est, 35



Sæpe suo victor lenis in hoste fuit.

Quid dubitas? quid tuta times? accede, rogaque.

Cæsare nil ingens mitius orbis habet.

Me miserum! quid agam, si proxima quæque relinquunt?

Subtrahis effracto tu quoque colla iugo? 40

Quò ferar? unde petam lapsis solatia rebus?

Anchora jam nostram non tenet ulla ratem.

Viderit: ipse sacram, quamvis invisus, ad aram

Confugiam: nullas submovet ara manus.

Adloquor en absens præsentia numina supplex: 45

Si fas est homini cum Jove posse loqui.

Arbiter imperii, quo certum est sospite cunctos

Ausoniæ curam gentis habere Deos:

O decus, o patriæ per te florentis imago,

O vir non ipso, quem regis, orbe minor; 50

Sic habites terras, sic te desideret æther!

Sic ad pacta tibi sidera tardus eas!

Parce, precor: minimamque tuo de fulmine partem

Deme. satis pœnæ, quod superabit, erit.

Ira quidem moderata tua est; vitamque dedisti: 55

Nec mihi jus civis, nec mihi nomen abest.

Nec mea concessa est aliis fortuna: nec exsul

Edicti verbis nominor ipse tui.

Omniaque hæc timui, quia me meruisse videbam:

Sed tua peccato lenior ira meo est. 60

Arva relegatum jussisti visere Ponti,

Et Scythicum profuga findere puppe fretum.

Jussus ad Euxini deformia litora veni.

Æquoris. hæc gelido terra sub axe jacet.

Nec me tam cruciat numquam sine frigore cælum, 65

Glebaque canenti semper obusta gelu;

Nesciaque est vocis quod barbara lingua Latinæ;

Grajaque quod Getico victa loquela sono;

Quam quod finitimo cinctus premor undique Marte;

Vixque brevis tutum murus ab hoste facit. 70

Pax tamen interdum, pacis fiducia numquam est.

Sic nunc hic patitur, nunc timet arma, locus.

Hinc ego dum muter, vel me Zancleæ Charybdis

Devoret, aque suis ad Styga mittat aquis:

Vel rapidæ flammis urar patienter in Ætnæ: 75

Vel freta Leucadii mittar in alta Dei.

Quod petitur, pœna est: neque enim miser esse recuso;

Sed precor, ut possim tutius esse miser.

### E L E G I A III.

**I**LLa dies hæc est, qua te celebrare poetæ,

(si modo non fallunt tempora) Bacche, solent;

Festaque odoratis innectunt tempora sertis,

Et dicunt laudes ad tua vina tuas.

Inter quos, memini, dum me mea fata sinebant, 5

Non invisa tibi pars ego sæpe fui.

Quem nunc suppositum stellis Cynosuridos Ursæ  
Juncta tenet crudis Sarmatis ora Getis.  
Quique prius mollem, vacuamque laboribus, egi  
In studiis vitam, Pieridumque choro; 10  
Nunc procul a patria Geticis circumsonor armis,  
Multa prius pelago, multaque passus humo.  
Sive mihi casus, sive hoc dedit ira Deorum;  
Nubila nascenti seu mihi Parca fuit:  
Tu tamen e sacris hederæ cultoribus unum 15  
Numine debueras sustinuisse tuo.  
An dominæ fati quidquid cecinere Sorores,  
Omne sub arbitrio desinit esse Dei?  
Ipse quoque ætherias meritis investus es arces;  
Quâ non exiguo facta labore via est. 20  
Nec patria est habitata tibi: sed ad usque nivosum  
Strymona venisti, Marticolamque Geten:  
Persidaque, & lato spatiantem flumine Gangen,  
Et quascumque bibit decolor Indus aquas.  
Scilicet hanc legem nentes fatalia Parcæ 25  
Stamina bis genito bis cecinere tibi.  
Me quoque, si fas est exemplis ire Deorum,  
Ferreæ sors vitæ difficilisque premit.  
Illo nec levius cecidi, quem magna locutum  
Repulit a Thebis Juppiter igne suo. 30  
Ut tamen audisti percussum fulmine vatem,  
Admonitu matris condoluisse potes.  
Et potes, adspiciens circum tua sacra poetas,

Nescio quis nostri, dicere, cultor abest.

Fer, bone Liber, opem: sic altam degravet ulmum 35

Vitis, & incluso plena sit uva mero.

Sic tibi cum Bacchis Satyrorum gnava juvenus

Adsit, & attonito non taceare sono.

Ossa bipenniferi sic sint male pressa Lycurgi;

Impia nec pœnâ Pentheos umbra vacet. 40

Sic micet æternum, vicinaque sidera vincat

Conjugis in cœlo Cressa Corona tuæ.

Huc ades, & casus releves, pulcherrime, nostros,

Unum de numero me, memor, esse tuo.

Sunt Dîs inter se commercia. flectere tenta 45

Cæsareum numen numine, Bacche, tuo.

Vos quoque, consortes studii, pia turba, poetæ,

Hæc eadem sumto quisque rogare mero.

Atque aliquis vestrûm, Nasonis nomine dicto,

Deponat lacrimis pocula mixta suis: 50

Admonitusque mei, cum circumspexerit omnes,

Dicat, Ubi est nostri pars modo Naso chori?

Idque ita; si vestrum merui candore favorem:

Nullaque iudicio litera læsa meo est.

Si, veterum digne veneror cum scripta virorum, 55

Proxima non illis esse minora reor.

Sic igitur dextro faciatis Apolline carmen:

Quod licet, inter vos nomen habete meum.

## ELEGIA IV.

**L**ittore ab Euxino Nasonis epistola veni,  
Lassaue facta mari, lassaue facta viâ.  
**Q**ui mihi flens dixit, Tu, cui licet, adspice Romam.  
Heu quanto melior sors tua sorte meâ!  
Flens quoque me scripsit: nec qua signabar, ad os est  
Ante, sed ad madidas gemma relata genas.  
Trititiæ caussam si quis cognoscere quærit,  
Ostendi solem postulat ille sibi.  
Nec frondem in silvis, nec aperto mollia prato  
Gramina, nec pleno flumine cernit aquas. 10  
**Q**uid Priamus doleat, mirabitur, Hectore raptō;  
Quidve Philoctetes ictus ab angue gemat.  
Dī facerent utinam, talis status esset in illo,  
Ut non trititiæ caussa dolenda foret!  
Fert tamen, ut debet, casus patienter amarus: 15  
More nec indomiti frena recusat equi.  
Nec fore perpetuam sperat sibi numinis iram,  
Conscius in culpa non scelus esse sua.  
Sæpe refert, sit quanta Dei clementia: cujus  
Se quoque in exemplis adnumerare solet. 20  
Nam quod opes teneat patrias, quod nomina civis,  
Denique quod vivat, munus habere Dei.  
Te tamen, ô, si quid credis mihi carior, ille,  
Omnibus, in toto pectore semper habet.

Teque Mentētiaden, te qui comitavit Oresten, 25

Te vocat Ægiden, Euryalumque suum.

Nec patriam magis ille suam desiderat, & quæ

Plurima cum patriâ sentit abesse suâ,

Quam vultus, oculosque tuos, o dulcior illo

Melle, quod in ceris Attica ponit apis! 30

Sæpe etiam mœrens tempus reminiscitur illud,

Quod non præventum morte fuisse dolet.

Cumque alii fugerent subitæ contagia cladis,

Nec vellent iclæ limen adire domûs;

Te sibi cum paucis meminit mansisse fidelem: 35

Si paucos aliquis tresve duosve vocat.

Quamvis attonitus, sensit tamen omnia: nec te

Se minus adversis indoluisse suis.

Verba solet, vultumque tuum, gemitusque referre:

Et, te flente, suos immaduisse sinus. 40

Quam sibi præstiteris, qua consolatus amicum

Sis ope; solandus cum simul ipse fores.

Pro quibus adfirmat fore se memoremque piumque,

Sive diem videat, sive tegatur humo.

Per caput ipse suum solitus jurare tuumque, 45

Quod scio non illi vilis esse suo.

Plena tot ac tantis referatur gratia factis:

Nec sinet ille tuos litus arare boves.

Fac modo constanter profugum tueare. quod ille,

Qui bene te novit, non rogat; ipsa rogo. 50

## E L E G I A V.

**A**nnuus adsueta Dominæ natalis honorem  
Exigit. ite manus ad pia sacra meæ.  
Sic quondam festum Laertius egerit heros  
Forsan in extremo conjugis orbe diem.  
Lingua favens adsit, longorum oblita malorum: 5  
Quæ (puto) dedidicit jam bona verba loqui.  
Quæque semel toto vestis mihi sumitur anno,  
Sumatur fatis discolor alba meis.  
Araque gramineo viridis de cespite fiat;  
Et velet tepidos nexa corona focos. 10  
Da mihi tura, puer, pingues facientia flammæ,  
Quodque pio fusum stridat in igne merum.  
Optime natalis, quamvis procul absumus, opto  
Candidus huc venias, dissimilisque meo.  
Sique quod instabat dominæ miserabile vulnus, 15  
Sit perfuncta meis tempus in omne malis.  
Quæque gravi nuper plus quam quassata procella est,  
Quod superest, tutum per mare navis eat.  
Illa domo, nataque sua, patriaque fruatur:  
Erepta hæc uni sit satis esse mihi. 20  
Quatenus & non est in caro conjuge felix,  
Pars vitæ tristi cetera nube vacet.  
Vivat, ametque virum, quoniam sic cogitur, absens.  
Consumetque annos, sed diuturna, suos.

Adjicerem & nostros: sed ne contagia fati 25  
Corrumpant timeo, quos agit ipsa, mei.  
Nil homini certum est. fieri quis posse putaret,  
Ut facerem in mediis hæc ego sacra Getis?  
Adspice, ut aura tamen fumos e ture coortos  
In partes Italas & loca dextra ferat. 30  
Sensus inest igitur nebulis, quas exigit ignis:  
Consilium fugiunt cetera pene meum.  
Consilio, commune sacrum cum fiat in ara  
Fratribus, alterna qui periere manu,  
Ipsa sibi discors, tamquam mandetur ab illis, 35  
Scinditur in partes atra favilla duas.  
Hoc (memini) quondam fieri non posse loquebar.  
Et me Battiades iudice falsus erat.  
Omnia nunc credo: cum tu non stultus ab Arcto  
Terga vapor dederis, Ausoniamque petas. 40  
Hæc igitur lux est: quæ si non orta fuisset,  
Nulla fuit misero festa videnda mihi.  
Edidit hæc mores illis Heroisin æquos,  
Quis erat Eetion Icariusque pater.  
Nata pudicitia est, mores, probitasque, fidesque, 45  
At non sunt istâ gaudia nata die:  
Sed labor, & curæ, fortunaque moribus impar,  
Justaque de viduo pene querela toro.  
Scilicet adversis probitas exercita rebus  
Tristi materiam tempore laudis habet. 50  
Si nihil infesti durus vidisset Ulixes,



Penelope felix, sed sine laude, foret.  
Victor Echionias si vir penetrasset in arces,  
Forsitan Evadnen vix sua nosset humus.  
Cum Pelia tot sint genitæ, cur nobilis una est? 55  
Nupta fuit misero nempe quod una viro.  
Effice, ut Iliacas tangat prior alter arenas,  
Laodamia nihil cur referatur erit.  
Et tua, quod mallet, pietas ignota maneret,  
Implessent venti si mea vela sui. 60  
Dî tamen, & Cæsar Dîs accessure, sed olim,  
Æquarint Pylios cum tua fata dies;  
Non mihi, qui pœnam fateor meruisse, sed illi  
Parcite, quæ nullo digna dolore dolet.

---

## E L E G I A VI.

**T**U quoque nostrarum quondam fiducia rerum,  
Qui mihi confugium, qui mihi portus eras;  
Tu modo suscepti caussam dimittis amici,  
Officiiue pium tam cito ponis onus?  
Sarcina sum, fateor; quam si tu tempore duro 5  
Depositurus eras, non subeunda fuit.  
Fluctibus in mediis navem, Palinure, relinquis?  
Ne fuge; neve tuâ sit minor arte fides.  
Numquid Achilleos inter fera prœlia fidi

Deseruit levitas Automedontis equos?

10

Quem semel excepit, numquid Podalirius ægro

Promissam medicæ non tulit artis opem?

Turpius ejicitur, quam non admittitur hospes.

Quæ patuit, dextræ firma sit ara meæ.

Nil, nisi me solum, primo tutatus es: at nunc 15

Me pariter serva, judiciumque tuum:

Si modo non aliqua est in me nova culpa; tuamque

Mutarunt subito crimina nostra fidem.

Spiritus hic, Scythica quem non bene ducimus aura,

Quod cupio, membris exeat ante meis; 20

Quam tua delicto stringantur pectora nostro,

Et videar merito vilior esse tibi.

Non adeo toti fatis urguemur iniquis,

Ut mea sit longis mens quoque mota malis.

Finge tamen motam; quoties Agamemnone natum 25

Dixisse in Pyladen verba proterva putas?

Nec procul a vero est, quod vel pulsarit amicum;

Mansit in officiis non minus ille suis.

Hoc est cum miseris solum commune beatis,

Ambobus tribui quod solet obsequium. 30

Ceditur & cæcis, & quos prætexta verendos,

Virgaque cum verbis imperiosa facit.

Si mihi non parcis, fortunæ parcere debes.

Non habet in nobis ullius ira locum.

Elige nostrorum minimum minimumque laborum: 35

Isto, quo reris, grandius illud erit.

Quam

Quam multa madidæ celebrantur arundine fossæ,  
Florida quam multas Hybla tuetur apes,  
Quam multæ gracili terrena sub horrea ferre  
Limite formicæ grana reperta solent; 40  
Tam me circumstant densorum turba malorum.  
Crede mihi; vero est nostra querela minor..  
His qui contentus non est, in litus arenas,  
In segetem spicas, in mare fundat aquas.  
Intempestivos igitur compesce timores; 45  
Vela nec in medio desere nostra mari.

---

## ELEGIA VII.

Quam legis, ex illâ tibi venit epistola terrâ,  
Latus ubi æquoreis additur Ister aquis.  
Si tibi contingit cum dulci vita salute,  
Candida Fortunæ pars manet una meæ.  
Scilicet, ut semper, quid agam, carissime, quæris: 5  
Quamvis hoc vel me scire tacente potes.  
Sum miser, hæc brevis est nostrorum summa malorum:  
Quisquis & offenso Cæsare vivet, erit.  
Turba Tomitanæ quæ sit regionis, & inter  
Quos habitem mores, discere cura tibi est? 10  
Mixta sit hæc quamvis inter Grajosque Getasque,  
A male pacatis plus trahit ora Getis.  
Ovidius T. III. Y

Sarmaticæ major Geticæque frequentia gentis  
Per medias in equis itque reditque vias.  
In quibus est nemo, qui non coryton, & arcum, 15  
Telaque vipereo lurida felle gerat.  
Vox fera, trux vultus, verissima Martis imago:  
Non coma, non ullâ barba resecta manu.  
Dextera non segnis fixo dare vulnera cultro,  
Quem vinctum lateri barbarus omnis habet. 20  
Vivit in his eheu! tenerorum oblitus amorum,  
Hos videt, hos vates audit, amice, tuus!  
Atque utinam vivat, sed non moriatur in illis!  
Absit ab invisis & tamen umbra locis!  
Carmina quod pleno saltari nostra Theatro, 25  
Versibus & plaudi scribis, amice, meis;  
Nil equidem feci (tu scis hoc ipse) theatri:  
Musa nec in plausus ambitiosa mea est.  
Nec tamen ingratum est, quodcumque obliviam nostri  
Impedit, & profugi nomen in ora refert. 30  
Quamvis interdum, quæ me læsisse recordor,  
Carmina devoveo, Pieridasque meas;  
Cum bene devovi, nequeo tamen esse sine illis:  
Vulneribusque meis tela cruenta sequor.  
Quæque modo Euboicis lacerata est fluctibus, audet 35  
Graja Caphaream currere puppis aquam.  
Nec tamen ut lauder vigilo, curamque futuri  
Nominis, utilius quod latuisset, ago.  
Detineo studiis animum, falloque dolores:

Exterior curis & dare verba meis. 40

Quid potius faciam solis desertus in oris,

Quamve malis aliam quærere coner opem?

Sive locum spectro, locus est inamabilis, & quo

Esse nihil toto tristius orbe potest.

Sive homines, vix sunt homines hoc nomine digni: 45

Quamque lupi, sævæ plus feritatis habent.

Non metuunt leges, sed cedit viribus æquum;

Victæque pugnaci jura sub ense jacent.

Pellibus & laxis arcent male frigora braccis;

Oraque sunt longis horrida testa comis. 50

In paucis remanent Grajæ vestigia linguæ:

Hæc quoque jam Getico barbara facta sono.

Unus in hoc populo nemo est, qui forte Latine

Quælibet e medio reddere verba queat.

Ille ego Romanus vates (ignoscite Musæ) 55

Sarmatico cogor plurima more loqui.

En pudet, & fateor; jam desuetudine longâ

Vix subeunt ipsi verba Latina mihi.

Nec dubito, quin sint & in hoc non pauca libello

Barbara. non hominis culpa, sed ista loci. 60

Ne tamen Ausoniæ perdam commercia linguæ,

Et fiat patrio vox mea muta sono;

Ipse loquor mecum, desuetæque verba retracto;

Et studii repeto signa sinistra mei.

Sic animum tempusque traho: meque ipse reduco 65

A contemplatu, submoveoque, mali.

Carminibus quæro miserarum obliviam rerum.

Præmia si studio consequor ista, sat est.

# ELEGIA VIII.

**N**ON adeo cecidi, quamvis dejectus, ut infra  
 Te quoque sim: inferius quo nihil esse potest.  
 Quæ tibi res animos in me facit, improbe? curve  
 Casibus insultas, quos potes ipse pati?  
 Nec mala te reddunt mitem placidumve jacenti 5  
 Nostra, quibus possint illacrimare feræ?  
 Nec metuis dubio Fortunæ stantis in orbe  
 Numen, & exosæ verba superba Deæ?  
 Exiget ah dignas ultrix Rhamnusia pœnas!  
 Imposito calcas quid mea fata pede? 10  
 Vidi ego naufragiumque viros & in æquore mergi:  
 Et, Numquam, dixi, justior unda fuit.  
 Vilia qui quondam miseris alimenta negarat,  
 Nunc mendicato pascitur ipse cibo.  
 Passibus ambiguis Fortuna volubilis errat, 15  
 Et manet in nullo certa tenaxque loco.  
 Sed modo læta manet, vultus modo sumit acerbos,  
 Et tantum constans in levitate sua est.  
 Nos quoque floruimus, sed flos erat ille caducus;  
 Flammaque de stipulâ nostra brevisque fuit. 20

Neve tamen totâ capias fera gaudia mente,  
 Non est placandi spes mihi nulla Dei.  
 Vel quia peccavi citra scelus; utque pudore  
 Non caret, invidiâ sic mea culpa caret:  
 Vel quia nil ingens ad finem Solis ab ortu, 25  
 Illo, cui paret, mitius orbis habet.  
 Scilicet ut non est per vim superabilis ulli,  
 Molle cor ad timidas sic habet ille preces.  
 Exemploque Deûm, quibus accessurus & ipse est,  
 (Cum pœnæ veniâ plura roganda petam.) 30  
 Si numeres anno Soles & nubila toto,  
 Invenies nitidum sæpius fuisse diem.  
 Ergo, ne nostra nimium lætere ruina,  
 Restitui quondam me quoque posse puta.  
 Posse puta fieri, lenito Principe, vultus 35  
 Ut videas mediâ tristis in Urbe meos:  
 Utque ego te videam caussa graviore fugatum.  
 Hæc sunt a primis proxima vota mihi.

## E L E G I A IX.

**O** Tua si sineres in nostris nomina poni  
 Carminibus, positus quam mihi sæpe fores!  
 Te solum meriti canerem memor; inque libellis  
 Crevisset sine te pagina nulla meis.

Quid tibi deberem tota sciretur in Urbe:

5

Exsul in amissa si tamen Urbe legor.

Te præsens mitem, te nosset senior ætas:

Scripta vetustatem si modo nostra ferent.

Nec tibi cessaret doctus bene dicere lector:

Hic tibi servato vate maneret honor.

10

Cæsaris est primum munus, quod ducimus auras:

Gratia post magnos est tibi habenda Deos.

Ille dedit vitam; tu, quam dedit ille, tueris:

Et facis accepto munere posse frui.

Cumque perhorruerit casus pars maxima nostros, 15

Pars etiam credi pertimuisse velit,

Naufragiumque meum tumulo spectarit ab alto,

Nec dederit nanti per freta sæva manum;

Seminecem Stygia revocasti solus ab unda.

Hoc quoque, quod memores possumus esse, tuum est. 20

Dî tibi se tribuant cum Cæsare semper amicos:

Non potuit votum plenius esse meum.

Hæc meus argutis, si tu paterere, libellis

Poneret in multâ luce videnda labor.

Se quoque nunc, quamvis est jussa quiescere, quin te 25

Nominet invitum, vix mea Musa tenet.

Utque canem pavidæ naclum vestigia cervæ

Luclantem frustra copula dura tenet;

Utque fores nondum reserati carceris acer

Nunc pede, nunc ipsa fronte lacessit equus; 30

Sic mea, lege datâ vincla atque inclusa, Thalia



Per titulum vetiti nominis ire cupit.  
Ne tamen officio memoris lædaris amici,  
Parebo jussis (parce timere) tuis.  
At non parerem, nisi si meminisse putares. 35  
Hoc quod non prohibet vox tua, gratus ero.  
Dumque (quod ô breve sit!) lumen solare videbo,  
Serviet officio spiritus iste tuo.

---

## ELEGIA X.

UT sumus in Ponto, ter frigore constitit Ister:  
Facta est Euxini dura ter unda maris.  
At mihi jam videor patria procul esse tot annis,  
Dardana quot Grajo Troja sub hoste fuit.  
Stare putes; adeo procedunt tempora tarde, 5  
Et peragit lentis passibus annus iter.  
Nec mihi solstitium quidquam de noctibus aufert:  
Efficit angustos nec mihi bruma dies.  
Scilicet in nobis rerum natura novata est;  
Cumque meis curis omnia longa facit. 10  
Num peragunt solitos communia tempora motus,  
Suntque magis vitæ tempora dura meæ?  
Quem tenet Euxini mendax cognomine litus,  
Et Scythici vere terra sinistra freti.  
Innumeræ circa gentes fera bella minantur; 15

Quæ sibi non raptò vivere turpe putant.  
Nil extra tutum est. tumulus defenditur ægre  
Mœnibus exiguis, ingenioque loci.  
Cum minime credas; ut aves, densissimus hostis  
Advolat, & prædam vix bene visus agit. 20  
Sæpe intra muros clausis venientia portis  
Per medias legimus noxia tela vias.  
Est igitur rarus, qui rus colere audeat: isque  
Hac arat infelix, hac tenet arma manu.  
Sub galea pastor junctis pice cantat avenis; 25  
Proque lupo pavidæ bella verentur oves.  
Vix ope castelli defendimur: & tamen intus  
Mixta facit Grajis barbara turba metum.  
Quippe simul nobis habitat discrimine nullo  
Barbarus; & testî plus quoque parte tenet. 30  
Quos ut non timeas, possis odisse videndo  
Pellibus & longâ tempora testâ comâ.  
Hos quoque, qui geniti Graja creduntur ab urbe,  
Pro patrio cultu Persica bracca tegit.  
Exercent illi sociæ commercia linguæ. 35  
Per gestum res est significanda mihi.  
Barbarus hîc ego sum, quia non intelligor ulli:  
Et rident stolidi verba Latina Getæ.  
Meque palam de me tuto mala sæpe loquuntur:  
Forsitan objiciunt exsiliumque mihi. 40  
Utque fit, in me aliquid, si quid dicentibus illis  
Abnuerim quoties adnuerimque, putant.

Adde, quod injustum rigido jus dicitur ense:

Dantur & in medio vulnera sæpe foro.

O duram Lachesin, quæ tam grave sidus habenti 45

Fila dedit vitæ non breviora meæ!

Quod patriæ vultu, vestroque caremus, amici,

Quodque hîc in Scythicis finibus esse queror;

Utraque pœna gravis. merui tamen Urbe carere;

Non merui tali forsitan esse loco. 50

Quid loquor ah demens? ipsam quoque perdere vitam,

Cæsaris offenso numine, dignus eram.

---

### ELEGIA XI.

**Q**UOD te nescio quis per jurgia dixerit esse

Exsulis uxorem, litera questa tua est.

Indolui; non tam mea quod fortuna male audit,

Qui jam consuevi fortiter esse miser;

Quam quia, cui minime vellem, sim caussa pudoris, 5

Teque rear nostris erubuisse malis.

Perfer, & obdura. multo graviora tulisti,

Cum me surripuit Principis ira tibi.

Fallitur iste tamen, quo judice nominor exsul.

Mollior est culpam pœna secuta meam. 10

Maxima pœna mihi est, ipsum offendisse: priusque

Venisset mallem funeris hora mihi.

Quassa tamen nostra est, non fracta, nec obruta puppis:

Utque caret portu, sic tamen exstat aquis.

Nec vitam, nec opes, nec jus mihi civis ademit; 15

Quæ merui vitio perdere cuncta meo.

Sed quia peccato facinus non adfuit illi,

Nil nisi me patriis jussit abesse focus.

Utque aliis, numerum quorum comprehendere non est,

Cæsareum nomen, sic mihi, mite fuit. 20

Ipse relegati, non exulis, utitur in me

Nomine: tuta suo iudice causa mea est.

Jure igitur laudes, Cæsar, pro parte virili

Carmina nostra tuas qualiacumque canunt.

Jure Deos, ut adhuc cæli tibi limina claudant, 25

Teque velint sine se, comprecor, esse Deum.

Optat idem populus. sed ut in mare flumina vastum,

Sic solet exiguae currere, rivus aquæ.

At tu fortunam, cujus vocor exsul ab ore,

Nomine mendaci parce gravare meam. 30

---

## ELEGIA XII.

**S**Cribis, ut oblectem studio lacrimabile tempus,

Ne pereant turpi pectora nostra situ.

Difficile est, quod, amice, mones; quia carmina lætum

Sunt opus, & pacem mentis habere volunt.

Nostra per adversas agitur Fortuna procellas: 5

Sorte nec ulla meâ tristior esse potest.

Exigis, ut Priamus natorum funere ludat,

Et Niobe festos ducat ut orba choros.

Luſtibus, an studio videor debere teneri,

Solus in extremos jussus abire Getas? 10

Des licet hîc valido pectus mihi robore fultum,

Fama refert Anyti quale fuisse reo;

Fracta cadet tantæ sapientia mole ruinæ.

: Plus valet humanis viribus ira Dei.

Ille senex dictus sapiens ab Apolline, nullum 15

Scribere in hoc casu sustinisset opus.

Ut patriæ veniant, veniant oblivia vestri,

Omnis ut admissi sensus abesse queat;

At timor officio fungi vetat ipse quieto.

Cinctus ab innumero me tenet hoste locus. 20

Adde, quod ingenium longa rubigine læsum

Torpet; & est multo, quam fuit ante, minus.

Fertilis, assiduo si non renovetur aratro,

Nil, nisi cum spinis gramen, habebit ager.

Tempore qui longo steterit, male curret, & inter 25

Carceribus missos ultimus ibit equos.

Vertitur in teneram cariem, rimisque dehiscit,

Si qua diu solitis cymba vacarit aquis.

Me quoque despero, fuerim cum parvus & ante,

Illi, qui fueram, posse redire parem. 30

Contudit ingenium patientia longa laborum:

Et pars antiqui magna vigoris abest.  
Sæpe tamen nobis, ut nunc quoque, sumta tabella est;  
Inque suos volui cogere verba pedes.  
Carmina scripta mihi sunt nulla, aut qualia cernis; 35  
Digna sui domini tempore, digna loco.  
Denique non parvas animo dat gloria vires,  
Et fecunda facit pectora laudis amor.  
Nominis & famæ quondam fulgore trahebar,  
Dum tulit antennas aura secunda meas. 40  
Non adeo est bene nunc, ut sit mihi gloria curæ:  
Si liceat, nulli cognitus esse velim.  
An, quia cesserunt primò bene carmina, suades  
Scribere, successus ut sequar ipse meos?  
Pace, novem, vestrâ liceat dixisse, Sorores; 45  
Vos estis nostræ maxima causa fugæ.  
Utque dedit justas tauri fabricator abeni,  
Sic ego do pœnas artibus ipse meis.  
Nil mihi debuerat cum versibus amplius esse;  
Sed fugerem merito naufragus omne fretum. 50  
At puto, si demens studium fatale retentem,  
Hic mihi præbebit carminis arma locus.  
Non liber hîc ullus, non qui mihi commodet aurem,  
Verbaque significant quid mea nôrit, adest.  
Omnia barbariæ loca sunt, vocisque ferinæ, 55  
Omnia sunt Getici plena timore soni.  
Ipse mihi videor jam dedidicisse Latine:  
Jam didici Getice Sarmaticeque loqui.

Nec tamen, ut verum fatear tibi, nostra teneri

A componendo carmine Musa potest. 60

Scribimus, & scriptos absumimus igne libellos.

Exitus est studii parva favilla mei.

Nec possum, & cupio non ullos ducere versus.

Ponitur idcirco noster in igne labor.

Nec nisi pars casu flammis erepta, dolove, 65

Ad vos ingenii pervenit ulla mei.

Sic utinam, quæ nil metuentem tale magistrum

Perdedit, in cineres Ars mea versa foret.

---

### ELEGIA XIII.

**H**Anc tuus e Getico mittit tibi Naso salutem:

Mittere rem si quis, qua caret ipse, potest.

Æger enim traxi contagia corpore mentis,

Libera tormento pars mihi ne qua vacet.

Perque dies multos lateris cruciatibus uror, 5

Sed quod non modico frigore læsit hiems.

Si tamen ipse vales, aliqua nos parte valemus:

Quippe mea est humeris fulta ruina tuis.

Qui mihi cum dederis ingentia pignora, cumque

Per numeros omnes hoc tueare caput; 10

Quod tua me raro solatur epistola, peccas:

Remque piam præstas, ni mihi verba neges,

Hoc precor emenda: quod si correxeris unum,

Nullus in egregio corpore nævus erit.

Pluribus accusem; fieri nisi possit, ut ad me 15

Litera non veniat; missa sit illa tamen.

Dī faciant, ut sit temeraria nostra querela;

Teque putem falso non meminisse mei.

Quod precor, esse liquet. neque enim mutabile robur

Credere me fas est pectoris esse tui. 20

Cana prius gelido desint absinthia Ponto,

Et careat dulci Trinacris Hybla thymo;

Immemorem quam te quisquam convincat amici.

Non ita sunt fati stamina nigra mei.

Tu tamen, ut falsæ possis quoque pellere culpæ 25

Crimina; quod non es, ne videre, cave:

Utque solebamus consumere longa loquendo

Tempora, sermonem deficiente die;

Sic ferat ac referat tacitas nunc litera voces:

Et peragant linguæ charta manusque vices. 30

Quod fore ne nimium videar diffidere, sitque

Versibus hīc paucis admonuisse satis;

Accipe, quo semper finitur epistola verbo,

Aque meis distent ut tua fata, Vale.



## ELEGIA XIV.

**Q**uanta tibi dederint nostri monumenta libelli,  
O mihi me conjux carior, ipsa vides.  
Detrahat auctori multum Fortuna licebit;  
Tu tamen ingenio clara ferere meo.  
Dumque legar, mecum pariter tua fama legetur: 5  
Nec potes in mœstos omnis abire rogos.  
Cumque viri casu possis miseranda videri,  
Invenies aliquas, quæ quod es, esse velint:  
Quæ te, nostrorum cum sis in parte malorum,  
Felicein dicant, invideantque tibi. 10  
Non ego divitias dando tibi plura dedissem.  
Nil feret ad manes divitis umbra suos.  
Perpetui fructum donavi nominis: idque,  
Quo dare nil potui munere majus, habes.  
Adde, quod, ut rerum sola es tutela mearum, 15  
Ad te non parvi venit honoris onus.  
Quod numquam vox est de te mea muta, tuique  
Judiciis debes esse superba vtri.  
Quæ ne quis possit temeraria dicere, præsta:  
Et pariter serva meque piamque fidem. 20  
Nam tua, dum stetimus, turpi sine crimine mansit,  
Et laudem probitas irreprehensa tulit.  
Par eadem nostrâ nunc est sibi facta ruinâ.  
Conspicuum virtus hîc tua ponat opus.

Esse bonam facile est, ubi, quod vetet esse, remotum est; 25

Et nihil officio nupta quod obstat habet.

Cum Deus intonuit, non se subducere nimbo,

Id demum pietas, id socialis amor.

Rara quidem virtus, quam non Fortuna gubernet;

Quæ maneat stabili, cum fugit illa, pede. 30

Si qua tamen pretii sibi merces ipsa petiti,

Inque parum lætis ardua rebus adest;

Ut tempus numeres, per secula nulla tacetur,

Et loca mirantur, quâ patet orbis iter.

Adspicis, ut longo maneat laudabilis ævo 35

Nomen inextinctum, Penelopæa fides?

Cernis, ut Admeti cantetur, ut Hectoris uxor,

Ausaque in accensos Iphias ire rogos?

Ut vivat famâ conjux Phylaceia, cujus

Iliacam celeri vir pede pressit humum? 40

Nil opus est leto pro me, sed amore fideque.

Non ex difficili fama petenda tibi est.

Nec te credideris, quia non facis, ista moneri.

Vela damus, quamvis remige puppis eat.

Qui monet, ut facias, quod jam facis, ille monendo 45

Laudat, & hortatu comprobat acta suo.

P. OVIDII NASONIS  
EPISTOLARUM  
EX PONTO  
LIBRI IV.

*Ovidius* T. III.

Z





P. OVIDII NASONIS  
 EPISTOLARUM  
 EX PONTO  
 LIBER I.

---

EPISTOLA I.

B R U T O.

**N**ASO, Tomitanæ jam non novus incola terræ,  
 Hoc tibi de Getico litore mittit opus.  
 Si vacat, hospitio peregrinos, Brute, libellos  
 Excipe, dumque aliquo, quolibet abde loco.  
 Publica non audent inter monumenta venire,     5  
 Ne suus hoc illis clausurit auctor iter.  
 Ah quoties dixi, Certe nil turpe docetis!  
 Ite: patet castis versibus ille locus.

Non tamen accedunt: sed, ut adspicis ipse, latere  
Sub Lare privato tutius esse putant. 10  
Quæris, ubi hos possis nullo componere læso?  
Qua steterant Artes, pars vacat illa tibi.  
Quid veniant, novitate roges fortasse sub ipsa.  
Accipe, quodcumque est, dummodo non sit amor.  
Invenies, quamvis non est miserabilis index, 15  
Non minus hoc illo triste, quod ante dedi.  
Rebus idem, titulo differt: & epistola cui sit  
Non occultato nomine missa docet.  
Nec vos hoc vultis, sed nec prohibere potestis:  
Musaque ad invitos officiosa venit. 20  
Quidquid id est, adjuuge meis. nihil impedit ortos  
Exsule, servatis legibus, Urbe frui.  
Quod metuas non est. Antonî scripta leguntur;  
Doctus & in promptu scrinia Brutus habet.  
Nec me nominibus furiosus confero tantis. 25  
Sæva Deos contra non tamen arma tuli.  
Denique Cæsareo, quod non desiderat ipse,  
Non caret e nostris ullus honore liber.  
Si dubitas de me, laudes admitte Deorum;  
Et carmen demto nomine sume meum. 30  
Adjuvat in bello pacatæ ramus olivæ:  
Proderit Auctorem Pacis habere nihil?  
Cum foret Æneæ cervix subjecta parenti,  
Dicitur ipsa viro flamma dedisse viam.  
Fert liber Æneaden: & non iter omne patebit? 35

At patriæ pater hic; ipsius ille fuit.  
 Equis ita est audax, ut limine cogat abire  
 Jactantem Phariâ tinnula sinistra manu?  
 Ante Deûm Matrem cornu tibicen adunco  
 Cum canit, exiguæ quis stipis æra neget? 40  
 Scimus ab imperio fieri nil tale Dianæ:  
 Unde tamen vivat, vaticinator habet.  
 Ipsa movent animos Superorum numina nostros;  
 Turpe nec est tali credulitate capi.  
 En ego, pro sistro Phrygiique foramine buxi, 45  
 Gentis Iuleæ nomina sancta fero.  
 Vaticinor, moneoque; locum date sacra ferenti:  
 Non mihi, sed magno poscitur ille Deo.  
 Nec, quia vel merui, vel sensi Principis iram,  
 A nobis ipsum nolle putate coli. 50  
 Vidi ego linigeræ numen violasse fatentem  
 Isidis, Isiacos ante sedere focos.  
 Alter, ob huic similem privatus lumine culpam,  
 Clamabat media se meruisse via.  
 Talia Cœlestes fieri præconia gaudent, 55  
 Ut, sua quid valeant numina, teste probent.  
 Sæpe levant pœnas, ereptaque lumina reddunt,  
 Cum bene peccati pœnituisse vident.  
 Pœnitet ô, (si quid miserorum creditur ulli)  
 Pœnitet, & facto torqueor ipse meo! 60  
 Cumque sit exilium, magis est mihi culpa dolori:  
 Estque pati pœnas, quam meruisse, minus.

Ut mihi Dî faveant, quibus est manifestior ipse,  
 Pœna potest demi, culpa perennis erit.  
 Mors faciet certe, ne sim, cum venerit, exsul: 65  
 Ne non peccarim, mors quoque non faciet.  
 Nil igitur mirum, si mens mihi tabida facta  
 De nive manantis more liquescit aquæ.  
 Estur ut oculatâ vitiata teredine navis:  
 Æquorei scopulos ut cavat unda salis: 70  
 Roditur ut scabra positum rubigine ferrum:  
 Conditus ut tineæ carpitur ore liber:  
 Sic mea perpetuos curarum pectora morsus,  
 Fine quibus nullo conficiantur, habent.  
 Nec prius hi mentem stimuli, quam vita, relinquent: 75  
 Quique dolet citius, quam dolor, ipse cadet.  
 Hoc mihi si Superi, quorum sumus omnia, credent,  
 Forsitan exigua dignus habebor ope.  
 Inque locum Scythico vacuum mutabor ab arcu.  
 Plus isto, duri, si precer, oris ero. 80

---

## EPISTOLA II.

M A X I M O.

**M**Axime, qui tanti mensuram nominis imple,  
 Et geminas animi nobilitate genus;  
 Qui nasci ut posses, quamvis cecidere trecenti,



Non omnes Fabios abstulit una dies;  
 Forsitan hæc a quo mittatur epistola quæras; 5  
 Quique loquar tecum, certior esse velis.  
 Hei mihi! quid faciam? vereor, ne nomine lecto  
 Durus, & aversâ cetera mente legas.  
 Viderit hæc si quis, tibi me scripsisse fateri  
 Audebo, & propriis ingemuisse malis. 10  
 Viderit; audebo tibi me scripsisse fateri,  
 Atque modum culpæ notificare meæ.  
 Qui, cum me pœna dignum graviore fuisset  
 Confitear, possum vix graviora pati.  
 Hostibus in mediis, interque pericula versor: 15  
 Tamquam cum patriâ pax sit adempta mihi.  
 Qui, mortis sævo gement ut vulnere caussas,  
 Omnia vipereo spicula felle linunt.  
 His eques instructus perterrita mœnia lustrat,  
 More lupi clausas circueuntis oves. 20  
 At semel intentus nervo levis arcus equino  
 Vincula semper habens irresoluta manet.  
 Testa rigent fixis veluti vallata sagittis,  
 Portaque vix firmâ submovet arma serâ.  
 Adde loci faciem, nec fronde nec arbore læti, 25  
 Et quod iners hiemi continuatur hiems.  
 Hic me pugnantem cum frigore, cumque sagittis,  
 Cumque meo fato, quarta fatigat hiems.  
 Fine carent lacrimæ, nisi cum stupor obstitit illis:  
 Et similis morti pectora torpor habet. 30

Felicem Nioben, quamvis tot funera vidit,

Quæ posuit sensum saxea facta mali!

Vos quoque felices, quarum clamantia fratrem

Cortice velavit populus ora novo!

Ille ego sum, lignum qui non admittar in ullum: 35

Ille ego sum, frustra qui lapis esse velim.

Ipsa Medusa oculis veniat licet obvia nostris,

Amittat vires ipsa Medusa suas.

Vivimus, ut sensu numquam careamus amaro:

Et gravior longâ fit mea pœna morâ. 40

Sic inconsumtum Tityi semperque renascens

Non perit, ut possit sæpe perire, jecur.

At puto, cum requies, medicinaque publica curæ

Somnus adest, solitis nox venit orba malis.

Somnia me terrent veros imitantia casus: 45

Et vigilant sensus in mea damna mei.

Aut ego Sarmaticas videor vitare sagittas:

Aut dare captivas ad fera vincla manus.

Aut, ubi decipior melioris imagine somni,

Adspicio patriæ tecta relicta meæ. 50

Et modo vobiscum, quos sum veneratus, amici,

Et modo cum cara conjuge, multa loquor.

Sic, ubi percepta est brevis & non vera voluptas,

Pejor ab admonitu fit status iste boni.

Sive dies igitur caput hoc miserabile cernit, 55

Sive pruinosi Noctis aguntur equi;

Sic mea perpetuis liquefiunt pectora curis,

Ignibus admotis ut nova cera solet.

Sæpe precor mortem, mortem quoque deprecor idem;

Ne mea Sarmaticum contegat ossa solum. 60

Cum subit, Augusti quæ sit clementia, credo

Mollia naufragiis litora posse dari.

Cum video quam sint mea fata tenacia, frangor;

Spesque levis magno victa timore cadit.

Nec tamen ulterius quidquam sperove precorve, 65

Quam male mutato posse carere loco.

Aut hoc, aut nihil est, pro me tentare modeste

Gratia quod salvo vestra pudore queat.

Suscipe, Romanæ facundia, Maxime, linguæ,

Difficilis caussæ mite patrocinium. 70

Est mala; confiteor: sed te bona fiet agente.

Lenia pro miserâ fac modo verba fugâ.

Nescit enim Cæsar, quamvis Deus omnia norit,

Ultimus hîc qua sit conditione locus.

Magna tenent illud rerum molimina numen: 75

Hæc est cœlesti pectore cura minor.

Nec vacat, in qua sint positi regione Tomitæ,

Quærere, finitimo vix loca nota Getæ.

Aut quid Sauromatæ faciant, quid Iazyges acres,

Cultaque Orestæ Taurica terra Deæ. 80

Quæque aliæ gentes, ubi frigore constitit Ister,

Dura meant celeri terga per amnis equo.

Maxima pars hominum nec te, pulcherrima, curant,

Roma; nec Ausonii militis arma timent.

Dant animos arcus illis plenæque pharetræ; 85

Quamque libet longis cursibus aptus equus:

Quodque sitim didicere diu tolerare famemque;

Quodque sequens nullas hostis habebit aquas.

Ira Dei mitis non me misisset in istam,

Si satis hæc illi nota fuisset, humum. 90

Nec me, nec quemquam Romanum gaudet ab hoste,

Meque minus, vitam cui dedit ipse, premi.

Noluit, ut poterat, minimo me perdere nutu.

Nil opus est ullis in mea fata Getis.

Sed neque, cur morerer, quidquam mihi comperit actum: 95

Nec minus infestus, quam fuit, esse potest.

Tum quoque nil fecit, nisi quod facere ipse coegi;

Pene etiam merito parcior ira meo.

Dî faciant igitur, quorum mitissimus ipse est,

Alma nihil majus Cæsare terra ferat. 100

Utque diu sub eo sit publica sarcina rerum,

Perque manus hujus tradita gentis eat.

At tu tam placido, quam nos quoque sensimus illum,

Judice pro lacrimis ora resolve meis.

Non petito ut bene sit, sed uti male tutius; utque 105

Exsiliū sævo distet ab hoste meum.

Quamque dedere mihi præsentia numina vitam,

Non adimat stricto squalidus ense Getes.

Denique, si moriar, subeant pacatius arvom

Ossa, nec a Scythicâ nostra premantur humo. 110

Nec male compositos (ut scilicet exsule dignum)

Bistonii cineres ungula pulset equi.

Et ne, si superest aliquid post funera sensûs,

Terreat hîc manes Sarmatis umbra meos.

Cæsaris hæc animum poterant audita movere, 115

Maxime; movissent si tamen ante tuum.

Vox, precor, Augustas pro me tua molliat aures,

Auxilio trepidis quæ solet esse reis:

Adsuetaque tibi doctæ dulcedine linguæ

Æquandi Superis pectora flecte viri. 120

Non tibi Theromedon, crudusve rogabitur Atreus,

Quique suis homines pabula fecit equis;

Sed piger ad pœnas Princeps, ad præmia velox,

Quique dolet, quoties cogitur esse ferox.

Qui vincit semper, victis ut parcere possit; 125

Clausit & æternâ civica bella serâ.

Multa metu pœnæ, pœnâ qui pauca coercet;

Et jactat invitâ fulmina rara manu.

Ergo tam placidas orator missus ad aures,

Ut propior patriæ sit fuga nostra, roga. 130

Ille ego sum, qui te colui; quem festa solebat

Inter convivas mensa videre tuos.

Ille ego, qui duxi vestros Hymenæon ad ignes;

Et cecini fausto carmina digna toro.

Cujus te solitum memini laudare libellos, 135

Exceptis, domino qui nocuere suo.

Cui tua nonnumquam miranti scripta legebas.

Ille ego, de vestrâ cui data nupta domo.

Hanc probat, & primo dilectam semper ab ævo,  
 Est inter comites Marcia censa suas. 140  
 Inque suis habuit matertera Cæsaris ante:  
 Quarum iudicio si qua probata, proba est.  
 Ipsa suâ melior famâ, laudantibus istis,  
 Claudia divinâ non eguisset ope.  
 Nos quoque præteritos sine labe peregimus annos. 145  
 Proxima pars vitæ transilienda meæ.  
 Sed de me ut sileam, conjux mea sarcina vestra est.  
 Non potes hanc salva dissimulare fide.  
 Confugit hæc ad vos: vestras amplectitur aras.  
 Jure venit cultos ad sibi quisque Deos. 150  
 Flensque rogat, precibus lenito Cæsare vestris,  
 Busta sui fiant ut propiora viri.

## E P I S T O L A III.

R U F I N O.

**H**Anc tibi Naso tuus mittit, Rufine, salutem;  
 Qui miser est, ulli si suus esse potest.  
 Reddita confusæ nuper solatia menti  
 Auxilium nostris spemque tulere malis.  
 Utque Machaoniis Præantius artibus heros 5  
 Lenito medicam vulnere sensit opem;  
 Sic ego mente jacens, & acerbo saucius ictu,

Admonitu cœpi fortior esse tuo.

Et jam deficiens sic ad tua verba revixi,  
Ut solet infuso vena redire mero. 10

Non tamen exhibuit tantas facundia vires,  
Ut mea sint dictis pectora sana tuis.

Ut multum nostræ demas de gurgite curæ;  
Non minus exhausto, quod superabit, erit.  
Tempore ducetur longo fortasse cicatrix. 15

Horrent admotas vulnera cruda manus.  
Non est in medico semper, relevetur ut æger.

Interdum docta plus valet arte malum.  
Cernis, ut e molli sanguis pulmone remissus  
Ad Stygias certo limite ducat aquas. 20

Adferat ipse licet sacras Epidaurius herbas,  
Sanabit nullâ vulnera cordis ope.

Tollere nodosam nescit medicina podagram,  
Nec formidatis auxiliatur aquis.  
Cura quoque interdum nullâ medicabilis arte; 25

Aut, ut sit, longâ est extenuanda morâ.  
Cum bene firmarunt animum præcepta jacentem,  
Sumtaque sunt nobis pectoris arma tui;

Rursus amor patriæ, ratione valentior omni,  
Quod tua texuerunt scripta, retexit opus. 30

Sive pium vis hoc, sive hoc muliebri vocari,  
Confiteor misero molle cor esse mihi.

Non dubia est Ithaci prudentia: sed tamen optat  
Fumum de patriis posse videre focis,

Nescio qua natale solum dulcedine captos 35  
Ducit, & immemores non sinit esse sui.  
Quid melius Roma? Scythico quid frigore pejus?  
Huc tamen ex illa barbarus urbe fugit.  
Cum bene sit clausæ caveâ Pandione natæ,  
Nititur in silvas illa redire suas. 40  
Adsueto tauri saltus, adsueta leones  
(Nec feritas illos impedit) antra petunt.  
Tu tamen exilii morsus e pectore nostro  
Fomentis speras cedere posse tuis.  
Effice, vos ipsi ne tam mihi sitis amandi, 45  
Talibus ut levius sit caruisse malum.  
At, puto, qua fueram genitus, tellure carenti,  
In tamen humano contigit esse loco.  
Orbis in extremi jaceo desertus arenis:  
Fert ubi perpetuas obruta terra nives. 50  
Non ager hîc pomum, non dulces educat uvas:  
Non salices ripâ, robora monte virent.  
Neve fretum terrâ laudes magis, æquora semper  
Ventorum rabie, solibus orba, tument,  
Quocumque adspicias, campi cultore carentes, 55  
Vastæque, quæ nemo vindicet, arva jacent.  
Hostis adest dextra lævaque a parte timendus,  
Vicinoque metu terret utrumque latus.  
Altera Bistonias pars est sensura sarissas,  
Altera Sarmaticâ spicula missa manu. 60  
I nunc, & veterum nobis exempla virorum,



Qui forti casum mente tulere, refer.

Et grave magnanimi robur mirare Rutil,

Non usi reditûs conditione dati.

Smyrna virum tenuit, non Pontus & hostica tellus; 65

Pene minus nullo Smyrna petenda loco.

Non doluit patria Cynicus procul esse Sinopeus:

Legit enim sedes, Attica terra, tuas.

Arma Neoclides qui Persica contudit armis,

Argolica primam sensit in urbe fugam. 70

Pulsus Aristides patriâ Lacedæmona fugit:

Inter quas dubium, quæ prior esset, erat.

Cæde puer facta Patroclus Opunta reliquit,

Thessaliæque adiit, hospes Achillis, humum.

Exsul ab Hæmoniâ Pirenida cessit ad undam, 75

Quo duce trabs Colchas sacra cucurrit aquas.

Liquit Agenorides Sidonia mœnia Cadmus,

Poneret ut muros in meliore loco.

Venit ad Adrastum Tydeus Calydone fugatus;

Et Teucrum Veneri grata recepit humus. 80

Quid referam veteres Romanæ gentis, apud quos

Exsulibus tellus ultima Tybur erat?

Persequar ut cunctos, nulli datur omnibus ævis

Tam procul a patria est, horridiorve locus.

Quo magis ignoscat sapientia vestra dolenti, 85

Qui facit ex dictis non ita multa tuis.

Nec tamen inficior, si possint nostra coire

Vulnera, præceptis posse coire tuis.

Sed vereor, ne me frustra servare labores;  
 Neu juver admota perditus æger ope. 90  
 Nec loquor hæc, quia sit major prudentia nobis;  
 Sed sim quam medico notior ipse mihi.  
 Ut tamen hoc ita sit, munus tua grande voluntas  
 Ad me pervenit, consuliturque boni.

---

## EPISTOLA IV.

### U X O R I.

**J**AM mihi deterior canis adspersitur ætas,  
 Jamque meos vultus ruga senilis arat:  
 Jam vigor, & quasso languent in corpore vires,  
 Nec, juveni lusus qui placuere, placent.  
 Nec, si me subito videas, agnoscere possis: 5  
 Ætatis facta est tanta ruina meæ.  
 Confiteor facere hæc annos: sed & altera caussa est,  
 Anxietas animi, continuusque labor.  
 Nam mea per longos si quis mala digerat annos,  
 (Crede mihi) Pyllo Nestore major ero. 10  
 Cernis ut in duris (& quid bove firminus?) arvis  
 Fortia taurorum corpora frangat opus.  
 Quæ numquam vacuo solita est cessare novali,  
 Fructibus assiduis lassa senescit humus.  
 Occidet, ad Circi si quis certamina semper, 15  
 Non

Non intermissis cursibus, ibit equus.  
 Firma sit illa licet, solvetur in æquore nâvis,  
 Quæ numquam liquidis sicca carebit aquis.  
 Me quoque debilitat series immensa malorum,  
 Ante meum tempus cogit & esse senem.  
 Otia corpus alunt; animus quoque pascitur illis.  
 Immodicus contra carpit utrumque labor.  
 Adspice, in has partes quod venerit Æsone natus,  
 Quam laudem a sera posteritate ferat.  
 At labor illius nostro leviorque minorque:  
 Si modo non verum nomina magna premunt.  
 Ille est in Pontum, Pelia mittente, profectus,  
 Qui vix Thessaliæ fine timendus erat.  
 Cæsar's ira mihi nocuit; quem Solis ab ortu  
 Solis ad occasus utraq; terra tremit.  
 Junctior Hæmonia est Ponto, quam Roma sinistro:  
 Et brevius, quam nos, ille peregit iter.  
 Ille habuit comites, primos telluris Achivæ:  
 At nostram cuncti destituere fugam.  
 Nos fragili vastum ligno sulcavimus æquor:  
 Quæ tulit Æsoniden, firma carina fuit.  
 Nec Tiphys mihi rector erat: nec Agenore natus;  
 Quas sequerer, docuit, quas fugeremque vias.  
 Illum tutata est cum Pallade regia Juno:  
 Defendêre meum numina nulla capiti.  
 Illum furtivæ juvere Cupidinis artes;  
 Quas a me vellem non didicisset Amor.

Ovidius T. III.

A a

Ille domum. rediit: nos his moriemur in arvis,

Perstiterit læsi si gravis ira Dei.

Durius est igitur nostrum, fidissima conjux, 45

Illo, quod subiit Æsone natus, onus.

Te quoque, quam juvenem discedens Urbe reliqui,

Credibile est nostris insenuisse malis.

O ego, Dī faciant, talem te cernere possim,

Caraque mutatis oscula ferre genis; 50

Amplectique meis corpus non pingue lacertis;

Et, Gracile hoc fecit, dicere, cura mei:

Et narrare meos flenti flens ipse labores:

Sperato numquam colloquioque frui:

Turaque Cæsaribus cum conjuge Cæsare dignā, 55

Dīs veris, memori debita ferre manu!

Memnonis hanc utinam, lenito Principe, mater

Quam primum roseo provocet ore diem!

## EPISTOLA V.

MAXIMO.

**I**lle tuos quondam non ultimus inter amicos,  
Ut sua verba legas, Maxime, Naso rogat.

In quibus ingenium desiste requirere nostrum,  
Nescius exilii ne videre mei.

Cernis, ut ignavum corrumpant otia corpus: 5

Ut capiant vitium, nŕ moveantur, aquæ.  
 Et mihi, si quis erat, ducendi carminis usus  
 Deficit; estque minor factus inerte situ.  
 Hæc quoque, quæ legitis, (si quid mihi, Maxime, credis)  
 Scribimus invitâ vixque coacta manu. 19  
 Non libet in tales animum contendere curas;  
 Nec venit ad duros Musa vocata Getas.  
 Ut tamen ipse vides, luctor deducere versum,  
 Sed non fit fato mollior ille meo.  
 Cum relego, scripsisse pudet: quia plurima cerno, 25  
 Me quoque, qui feci, iudice digna lini.  
 Nec tamen emendo: labor hic quam scribere major;  
 Mensque pati durum sustinet ægra nihil.  
 Scilicet incipiam lima mordacius uti,  
 Et sub iudicium singula verba vocem? 30  
 Torquet enim Fortuna parum, nisi Nilus in Hebrum  
 Confluat? & frondes Alpibus addat Athos?  
 Parcendum est animo miserabile vulnus habenti.  
 Subducant oneri colla perusta boves.  
 At, puto, fructus adest, justissima caussa laborum: 25  
 Et sata cum multo fœnore reddit ager.  
 Tempus ad hoc nobis (repetas licet omnia) nullum  
 Profuit (atque utinam non nocuisset!) opus.  
 Cur igitur scribam miraris? miror & ipse:  
 Et mecum quæro sæpe, quid inde feram. 30  
 An populus vere sanos negat esse poetas;  
 Sumque fides hujus maxima vocis ego?

Qui, sterili toties cum sim deceptus ab arvo,  
 Damnosa persto condere semen humo.  
 Scilicet est cupidus studiorum quisque suorum; 35  
 Tempus & adsueta ponere in arte juvat.  
 Saucius ejurat pugnam gladiator, & idem  
 Immemor antiqui vulneris arma capit.  
 Nil sibi cum pelagi dicit fore naufragus undis;  
 Mox ducit remos, quâ modo navit aqua. 40  
 Sic ego constanter studium non utile carpo;  
 Et repeto, nollem quas coluisse, Deas.  
 Quid potius faciam? non sum qui segnia ducam  
 Otia. mors nobis tempus habetur iners.  
 Nec juvat in lucem nimio marcescere vino: 45  
 Nec tenet incertas alea blanda manus.  
 Cum dedimus somno, quas corpus postulat, horas,  
 Quò ponam vigilans tempora longa modo?  
 Moris an oblitus patrii contendere discam  
 Sarmaticos arcus, & trahar arte loci? 50  
 Hoc quoque me studium prohibent adsumere vires;  
 Mensque magis gracili corpore nostra valet.  
 Cum bene quæsieris, quid agam; magis utile nil est  
 Artibus his, quæ nil utilitatis habent.  
 Consequor ex illis casus oblivia nostri. 55  
 Hanc satis est messem si mea reddit humus.  
 Gloria vos acuat: vos ut recitata probentur  
 Carmina, Pieriis invigilate choris.  
 Quod venit ex facili, satis est componere nobis:

Et nimis intenti caussa laboris abest. 60  
 Cur ego sollicitâ poliam mea carmina curâ?  
 An verear, ne non adprobet illa Getes?  
 Forsitan audacter faciam, sed gloriôr, Istrum  
 Ingenio nullum majus habere meo.  
 Hoc (ubi vivendum) satis est si consequor arvo, 65  
 Inter inhumanos esse poeta Getas.  
 Quo mihi diversum fama contendere in orbem?  
 Quem Fortuna dedit, Roma sit ille locus.  
 Hoc mea contenta est infelix Musa theatro.  
 Sic merui; magni sic voluere Dei. 70  
 Nec reor hinc illuc nostris iter esse libellis,  
 Quò Boreas penna deficiente venit.  
 Dividimur cœlo; quæque est procul urbe Quirini,  
 Adspicit hirsutos cominus Ursa Getas.  
 Per tantum terræ, tot aquas vix credere possim 75  
 Indicium studii transiluisse mei.  
 Finge legi, quodque est mirabile, finge placere:  
 Auctorem certe res juvet ista nihil.  
 Quo tibi, si calida positus laudare Syene;  
 Aut ubi Taprobanen Indica cingit aqua? 80  
 Altius ire libet? si te distantia longe  
 Pleiadum laudent signa, quid inde feras?  
 Sed neque pervenio scriptis mediocribus istuc;  
 Famaque cum domino fugit ab Urbe suo.  
 Vosque, quibus perii, tunc cum mea fama sepulta est, 85  
 Nunc quoque de nostra morte tacere reor.

## EPISTOLA VI.

GRÆCINO.

**E**quid ut audisti (nam te diversa tenebat  
 Terra) meos casus, cor tibi triste fuit?  
 Dissimules, metuasque licet, Græcine, fateri;  
 Si bene te novi, triste fuisse liquet.  
 Non cadit in mores feritas inamabilis istos;      §  
 Nec minus a studiis dissidet illa tuis.  
 Artibus ingenuis, quarum tibi maxima cura est,  
 Pectora mollescunt, asperitasque fugit.  
 Nec quisquam meliore fide complectitur illas,  
 Qua sinit officium, militiæque labor.      10  
 Certe ego, cum primum potui sentire quid essem,  
 (Nam fuit attonito mens mihi nulla diu)  
 Hoc quoque Fortunæ sensi, quod amicus abesses:  
 Qui mihi præsidium grande futurus eras.  
 Tecum tunc aberant ægræ solatia mentis,      15  
 Magnaque pars animæ consilique mei.  
 At nunc, quod superest, fer opem, precor, eminus unam:  
 Adloquioque juva pectora nostra tuo.  
 Quæ (non mendaci si quidquam credis amico)  
 Stulta magis dici, quam scelerata, decet.      20  
 Nec leve, nec tutum, peccati quæ sit origo,  
 Scribere. tractari vulnera nostra timent,



Qualicumque modo mihi sint ea facta, rogare

Desine. non agites, si qua coire velis.

Quidquid id est, ut non facinus, sic culpa, vocandum. 25

Omnis an in magnos culpa Deos, scelus est?

Spes igitur menti pœnæ, Græcine, levandæ

Non est ex toto nulla relicta meæ.

Hæc Dea, cum fugerent sceleratas numina terras,

In Dīs invisâ sola remansit humo. 30

Hæc facit, ut vivat vinctus quoque compede fossor,

Liberaque a ferro crura futura putet.

Hæc facit, ut, videat cum terras undique nullas,

Naufragus in mediis brachia jactet aquis.

Sæpe aliquem sollers medicorum cura reliquit; 35

Nec spes huic venâ deficiente cadit.

Carcere dicuntur clausi sperare salutem:

Atque aliquis pendens in cruce vota facit.

Hæc Dea quam multos laqueo sua colla ligantes

Non est propositâ passa perire nece! 40

Me quoque conantem gladio finire dolorem

Arcuit, injecta continuitque manu.

Quidque facis? lacrimis opus est, non sanguine, dixit:

Sæpe per has flecti Principis ira solet.

Quamvis est igitur meritis indebita nostris, 45

Magna tamen spes est in bonitate Dei.

Qui ne difficilis mihi sit, Græcine, precare;

Confer & in votum tu quoque verba meum.

Inque Tomitana jaceam tumultus arena,

Si te non nobis ista vovere liquet.

50

Nam prius incipiant turres vitare columbæ,

Antra feræ, pecudes gramina, mergus aquas;

Quam male se præstet veteri Græcinus amico.

Non ita sunt fatis omnia versa meis.

## EPISTOLA VII.

MESSALLINO.

**L**ittera pro verbis tibi, Messalline, salutem,  
Quam legis, a sævis attulit usque Getis.

Indicat auctorem locus? an, nisi nomine lecto,

Hæc me Nasonem scribere verba latet?

Ecquis in extremo positus jacet orbe tuorum, 5

Me tamen excepto, qui precor esse tuus?

Dī procul a cunctis, qui te venerantur amantque,

Hujus notitiam gentis abesse velint.

Nos satis est inter glaciem Scythicasque sagittas

Vivere: si vita est mortis habenda genus. 10

Nos premat aut bello tellus, aut frigore cælum:

Truxque Getes armis, grandine pulset hiems:

Nos habeat regio, nec poma fræta, nec uvis;

Et cujus nullum cesset ab hoste latus.

Cetera sit sospes cultorum turba tuorum; 15

In quibus, ut populo, pars ego parva fui.

Me miserum, si tu verbis offenderis istis;

Nosque negas ulla parte fuisse tuos!

Idque sit ut verum, mentito ignoscere debes.

Nil demit laudi gloria nostra tuæ. 20

Quis se Cæsaribus notis non fingit amicum?

Da veniam fasso; tu mihi Cæsar eris.

Nec tamen irrumpo, quò non licet ire: satisque est,

Atriâ si nobis non patuisse negas.

Utque tibi fuerit mecum nihil amplius, uno 25

Nempe salutaris, quam prius, ore minus.

Nec tuus est genitor nos inficiatus amicos,

Hortator studii, caussaque, faxque mei.

Cui nos & lacrimas, supremum in funere munus,

Et dedimus medio scripta canenda foro. 30

Adde quod est frater tanto tibi junctus amore,

Quantus in Atridis Tyndaridisque fuit.

Is me nec comitem, nec dedignatus amicum est:

Si tamen hæc illi non nocitura putas.

Si minus, hac quoque me mendacem parte fatebor. 35

Clausa mihi potius tota sit ista domus.

Sed neque claudenda est; & nulla potentia vires

Præstandi, ne quid peccet amicus, habet.

Et tamen ut cuperem culpam quoque posse negari;

Sic facinus nemo nescit abesse mihi. 40

Quod nisi delicti pars excusabilis esset,

Parva relegari pœna futura fuit.

Ipse sed hoc vidit, qui pervidet omnia, Cæsar,

Stultitiam dici crimina posse mea.

Quâque ego permisi, quâque est res passa, pepercit: 45

Usus & est modice fulminis igne sui.

Nec vitam, nec opes, nec ademit posse reverti:

Si sua per vestras victa sit ira preces.

At graviter cecidi. quid enim mirabile, si quis

A Jove percussus non leve vulnus habet? 50

Ipsæ suas ut jam vires inhiberet Achilles,

Missa graves ictus Pelias hasta tulit.

Judicium nobis igitur cum vindicis adsit,

Non est cur tua me janua nosse neget.

Culta quidem (fateor) citra, quam debuit, illa: 55

Sed fuit in fatis hoc quoque, credo, meis.

Nec tamen officium sensit magis altera nostrum.

Hic, illic, vestro sub Lare semper eram.

Quæque tua est pietas; ut te non excolat ipsum,

Jus aliquod tecum fratris amicus habet. 60

Quid, quod, ut emeritis referenda est gratia semper;

Sic est fortunæ promeruisse tuæ?

Quod si permittis nobis suadere, quid optes:

Ut des, quam reddas, plura, precare Deos.

Idque facis, quantumque licet meminisse, solebas 65

Officii causam pluribus esse dati.

Quo libet in numero me, Messalline, repone:

Sim modo pars vestræ non aliena domûs.

Et mala Nasonem (quoniam meruisse videtur)

Si non ferre doles, at meruisse dole. 70

## EPISTOLA VIII.

S E V E R O .

**A** Tibi dilecto missam Nasone salutem  
 Accipe, pars animæ magna, Severe, meæ.  
 Neve roga, quid agam: si persequar omnia, flebis.  
 Summa satis nostri si tibi nota mali.  
 Vivimus assiduis expertes pacis in armis, 5  
 Dura pharetrato bella movente Getâ.  
 Deque tot expulsis sum miles in exsule solus:  
 Tuta (nec invideo) cetera turba jacet.  
 Quoque magis nostros venia dignere libellos,  
 Hæc in procinctu carmina facta leges. 10  
 Stat vetus urbs, ripæ vicina binominis Istri,  
 Mœnibus & positu vix adeunda loci.  
 Caspius Ægyptos (de se si credimus ipsis)  
 Condidit; & proprio nomine dixit opus.  
 Hanc ferus, Odrysîs inopino Marte peremtis, 15  
 Cepit, & in Regem sustulit arma Getes.  
 Ille memor magni generis, virtute quod augeat,  
 Protinus innumero milite cinctus adest.  
 Nec prius abscessit, merita quam cæde nocentum  
 Se nimis ulciscens exstitit ipse nocens. 20  
 At tibi, Rex ævo, detur, fortissime nostro,  
 Semper honoratâ sceptrâ tenere manu.

Teque, quod & præstat, (quid enim tibi plenius optem?)

Martia cum magno Cæsare Roma probet.

Sed memor unde abii, queror, o jucunde sodalis, 25

Accedant nostris sæva quod arma malis.

Ut careo vobis, Stygias detrusus in oras,

Quatuor autumnos Pleias orta facit.

Nec tu credideris urbanæ commoda vitæ

Quærere Nasonem. quærit & illa tamen. 30

Nam modo vos animo dulces reminiscor amici;

Nunc mihi cum carâ conjuge nata subit:

Eque domo rursus pulchræ loca vertor ad Urbis,

Cunctaque mens oculis pervidet illa suis.

Nunc fora, nunc ædes, nunc marmore tecta theatra, 35

Nunc subit æquatâ porticus omnis humo.

Gramina nunc Campi, pulchros spectantis in hortos,

Stagnaue & Euripi, Virgineusque liquor.

At, puto, sic Urbis misero est erepta voluptas,

Quolibet ut saltem rure frui liceat. 40

Non meus amissos animus desiderat agros,

Ruraue Peligno conspicienda solo:

Nec quos piniferis positos in collibus hortos

Spectat Flaminiae Clodia juncta viæ.

Quos ego nescio cui colui; quibus ipse solebam 45

Ad sata fontanas (nec pudet) addere aquas.

Sunt ibi, si vivunt, nostrâ quoque consita quondam,

Sed non & nostrâ poma legenda manu.

Pro quibus amissis utinam contingere possit

Hic saltem profugo gleba colenda mihi! 50

Ipse ego pendentes (liceat modo) rupe capellas,

Ipse velim baculo pascere nixus oves.

Ipse ego, ne solitis insistant pectora curis,

Ducam ruricolas sub juga panda boves.

Et discam Getici quæ norint verba iuveni: 55

Adsuetas illis adjiciamque minas.

Ipse, manu capulum pressi moderatus aratri,

Experiar motâ spargere semen humo.

Nec dubitem longis purgare ligonibus arva;

Et dare, quas sitiens combibat hortus, aquas. 60

Unde sed hoc nobis, minimum quos inter & hostem

Discrimen murus clausaque porta facit?

At tibi nascenti (quod toto pectore lætor)

Nêrunt fatales fortia fila Deæ.

Te modo Campus habet, densâ modo Porticus umbrâ: 65

Nunc, in quo ponis tempora rara, Forum.

Umbria nunc revocat: nec non Albana petentem

Appia ferventi ducit in arva rotâ.

Forsitan hîc optes, ut justam supprimat iram

Cæsar; & hospitium sit tua villa meum. 70

Ah nimium est, quod, amice, petis! moderatius opta:

Et voti, quæso, contrahe vela tui.

Terra velim propior, nullique obnoxia bello

Detur: erit nostris pars bona demta malis.

## EPISTOLA IX.

M A X I M O .

**Q**UÆ mihi de raptu tua venit epistola Celso,  
 Protinus est lacrimis humida facta meis.  
 Quodque nefas dictu, fieri nec posse putavi,  
 Invitis oculis litera lecta tua est.  
 Nec quidquam ad nostras pervenit acerbius aures,  
 Ut sumus in Ponto; perveniatque precor.  
 Ante meos oculos tamquam præsentis imago  
 Hæret: & extinctum vivere fingit amor.  
 Sæpe refert animus lusus gravitate carentes:  
 Seria cum liquidâ sæpe peracta fide. 10  
 Nulla tamen subeunt mihi tempora densius illis,  
 Quæ vellem vitæ summa fuisse meæ.  
 Cum domus ingenti subito mea lapsa ruinâ  
 Concidit, in domini procubuitque caput.  
 Aduit ille mihi, cum pars me magna reliquit, 15  
 Maxime; Fortunæ nec fuit ipse comes.  
 Illum ego non aliter flentem mea funera vidi,  
 Ponendus quam si frater in igne foret.  
 Hæsit in amplexu, consolatusque jacentem est:  
 Cumque meis lacrimis miscuit usque suas. 20  
 O quoties vitæ custos invisus amaræ  
 Continuit promptas in mea fata manus!



O quoties dixit, Placabilis ira Deorum est.

Vive, nec ignosci tu tibi posse nega.

Vox tamen illa fuit celeberrima, Respice, quantum 25

Debeat auxilii Maximus esse tibi.

Maximus incumbet; quaque est pietate, rogabit,

Ne sit ad extremum Cæsaris ira tenax.

Cumque suis fratris vires adhibebit, & omnem,

Quo levius doleas, experietur opem. 30

Hæc mihi verba malæ minuerunt tædia vitæ.

Quæ tu, ne fuerint, Maxime, vana, cave.

Huc quoque venturum mihi se jurare solebat,

Non nisi te longæ jûs sibi dante viæ.

Nam tua non alio coluit penetralia ritu, 35

Terrarum dominos quam colis ipse Deos.

Crede mihi: multos habeas cum dignus amicos,

Non fuit e multis quolibet ille minor.

Si modo nec census, nec clarum nomen avorum,

Sed probitas magnos ingeniumque facit. 40

Jure igitur Celso lacrimas libamus ademto;

Cum fugerem, vivo quas dedit ille mihi.

Carmina jure damus, raros testantia mœurs;

Ut tua venturi nomina, Celse, legant.

Hoc est, quod possum Geticis tibi mittere ab arvis; 45

Hoc solum est istic, quod liquet esse meum.

Funera nec potui comitare, nec unguere corpus:

Aque tuis toto dividor orbe rogis.

Qui potuit, quem tu pro numine vivus habebas,

Præstitit officium Maximus omne tibi. 50  
 Ille tibi exsequias, & magni funus honoris  
 Fecit; & in gelidos versit amoma sinus.  
 Diluit & lacrimis mœrens unguenta profusis;  
 Ossaque vicinâ condita texit humo.  
 \* Qui quoniam extinctis, quæ debet, præstat amicis, 55  
 Et nos extinctis adnumerare potest.

## EPISTOLA X.

F L A C C O.

**N**aso suo profugus mittit tibi, Flacce, salutem:  
 Mittere rem si quis, qua caret ipse, potest.  
 Longus enim curis vitiatum corpus amaris  
 Non patitur vires languor habere suas.  
 Nec dolor ullus adest, nec febribus uror *anhelis*; 5  
 Et peragit soliti vena tenoris iter.  
 Os hebes est, positæque movent fastidia mensæ:  
 Et queror, invisi cum venit hora cibi.  
 Quod mare, quod tellus, adpone, quod educat aer;  
 Nil ibi, quod nobis esuriatur, erit. 10  
 Nectar & ambrosiam, latices epulasque Deorum,  
 Det mihi formosâ nava Juventa manu;  
 Non tamen exacuet torpens sapor ille palatum:  
 Stabit & in stomacho pondus inerte diu.

Hæc

Hæc ego non ausim, cum sint verissima, cuivis 15  
Scribere; delicias ne mala nostra vocent.

Scilicet is status est, ea rerum forma mearum,  
Deliciis etiam possit ut esse locus?

Delicias illi precor has contingere, si quis,  
Ne mihi sit levior Cæsaris ira, timet. 20

Is quoque, qui gracili cibus est in corpore, somnus,  
Non alit officio corpus inane suo.

Sed vigilo, vigilantque mei sine fine dolores;  
Quorum materiam dat locus ipse mihi.

Vix igitur possis visos agnoscere vultus: 25  
Quoque ierit, quæras, qui fuit ante, color.

Parvus in exiles succus mihi pervenit artus:  
Membraque sunt cerâ pallidiora novâ.

Non hæc immodico contraxi damna Lyæo:  
Scis mihi quam solæ pene bibantur aquæ. 30

Non epulis oneror: quarum si tangar amore,  
Est tamen in Geticis copia nulla locis.

Nec vires adimit Veneris damnosa voluptas:  
Non solet in mæstos illa venire toros.


Unda locusque nocent: & caussa valentior istis, 35  
Anxietas animi, quæ mihi semper adest.

Hanc nisi tu pariter simili cum fratre lebares,  
Vix mens tristitiæ mœsta tulisset onus.

Vos estis fragili tellus non dura phaselo:  
Quamque negant multi, vos mihi fertis opem. 40

Ferte, precor, semper, quia semper egebimus illâ;  
Ovidius T. III. Bb

Cæsaris offensum dum mihi numen erit.  
ui meritam nobis minuat, non finiat iram,  
Suppliciter vestros quisque rogate Deos.





P. OVIDII NASONIS  
**EPISTOLARUM**  
**EX PONTO**  
*L I B E R II.*

---

**EPISTOLA I.**

GERMANICO CÆSARI.

**H**UC quoque Cæsarei pervenit fama triumphī,  
 Languida quo fessi vix venit aura Noti.  
 Nil fore dulce mihi Scythica regione putavi.  
 Jam minus hic odio est, quam fuit ante, locus.  
 Tandem aliquid pulsa curarum nube serenum      5  
 Vidi; Fortunæ verba dedique meæ.  
 Nolit ut ulla mihi contingere gaudia Cæsar,  
 Velle potest cuivis hæc tamen una dari.  
 Dī quoque, ut a cunctis hilari pietate colantur,

Bb 2

- Tristitiam poni per sua festa jubent. 10  
 Denique, quod certus furor est audere fateri,  
 Hac ego lætitiâ, si vetet ipse, fruar.  
 Juppiter utilibus quoties juvat imbribus agros,  
 Mixta tenax segeti crescere lappa solet.  
 Nos quoque frugiferum sentimus inutilis herba 15  
 Numen; & invita sæpe juvamur ope.  
 Gaudia Cæsareæ mentis pro parte virili  
 Sunt mea: privati nil habet illa domus.  
 Gratia, Fama, tibi: per quam spectata triumphi  
 Incluso mediis est mihi pompa Getis. 20  
 Indice te didici, nuper visenda cõisse  
 Innumeras gentes ad Ducis ora sui.  
 Quæque capit vastis immensum mœnibus orbem,  
 Hospitiis Romam vix habuisse locum.  
 Tu mihi narrasti, cum multis lucibus ante 25  
 Fuderit assiduas nubilus Auster aquas,  
 Lumine cœlesti Solem fulsisse serenum,  
 Cum populi vultu conveniente die.  
 Atque ita victorem, cum magno vocis honore,  
 Bellica laudatis dona dedisse viris: 30  
 Claraque sumtutum pictas insignia vestes,  
 Tura prius sanctis imposuisse focis:  
 Justitiamque sui caste placasse Parentis;  
 Illo quæ templum pectore semper habet.  
 Quæque ierit, felix adjectum plausibus omen; 35  
 Saxaque roratis erubuisse rosis.

Protinus argento veros imitantia muros  
 Barbara cum victis oppida lata viris.  
 Fluminaque, & montes, & in altis pascua silvis;  
 Armaque cum telis in strue mixta suis. 40  
 Deque triumphato, quod Sol incenderit, auro  
 Aurea Romani tecta fuisse fori.  
 Totque tulisse duces captivis addita collis  
 Vincula, penę hostes quot satis esse fuit.  
 Maxima pars horum vitam veniamque tulerunt: 45  
 In quibus & belli summa caputque Bato.  
 Cur ego posse negem minui mihi Numinis iram,  
 Cum videam mites hostibus esse Deos?  
 Pertulit huc idem nobis, Germanice, rumor,  
 Oppida sub titulo nominis fuisse tui. 50  
 Atque ea te contra, nec muri mole, nec armis,  
 Nec satis ingenio tuta fuisse loci.  
 Dî tibi dent annos! a te nam cetera sumes;  
 Sint modo virtuti tempora longa tuæ.  
 Quod precor eveniet, sunt quiddam oracula vatum. 55  
 Nam Deus optanti prospera signa dedit.  
 Te quoque victorem Tarpejas scândere in arces  
 Læta coronatis Roma videbit equis.  
 Maturosque Pater nati spectabit honores,  
 Gaudia percipiens, quæ dedit ipse suis. 60  
 Jam nunc hæc a me, juvenum belloque togaque  
 Maxime, dicta tibi vaticinante nota.  
 Hunc quoque carminibus referam fortasse triumphum;

Sufficiet nostris si modo vita malis.  
 Imbuero Scythicas si non prius ipse sagittas; 63  
 Abstuleritque ferox hoc caput ense Getes.  
 Quod si, me salvo, dabitur tibi laurea templis,  
 Omina bis dices vera fuisse mea.

## EPISTOLA II.

MESSALLINO.

**I**Lle domus vestræ primis venerator ab annis  
 Pulsus ad Euxini Naso sinistra freti;  
 Mittit ab indomitis hanc, Messalline, salutem,  
 Quam solitus præsens est tibi ferre, Getis.  
 Hei mihi, si lecto vultus tibi nomine non est, 3  
 Qui fuit, & dubitas cetera perlegere!  
 Perlege, nec mecum pariter mea verba relega:  
 Urbe licet vestra versibus esse meis.  
 Non ego concepi, si Pelion Ossa tulisset,  
 Clara meâ tangi sidera posse manu. 10  
 Nec nos, Enceladi dementia castra secuti,  
 In rerum dominos movimus arma Deos.  
 Nec, quod Tydidæ temeraria dextera fecit,  
 Numina sunt telis ulla petita meis.  
 Est mea culpa gravis, sed quæ me perdere solum 15  
 Ausa sit, & nullum majus adorta nefas.



Nil, nisi non sapiens possum timidusque vocari:

Hæc duo sunt animi nomina vera mei.

Esse quidem fateor, meritam post Cæsaris iram,

Difficilem precibus te quoque jure meis. 20

Quæque tua est pietas in totum nomen Iuli,

Te lædi, cum quis læditur inde, putas.

Sed licet arma feras, & vulnera sæva mineris;

Non tamen efficies, ut timeare mihi.

Puppis Achæmeniden Grajum Trojana recepit: 25

Profuit & Myso Peliæ hasta duci.

Confugit interdum templi violator ad aram,

Nec petere offensi numinis horret opem.

Dixerit hoc aliquis tutum non esse; fatemur.

Sed non per placidas it mea puppis aquas. 30

Tuta petant alii. Fortuna miserrima tuta est:

Nam timor eventus deterioris abest.

(Qui rapitur fati, quid præter fata requirat?

Sæpe creat molles aspera spina rosas.)

Qui rapitur spumante salo, sua brachia cauti 35

Porrigit, & spinas duraque saxa capit.

Accipitrem metuens pennis trepidantibus ales

Audet ad humanos fessa venire sinus.

Nec se vicino dubitat committere tecto,

Quæ fugit infestos territa cerva canes. 40

Da, precor, accessum lacrimis, mitissime, nostris;

Nec timidis rigidam vocibus obde forem.

Verbaque nostra favens Romana ad Numina perfer,

Non tibi Tarpejo culta Tonante minus.  
Mandatque mei legatus suscipe caussam: 45  
Nulla meo quamvis nomine causa bona est.  
Jam prope depositus, certe jam frigidus, ægre  
Servatus per te, si modo servor, ero.  
Nunc tua pro lapsis nitatur gratia rebus;  
Principis æterni quam tibi præstat amor. 50  
Nunc tibi & eloquii nitor ille domesticus adsit,  
Quo poteras trepidis utilis esse reis.  
Vivit enim in vobis facundi lingua parentis;  
Et res heredem reperit illa suum.  
Hanc ego non, ut me defendere tentet, adoro; 55  
Non est confessi causa tuenda rei.  
Num tamen excuses erroris imagine factum,  
An nihil expediat tale movere, vide.  
Vulneris id genus est, quod cum sanabile non sit,  
Non contrectari tutius esse putem. 60  
Lingua, sile: non est ultra narrabile quidquam.  
Posse velim cineres obruere ipse meos.  
Sic igitur, quasi me nullus deceperit error,  
Verba face, ut vita, quam dedit ipse, fruam.  
Cumque serenus erit, vultusque remiserit illos, 65  
Qui secum terras imperiumque movent;  
Exiguam ne me prædam sinat esse Getarum,  
Detque solum miseræ mite, precare, fugæ.  
Tempus adest aptum precibus. valet ipse, videtque  
Quas fecit vires, Roma, valere tuas. 70

Incolumis conjux sua pulvinaria servat:  
 Promovet Ausonium filius imperium.  
 Præterit ipse suos animo Germanicus annos,  
 Nec vigor est Drusi nobilitate minor.  
 Adde nurus, neptesque pias, natosque nepotum, 75  
 Ceteraque Augustæ membra valere domûs:  
 Adde triumphatos modo Pæonas, adde quieti  
 Subdita montanæ brachia Dalmatiæ.  
 Nec dedignata est abjectis Illyris armis  
 Cæsareum famulo vertice ferre pedem. 80  
 Ipse super currum placido spectabilis ore  
 Tempora Phœbeâ virgine nexa tulit.  
 Quem pia vobiscum proles comitavit euntem,  
 Digna parente suo, nominibusque datis.  
 Fratribus adsimilis, quos proxima templa tenentes 85  
 Divus ab excelsa Julius æde videt.  
 His Messallinus, quibus omnia cedere debent,  
 Primum lætitiæ non negat esse locum.  
 Quidquid ab his superest, venit in certamen amoris:  
 Hac hominum nulli parte secundus eris. 90  
 Hunc colis, ante diem per quem decreta merenti  
 Venit honoratis laurea digna comis.  
 Felices, quibus hos licuit spectare triumphos,  
 Et Ducis ore Deos æquiparante frui.  
 At mihi Sauromatæ pro Cæsaris ore videndi, 95  
 Terraque pacis inops, undaque vincta gelu.  
 Si tamen hæc audis, & vox mea pervenit istuc;

Sit tua mutando gratia blanda loco.  
 Hoc pater ille tuus, primo mihi cultus ab ævo,  
 Si quid habet sensus umbra diserta, petit. 100  
 Hoc petit & frater: quamvis fortasse veretur,  
 Servandi noceat ne tibi cura mei.  
 Tota domus petit hoc. nec tu potes ipse negare,  
 Et nos in turbæ parte fuisse tuæ.  
 Ingenii certe, quo nos male sensimus usos, 105  
 Artibus exceptis, sæpe probator eras.  
 Nec mea, si tantum peccata novissima demas,  
 Esse potest domui vita pudenda tuæ.  
 Sic igitur vestræ vigeant penetralia gentis;  
 Curaque sit Superis Cæsaribusque tui. 110  
 Mite, sed iratum merito mihi Numen, adora;  
 Eximat ut Scythici me feritate loci.  
 Difficile est, fateor, sed tendit in ardua virtus:  
 Et talis meriti gratia major erit.  
 Nec tamen Ætnæus vasto Polyphemus in antro 115  
 Accipiet voces Antiphatesve tuas:  
 Sed placidus facilisque Parens, veniæque paratus;  
 Et qui fulmineo sæpe sine igne tonat.  
 Qui, cum triste aliquid statuit, fit tristis & ipse:  
 Cuique fere pœnam sumere pœna sua est. 120  
 Victa tamen vitio est hujus clementia nostro:  
 Venit & ad vires ira coacta suas.  
 Qui quoniam patria toto sumus orbe remoti,  
 Nec licet ante ipsos procubuisse Deos;

Quos colis, ad Superos hæc fer mandata sacerdos: 125

Adde sed & proprias in mea verba preces.

Sic tamen hæc tenta, si non nocitura putabis.

Ignoscas: timeo naufragus omne fretum.

## EPISTOLA III.

M A X I M O.

**M**Axime, qui claris nomen virtutibus æquas,  
Nec sinis ingenium nobilitate premi;

Culte mihi (quid enim status hic a funere differt?)

Supremum vitæ tempus adusque meæ:

Rem facis, afflictum non aversatus amicum, 5

Qua non est ævo rarior ulla tuo.

Turpe quidem dictu, sed (si modo vera fatemur)

Vulgus amicitias utilitate probat.

Cura quid expediat prius est, quam quid sit honestum:

Et cum Fortuna statque caditque fides. 10

Nec facile invenias multis in millibus unum,

Virtutem pretium qui putet esse sui.

Ipse decor, recte facti si præmia desint,

Non movet, & gratis pœnitet esse probum.

Nil, nisi quod prodest, carum est. i, detrahe menti 15

Spem fructus avidæ, nemo petendus erit.

At peditus jam quisque suos amat, & sibi quid sit

Utile, sollicitis supputat articulis.  
Illud Amicitiae quondam venerabile numen  
Prostat, & in quaestu pro meretrice sedet. 20  
Quo magis admiror, non, ut torrentibus undis,  
Communis vitii te quoque labe trahi.  
Diligitur nemo, nisi cui Fortuna secunda est.  
Quæ, simul intonuit, proxima quæque fugat.  
En ego, non paucis quondam munitus amicis, 25  
Dum flavit velis aura secunda meis;  
Ut fera nimbose tumuerunt æquora vento,  
In mediis lacera puppe relinquor aquis.  
Cumque alii nolint etiam me nosse videri,  
Vix duo projecto tresve tulistis opem. 30  
Quorum tu princeps: nec enim comes esse, sed auctor,  
Nec petere exemplum, sed dare dignus eras.  
Te, nihil ex aëto, nisi non peccasse ferentem  
Sponte sua probitas officiumque juvant.  
Iudice te mercede caret, per seque petenda est 35  
Externis virtus incommutata bonis.  
Turpe putas abigi, quia sit miserandus, amicum;  
Quodque sit infelix, desinere esse tuum.  
Mitius est lasso digitum supponere mento,  
Mergere quam liquidis ora natantis aquis. 40  
Cerne, quid Æacides post mortem præstet amico:  
Instar & hanc vitam mortis habere puta.  
Pirithoum Theseus Stygias comitavit ad undas:  
A Stygiis quantum sors mea distat aquis!

Aduit insano juvenis Phocæus Orestæ: 45

Et mea non minimum culpa furoris habet.

Tu quoque magnorum laudes admitte virorum;

Utque facis, lapso, quam potes, adfer opem.

Si bene te novi; si, quod prius esse solebas,

Nunc quoque es, atque animi non cecidere tui. 50

Quo Fortuna magis sævit, magis ipse resistis:

Utque decet, ne te vicerit illa, caves.

Et bene uti puges, bene pugnans efficit hostis.

Sic eadem prodest caussa, nocetque mihi.

Scilicet indignum, juvenis rarissime, ducis 55

Te fieri comitem stantis in orbe Deæ.

Firmus es; &, quoniam non sunt ea, qualia velles,

Vela regis quassæ qualiacumque ratis.

Quæque ita concussa est, ut jam casura putetur,

Restat adhuc humeris fulta ruina tuis. 60

Ira quidem primo fuerat tua justa, nec ipso

Lenior, offensus qui mihi jure fuit.

Quique dolor pectus tetigisset Cæsaris alti,

Illum jurabas protinus esse tuum.

Ut tamen audita est nostræ tibi cladis origo; 65

Diceris erratis ingemuisse meis.

Tum tua me primum solari litera cœpit;

Et læsum flecti spem dare posse Deum.

Movit amicitiae tum te constantia longæ;

Ante tuos ortus quæ mihi cœpta fuit. 70

Et quod eras aliis factus, mihi natus amicus:

Quodque tibi in cunis oscula prima dedi.  
Quod, cum vestra domus teneris mihi semper ab annis  
Culta sit, esse vetus nunc tibi cogor onus.  
Me tuus ille pater, Latiae facundia linguae, 75  
Quæ non inferior nobilitate fuit,  
Primus, ut auderem committere carmina Famæ  
Impulit. ingenii dux fuit ille mei.  
Nec, quo sit primum nobis a tempore cultus,  
Contendo fratrem posse referre tuum. 80  
Te tamen ante omnes ita sum complexus, ut unus  
Quolibet in casu gratia nostra fores.  
Ultima me tecum vidit, mæstisque cadentes  
Excepit lacrimas Italis ora genis.  
Cum tibi quærenti, num verus nuntius esset, 85  
Attulerat culpæ quem mala fama meæ;  
Inter confessum dubie, dubieque negantem,  
Hærebam, pavidas dante timore notas:  
Exemploque nivis, quam solvit aquaticus Auster,  
Gutta per attonitas ibat oborta genas. 90  
Hæc igitur referens, & quod mea crimina primi  
Erroris venia posse latere vides;  
Respicias antiquum lapsis in rebus amicum;  
Fomentisque juvas vulnera nostra tuis.  
Pro quibus optandi si nobis copia fiat, 95  
Tam bene promerito commoda mille precer.  
Sed si sola mihi dentur tua vota; precabor,  
Ut tibi sit salvo Cæsare salva parens.



Hæc ego, cum faceres altaria pingua ture,  
Te solitum memini prima rogare Deos. 100

## EPISTOLA IV.

A T T I C O.

**A**ccipe colloquium gelido Nasonis ab Istro,  
Attice, judicio non dubitande meo.  
Ecquid adhuc remanes memor infelicis amici?  
Deserit an partes languida cura suas?  
Non ita Dî tristes mihi sunt, ut credere possim, 5  
Fasque putem jam te non meminisse mei.  
Ante meos oculos tua stat, tua semper imago est:  
Et videor vultus mente videre tuos.  
Seria multa mihi tecum collata recordor:  
Nec data jucundis tempora pauca jocis. 10  
Sæpe citæ longis visæ sermonibus horæ:  
Sæpe fuit brevior quam mea verba, dies.  
Sæpe tuas factum venit modo carmen ad aures;  
Et nova judicio subdita Musa tuo est.  
Quod tu laudaras, populo placuisse putabam: 15  
Hoc pretium curæ dulce recentis erat.  
Utque meus lima rarus liber esset amici,  
Non semel admonitu facta litura tuo est.  
Nos fora viderunt pariter, nos porticus omnis,

Nos via, nos junctis curva theatra locis. 20  
 Denique tantus amor nobis, carissime, semper,  
 Quantum in Æacidis Astoridisque fuit.  
 Non ego, securæ biberes si pocula Lethes,  
 Excidere hæc credam pectore posse tuo.  
 Longa dies citius brumali sidere, noxque 25  
 Tardior hibernâ solstitialis erit.  
 Nec Babylon æstum, nec frigora Pontus habebit,  
 Calthaque Pæstanas vincet odore rosas;  
 Quam tibi nostrarum veniant oblivia rerum.  
 Non ita pars fati candida nulla mei. 30  
 Ne tamen hæc dici possit fiducia mendax,  
 Stultaque credulitas nostra fuisse, cave;  
 Constantique fide veterem tutare sodalem,  
 Quâ licet, & quantum non onerosus ero.

---

## EPISTOLA V.

### SALANO.

**C**ondita disparibus numeris ego Naso Salanø  
 Præposita misi verba salute meo.  
 Quæ rata sit cupio, rebusque ut comprobet omen,  
 Te precor a salvo possit, amice, legi.  
 Candor, in hoc ævo res intermortua pene, 5  
 Exigit, ut faciam talia vota, tuus.

Nam

Nam fuerim quamvis modico tibi cognitus usu,  
 Diceris exsiliis ingemuisse meis.  
 Missaque ab extremo legeres cum carmina Ponto,  
 Illa tuus jovit qualiacumque favor. 10  
 Optastique brevem salvi mihi Cæsaris iram;  
 Quod tamen optari, si sciat, ipse sinat.  
 Moribus ista tuis tam mitia vota dedisti:  
 Nec minus idcirco sunt ea grata mihi.  
 Quoque magis moveare malis, doctissime, nostris, 15  
 Credibile est fieri conditione loci.  
 Vix hac invenias totum (mihi crede) per orbem,  
 Quæ minus Augustâ Pace fruatur, humum.  
 Tu tamen hîc structos inter fera prœlia versus  
 Et legis, & lectos ore favente probas. 20  
 Ingenioque meo, vena quod paupere manat,  
 Plaudis; & e rivo flumina magna facis.  
 Grata quidem sunt hæc animo suffragia nostro;  
 Vix sibi cum miseros posse placere putes.  
 Dum tamen in rebus tentamus carmina parvis, 25  
 Materix gracili sufficit ingenium.  
 Nuper, ut huc magni pervenit Fama triumphî,  
 Ausus sum tantæ sumere molis opus.  
 Obruit audentem rerum gravitasque nitorque:  
 Nec potui cœpti pondera ferre mei. 30  
 Illic, quam laudes, erit officiosa voluntas;  
 Cetera materiâ debilitata jacent.  
 Quod si forte liber vestras pervenit ad aures,  
 Ovidius T. III. Cc

Tutelam, mando, sentiat ille tuam.  
 Hoc tibi facturo, vel si non ipse rogarem, 35  
 Accedat cumulus gratia nostra levis.  
 Non ego laudandus, sed sunt tua pectora, lacte,  
 Et non calcata candidiora nive.  
 Mirarisque alios, cum sis mirabilis ipse;  
 Nec lateant artes, eloquiumque tuum. 40  
 Te juvenum Princeps, cui dat Germania nomen,  
 Participem studii Cæsar habere solet.  
 Tu comes antiquus, tu primis junctus ab annis,  
 Ingenio mores æquiparante, places.  
 Te dicente prius fit protinus impetus illi: 45  
 Teque habet, elicias qui sua verba tuis.  
 Cum tu desisti, mortaliaque ora quierunt,  
 Clausaque non longa conticuere morâ;  
 Surgit Iuleo juvenis cognomine dignus,  
 Qualis ab Eois Lucifer exit aquis. 50  
 Dumque silens adstat, status est vultusque disertus,  
 Spemque decens doctæ vocis amictus habet.  
 Mox, ubi pulsa mora est, atque os cœleste solutum,  
 Hoc Superos jures more solere loqui.  
 Atque, Hæc est, dicas, facundia Principe digna: 55  
 Eloquio tantum nobilitatis inest.  
 Huic tu cum placeas, & vertice sidera tangas,  
 Scripta tamen profugi vatis habenda putas.  
 Scilicet ingeniis aliqua est concordia junctis,  
 Et servat studii fœdera quisque sui. 60

Rusticus agricolam, miles fera bella gerentem,  
 Rectorem dubiæ navita puppis amat.  
 Tu quoque Pieridum studio, studiose, teneris;  
 Ingenioque faves, ingeniose, meo.  
 Distat opus nostrum; sed fontibus exit ab isdem: 65  
 Artis & ingenuæ cultor uterque sumus:  
 Thyrsus enim vobis, gestata est laurea nobis;  
 Sed tamen ambobus debet inesse calor.  
 Utque meis numeris tua dat facundia nervos,  
 Sic venit a nobis in tua verba nitor. 70  
 Jure igitur studio confinia carmina vestro,  
 Et commilitii sacra tuenda putas.  
 Pro quibus ut maneât, de quo censeris, amicus,  
 Comprecor ad vitæ tempora summa tuæ.  
 Succedatque tuis orbis moderator habenis. 75  
 Quod mecum populi vota precantur idem.

---

## EPISTOLA VI.

GRÆCINUS.

**C**Armine Græcinum, qui præsens voce solebat,  
 Tristis ab Euxinis Naso salutatur aquis.  
 Exulis hæc vox est. præstat mihi litera linguam:  
 Et, si non liceat scribere, mutus ero.  
 Corripis, ut debes, stulti peccata sodalis: 5

Et mala me meritis ferre minora dōces.  
Vera facis, sed sera, meæ convicia culpæ.

Aspera confesso verba remitte reo.  
Cum poteram recto transire Ceraunia velo,  
Ut fera vitarem saxa, monendus eram: 10  
Nunc mihi naufragio quid prodest discere factō,

Quam mea debuerit currere cymba viam?  
Brachia da lasso potius prendenda natanti:

Nec pigeat mento supposuisse manum:  
Idque facis, faciasque precor. sic mater & uxor, 15

Sic tibi sint fratres, totaque salva domus:  
Quodque soles animo, quod semper voce precari,  
Omnia Cæsaribus sic tuâ facta probes.

Turpe erit in miseris veteri tibi rebus amico  
Auxilium nulla parte tulisse tuum: 20

Turpe referre pedem, nec passu stare tenaci:  
Turpe laborantem deseruisse ratem:

Turpe sequi casum, & fortunæ cedere, amicum  
Et, nisi sit felix, esse negare suum.

Non ita vixerunt Strophio atque Agamemnone nati: 25  
Non hæc Ægidæ Pirithoiue fides.

Quos prior est mirata, sequens mirabitur ætas:  
In quorum plausus tota theatra sonant.

Tu quoque, per durum servato tempus amico,  
Dignus es in tantis nomen habere viris: 30

Dignus es: &, quoniam laudem pietate merearis,  
Non erit officii gratia surda tui.

Crede mihi, (nostrum si non mortale futurum  
 Carmen) in ore frequens posteritatis eris.  
 Fac modo permaneas lapsa, Græcine, fidelis; 35  
 Duret & in longas impetus iste moras.  
 Quæ tu cum præstes, remo tamen utor in aura.  
 Nil nocet admisso subdere calcar equo.

---

## E P I S T O L A VII.

A T T I C O.

**E**sse salutatum vult te mea litera primum  
 A male pacatis, Attice, missa Getis.  
 Proxima subsequitur, quid agas, audire voluptas;  
 Et si, quidquid agas, sit tibi cura mei.  
 Nec dubito quin sit: sed me timor ipse malorum 5  
 Sæpe supervacuus cogit habere metus.  
 Da veniam, quæso, nimioque ignosce timori.  
 Tranquillas etiam naufragus horret aquas.  
 Qui semel est læsus fallaci piscis ab hamo,  
 Omnibus unca cibus æra subesse putat. 10  
 Sæpe canem longe visum fugit agna, lupumque  
 Credit, & ipsa suam nescia vitat opem.  
 Membra reformidant mollem quoque saucia tactum:  
 Vanaque sollicitis incutit umbra metum.  
 Sic ego Fortunæ telis confixus iniquis, 15

Pectore concipio nil nisi triste meo.

Jam mihi fata liquet, cœptos servantia cursus,

Per sibi consuetas semper itura vias.

Observare Deos, ne quid mihi cedat amice,

Verbaque Fortunæ vix puto posse dari. 20

Est illi curæ me perdere; quæque solebat

Esse levis, constans & bene certa nocet.

Crede mihi, si sum veri tibi cognitus oris,

Nec fraus in nostris casibus esse potest;

Cinyphiæ segetis citius numerabis aristas, 25

Altaque quam multis floreat Hybla thymis:

Et quot aves motis nitantur in aera pennis;

Quotque natent pisces æquore, certus eris:

Quam tibi nostrorum statuatur summa laborum,

Quos ego sum terra, quos ego passus aqua. 30

Nulla Getis toto gens est truculentior orbe:

Sed tamen hi nostris ingemuere malis.

Quæ tibi si memori coner perscribere versu,

Ilias est fatis longa futura meis.

Non igitur vereor, quod te rear esse verendum, 35

Cujus amor nobis pignora mille dedit:

Sed quia res timida est omnis miser; & quia longo

Tempore lætitiæ janna clausa meæ est.

Jam dolor in morem venit meus: utque caducis

Percussu crebro saxa cavantur aquis; 40

Sic ego continuo Fortunæ vulneror ictu:

Vixque habet in nobis jam nova plaga locum.



Nec magis assiduo vomer tenuatur ab usu,

Nec magis est curvis Appia trita rotis;

Pectora quam mea sunt serie cæcata laborum: 45

Et nihil inveni, quod mihi ferret opem.

Artibus ingenuis quæsitæ est gloria multis:

Infelix perii dotibus ipse meis.

Vita prior vicio caret, & sine labe peracta:

Auxilii misero nil tulit illa mihi. 50

Culpa gravis precibus donatur sæpe suorum:

Omnis pro nobis gratia muta fuit.

Adjuvat in duris alios præsentia rebus:

Obruit hoc absens vasta procella caput.

Quæ non horruerint tacitam quoque Cæsaris iram? 55

Addita sunt pœnis aspera verba meis.

Fit fuga temporibus levior: projectus in æquor.

Arcturum subii Pleiadumque minas.

Sæpe solent hiemem placidam sentire carinæ:

Non Ithacæ puppi sævior unda fuit. 60

Recta fides comitum poterat mala tanta levare:

Ditata est spoliis perfida turba meis.

Mitius exsilium faciunt loca: tristior ista

Terra sub ambobus non jacet ulla polis.

Est aliquid patriis vicinum finibus esse: 65

Ultima me tellus, ultimus orbis habet.

Præstat & exsilibus pacem tua laurea, Cæsar:

Pontica finitimo terra sub hoste jacet.

Tempus in agrorum cultu consumere dulce est:

Non patitur verti barbarus hostis humum. 70  
 Temperie cœli corpusque animusque juvantur;  
 Frigore perpetuo Sarmatis ora riget.  
 Est in aqua dulci non invidiosa voluptas:  
 Æquoreo bibitur cum sale mixta palus.  
 Omnia deficiunt: animus tamen omnia vincit. 75  
 Ille etiam vires corpus habere facit.  
 Sustineas ut onus, nitendum vertice pleno est;  
 At flecti nervos si patiare, cadet.  
 Spes quoque, posse morâ mitescere Principis iram,  
 Vivere ne nolim deficiamque, cavet. 80  
 Nec vos parva datis pauci solatia nobis,  
 Quorum spectata est per mala nostra fides.  
 Cœpta tene, quæso; nec in æquore desere navem:  
 Meque simul serva, iudiciumque tuum.

---

## EPISTOLA VIII.

MAXIMO COTTÆ.

**R**editus est nobis Cæsar cum Cæsare nuper,  
 Quos mihi misisti, Maxime Cotta, Deos.  
 Utque suum munus numerum, quem debet, haberet,  
 Est ibi Cæsaribus Livia iuncta suis.  
 Argentum felix, omnique beatius auro, 3  
 Quod, fuerat pretium cum rude, numen erit.

Non mihi divitias dando majora dedisses,  
 Cœlitibus missis nostra sub ora tribus.

Est aliquid spectare Deos, & adesse putare;  
 Et quâsi cum vero numine posse loqui.

Præmia quanta, Dei! nec me tenet ultima tellus:  
 Utque prius, media sospes in Urbe moror.

Cæsareos. video vultus, velut ante videbam:  
 Vix hujus voti spes fuit ulla mihi.

Utque salutabam, numen cœleste saluto.  
 Quod reduci tribuas, nil (puto) majus habes.

Quid nostris oculis, nisi sola Palatia desunt?  
 Qui locus, ablato Cæsare, vilis erit.

Hunc ego cum spectem, videor mihi cernere Romam.  
 Nam patriæ faciem sustinet ille suæ.

Fallor? an irati mihi sunt in imagine vultus;  
 Torvaque nescio quid forma minantis habet?

Parce, vir immenso major virtutibus orbe,  
 Justaque vindictæ supprime lora tuæ.

Parce, precor, secli decus indelebile nostri;  
 Terrarum dominum quem sua cura facit.

Per patriæ nomen, quæ te tibi carior ipso est;  
 Per numquam surdos in tua vota Deos;

Perque tori sociam, quæ par tibi sola reperta est,  
 Et cui majestas non onerosa tua est;

Perque tibi similem virtutis imagine Natum,  
 Moribus agnosci qui tuus esse potest;

Perque tuos, vel avo, vel dignos patre nepotes,

Qui veniunt magno per tua vota gradu;  
Parte leves minimâ, nostras & contrahe pœnas; 35

Daque, procul Scythico qui sit ab hoste, locum.  
Et tua, (si fas est) a Cæsare proxime Cæsar,  
Numina sint precibus non inimica meis.

Sic fera quamprimum pavidò Germania vultu

Ante triumphantes serva feratur equos. 40

Sic pater in Pyllos, Cumæos mater in annos

Vivant; & possis filius esse diu.

Tu quoque, conveniens ingenti Nupta marito,

Accipe non durâ supplicis aure preces.

Sic tibi vir sospes, sic sint cum prole nepotes, 45

Cumque bonis nuribus quas peperere nurus.

Sic, quem dira tibi rapuit Germania, Drusus

Pars fuerit partûs sola caduca tui.

Sic tibi, marte suo fraterni funeris ultor,

Purpureus niveis filius instet equis. 50

Adnuite ô timidis, mitissima numina, votis.

Præsentes aliquid prorsit habere Deos.

Cæsaris adventu tota gladiator arena

Exit; & auxilium non leve vultus habet.

Nos quoque vestra juvet quod, quâ licet, ora videmus; 55

Intrata est Superis quod domus una tribus.

Felices illi, qui non simulacra, sed ipsos,

Quique Deûm coram corpora vera vident:

Quod quoniam nobis invidit inutile fatum;

Quos dedit ars votis, effigiemque colo. 60

Sic homines novere Deos, quos arduus æther  
 Occulit: & colitur pro Jove forma Jovis.  
 Denique, quæ mecum est, & erit sine fine, cavete,  
 Ne sit in invisio vestra figura loco.  
 Nam caput e nostra citius cervice recedet, 65  
 Et patiar fossis lumen abire genis;  
 Quam caream raptis, o publica numina, vobis.  
 Vos eritis nostræ portus & ara fugæ.  
 Vos ego complectar, Geticis si cingar ab armis:  
 Vosque meas Aquilas, vos mea signa sequar. 70  
 Aut ego me fallo, nimiaque cupidine ludor:  
 Aut spes exiliî commodioris adest.  
 Nam minus & minus est facies in imagine tristis;  
 Visaque sunt dictis adnuere ora meis.  
 Vera precor fiant timidæ præsentia mentis: 75  
 Justaque quamvis est, sit minor ira Dei.

---

## EPISTOLA IX.

COTYI REGI.

**R**egia progenies, cui nobilitatis origo  
 Nomen in Eumolpi pervenit usque, Coty,  
 Fama loquax vestras si jam pervenit ad aures,  
 Me tibi finitimi parte jacere soli;  
 Supplicis exaudi, juvenum mitissime, vocem: 5

Quamque potes profugo (nam potes) adfer opem.  
Me Fortuna tibi (de qua ne conquerar, hoc est)

Tradidit; hoc uno non inimica mihi.

Excipe naufragium non duro litore nostrum,

Ne fuerit terrâ tutior unda tuâ. 10

Regia (crede mihi) res est, succurrere lapsis:

Convenit & tanto, quantus es ipse, viro.

Fortunam decet hoc istam: quæ maxima cum sit,

Esse potest animo vix tamen æqua tuo.

Conspicitur numquam meliore potentia caussâ, 15

Quam quoties vanas non sinit esse preces.

Hoc nitor ille tui generis desiderat: hoc est

A Superis ortæ nobilitatis opus.

Hoc tibi & Eumolpus, generis clarissimus auctor,

Et prior Eumolpo suadet Erichthonius. 20

Hoc tecum commune Deo: quod uterque rogati

Supplicibus vestris ferre soletis opem.

Nam quid erit, solito quare dignemur honore

Numina, si demas velle juvare Deos?

Juppiter oranti surdas si præbeat aures, 25

Victima pro templo cur cadat icta Jovis?

Si pacem nullam pontus mihi præstet eunti,

Irrita Neptuno cur ego tura feram?

Vana laborantis si fallat vota coloni,

Accipiat gravidæ cur suis exta Ceres? 30

Nec dabit intonso jugulum caper hostia Baccho,

Musta sub adducto si pede nulla fluant.

Cæsar ut imperii moderetur frena precamur, J

Tam bene quo patriæ consulit ille suæ.

Utilitas igitur magnos hominesque Deosque 35

Efficit; auxiliis quoque favente suis.

Tu quoque fac prosis intra tua castra jacenti,

O Coty, progenies digna parente tuo.

Conveniens homini est, hominem servare, voluptas:

Et melius nullâ quæritur arte favor. 40

Quis non Antiphaten Læstrygona devovet? aut quis

Munifici mores improbat Alcinoi?

Non tibi Cassandreus pater est, gentisque Phæac;

Quive repertorem torruit arte suâ:

Sed quam Marte ferox, & vinci nescius armis, 45

Tam numquam facta pace cruoris amans.

Adde, quod ingenuas didicisse fideliter artes,

Emollit mores, nec sinit esse feros.

Nec Regum quisquam magis est instructus ab illis,

Mitibus aut studiis tempora plura dedit. 50

Carmina testantur; quæ, si tua nomina demas,

Threicium juvenem composuisse negem.

Neve sub hoc tractu vates foret unicus Orpheus,

Bistonis ingenio terra superba tuo est.

Utque tibi est animus, cum res ita postulat, arma 55

Sumere, & hostili tingere cæde manum;

Atque, ut es, excusso jaculum torquere lacerto,

Collaque velocis flectere doctus equi;

Tempora sic data sunt studiis ubi justa paternis,

Utque suis humeris forte quievit opus; 60  
Ne tua marcescant per inertes otia somnos,  
Lucida Pieriâ tendis in astra viâ.  
Hæc quoque res aliquid tecum mihi fœderis adfert:  
Ejusdem sacri cultor uterque sumus.  
Ad vatem vates orantia brachia tendo, 65  
Terra sit exiliis ut tua fida meis.  
Non ego cæde nocens in Pontica litora veni;  
Mixtæ sunt nostrâ dira venena manu:  
Nec mea subjectâ convicta est gemma tabellâ  
Mendacem linis imposuisse notam. 70  
Nec quidquam, quod lege veter committere, feci.  
Et tamen his gravior noxa fatenda mihi est.  
Neve roges quid sit; stultam conscripsimus Artem;  
Innocuas nobis hæc vetat esse manus.  
Ecquid præterea peccarim, quærere noli: 75  
Ut lateat solâ culpa sub Arte mea.  
Quidquid id est, habui moderatam vindicis iram:  
Qui nisi natalem nil mihi demsit humum.  
Hac quoniam careo; tua nunc vicinia præstet,  
Inviso possim tutus ut esse loco. 80



## EPISTOLA X.

M A C R O.

**E**Cquid ab impressæ cognoscis imagine gemmæ  
Hæc tibi Nasonem scribere verba, Mâcer?  
Auctorisque sui si non est annulus index,  
Cognitane est nostrâ litera facta manu?  
An tibi notitiam mora temporis eripit horum,  
Nec repetunt oculi signa vetusta tui?  
Sis licet oblitus pariter gemmæque manusque,  
Exciderit tantum ne tibi cura mei?  
Quam tu vel longi debes conviciibus ævi,  
Vel mea quod conjux non aliena tibi;  
Vel studiis, quibus es, quam nos, sapientius usus;  
Utque decet, nulla factus es Arte nocens.  
Tu canis æterno quidquid restabat Homero,  
Ne careant summâ Troica bella manu.  
Naso parum prudens; Artem dum tradit amandî,  
Doctrinæ pretium triste magister habet.  
Sunt tamen inter se communia sacra poetis;  
Diversum quamvis quisque sequamur iter.  
Quorum te memorem (quamquam procul absumus) esse  
Suspikor, & casus velle levare meos.  
Te duce, magnificas Asiæ perspeximus urbes:  
Trinacris est oculis te duce nota meis.

Vidimus Ætnæa cœlum splendescere flamma,  
 Suppositus monti quam vomit ore gîgas:  
 Hennæosque lacus, & olentia stagna Palici, 25  
 Quâque suis Cyanên miscet Anapus aquis.  
 Nec procul hinc Nymphen, quæ, dum fugit Elidis amnem,  
 Tecta sub æquoreâ nunc quoque currit aquâ.  
 Hîc mihi labentis pars anni magna peracta est.  
 Eheu, quam dispar est locus ille Getis! 30  
 Et quota pars hæc sunt rerum, quas vidimus ambo,  
 Te mihi jucundas efficiente vias!  
 Seu rate cæruleas picta sulcavimus undas:  
 Esseda nos agili sive tulere rotâ.  
 Sæpe brevis nobis vicibus via visa loquendi; 35  
 Pluraque, si numeres, verba fuere gradu.  
 Sæpe dies sermone minor fuit; inque loquendum  
 Tarda per æstivos defuit hora dies.  
 Est aliquid, casus pariter timuisse marinos;  
 Junctaque ad æquoreos vota tulisse Deos: 40  
 Et modo res egisse simul; modo rursus ab illis,  
 Quorum non pudeat, posse referre jocos.  
 Hæc tibi si subeant, (absim licet) omnibus horis  
 Ante tuos oculos, ut modo visus, ero.  
 Ipse quidem extremi cum sim sub cardine mundi, 45  
 Qui semper liquidis altior exstat aquis;  
 Te tamen intueor, quo solo pectore possum:  
 Et tecum gelido sæpe sub axe loquor.  
 Hîc es, & ignoras: & ades celeberrimus absens:  
 Inque

Inque Getas media visus ab Urbe venis. 30  
 Redde vicem: &, quoniam regio felicior ista est,  
 Illic me memori pectore semper habe.

---

## EPISTOLA XI.

R U F O.

**H**OC tibi, Rufe, brevi properatum tempore mittit  
 Naso parum faustæ conditor Artis opus:  
 Ut, quamquam longe toto sumus orbe remoti,  
 Scire tamen possis nos meminisse tui.  
 Nominis ante mei veniant oblivia nobis, 5  
 Pectore quam pietas sit tua pulsa meo.  
 Et prius hanc animam vacuas reddemus in auras,  
 Quam fiat meriti gratia vana tui.  
 Grande voco lacrimas meritum, quibus ora rigabas,  
 Cum mea concreto sicca dolore forent. 10  
 Grande voco meritum, mœstæ solatia mentis,  
 Cum pariter nobis illa tibi que dares.  
 Sponte quidem, per seque mea est laudabilis uxor;  
 Admonitu melior fit tamen illa tuo.  
 Namque quod Hermiones Castor fuit, Hector Iuli, 15  
 Hoc ego te lætor conjugis esse meæ.  
 Quæ, ne dissimilis tibi sit probitate, laborat;  
 Seque tui vitæ sanguinis esse probat.  
 Ovidius T. III. Dd

Ergo, quod fuerat stimulis factura sine ullis,  
Plenius auctorem te quoque nacta facit. 20  
Acer, & ad palmæ per se cursurus honores,  
Si tamen horteris, fortius ibit equus.  
Adde, quod absentis curâ mandata fideli  
Perficus, & nullum ferre gravaris onus.  
O referant grates, quoniam non possumus ipsi, 25  
Dî tibi: quî referent, si pia facta vident.  
Sufficiatque diu corpus quoque moribus istis,  
Maxima Fundani gloria, Rufe, soli.





P. OVIDII NASONIS  
 EPISTOLARUM  
 EX PONTO  
 LIBER III.

---

EPISTOLA I.

U X O R I.

**Æ** Quor Iasonio pulsatum remige primùm,  
 Quæque nec hoste fero, nec nive, Terra, cares;  
 Ecquod erit tempus, quo vos ego Naso relinquam,  
 In minus hostilem jussus abire locum?  
 An mihi Barbaria vivendum semper in ista?  
 Inque Tomitana condar oportet humo?  
 Pace tua, (si pax ulla est tibi, Pontica tellus,  
 Finitimus rapido quam terit hostis equo;)  
 Pace tua dixisse velim; tu pessima duro

Dd 2

Pars es in exsilio, tu mala nostra gravas. 10  
Tu neque ver sentis cinctum florente corona:  
Tu neque messorum corpora nuda vides.  
Nec tibi pampineas autumnus porrigit uvas:  
Cuncta sed immodicum tempora frigus habent.  
Tu glacie freta vincula tenes: & in æquore piscis 15  
Inclusus tecta sæpe natavit aqua.  
Nec tibi sunt fontes, laticis nisi pene marini:  
Qui potus dubium sistat alatne sitim.  
Rara, neque hæc felix, in apertis eminet arvis  
Arbor; & in terra est altera forma maris. 20  
Non avis obloquitur: silvis nisi si qua remotis  
Æquoreas rauco gutture potat aquas.  
Tristia per vacuos horrent absinthia campos,  
Conveniensque suo messis amara loco.  
Adde metus, & quod murus pulsatur ab hoste; 25  
Tinctaque mortiferâ tæbe sagitta madet.  
Quod procul hæc regio est, & ab omni devia cursu:  
Nec pede quo quisquam, nec rate, tutus eat.  
Non igitur mirum, finem quærentibus horum  
Alter si nobis usque rogatur humus. 30  
Te magis est mirum non hoc evincere, conjux;  
Inque meis lacrimas posse tenere malis.  
Quid facias, quæris? quæras hoc scilicet ipsum;  
Invenies, vere si reperire voles.  
Velle parum est: cupias, ut re potiaris, oportet; 35  
Et faciat somnos hæc tibi cura breves.

Velle reor multos. quis enim mihi tam sit iniquus,  
Optet ut exsilium pace carere meum?

Pectore te toto cunctisque incumbere nervis,  
Et niti pro me nocte dieque decet. 40

Utque juvent alii, tu debes vincere amicos,  
Uxor, & ad partes prima venire tuas.  
Magna tibi imposita est nostris persona libellis:  
Conjugis exemplum diceris esse bonæ.

Hanc cave degeneres. ut sint præconia nostra 45  
Vera vide; Famæ quo tuearis opus.

Ut nihil ipse querar; tacito me Fama queretur,  
Quæ debet, fuerit ni tibi cura mei.

Exposuit mea me populo Fortuna videndum;  
Et plus notitiæ, quam fuit ante, dedit. 50

Notior est factus Capaneus a fulminis ictu:  
Notus humo mersis Amphiarus equis.

Si minus errasset, notus minus esset Ulixes;  
Magna Philoctetæ vulnere fama suo est.

Si locus est aliquis magna inter nomina parvis, 55  
Nos quoque conspicuos nostra ruina facit.

Nec te nesciri patitur mea pagina; qua non  
Inferius Coæ Battide nomen habes.

Quidquid ages igitur, magna spectabere scena:  
Et pia non parvis testibus uxor eris. 60

Crede mihi; quoties laudaris carmine nostro,  
Quæ legit has laudes, an mereare rogat.

Utque favere reor plures virtutibus istis,

Sic tua non paucæ carpere facta volent.  
Quare, tu præsta, nè livor dicere possit: 65  
Hæc est pro miseri lenta salute viri.  
Cumque ego deficiam, nec possim ducere curram,  
Fac tu sustineas debile sola jugum.  
Ad medicum specto, venis fugientibus, æger:  
Ultima pars animæ dum mihi restat, ades. 70  
Quodque ego præstarem, si te magis ipse valerem,  
Id mihi, cum valeas fortius, ipsa refer.  
Exigit hoc socialis amor, fœdusque maritum:  
Moribus hoc, conjux, exigis ipsa tuis.  
Hoc domui debes, de qua censeris, ut illam 75  
Non magis officiis, quam probitate, colas.  
Cuncta licet facias; nisi sis laudabilis, uxor,  
Non poterit credi Marcia culta tibi.  
Nec sumus indigni; nec (si vis vera fateri)  
Debetur meritis gratia nulla meis. 80  
Redditur illa quidem grandi cum fœnore nobis,  
Nec te, si cupiat lædere, livor habet.  
Sed tamen hoc factis adijunge prioribus unum,  
Pro nostris ut sis ambitiosa malis.  
Ut minus infesta jaceam regione, labora: 85  
Clauda nec officii pars erit ulla tui.  
Magna peto, sed non tamen invidiosa roganti;  
Utque ea non teneas, tuta repulsa tua est.  
Nec mihi succense, toties si carmine nostro,  
Quod facis, ut facias, teque imitere, rogo. 90



Fortibus adsuevit tubicen prodesse; suoque

Dux bene pugnantes incitat ore viros.

Nota tua est probitas, testataque tempus in omne:

(Sit virtus etiam non probitate minor.)

Nec tibi Amazonia est pro me sumenda securis, 95

Aut excisa levi pelta gerenda mapu.

Numen adorandum est; non ut mihi fiat amicum,

Sed sit ut iratum, quam fuit ante, minus.

Gratia si nulla est, lacrimæ tibi grætia fient.

Hac potes, aut nulla, parte movere Deos. 100

Quæ tibi ne desint, bene per mala nostra cavetur:

Meque viro flendi copia dives adest.

Utque meæ res sunt, omni (puto) tempore flebis.

Has Fortuna tibi nostra ministrat opes.

Si mea mors redimenda tuâ (quod abominor) esset, 105

Admeti conjux, quam sequereris, erat.

Æmula Penelopes fieres, si fraude pudicâ

Instantes velles fallere nupta procos.

Si comes extincti manes sequerere mariti,

Esset dux facti Laodamia tui. 110

Iphias ante oculos tibi erat ponenda, volenti

Corpus in accensos mittere forte rogos.

Morte nihil opus est, nil Icarotide telâ.

Cæsaris at conjux ore precanda tuo.

Quæ præstat virtute sua, ne prisca vetustas 115

Laude pudicitiae sæcula nostra premat.

Quæ Veneris formam, mores Junonis habendo,

Sola est cœlesti digna reperta toro.

Quid trepidas, quid adire times? non impia Progne;

Filiave Ætææ voce movenda tua est: 120

Nec nurus Ægypti, nec sæva Agamemnonis uxor;

Scyllave, quæ Siculas inguine terret aquas;

Telegonive parens vertendis nata figuris;

Nexave nodosas angue Medusa comas.

Femina sed Princeps; in qua Fortuna videre 125

Se probat, & cæcæ crimina falsa tulit.

Qua nihil in terris ad finem Solis ab ortu

Clarius, excepto Cæsare, mundus habet.

Eligito tempus, captatum sæpe, rogandi,

Exeat adversâ ne tua navis aquâ. 130

Non semper sacras reddunt oracula sortes;

Ipsaque non omni tempore fana patent.

Cum status Urbis erit, qualem nunc auguror esse,

Et nullus populi contrahet ora dolor;

Cum domus Augusti, Capitoli more colenda, 135

Læta, (quod est, & sit) plenaque pacis erit;

Tum tibi Dî faciant adeundi copia fiat,

Profectura aliquid tum tua verba puta.

Si quid aget majus, differ tua cœpta; caveque

Spem festinando præcipitare meam. 140

Nec rursus jubeo, dum sit vacuissima quæras.

Corporis ad cultum vix vacat illa sui.

Curia cum patribus fuerit stipata verendis,

Per rerum turbam tu quoque oportet eas.

Cum tibi contigerit vultum Junonis adire, 145

Fac sis personæ, quam tueare, memor.

Nec factum defende meum: mala caussa silenda est.

Nil nisi sollicitæ sint tua verba preces.

Tum lacrimis demenda mora est: submissaque terræ

Ad non mortales brachia tende pedes. 150

Tum pete nil aliud, sævo nisi ab hoste recedam:

Hostem Fortunam sit satis esse mihi.

Plura quidem subeunt: sed jam turbata timore

Hæc quoque vix poteris ore tremante loqui.

Suspitor hoc damno tibi non fore: sentiat illa 155

Te majestatem pertimuisse suam.

Nec tua si fletu scindentur verba, nocebit.

Interdum lacrimæ pondera vocis habent.

Lux etiam cœptis facito bona talibus adsit,

Horaque conveniens, auspiciūque favens. 160

Sed prius imposito sanctis altaribus igni,

Tura fer ad magnos vinaque pura Deos.

E quibus ante omnes Augustum numen adora,

Progeniemque piā, participemque tori.

Sint utinam mites solito sibi more; tuasque 165

Non duris lacrimas vultibus adspiciant.

## EPISTOLA II.

C O T T Æ.

**Q**uam legis a nobis missam tibi, Cotta, salutem,  
 Missa sit ut vere, perveniatque, precor.  
 Namque meis sospes multum cruciatibus aufers;  
 Utque sit e nobis pars bona salva, facis.  
 Cumque labent alii, jactataque vela relinquunt, 5  
 Tu laceræ remanes ancora sola rati.  
 Grata tua est igitur pietas. ignoscimus illis,  
 Qui cum Fortuna terga dedere fugæ.  
 Cum feriant unum, non unum fulmina terrent:  
 Junctaque percusso turba pavere solet. 10  
 Cumque dedit paries venturæ signa ruinæ,  
 Sollicito vacuus fit locus ille metu.  
 Quis non e timidis ægri contagia vitat,  
 Vicinum metuens ne trahat inde malum?  
 Me quoque amicorum nimio terrore metuque, 15  
 Non odio, quidam destituere mei.  
 Non illis pietas, non officiosa voluntas  
 Defuit: adversos extimere Deos.  
 Utque magis cauti possunt timidique videri,  
 Sic adpellari non meruere mali. 20  
 At meus excusat caros ita candor amicos;  
 Utque habeant de me crimina nulla, favet.

Sint hac contenti venia, signentque licebit,  
 Purgari factum me quoque teste suum.  
 Pars estis pauci potior, qui rebus in artis 25  
 Ferre mihi nullam turpe putastis opem.  
 Tunc igitur meriti morietur gratia vestri,  
 Cum cinis absumto corpore factus ero.  
 Fallar, & illa meæ superabit tempora vitæ;  
 Si tamen a memori posteritate legar. 30  
 Corpora debentur mœstis exsanguia bustis:  
 Effugiunt structos nomen honorque rogos.  
 Occidit & Theseus, & qui comitavit Oresten:  
 Sed tamen in laudes vivit uterque suas.  
 Vos etiam seri laudabunt sæpe nepotes; 35  
 Claraque erit scriptis gloria vestra meis.  
 Hæc quoque Sauromatæ vos jam novere Getæque:  
 Et tales animos barbara turba probat.  
 Cumque ego de vestra nuper probitate referrem,  
 (Nam didici Getice Sarmaticeque loqui) 40  
 Forte senex quidam, cœtu cum staret in illo,  
 Reddidit ad nostros talia verba sonos:  
 Nos quoque amicitia nomen bene novimus, hospes,  
 Quos procul a vobis frigidus Ister habet.  
 Est locus iu Scythia, (Tauros dixere priores) 45  
 Qui Getica longe non ita distat humo.  
 Hac ego sum terra (patriæ nec pœnitet) ortus.  
 Consortem Phœbi gens colit illa Deam.  
 Tempa manent hodie, vastis innixa columnis,

- Perque quater denos itur in illa gradus. 50  
Fama refert illic signum cœleste fuisse.  
Quoque minus dubites, stat basis orba Deâ.  
Araque, quæ fuerat naturâ candida saxi,  
Decolor adfuso tincta cruore rubet.  
Femina sacra facit, tædæ non nota jugali: 55  
Quæ superat Scythicas nobilitate nurus.  
Sacrifici genus est, (sic instituere priores)  
Advena virgineo cæsus ut ense cadat.  
Regna Thoas habuit, Mæotide clarus in ora:  
Nec fuit Euxinis notior alter aquis. 60  
Sceptra tenente illo, liquidas fecisse per auras  
Nescio quam dicunt Iphigenian iter.  
Quam levibus ventis sub nube per aera vectam  
Creditor his Phœbe deposuisse locis.  
Præfuerat templo multos ea rite per annos, 65  
Invitâ peragens tristia sacra manu.  
Cum duo velifera juvenes venere carina,  
Presseruntque suo litora nostra pede.  
Par fuit his ætas, & amor: quorum alter Orestes,  
Alter erat Pylades. nomina fama tenet. 70  
Protinus inमितem Triviæ ducuntur ad aram,  
Evincti geminas ad sua terga manus.  
Spargit aquâ captos lustrali Graja sacerdos,  
Ambiat ut fulvas infula longa comas.  
Dumque parat sacrum, dum velat tempora vittis, 75  
Dum tardæ caussas invenit usque moræ;

Non ego crudelis, juvenes ignoscite, dixit;  
 Sacra suo facio barbariora loco.  
 Ritus is est gentis. qua vos tamen urbe venitis?  
 Quove parum fausta puppe petistis iter? 80  
 Dixit: &, audito patriæ pia nomine virgo,  
 Consortes urbis comperit esse suæ.  
 Alter at e vobis, inquit, cadat hostia; sacri  
 Ad patrias sedes nuntius alter eat.  
 Ire jubet Pylades carum periturus Oresten. 85  
 Hic negat: inque vicem pugnat uterque mori.  
 Exstitit hoc unum, quo non convenerit illis.  
 Cetera par concors & sine lite fuit.  
 Dum peragunt pulchri juvenes certamen amoris,  
 Ad fratrem scriptas exarat illa notas. 90  
 Ad fratrem mandata dabat, cuique illa dabantur,  
 (Humanos casus adspice) frater erat.  
 Nec mora; de templo rapiunt simulacra Dianæ:  
 Clamque per immensas puppe feruntur aquas.  
 Mirus amor juvenum, quamvis abiire tot anni, 95  
 In Scythia magnum nunc quoque nomen habet.  
 Fabula narrata est postquam vulgaris ab illo,  
 Laudarunt omnes facta piàmque fidem.  
 Scilicet hac etiam (qua nulla ferocior) ora  
 Nomen amicitiae barbara corda movet. 100  
 Quid facere Ausonia geniti debetis in Urbe,  
 Cum tangant diros talia facta Getas?  
 Adde, quod est animus semper tibi mitis; & altæ

Indicium mores nobilitatis habet;  
 Quos Valesus patrii cognoscat nominis auctor; 105  
 Quos Numa maternus non neget esse suos;  
 Adjectique probent genitiva ad nomina Cottæ,  
 Si tu non esses, interitura domus.  
 Digne vir hac serie, lapso succurrere amico  
 Conveniens istis moribus esse puta. 110

## EPISTOLA III.

FABIO MAXIMO,

**S**I vacat exiguum profugo dare tempus amico,  
 O sidus Fabiæ, Maxime, gentis, ades:  
 Dum tibi quæ vidi referam; seu corporis umbra,  
 Seu veri species, seu fuit ille sopor.  
 Nox erat: & bifores intrabat Luna fenestras, 5  
 Mense fere medio quanta nitere solet.  
 Publica me requies curarum somnus habebat,  
 Fusaque erant toto languida membra toro:  
 Cum subito pennis agitated inhorruit aer;  
 Et gemit parvo mota fenestra sono. 10  
 Territus in cubitum relevo mea membra sinistram:  
 Pulsus & e trepido pectore somnus abit.  
 Stabat Amor vultu, non quo prius esse solebat,  
 Fulcra tenens lævâ tristis acerna manu.



Nec torquem collo, nec habens crinale capillis; 15

Nec bene dispositas comtus, ut ante, comas.

Horrida pendebant molles super ora capilli;

Et visa est oculis horrida penna meis.

Qualis in aeris tergo solet esse columbæ,

Traçantum multæ quam tetigere manus. 20

Hunc, simul agnovi, (neque enim mihi notior alter)

Talibus adfata est libera lingua sonis:

O puer, exilii decepto caussa magistro,

Quem fuit utilius non docuisse mihi;

Huc quoque venisti, pax est ubi tempore nullo, 25

Et coit adstrictis barbarus Ister aquis?

Quæ tibi caussa viæ? nisi uti mala nostra videres?

Quæ sunt, si nescis, invidiosa tibi.

Tu mihi dictasti juvenilia carmina primus:

Adposui senis, te duce, quinque pedes. 30

Nec me Mæonio consurgere carmine, nec me

Dicere magnorum passus es acta ducum.

Forsitan exiguas, aliquas tamen, arcus & ignis

Ingenii vires comminuere mei.

Namque ego dum canto tua regna, tuæque parentis, 35

In nullum mea mens grande vacavit opus.

Nec satis id fuerat; stultus quoque carmina feci,

Artibus ut posses non rudis esse meis.

Pro quibus exilium misero mihi reddita merces:

Id quoque in extremis, & sine pace, locis. 40

At non Chlonides Eumolpus in Orphea talis,

In Phryga nec Satyrum talis Olympus erat:  
Præmia nec Chiron ab Achilli talia cepit,  
Pythagoræque ferunt non nocuisse Numam.  
Nomina neu referam longum collecta per ævum, 45  
Discipulo perii solus ab ipse meo.  
Dum damus arma tibi, dum te, lascive, docemus,  
Hæc te discipulo dona magister habet.  
Scis tamen; ut liquido juratus dicere possis,  
Non me legitimos sollicitasse toros. 50  
Scripsimus hæc istis, quarum nec vitta pudicos  
Contingit crines, nec stola longa pedes.  
Dic, precor, ecquando didicisti fallere nuptas,  
Et facere incertum per mea jussa genus?  
An sit ab his omnis rigide submota libellis, 55  
Quam lex furtivos arcet habere viros?  
Quid tamen hoc prodest, vetiti si lege severa  
Credor adulterii composuisse notas?  
At tu, sic habeas ferientes cuncta sagittas;  
Sic numquam rapido lampades igne vacent; 60  
Sic regat imperium, terrasque coerceat omnes  
Cæsar, ab Ænea qui tibi fratre nepos;  
Effice, sit nobis non implacabilis ira;  
Meque loco plecti commodiore velit.  
Hæc ego visus eram puero dixisse volucris. 65  
Hos visus nobis ille dedisse sonos:  
Per, mea tela, faces, & per, mea tela, sagittas,  
Per matrem juro, Cæsareumque caput;  
Nil,

Nil, nisi concessum, nos te didicisse magistro;  
 Artibus & nullum crimen inesse tuis. 70  
 Utque hoc, sic utinam defendere cetera posses!  
 Scis aliud, quod te læserit, esse magis.  
 Quidquid id est (neque enim debet dolor ille referri)  
 Non potes a culpa dicere abesse tua.  
 Tu licet erroris sub imagine crimen obumbres, 75  
 Non gravior merito vindicis ira fuit.  
 Ut tamen adspicerem, consolaretque jacentem,  
 Lapsa per impensas est mihi penna vias.  
 Hæc loca tum primum vidi, cum Matre rogante  
 Phasias est telis fixa puella meis. 80  
 Quæ nunc cur iterum post secula longa revisam,  
 Tu facis, o castris miles amice meis.  
 Pone metus igitur; mitescet Cæsaris ira;  
 Et veniet votis mollior hora tuis.  
 Neve moram timeas, tempus, quod quærimus, instat: 85  
 Cunctaque lætitiæ plena triumphus habet.  
 Dum domus, & nati, dum mater Livia gaudet;  
 Dum gaudes Patriæ magne Ducisque Pater;  
 Dum tibi gratatur populus, totamque per Urbem  
 Omnis odoratis ignibus ara calet; 90  
 Dum faciles aditus præbet venerabile templum;  
 Sperandum nostras posse valere preces.  
 Dixit; & aut ille est tenuis dilapsus in auras,  
 Cœperunt sensus aut vigilare mei.  
 Si dubitem, quin his faveas, o Maxime, dicis. 95

Ovidius T. III.

Ee

Memnonio cygnos esse colore putem.  
 Sed neque mutatur nigra pice lacteus humor:  
 Nec, quod erat candens, fit terebinthus; ebur.  
 Conveniens animo genus est tibi; nobile namque  
 Pectus, & Herculeæ simplicitatis habes.  
 Livor, iners vitium, mores non exit in altos,  
 Utque latens imâ vipera serpit humo.  
 Mens tua sublimis supra genus eminet ipsum:  
 Grandius ingenio nec tibi nomen inest.  
 Ergo alii noceant miseris, optentque timeri,  
 Tinctaque mordaci spicula felle gerant:  
 At tua supplicibus domus est adsueta juvandis;  
 In quorum numero me precor esse velis.

## EPISTOLA IV.

RUFINO.

**H**ÆC tibi non vanam portantia verba salutem,  
 Naso Tomitana mittit ab urbe tuus;  
 Utque suo faveas mandat, Rufine, Triumpho;  
 In vestras venit si tamen ille manus.  
 Est opus exiguum, vastisque paratibus impar:  
 Quale tamen cumque est, ut tuare rogo.  
 Firma valent per se, nullumque Machaona quærunt:  
 Ad medicum dubius confugit ager opem.

Non opus est magnis placido lectori poetis:

Quamlibet invitum difficilemque, tebent.

Nos, quibus ingenium longi minuere labores,

Aut etiam nullum forsitan ante fuit,

Viribus infirmi, vestro candore valemus.

Quem mihi si demas, omnia rapta putem

Cunctaque cum mea sint propenso nixa favore,

Præcipuum ventæ jus habet ille liber.

Spēctatum vates alii scripsere triumphum.

Est aliquid memori visa notare manu.

Nos ea vix avidam vulgo captata per aures

Scripsimus: atque oculi fama fuere mei.

Scilicet adfectus similes, aut impetus idem,

Rebus ab audicis conspicuisque venit?

Nec nitor argenti, quem vos vidistis, & auri;

Quod mihi defuerint, purpuraque illa, quærona

Sed loca, sed gentes formatae mille figuris

Nutrissent carmen, præliaque ipsa, meumque

Et Regum vultus, certissima pigora mentis,

Juvisent aliquid forsitan illud opus.

Plausibus ex ipsis populi, lætoque favore,

Ingenium quodvis incaluisse potest.

Tamque ego summissem tali clangore vigorem;

Quam rudis audita miles ad arma tuba

Pectora sint nobis nivibus glacieque dicitur

Atque hoc, quem patior, frigidiora loco;

Illā Ducis facies, in curru stantis æburao,

Excuteret frigus sensibus omine meis,  
 His ego defectus, dubiisque laudoribus usus,  
 Ad vestri venio jure favoris opem.  
 Nec mihi nota ducum, nec sunt mihi nota locorum  
 Nomina: materiam vix habuere manus.  
 Pars quota de tantis rebus, quam Fama referre,  
 Aut aliquis nobis scribere posset, erat?  
 Quo magis, o lector, debes ignoscere, si quid  
 Erratum est illic; præteritumve mihi.  
 Adde, quod assiduam domini meditata querelam,  
 Ad lætum carmen vix mea versa lyra est,  
 Vix bona post tanto querenti verba subibant;  
 Et gaudere aliquid, res mihi visa nova est.  
 Utque reformidant insuetum lumina Solem,  
 Sic ad lætitiâ mens mea segnis erat.  
 Est quoque cunctarum novitas carissima rerum;  
 Gratiaque officio, quod mora tardat, abest.  
 Cetera certatim de magno scripta triumpho  
 Jam pridem populi suspicor ore legi.  
 Illa bibit sitiens, lector mea pocula plenus;  
 Illa recens pota est, nostra tepescit aqua.  
 Non ego cessavi, nec fecit inertia serum;  
 Ultima me vasti sustinet ora freti.  
 Dum venit huc rumor, properataque carmina fiunt,  
 Factaque eunt ad vos, annus abisse potest.  
 Nec minimum refert, intacta rosaria primus,  
 An serâ carpas pene relicta manu.

Quid mirum, lectis exhausto floribus horto,  
Si Duce non facta est digna corona suo?

Deprecor, hæc vatum contra sua carmina ne quis

Dicta putet. pro se Musa locuta mea est.

Sunt mihi vobiscum communia sacra; poetæ;

In vestro miseris si licet esse choro.

Magnaque pars animæ mecum vixistis; amici:

Hac ego non absens vos quoque parte colo.

Sint igitur vestro mea commendanda favori

Carmina, non possum pro quibus ipse loqui.

Scripta placent a morte fere: quia lædere vivos:

Livor, & injusto carpere dente solet.

Si genus est mortis male vivere; terra moratur;

Ex desunt fatis sola sepulcra meis,

Denique opus nostræ culpetur ut undique curæ,

Officium nemo qui reprehendat erit.

Ut desint vires, tamē est laudanda voluntas:

Hac ego contentos auguror esse Deos.

Hæc facit, ut veniat pauper quoque gratus ad aras,

Et placeat cæso non minus agna bove.

Res quoque tanta fuit, quantæ subsistere summo

Æneidos vati grande fuisset onus.

Ferre etiam molles elegi tam vasta triumphi

Pondera disparibus non potuere rotis.

Quo pede nunc utar, dubia est sententiā nobis.

Alter enim de te, Rhene, triumphus adest,

Irrita verorum non sunt præsagia vatum.

Danda Jovī laurus, dum prior illa viret. 190  
 Nec mea verba legis, qui sum submotus ad Istrum,  
 Non bene pacatis flumina pota Getis;  
 Ista Dei vox est: Deus est in pectore nostro:  
 Hæc duce prædico vaticinorque Deo.  
 Quid cessas currum pompamque parare triumphis, 95  
 Livia? jam nullas dant tibi bella moras.  
 Perfida damnatas Germania projicit hastas,  
 Jam pondus dices omen habere meum.  
 Crede, brevique fides aderit; geminabit honorem  
 Filius, & junctis, ut prius, ibit equis.  
 Prome, quod injicias humeris victoribus, ostrum.  
 Ipsa potest solitum nosse corona caput,  
 Scuta, sed & galeæ gemmis radiantur & auro,  
 Stentque super victos trunca tropæa viros.  
 Oppida turritis cingantur eburnea muris: 105  
 Fictaque res vero more putetur agi.  
 Squalidus immissos fracta sub arundine crines  
 Rhenus, & infectas sanguine portet aquas.  
 Barbara jam capti poscunt insignia Reges,  
 Textaque fortunâ divitiorsuâ.  
 Et quæ præterea virtus invicta tuorum  
 Sæpe parata tibi, sæpe paranda facit.  
 Dî, quorum monitu sumus eventura locuti,  
 Verba (precor) celeri nostra probate fide.



## EPISTOLA V.

MAXIMO COTTÆ.

Quam legis, unde tibi mittatur epistola, quæris?

Hinc, ubi cæruleis jungitur Ister aquis.

Ut regio dicta est, succurrere debet & auctor,

Læsus ab ingenio Naso poeta suo.

Qui tibi, quam mallet præsens deferre salutem, 5

Mittit ab hirsutis, Maxime Cotta, Getis.

Legimus, o juvenis, patrii non degener oris,

Dicta tibi pleno verba diserta foro.

Quæ, quamquam lingua mihi sunt properante per horas

Lecta satis multas, pauca fuisse queror. 10

Plura sed hæc feci relegendo sæpe; nec unquam

Non mihi, quam primo, grata fuere magis.

Cumque nihil toties lecta e dulcedine perdant,

Viribus illa suis, non novitate, placent.

Felices, quibus hæc ipso cognoscere in actu, 15

Et tam facundo contigit ore frui!

Nam quamquam sapor est adlata dulcis in unda,

Gratius ex ipso fonte bibuntur aquæ.

Et magis adducto pomum decerpere ramo,

Quam de cælata sumere lance juvat. 20

At nisi peccassem, nisi me mea Musa fugasset,

Quod legi, tuæ vox exhibuisset opus.

Utque fui solitus, sedissem forsitan unus

De centum iudex in tua verba viris.

Major & implēsset præcordia nostra voluptas, 25

Cum traherer dictis adnueremque tuis.

Quem quoniam fatum, vobis patriaque relictis,

Inter inhumanos maluit esse Getas;

Quod licet, ut videar tecum magis esse, legenda

Sæpe, precor, studii pignora mitte tui: 30

Exemploque meo, nisi dedignaris id ipsum,

Uttere: quod nobis rectius ipse dares.

Namque ego, qui perii jam pridem, Maxime, vobis,

Ingenio nitor non perilissee meo.

Redde vicem: nec rara tui monumenta laboris 35

Accipiant nostræ, grata futura, manus.

Dic tamen, o juvenis studiorum plene meorum;

Ecquid ab his ipsis admoneare mei?

Ecquid, ubi aut recitas factum modo carmen amicis,

Aut, quod sæpe soles, exigis ut recitent, 40

Interdum queritur tua mens, oblita quid absit?

(Nescio quid certe sentit abesse sui.)

Utque loqui de me multum præsentē solebas,

Nunc quoque Nasonis nomen in ore tuo est?

Ipse quidam Getico peream violatus ab arcu; 45

(Et sit perjuri quam prope pœna vides)

Te nisi momentis video pene omnibus absens.

Gratia Dīs, menti quolibet ire licet.

Hac ubi perveni, nulli cerneadus, in Urbem,

Sæpe loquor tecum; sæpe loquente fruor. 50  
 Tum, mihi difficile est, quam sit bene, dicere; quamque  
 Candida iudiciis hora sit illa meis.  
 Tum me, (si qua fides) cœlesti sede receptum  
 Cum fortunatis suspicor esse Deis.  
 Rursus, ut huc redii, cœlum Superosque relinquo; 55  
 A Styge nec longe Pontica distat humus.  
 Unde ego si fato nitor prohibente reverti,  
 Spem sine profectu, Maxime, tolle mihi.

## EPISTOLA VI.

## A M I G O R U M C U I D A M.

**N**aso suo, nomen posuit cui pene, sodall  
 Mittit ab Euxinis hoc breve carmen aquis.  
 At, si cauta parum scripsisset dextra, quis esses,  
 Forsitan officio parta querela foret.  
 Cur tamen, hoc aliis tutum credentibus, unus,  
 Adpellent ne te carmina nostra, rogas?  
 Quanta sit in mediâ elementia Cæsaris irâ,  
 Ex me, si nescis, certior esse potes.  
 Huic ego, quam patior, nil possem demere pœnæ,  
 Si iudex meriti cogeret esse mei. 10  
 Non vetat ille sui quemquam meminisse sodalis:  
 Nec prohibet tibi me scribere, teque mihi.

Nec scelus admittas, si consuleris amicum,  
 Mollibus & verbis aspera fata leves.  
 Cur, dum tuta times, facis ut reverentia talis  
 Fiat in Augustos invidiosa Deos?  
 Fulminis adflatos interdum vivere telis  
 Vidimus, & refici, non prohibente Jove.  
 Nec, quia Neptunus navem lacerarat Ulixis,  
 Leucotheæ nanti ferre negavit opem.  
 Crede mihi, miseris cœlestia numina parant:  
 Nec semper læsos, & sine fine, premunt.  
 Principe nec nostro Deus est moderatior ullus:  
 Justitia vires temperat ille suas.  
 Nuper eam Cæsar, factò de marmore templo,  
 Jampridem posuit mentis in ædo suæ.  
 Juppiter in multos temeraria fulmina torquet,  
 Qui pœnam culpa non meruere pari.  
 Obruerit sævis cum tot Deus æquoris undis,  
 Ex illis mergi pars quota digna fuit?  
 Cum pereant acie fortissima quæque, sub ipso  
 Iudice, deletus Mantis iniquus erit.  
 At, si forte velis in nos inquirere, nemo est,  
 Qui sc, quod patitur, commeruisse neget.  
 Adde, quod extinctos vel aqua, vel Marte, vel igni,  
 Nulla potest iterum restituere dies.  
 Restituit multos, aut pœnæ parte levavit.  
 Cæsar; & in multis me velit esse precor.  
 An tu, cum tali populus sub Principe simus,

Adloquio profugi credis inesse metum? 40

Forsitan hæc domino Busiride jure timeres,

Aut solito clausos urere in ære viros.

Desine mitem animum vano infamare timore.

Sæva quid in placidis saxa vereris aquis?

Ipse ego, quod primo scripsi sine nomine vobis, 45

Vix excusari posse mihi videor.

Sed pavor attonito rationis ademerat usum;

Cesserat omne novis consiliumque malis.

Fortunamque meam metuens, non vindicis iram,

Terrebar titulo nominis ipse mei. 50

Haftenus admonitus memori concede poetæ,

Ponat ut in chartis nomina cara suis.

Turpe erit ambobus, longo mihi proximus usu

Si nulla libri parte legare mei.

Ne tamen iste metus somnos tibi rumpere possit, 55

Non ultra, quam vis, officiosus ero.

Teque tegam, qui sis: nisi cum permiseris ipse.

Cogetur nemo munus habere meum.

Tu modo, quem poteras vel aperte tutus amare,

Si res est anceps ista, latenter ama. 60

## EPISTOLA VII.

A M I C I S.

**V** Erba mihi desunt eadem tam sæpe roganti,  
 Jamque pudet vanas finæ carere preces.  
 Tædia consimili fieri de carmine vobis,  
 Quidque petam, cunctos edidicisse reor.  
 Nostra quid adportet jam nostis epistola, quamvis  
 Charta sit a vinculis non labefacta suis.  
 Ergo mutetur nostri sententia scripti,  
 Ne toties contra, quam rapit annis, eam.  
 Quod bene de vobis speravi, ignoscite, amici:  
 Talia peccandi jam mihi finis erit.  
 Nec gravis uxori dicar: quæ scilicet in me  
 Quam proba, tam timida est, experientisq; parum,  
 Hæc quoque, Naso, fores: etenim pejora tulisti.  
 Jam tibi sentiri sarcina nulla potest.  
 Ductus ab armento taurus detractat aratrum:  
 Subtrahit, & duro colla novella iugo.  
 Nos, quibus adsuevit fatum crudeliter uti,  
 Ad mala jam pridem non sumus ulla rudes.  
 Venimus in Geticos fines; moriamur in illis:  
 Parcaque ad extremum, quâ mea cœpit, eat.  
 Spem juvet amplecti, quæ non juvat irrita semper;  
 Et fieri cupias si qua, futura putes.

Proximus huic gradus est, bene desperare salutem,

Seque semel vera scire perisse fide:

Curando fieri quædam majora videmus

Vulnera, quæ melius non tetigisse fuit.

Mitius ille perit, subita qui mergitur unda,

Quam sua qui tumidis brachia lassat aquis.

Cur ego concepi Scythiis me posse carere

Finibus, & terra prosperiore frui?

Cur aliquid de me speravi lenius umquam?

An Fortuna mihi sic mea nota fuit?

Torqueor en gravius, repetitaque forma locorum

Exsiliū renovat triste, recensque facit.

Est tamen utilius, studium cessasse meorum;

Quam, quas admōrint, non valuisse preces.

Magna quidem res est, quam non audetis, amici:

Sed si quis peteret, quid dare vellet, erat.

Dummodo non vobis hoc Cæsaris ira negarit,

Fortiter Euxinis immotemur aquis.

## EPISTOLA VIII.

M A X I M O.

**Q**UÆ tibi, quærebam, memorem testantia cūram  
Dona Tomitantis mittere posset ager.

Dignus es argento, fulvo quoque dignior auro:

Sed te, cum donas, ista juvare solent.  
Nec tamen hæc loca sunt ullo pretiosa metallo:  
Hostis ab agricola vix sinit illa fodi:  
Purpura sæpe tuos fulgens prætexit amictus:

Sed non Sarmaticâ tinguitor vlla manu:  
Vellera dura ferunt pecudes, & Palladis uti.

Arte Tomitanæ non didicere nurus:  
Femina pro lanâ Cerealia munera frangit;

Suppositoque gravem vertice portat aquam.  
Non hîc pampineis amicitur vitibus ulmus:

Nulla premunt ramos pondere poma suo:  
Tristia deformes pariant absinthia campi;

Terraque de fructu quamvis amara docet:  
Nil igitur tota Ponti regione sinisteri;

Quod mea sedulitas mittere posset, erat.  
Clausa tamen misi Scythicâ tibi tela pharetra:

Hoste precor fiant illâ creata tuorum:  
Hos habet hæc calamos, hos hæc habet ora libellos:

Hæc viget in nostris, Maxime, Musa locis.  
Quæ quamquam misisse pudet, quia parva videntur;

Tu tamen hæc, quæso, consule missa boni.

FINIS

LIBER PRIMUS  
LIBER SECUNDUS  
LIBER TERTIUS  
LIBER QUARTUS  
LIBER QUINTUS  
LIBER SEXTUS  
LIBER SEPTIMUS  
LIBER OCTAVUS  
LIBER NONUS  
LIBER DECIMUS



## EPISTOLA IX.

B R U T O .

**Q**uod sit in his eadem sententia, Brute, libellis,  
 Carmina nescio quem carpere nostra refers;  
 Nil nisi me terra fruar ut propiore rogare,  
 Et, quam sim denso cinctus ab hoste, queri.  
 O quam de multis vitium reprehenditur unum!  
 Hoc peccat solum si mea Musa, bene est.  
 Ipse ego librorum video delicta meorum;  
 Cum sua plus justo carmina quisque probet.  
 Auctor opus laudat. sic forsitan Agrius olim  
 Thersiten facie dixerit esse bona.  
 10  
 Judicium tamen hfc nostrum non decipit error;  
 Nec quidquid genui, protinus illud amo.  
 Cur igitur, si me videam delinquere, peccem,  
 Et patiar scripto crimen inesse, rogas?  
 Non eadem ratio est, sentire & demere morbos.  
 15  
 Sensus inest cunctis; tollitur arte malum.  
 Sæpe aliquod cupiens verbum mutare, relinquo;  
 Judicium vires destituuntque meum.  
 Sæpe piget (quid enim dubitem tibi vera fateri?)  
 Corrigere, & longi ferre laboris onus.  
 20  
 Scribentem juvat ipse favor, minuitque laborem;  
 Cumque suo crescens pectore fervet opus.

Corrigere at res est tanto magis ardua, quanto

Magnus Aristarcho major Homerus erat.

Sic animum lento curarum frigore lædit, 25

Ut cupidi cursor frena retentat equi.

Atque ita Dī mites minuant mihi Cæsaris iram,

Ossaque pacatā nostra tegantur humo;

Ut mihi conanti nonnumquam intendere cūras,

Fortunæ species obstat acerba meæ. 30

Vixque mihi videor, faciam quod carmina, sanus;

Inque feris curem corrigere illa Getis.

Nil tamen e scriptis magis excusabile nostris,

Quam sensus cunctis pene quod unus inest.

Læta fere lætus cecini, cano tristia tristis. 35

Conueniens operi tempus utrumque suo est.

Quid, nisi de vitio scribam regionis amaræ?

Utque sólo moriar commodiore, precer?

Cum toties eadem dicam, vix audior ulli:

Verbaque profectu dissimulata carent. 40

Et tamen hæc eadem cum sint, non scribimus isdem:

Unaque per plures vox mea tentat opem.

An, ne bis sensum lector reperiret eundem,

Unus amicorum, Brute, rogandus erat? 45

Non fuit hoc tanti; confesso ignoscite, docti.

Vilior est operis fama salutē meā.

Denique materiem quam quis sibi finxerit ipse,

Arbitrio variat multa poeta suo.

Musa mea est index nimium quoque vera malorum;

Atque

Atque incorruptæ pondera testis habet. 30

Nec liber ut fieret, sed uti sua cuique daretur

Litera, propositum curaque nostra fuit.

Postmodo collectas, utcumque sine ordine, junxi:

Hoc opus electum ne mihi forte putes.

Da veniam scriptis, quorum non gloria nobis 35

Causa, sed utilitas officiumque, fuit.





P. OVIDII NASONIS  
**EPISTOLARUM**  
**EX PONTO**  
*LIBER IV.*

---

**EPISTOLA I.**

**SEXTO POMPEJO.**

**A**Ccipe Pompei, deductum carmen ab illo,  
 Debitor est vitæ qui tibi, Sexte, suæ.  
**Q**ui si non prohibes a me tua nomina poni,  
 Accedet meritis hæc quoque summa tuis.  
 Sive trahis vultus, equidem peccasse fatebor. 3  
 Delicti tamen est caussa probanda mei.  
 Non potuit mea mens, quin esset grata, teneri.  
 Sit precor officio non gravis ira pio.  
 O quoties libris ego sum mihi visus in istis

Impius, in nullo quod legerere loco! 19  
 O quoties, aliud vellem cum scribere, nomen  
 Retulit in ceras inscia dextra tuum!  
 Ipse mihi placuit mendis in talibus error;  
 Et vix invitâ facta litura manu est.  
 Viderit ad summum, dixi. licet ipse queratur; 15  
 Hanc pudet offensam non meruisse prius.  
 Da mihi, si quid ea est, hebetantem pectore Lethen;  
 Oblitus potero non tamen esse tui.  
 Idque sinas oro; nec fastidita repellas  
 Verba: nec officio crimen inesse putes. 20  
 Et levis hæc meritis referatur gratia tantis:  
 Sin minus; invito te quoque gratus ero.  
 Numquam pigra fuit nostris tua gratia rebus:  
 Nec mihi munificas arca negavit opes.  
 Nunc quoque nil subitis clementia territa fatis 25  
 Auxilium vitæ fertque feretque meæ.  
 Unde, roges forsân, fiducia tanta futuri  
 Sit mihi. quod fecit, quisque tuetur opus,  
 Ut Venus artificis labor est & gloria Goi,  
 Æquoreo madidas quæ premit imbre comas; 30  
 Arcis ut Actææ vel eburna vel æneæ custos  
 Bellica Phidiacâ stat Dea facta manu;  
 Vindicat ut Calamis laudem, quos fecit, equorum;  
 Ut similis veræ vacca Myronis opus;  
 Sic ego pars rerum non ultima, Sexte, tuarum, 35  
 Tutelæque feror munus opusque tuæ.

## EPISTOLA II.

S E V E R O.

**Q**uod legis, o Vates magnorum maxime Regum,  
 Venit ab intonsis usque, Severe, Getis.  
 Cujus adhuc nomen nostros tacuisse libellos,  
 (Si modo permittis dicere vera) pudet.  
 Orba tamen numeris cessavit epistola numquam  
 Ire per alternas officiosa vices.  
 Carmina sola tibi memorem testantia curam  
 Non data sunt. quid enim, quæ facis ipse, darem?  
 Quis mel Aristæo, quis Baccho vina Falerno,  
 Triptolemo fruges, poma det Alcinoos?  
 Fertile pectus habes, interque Heliconæ colentes;  
 Uberius nulli provenit ista seges.  
 Mittere carmen ad hunc, frondes erat addere silvis.  
 Hæc mihi cunctandi causa, Severe, fuit.  
 Nec tamen ingenium nobis respondet, ut ante:  
 Sed siccum sterili vomere litus aræ.  
 Scilicet ut limus venas excæcat in undis,  
 Læsaque suppresso fonte resistit aqua;  
 Pectora sic mea sunt limo vitiata malorum:  
 Et carmen vena pauperiore fluit.  
 Si quis in hac ipsum terra posuisset Homerum,  
 Esset, crede mihi, factus & ille Getes.  
 Da veniam fasso; studiis quoque frena remisi:

Ducitur & digitis litera rara meis.  
 Impetus ille sacer, qui vaturn pectora nutrit, 25  
 Qui prius in nobis esse solebat, abest.  
 Vix venit ad partes, vix sumtæ Musa tabellæ  
 Imponit pigras pene coacta manus.  
 Parvaque, ne dicam scribendi nulla voluptas  
 Est mihi: nec numeris neclere verba juvat. 30  
 Sive quod hinc fructus adeo non cepimus ullos,  
 Principium nostri res sit ut ista mali:  
 Sive quod in tenebris numerosos ponere gressus,  
 Quodque legas nulli, scribere carmen, idem est.  
 Excitat auditor studium; laudataque virtus 35  
 Crescit; & immensum gloria calcar habet.  
 Hic mea cui recitem nisi flavis scripta Corallis,  
 Quasque alias gentes, barbarus Ister habet?  
 Sed quid solus agam? quaque infelicia perdam  
 Otia materiâ, surripiamque diem? 40  
 Nam quia nec vinum, nec me tenet alea fallax,  
 Per quæ clam taciturn tempus abire solet;  
 Nec me, quod cuperem, si per fera bella liceret,  
 Oblectat cultu terra novata suo:  
 Quid, nisi Pierides, solatia frigida, restat, 45  
 Non bene de nobis quæ meruere Deæ?  
 At tu, cui bibitur felicius Aonius fons,  
 Utiliter studium quod tibi cedit, ama.  
 Sacraque Musarum merito cole: quodque legamus,  
 Huc aliquod curæ mitte recentis opus. 50

## EPISTOLA III.

## AMIGO INSTABILI.

**C**ONquerar, an taceam? ponam sine nomine crimen?  
An notum, qui sis, omnibus esse velim?  
Nomine non utar, ne commendere querela;  
Queraturque tibi carmine fama meo.  
Dum mea puppis erat validâ fundata carinâ, 5  
Qui mecum velles currere, primus eras.  
Nunc, quia contraxit vultum Fortuna, recodis,  
Auxilio postquam scis opus esse tuo.  
Dissimulas etiam, nec me vis nosse videri:  
Quisque sit, audito nomine, Naso, rogas. 10  
Ille ego sum, quamquam non vis audire, vetusta  
Pene puer puero junctus amicitia.  
Ille ego, qui primus tua seria nosse solebam,  
Qui tibi jucundis primus adesse jocis.  
Ille ego victor, densoque domesticus usu, 15  
Ille ego judiciis unica Musa tuis.  
Idem ego sum, qui nunc an vivam, perfide, nescis:  
Cura tibi de quo querere nulla fuit.  
Sive fui numquam carus, simulasse fateris:  
Seu non fingebas, invenire levis. 20  
Dic age, dic aliquam, quæ te mutaverit, iram:  
Nam nisi justa tua est, justa querela mea est.



Quæ te consimilem res nunc vetat esse priori?

An crimen, cæpi quod miser esse, vocas?

Si mihi rebus opem nullam factisque ferebas, 25

Venisset verbis charta notata tribus.

Vix equidem credo, sed & insultare jacenti

Te mihi, nec verbis parcere, Fama refert.

Quid facis, ah demens? cur, si Fortuna recedat,

Naufragio lacrimas eripis ipse tuo? 30

Hæc Dea non stabili, quam sit levis, orbe fatetur,

Quem summum dubio sub pede semper habet.

Quolibet est folio, quavis incertior aurâ.

Par illi levitas, improbe, sola tua est.

Omnia sunt hominum tenui pendentia filo; 35

Et subito casu, quæ valere, ruunt.

Divitis audita est cui non opulentia Græci?

Nempe tamen vitam captus ab hoste tulit.

Ille Syracosia modo formidatus in urbe,

Vix humili duram repulit arte famem. 40

Quid fuerat Magno majus? tamen ille rogavit

Submissa fugiens voce clientis opem.

Cuique viro totus terrarum paruit orbis,

Indigus effectus omnibus ipse magis.

Ille Jugurthino clarus Cimbrique triumpho, 45

Quo victrix toties Consule Roma fuit;

In cæno latuit Marius cannaque palustri:

Pertulit & tanto multa pudenda viro.

Ludit in humanis divina potentia rebus;

Et certam præsens vix habet hora fidem. 50  
 Litus ad Euxinum, si quis mihi diceret, ibis;  
 Et metues, arcu ne feriare Getæ;  
 I, bibe, dixissem; purgantes pectora succos;  
 Quidquid & in tota nascitur Anticyra:  
 Sum tamen hæc passus: nec si mortalia possem, 55  
 Et summi poteram tela cavere Dei.  
 Tu quoque fac timeas; &, quæ tibi læta videntur,  
 Dum loqueris, fieri tristia posse puta.

## EPISTOLA IV.

SEXTO POMPEJO.

**N**ulla dies adeo est australibus humida nimbis,  
 Non intermissis ut fluat imber aquis.  
 Nec sterilis locus ullus ita est, ut non sit in illo  
 Mixta fere duris utilis herba rubis.  
 Nil adeo Fortuna gravis miserabile fecit, 5  
 Ut minuant nullâ gaudia pace malum.  
 Ecce domo, patriaque carens, oculisque meorum,  
 Naufragus in Getici litoris actus aquas;  
 Quâ tamen inveni vultum diffundere caussam  
 Possem, Fortunæ nec meminisse meæ. 10  
 Nam mihi, cum fulva tristis spatiarer arena,  
 Visa est a tergo penna dedisse sonum.

Respicio: nec corpus erat, quod cernere possem:

Verba tamen sunt hæc aure recepta meâ:

En ego lætarum venio tibi nuntia rerum, 15

Fama per immensas aere lapsa vias.

Consule Pompejo, quo non tibi carior alter,

: Candidus & felix proximus annus erit.

Dixit: &, ut læto Pontum rumore replevit,

Ad gentes alias hinc Dea vertit iter. 20

At mihi, dilapsis inter nova gaudia curis,

Excidit asperitas hujus iniqua loci.

Ergo ubi, Jane biceps, longum reseraveris annum,

Pulsus & a sacro mense December erit;

Purpura Pompejum summi velabit honoris; 25

Ne titulis quidquam debeat ille suis.

Cernere jam videor rumpi penetralia turbâ,

Et populum lædi deficientē loco;

Templaque Tarpejæ primum tibi sedis adiri,

Et fieri faciles in tua vota Deos; 30

Colla boves niveos certæ præbere securi,

Quos aluit campis herba Falisca suis.

Cumque Deos omnes, tum quos impensius æquos

Esse tibi cupias, cum Jove Cæsar erit.

Curia te excipiet, Patresque e more vocati 35

Intendent aures ad tua verba suas.

Hos ubi facundo tua vox hilaraverit ore,

Utque solet, tulerit prospera verba dies,

Egeris & meritas Superis cum Cæsare grates,

Qui caussam, facias cur ita sæpe, dabit; 40  
 Inde domum repetes toto comitante Senatu,  
 Officium populi vix capiente domo.  
 Me miserum, turba quod non ego cernor in illa;  
 Nec poterunt istis lumina nostra frui!  
 Quamlibet absentem, qua possum, mente videbo: 45  
 Adspiciet vultus Consulis illa sui.  
 Dī faciant, aliquo subeat tibi tempore nostrum  
 Nomen; & Heu, dicas, quid miser ille facit?  
 Hæc tua pertulerit si quis mihi verba, fatebor  
 Protinus exsilium mollius esse meum. 50

## EPISTOLA V.

## EIDEM JAM CONSULI.

**I**Te, leves elegi, doctas ad Consulis aures;  
 Verbaque honorato ferte legenda viro.  
 Longa via est; nec vos pedibus proceditis æquis:  
 Testaque brumali sub nive terra latet.  
 Cum gelidam Thracen, & opertum nubibus Hæmon, 5  
 Et maris Ionii transieritis aquas;  
 Luce minus decima dominam venietis in Urbem,  
 Ut festinatum non faciatis iter.  
 Protinus inde domus vobis Pompeja petatur.  
 Non est Augusto junctior ulla Foro. 10

Si quis, ut in populo, qui sitis, & unde, requiret,  
Nomina deceptâ quælibet aure ferat.

Ut sit enim tutum, sicut reor esse, fateri,  
Verba minus certe ficta timoris habent.

Copia nec vobis ullo prohibente videndi 15

Consulis, ut limen contigeritis, erit.

Aut reget ille suos dicendo jura Quirites,  
Conspicuum signis cum premet altus ebur:

Aut populi reditus positam componet ad hastam,  
Et minui magnæ non sinet Urbis opes: 20

Aut, ut erunt Patres in Julia templa vocati,  
De tanto dignis Consule rebus aget:

Aut feret Augusto solitam natoque salutem,  
Deque parum noto consulet officio.

Tempus ab his vacuum Cæsar Germanicus omne 25  
Auferet. a magnis hunc colit ille Deis.

Cum tamen a turba rerum requieverit harum,  
Ad vos mansuetas porriget ille manus:

Quidque parens ego vester agam, fortasse requiret.  
Talia vos illi reddere verba velim: 30

Vivit adhuc, vitamque tibi debere fatetur,  
Quam prius a miti Cæsare munus habet.

Te sibi, cum fugeret, memori solet ore referre,  
Barbariæ tutas exhibuisse vias.

Sanguine Bistonium quod non tepefecerit ensem, 35  
Effectum cura pectoris esse tui.

Addita præterea vitæ quoque multa tuendæ

Munera, ne proprias attenuaret opes.  
 Pro quibus ut meritis referatur gratia, jurat,  
 Se fore Mancipium, tempus in omne, tuum. 40  
 Nam prius umbrosa carituros arbore montes,  
 Et freta velivolae non habitura rates,  
 Fluminaque in fontes cursu reditura supino,  
 Gratia quam meriti possit abire tui.  
 Hæc ubi dixeritis, servet sua dona, rogate. 45  
 Sic fuerit vestrae causa peracta viae.

## EPISTOLA VI.

BRUTO.

Quam legis, ex illis tibi venit epistola, Brute,  
 Nasonem nolle in quibus esse, locis.  
 Sed, tu quod nolle, voluit miserabile fatum.  
 Hei mihi, plus illud, quam tua vota, valet!  
 In Scythia nobis quinquennis Olympias acta est: 5  
 Jam tempus lustris transit in alterius.  
 Perstat enim Fortuna tenax, votisque malignum  
 Opponit nostris insidiosa pedem.  
 Certus eras pro me, Fabiæ lux, Maxime, gentis,  
 Numen ad Augustum supplice voce loqui. 10  
 Occidis ante preces; caussamque ego, Maxime, mortis  
 (Nec fueram tanti) me reor esse tuæ.

Jam timeo cuiquam nostram mandare salutem:

Ipsam morte tua concidit auxilium.

Cœperat Augustus deceptæ ignoscere culpæ; 15

Spem nostram, terras deseruitque simul.

Quale tamen potui de cœlite, Brute, recenti

Vestra procul positus carmen in ora dedi.

Quæ prosit pietas utinam mihi; sitque malorum

Jam modus, & sacræ mitior ira domûs! 20

Te quoque idem, liquido possum jurare, precari,

O mihi non dubia cognite Brute nota.

Nam cum præstiteris verum mihi semper amorém,

Hic tamen adverso tempore crevit amor.

Quippe tuas pariter lacrimas nostrasque videret, 25

Passuros pœnam crederet esse duos.

Lenem te miseris genuit Natura, nec ulli

Mitius ingenium, quam tibi, Brute, dedit.

Ut qui, quid valeas, ignoret, Marte forensi,

Posse tuo peragi vix putet ore reos. 30

Scilicet ejusdem est, quamvis pugnare videtur,

Supplicibus facilem, sœntibus esse trucem.

Cum tibi suscepta est legis vindicta severæ,

Verba velut tinquam singula virus habent.

Hostibus eveniat, quam sis violentus in armis 35

Sentire, & linguæ tela subire tuæ.

Quæ tibi tam tenui cura limantur, ut omnes

Istius ingenium corporis esse negent.

At si quem lædi Fortuna cernis iniqua,

Mollior est animo femina nulla tuo. 40  
 Hoc ego præcipue sensi, cum magna meorum  
 Notitiam pars est inficiata mei.  
 Immemor illorum, vestri non immemor umquam,  
 Qui mala solliciti nostra levastis, ero.  
 Et prius (heu nobis nimium conterminus!) Ister 45  
 In caput Euxino de mare vertet iter;  
 Utque Thyestæ redeant si tempora mensæ,  
 Solis ad Eoas currus agetur aquas;  
 Quam quisquam vestrûm, qui me doluistis ademtum,  
 Arguat ingratum non meminisse sui. 50

---

## E P I S T O L A VII.

### V E S T A L I.

**M**issus es Euxinas quoniam, Vestalis, ad undas,  
 Ut positis reddas jura sub axe locis;  
 Adspicis en, præsens, quali jaceamus in arvo:  
 Nec me testis eris falsa solere queri.  
 Accedet voci per te non irrita nostræ, 5  
 Alpinis juvenis regibus orte, fides.  
 Ipse vides certe glæie concreescere Pontum:  
 Ipse vides rigido stantia vina gelu.  
 Ipse vides, onerata ferox ut ducat Iazyx  
 Per medias Istri plaustra bubulcus aquas. 10



Adspicis & mitti sub adunco toxica ferro,  
 Et telum caussas mortis habere duas.  
 Atque utinam pars hæc tantum spectata fuisset,  
 Non etiam proprio cognita Marte tibi!  
 Tenditis ad primum per densa pericula pilum: 15  
 Contigit ex merito qui tibi nuper honos.  
 Sit licet hic titulus plenis tibi fructibus ingens,  
 Ipsa tamen virtus ordine major erat.  
 Non neget hoc Ister: cujus tua dextera quondam  
 Præniceam Getico sanguine fecit aquam. 20  
 Non neget Ægyptos, quæ, te subeunte, recepta  
 Sensit in ingenio nil opis esse loci.  
 Nam dubium, positu melius defensa manu,  
 Urbs erat in summo nubibus æqua jugo.  
 Sithonio Regi ferus interceperat illam 25  
 Hostis, & ereptas victor habebat opes.  
 Donec flumineâ devecta Vitellius undâ  
 Intulit, exposito milite, signa Getis.  
 At tibi, progenies alti fortissima Dauni,  
 Venit in adversos impetus ire viros. 30  
 Nec mora; conspicuus longe fulgentibus armis,  
 Fortia ne possint facta latere, caves:  
 Ingentique gradu contra ferrumque locumque,  
 Saxaque brumali grandine plura, subis.  
 Nec te missa super jaculorum turba moratur, 35  
 Nec quæ vipereo tela cruore madent.  
 Spicula cum pictis horrent in casside pennis;

Parsque fere scûti vulnere nulla vacat.  
 Nec corpus cunctos feliciter effugit ictus;  
 Sed minor est acri laudis amore dolor. 40  
 Talis apud Trojam Danaïs pro navibus Ajax  
 Dicitur Hecloreas sustinuisse faces.  
 Ut propius ventum est, admotaque dextera dextræ,  
 Resque fero potuit cominus ense geri;  
 Dicere difficile est, quid Mars tuus egerit illic, 45  
 Quotque neci dederis, quosque, quibusque modis.  
 Ense tuo factos calcabas victor acervos;  
 Impositoque Getes sub pede multus erat.  
 Pugnat ad exemplum Primi minor ordine Pili:  
 Multaque fert miles vulnera; multa facit. 50  
 Sed tantum virtus alios tua præterit omnes,  
 Ante citos quantum Pegasus ibat equos.  
 Vincitur Ægyptos: testataque tempus in omne  
 Sunt tua, Vestalis, carmine facta meo.

## E P I S T O L A VIII.

## S U I L L I O.

**L**itera sera quidem, studiis excolte Suilli,  
 Huc tua pervenit, sed mihi grata tamen:  
 Qua, pia si possit Superos lenire rogando  
 Gratia, laturum te mihi dicis opem.

Ut

Ut jam nil præstes, animi sum factus amici 5

Debitor; & meritum, velle juvare, voco.

Impetus iste tuus longum modo duret in ævum;

Neve malis pietas sit tua lassa meis.

Jus aliquod faciunt adfinia vincula nobis,

Quæ semper maneant illabefacta precor. 10

Nam tibi quæ conjux, eadem mihi filia pene est:

Et quæ te generum, me vocat illa virum.

Hei mihi, si lectis vultum tu versibus istis

Ducis, & adfinem te pudet esse meum! 15

At nihil hîc dignum poteris reperire pudore,

Præter Fortunam, quæ mihi cæca fuit.

Si genus excutias; Equites, ab origine prima,

Usque per innumeros inveniémur avos: 20

Sive velis, qui sint, mores inquirere nostros;

Errotem misero detrahe, labe carent. 25

Tu modo, si quid agi sperabis posse precando,

Quos colis, exora supplice voce Deos.

Dî tibi sunt Cæsar juvenis. tua numina placa.

Hac certe nulla est notior ara tibi.

Non sinit illa sui vanas antistitis umquam 25

Esse preces. nostris hînc pete rebus opem.

Quamlibet exigua si nos ea juverit aurâ,

Obruta de mediis cymba resurget aquis.

Tunc ego tura feram rapidis sollemnia flammis;

Et, valeant quantum numina, testis ero. 30

Nec tibi de Pario statuam, Germanice, templum

*Ovidius T. III.*

Gg

Marmore. carpsit opes illa ruina meas.  
 Templâ domus vobis faciant urbesque beatæ;  
 Naso suis opibus, carmine, gratus erit.  
 Parva quidem fateor pro magnis munera reddi, 35  
 Cum pro concessâ verba salute damus.  
 Sed qui, quam potuit, dat maxima, gratus abunde est;  
 Et finem pietas contigit illa suum.  
 Nec, quæ de parvâ Dîs pauper libat acerrâ,  
 Tura minus, grandi quam data lance, valent: 40  
 Agnaque tam ladens, quam gramine pasta Falisco,  
 Victimâ Tarpejos inficit icta focos.  
 Nec tamen, officio votum per carmina facto,  
 Principibus res est gratior ulla viris.  
 Carmina vestrarum peragunt præconia laudum: 45  
 Neve sit actorum fama caduca cavent.  
 Carmine fit vivax virtus; expersque sepulcri,  
 Notitiam seræ posteritatis habet.  
 Tabida consumit ferrum lapidemque vetustas;  
 Nullaque res majus tempore robur habet. 50  
 Scripta ferunt annos: scriptis Agamemnona nosti;  
 Et quisquis contra, vel simul arma tulit.  
 Quis Thebas septemque duces sine carmine nosset,  
 Et quidquid post hæc, quidquid & ante fuit?  
 Dî quoque carminibus (si fas est dicere) fiunt: 55  
 Tantaque majestas ore canentis eget.  
 Sic Chaos, ex illa naturæ mole prioris,  
 Digestum partes scimus habere suas:

Sic adfectantes cœlestia regna Gigantas,  
Ad Styga nimbifero vindicis igne datos. 60

Sic victor laudem superatis Liber ab Indis,  
Alcides capta traxit ab Æchalia.

Et modo, Cæsar, Avum, quem virtus addidit astris,  
Sacrârunt aliquâ carmina parte tuum.

Si quid adhuc igitur vivi, Germanice, nostro 65  
Restat in ingenio, serviet omne tibi.

Non potes officium vatis contemnere vates:  
Judicio prætium res habet ista tuo.

Quod nisi te numen tantum ad majora vocasset,  
Gloria Pieridum summa futurus eras. 70

Sed dare materiam nobis, quam carmina, majus:  
Nec tamen ex toto deserere illa potes.

Nam modo bella geris, numeris modo verba coerces,  
Quodque aliis opus est, hoc tibi ludus erit.

Utque nec ad citharam, nec ad arcum segnis Apollo est, 75  
Sed venit ad sacras nervus uterque manus;

Sic tibi nec docti, nec desunt principis artes:  
Mixta sed est animo cum Jove Musa tuo.

Quæ quoniam nec nos unda submovit ab illa,  
Ungula Gorgonei quam cava fecit equi; 80

Prosit, opemque ferat communia sacra tueri:  
Atque isdem studiis imposuisse manum.

Litora pellitis nimium subjecta Corallis  
Ut tandem sævos effugiamque Getas,

Clausaque si misero patria est, ut ponar in ullo, 85  
Gg 2

Qui minus Ausonia distet ab Urbe, loco.  
 Unde tuas possim laudes celebrare recentes,  
 Magnaque quam minimâ facta referre morâ.  
 Tangat ut hoc votum cœlestia, care Suilli,  
 Numina, pro socero pene precare tuo. 90

## E P I S T O L A IX.

G R Æ C I N O.

U Nde licet, non unde juvat, Græcine, salutem  
 Mittit ab Euxinis hanc tibi Naso vadis.  
 Missaque Dî faciant Auroram occurrat ad illam,  
 Bis senos fascēs quæ tibi prima dabit.  
 Ut, quoniam sine me tanges Capitolia Consul, 5  
 Et fiam turbæ pars ego nulla tuæ,  
 In domini subeat partes, & præstet amici  
 Officium jusso litera nostra die.  
 Atque ego si fatis genitus melioribus essem,  
 Et mea sincero curreret axe rota; 10  
 Quo nunc nostra manus per scriptum fungitur, esset  
 Lingua salutandi munere functa tui.  
 Gratatusque darem cum dulcibus oscula verbis:  
 Nec minus ille meus, quam tuus, esset honor.  
 Illâ (confiteor) sic essem luce superbus, 15  
 Ut caperet fastus vix domus ulla meos.

Dumque latus sancti cingit tibi turba Senatûs,  
 Consulis ante pedes ire viderer Eques.  
 Et quamquam cuperem semper tibi proximus esse,  
 Gauderem lateri non habuisse locum. 20  
 Nec querulus, turbâ quamvis eliderer, essem:  
 Sed foret a populo tunc mihi dulce premi.  
 Prospicerem gaudens, quantus foret agminis ordo,  
 Densaque quam longum turba teneret iter.  
 Quoque magis nôris quam me vulgaria tangant, 25  
 Spectarem, qualis purpura te tegeret.  
 Signa quoque in sellâ nossem formata curuli,  
 Et totum Numidæ sculptile dentis opus.  
 At cum Tarpejas esses deductus in arces,  
 Dum caderet jussu victima sacra tuo; 30  
 Me quoque secreto grates sibi magnus agentem  
 Audisset, media qui sedet æde, Deus.  
 Turaque mente magis plenâ, quam lance, dedissem  
 Ter quater, imperii lætus honore tui.  
 Hîc ego præsentem inter numerarer amicos; 35  
 Mitia jus Urbis si modo fata darent.  
 Quæque mihi solâ capitur nunc mente voluptas,  
 Tunc oculis etiam percipienda foret.  
 Non ita Cœlitibus visum est, & forsitan æquis:  
 Nam quid me pœnæ caussa negata juvet? 40  
 Mente tamen, quæ sola loco non exsulat, utar:  
 Prætextam, fasces adspiciamque tuos.  
 Hæc modo te populo reddentem jura videbit;

Et se secretis finget adesse locis.  
Nunc longi reditus hastæ supponere lustris 45  
Cernet, & exactâ cuncta locare fide.  
Nunc facere in medio facundum verba Senatu,  
Publica quærentem quid petat utilitas.  
Nunc, pro Cæsaribus, Superis decernere grates;  
Albave opimorum colla ferire boum. 50  
Atque utinam, cum jam fueris potiora precatus,  
Ut mihi placetur numinis ira, roges!  
Surgat ad hanc vocem plena pius ignis ab ara;  
Detque bonum voto lucidus omen apex.  
Interea, qua parte licet, ne cuncta queramur, 55  
Hic quoque te festum Consule tempus agam.  
Altera lætitiæ, nec cedens caussa priori,  
Successor tanti frater honoris, erit.  
Nam tibi finitum summo, Græciæ, Decembri  
Imperium, Jani suscipit ille die. 60  
Quæque est in vobis pietas, alterna feretis  
Gaudia, tu fratris fascibus, ille tuis.  
Sic tu bis fueris Consul, bis Consul & ille;  
Inque domo binus conspicietur honor.  
Qui quamquam est ingens, & nullum Martia summo 65  
Altius imperium Consule Roma videt;  
Multiplicat tamen hunc gravitas auctoris honorem;  
Et majestatem res data dantis habet.  
Judiciis igitur liceat Flaccoque tibi que  
Talibus Augusti tempus in omne frui. 70



Ut tamen a rerum cura propiore vacabit,  
 Vota precor votis addite vestra meis.  
 Et, si quem dabit aura sinum, laxate rudentes,  
 Exeat e Stygiis ut mea navis aquis.  
 Præfuit his, Græcine, locis modo Flaccus; & illo 75  
 Ripa ferox Istri sub duce tuta fuit.  
 Hic tenuit Mysas gentes in pace fideli:  
 Hic arcu fissos terruit ense Getas.  
 Hic raptam Trosmin celeri virtute recepit,  
 Infecitque fero sanguine Danubium. 80  
 Quære loci faciem, Scythicique incommoda cœli;  
 Et quam vicino terrear hoste, roga.  
 Sintne litæ tenues serpentis felle sagittæ:  
 Fiat an humanum victima dira caput.  
 Mentiar, an coeat duratus frigore pontus; 85  
 Et teneat glacies jugera multa freti.  
 Hæc ubi narrarit, quæ sit mea fama, require;  
 Quoque modo peragam tempora dura, roga.  
 Nec sumus hæc odio, nec scilicet esse meremur:  
 Nec cum Fortunâ mens quoque versa meâ est. 90  
 Illa quies animo, quam tu laudare solebas,  
 Ille vetus solito perstat in ore pudor.  
 Sic ego sum longe, sic hæc, ubi barbarus hostis,  
 Ut fera plus valeant legibus arma, facit;  
 Rem, queat ut nullam tot jam, Græcine, per annos 95  
 Femina de nobis, virve, puerve queri.  
 Hoc facit, ut misero faveant adsintque Tomitæ;

Hæc quoniam tellus testificanda mihi est.  
Illi me, quia velle vident, discedere malunt;  
Respectu cupiunt hîc tamen esse sui. 100  
Nec mihi credideris: exstant decreta, quibus nos  
Laudat, & immunes publica cera facit.  
Conueniens miseris hæc quamquam gloria non est,  
Proxima dant nobis oppida munus idem.  
Nec pietas ignota mea est: videt hospita tellus 105  
In nostra sacrum Cæsaris esse domo.  
Stant pariter natusque pius, conjuxque sacerdos,  
Numina jam facto non leviora Deo.  
Neu desit pars ulla domûs, stat uterque nepotum:  
Hic aviæ lateri proximus, ille patris. 110  
His ego do toties cum ture precantia verba,  
Eoo quoties surgit ab orbe dies.  
Tota, licet quæras, hoc me non fingere dicet,  
Officii testis, Pontica terra, mei.  
Pontica me tellus, quantis hac possumus ora, 115  
Natalem ludis scit celebrare Dei.  
Nec minus hospitibus pietas est cognita talis,  
Misit in has si quos longa Propontis aquas.  
Is quoque, quo lævus fuerat sub Præsede Pontus,  
Audierit frater forsitan ista tuus. 120  
Fortuna est impar animo, talique libenter  
Exiguas carpo munere pauper opes.  
Nec vestris damus hæc oculis, procul Urbe remoti:  
Contenti tacita sed pietate sumus.

Et tamen hæc tangent aliquando Cæsaris aures. 125

Nil illum, toto quod fit in orbe, latet.

Tu certe scis hoc, Superis adscite, videsque,

Cæsar; ut est oculis subdita terra tuis.

Tu nostras audis inter convexa locatus

Sidera, sollicito quas damus ore, preces. 130

Perveniant istuc & carmina forsitan illa,

Quæ de te misi cœlite facta novo.

Auguror his igitur flecti tua numina; nec tu

Immerito nomen mite Parentis habes.

## EPISTOLA X.

ALBINOVANO.

**H**IC mihi Cimmerio bis tertia ducitur æstas

Litore, pellitos inter agenda Getas.

Ecquos tu silices, ecquod, carissime, ferrum

Duritiae confers, Albinovane, meæ?

Gutta cavat lapidem; consumitur annulus usu; 5

Et teritur pressâ vomer aduncus humo.

Tempus edax igitur, præter nos, omnia perdet?

Cessat duritiâ mors quoque victa meâ.

Exemplum est animi nimium patientis Ulixes,

Jactatus dubio per duo lustra mari. 10

Tempora solliciti sed non tamen omnia fati

Pertulit; & placidæ sæpe fuere moræ.

An grave sex annis pulchram fovisse Calypso,

Æquoreæque fuit concubuisse Deæ?

Excipit Hippotades, qui dat pro munere ventos, 15

Curvet ut impulsos utilis aurâ sinus.

Nec bene cantantes labor est audissè puellas;

Nec degustanti lotos amara fuit.

Hos ego, qui patriæ faciant obliviam, succos

Parte meæ vitæ, si modo dentur, emam. 20

Nec tu contuleris urbem Læstrygonis umquam

Gentibus, obliquâ quas obit Ister aquâ.

Nec vincet sævum Cyclops feritate Phycen,

Qui quota terroris pars solet esse mei!

Scylla feris trunco quod latrat ab inguine monstribus, 25

Heniochæ nautis plus nocuere rates.

Nec potes infestis conferre Charybdin Achæis;

Ter licet epotum ter vomat illa fretum.

Qui quamquam dextra regione licentius errant,

Securum latus hoc non tamen esse sinunt. 30

Hic agri infrondes, hic spicula tincta venenis,

Hic freta vel pediti pervia reddit hiems.

Ut, quâ remus iter pulsus modo fecerat undis,

Siccus contempta nave viator eat.

Qui veniunt istinc, vix vos ea credere dicunt. 35

Quam miser est, qui fert asperiora fide!

Crede tamen: nec te caussas nescire sinemus,

Horrida Sarmaticum cur mare duret hiems.

Proxima sunt nobis plaustrī ducentia formam,  
 Et quæ præcipuum sidera frigus habent. 40  
 Hinc oritur Boreas, oræque domesticus huic est;  
 Et sumit vires a propiore loco.  
 At Notus, adverso tepidum qui spirat ab axe,  
 Est procul; & rarus languidiorque venit.  
 Adde quod hîc clauso miscentur flumina Ponto, 45  
 Vimque fretum multo perdit ab amne suam.  
 Huc Lycus, huc Sagaris, Peniusque, Hypanisque, Cratesque  
 Influit, & crebro vortice tortus Halys:  
 Partheniusque rapax, & volvens saxa Cynapes  
 Labitur; & nullo tardior amne Tyras. 50  
 Et tu, femineæ Thermodon cognite turmæ;  
 Et quondam Grajis Phasi petite viris.  
 Cumque Borysthenio liquidissimus amne Dyraspes,  
 Et tacite peragens lene Melanthus iter.  
 Quique duas terras, Asiam Cadmique sororem 55  
 Separat, & cursus inter utramque facit.  
 Innumerique alii, quos inter maximus omnes  
 Cedere Danubius se tibi, Nile, neget.  
 Copia tot laticum, quas auget, adulterat undas;  
 Nec patitur vires æquor habere suas. 60  
 Quin etiam stagno similis, pigræque paludi,  
 Cæruleus vix est, diluiturque color.  
 Innatat unda freto dulcis, leviorque marinâ est;  
 Quæ proprium mixto de sale pondus habet.  
 Si roget hæc aliquis, cur sint narrata Pedoni, 65

Quidve loqui certis juverit ista modis;  
Detinui, dicam, tempus, curasque fefelli.

Hunc fructum præsens attulit hora mihi.

Abfuimus solito, dum scribimus ista, dolore:

In mediis nec nos sensimus esse Getis. 70

At tu, non dubito, cum carmine Thesea laudes,

Materiæ titulos quin tueare tuæ;

Quemque refers, imitare virum. vetat ille profecto

Tranquilli comitem temporis esse fidem.

Qui quamquam est factis ingens, & conditur a te 75

Vir tanto, quanto debuit ore cani;

Est tamen ex illo nobis imitabile quiddam,

Inque fide Theseus quilibet esse potest.

Non tibi sunt hostes ferro clavaque domandi,

Per quos vix ulli pervius Isthmos erat; 80

Sed præstandus amor, res non operosa volenti.

Quis labor est puram non temerasse fidem?

Hæc tibi, qui perstas indeclinatus amico,

Non est quod linguâ dicta querente putes.

## EPISTOLA XI.

GALLIONI.

**G**Allio, crimen erit vix excusabile nobis,  
Carminè te nomen non habuisse meo.

Tu quoque enim (memini) cœlesti cuspide facta  
 Fovisti lacrimis vulnera nostra tuis.  
 Atque utinam, rapti jactura læsus amici, 5  
 Sensisses ultra, quod quererere, nihil!  
 Non ita Dīs placuit, qui te spoliare pudica  
 Conjuge crudeles non habuere nefas.  
 Nuntia nam luctus mihi nuper epistola venit,  
 Lectaque cum lacrimis sunt tua damna meis. 10  
 Sed neque prudentem solari stultior ausim,  
 Verbaque doctorum nota referre tibi:  
 Finitumque tuum, si non ratione, dolorem  
 Ipsâ jam pridem suspicor esse morâ.  
 Dum tua pervenit, dum litera nostra recurrens 15  
 Tot maria ac terras permeat, annus abit.  
 Temporis officium solatia dicere certi est:  
 Dum dolor in cursu est, dum petit æger opem.  
 At cum longa dies sedavit vulnera mentis,  
 Intempestive qui foveat illa, novat. 20  
 Adde quod (atque utinam verum tibi venerit omen!)  
 Conjugio felix jam potes esse novo.

---

## EPISTOLA XII.

TUTICANO.

**Q**UO minus in nostris ponaris, amice, libellis,

Nominis efficitur condicione tui.

Ast ego non alium prius hoc dignarer honore:

Est aliquis nostrum si modo carmen honos.

Lex pedis officio, naturaque nominis obstant: 5

Quaque meos adeas, est via nulla, modos.

Nam pudet in geminos ita nomen findere versus,

Desinet ut prior hoc, incipiatque minor:

Et pudeat, si te, qua syllaba parte moratur,

Artius adpellem, Tuticanumque vocem. 10

Nec potes in versum Tuticani more venire,

Fiat ut e longâ syllaba prima brevis.

Aut producatûr, quæ nunc correptius exit,

Et sit porrectâ longa secunda morâ.

His ego si vitiis ausim corrumpere nomen, 15

Ridear, & merito peccius habere neger.

Hæc mihi caussa fuit dilati muneris hujus,

Quod meus adjecto frenore reddet ager.

Teque canam quacumque nota: tibi carmina mittam,

Pene mihi puero cognite pene puer. 20

Perque tot annorum seriem, quot habemus uterque,

Non mihi, quam fratri frater, amate minus.

Tu bonus hortator, tu duxque comesque fuisti,

Cum regerem tenerâ frena novella manu.

Sæpe ego correxi sub te censore libellos; 25

Sæpe tibi admonitu facta litura meo est:

Dignam Mæoniis Phæacida condere chartis

Cum te Pierides perdocuere tuæ.



Hic tenor, hæc viridi concordia cæpta juventâ

Venit ad albentes illabefacta comas. 30

Quæ nisi te moveant, duro tibi pectora ferro

Esse, vel invicto clausa adamante putem.

Sed prius huic desint & bellum & frigora terræ,

Invisus nobis quæ duo Pontus habet;

Et tepidus Boreas, & sit præfrigidus Auster, 35

Et possit fatum mollius esse meum;

Quam tua sint lapso præcordia dura sodali.

... Hic cumulus nostris absit, abestque, malis,

Tu modo per Superos, quorum certissimus ille est,

Quo tuus assidue Principe crevit honor; 40

Effice, constanti profugum pietate tuendo,

Ne sperata meam deserat aura ratem.

Quid mandem, quæras? peream, nisi dicere vix est.

Si modo, qui periit, ille perire potest.

Nec quid agam invenio, nec quid nolimve velimve: 45

Nec satis utilitas est mea nota mihi.

Crede, mihi; miseros prudentia prima relinquit:

Et sensus cum re consiliumque fugit.

Ipse, precor, quæras, qua sim tibi parte juvandus:

Quoque viam facias ad mea vota vado. 50

## EPISTOLA XIII.

C A R O.

**O** Mihi non dubios inter memorande sodales,  
Quique, quod es, vere, Care, vocaris; ave.  
Unde saluteris, color hic tibi protinus index,  
Et structura mei carminis esse potest.  
Non quia mirifica est, sed quod nec publica certe;  
Qualis enim cumque est, non latet esse meam.  
Ipse quoque, ut chartæ titulum de fronte revellas,  
Quod sit opus, videor dicere posse, tuum.  
Quamlibet in multis positus noscère libellis;  
Perque observatas inveniere notas. 10  
Prodent auctorem vires, quas Hercule dignas  
Novimus, atque illi, quem canis, esse pares.  
Et mea Musa potest proprio deprensa colore  
Insignis vitiis forsitan esse suis.  
Tam in mala Thersiten prohibebat forma latere, 13  
Quam pulcher Nireus conspiciendus erat.  
Nec te mirari, si sint vitiosa, decebit  
Carmina, quæ faciam pene poeta Getes.  
Ah pudet! & Getico scripsi sermone libellum;  
Structaque sunt nostris barbara verba modis. 16  
Et placui, (gratare mihi) cœpique poetæ  
Inter inhumanos nomen habere Getas.  
Materiam quæris? laudes de Cæsare dixi.

Adjuta

Adjuta est novitas numine nostra Dei.

Nam patris Augusti docui mortale fuisse 23

Corpus, in ætherias numen abisse domos:

Esse parem virtute patri, qui frena coactus

Sæpe recusati ceperit imperii.

Esse pudicarum te Vestam, Livia, matrum, 30

Ambiguum nato dignior, anne viro.

Esse duos juvenes, firma adjumenta Parentis,

Qui dederint animi pignora certa sui.

Hæc ubi non patriâ perlegi scripta Camenâ,

Venit & ad digitos ultima charta meos;

Et caput & plenas omnes movere pharetras, 35

Et longum Getico murmur in ore fuit.

Atque aliquis, Scribas hæc cum de Cæsare, dixit,

Cæsaris imperio restituendus eras.

Ille quidem dixit, sed me jam, Care, nivali

Sexta relegatum bruma sub axe videt. 40

Carmina nil prosunt. nocuerunt carmina quondam:

Primaque tam miseræ caussa fuere fugæ.

At tu per studii communia fœdera sacri,

Per non vile tibi nomen amicitia;

Sic capto Latiis Germanicus hoste catenis, 45

Materiam vestris adferat ingeniis;

Sic valeant pueri, votum commune Deorum,

Quos laus formandos est tibi magna datos;

Quanta potes præbe nostræ momenta saluti:

Quæ nisi mutato nulla futura loco est. 50

Ovidius T. III.

Hh

## EPISTOLA XIV.

## TUTICANO.

**H**ÆC tibi mittuntur, quem sum modo carmine questus  
 Non aptum numeris nomen habere meis.  
 In quibus, excepto quod adhuc utcumque valemus,  
 Nil, te præterea quod juvet, invenies.  
 Ipsa quoque est invisæ salutis: suntque ultima vota,  
 Quolibet ex istis scilicet ire locis.  
 Nulla mihi cura est, terra quam mutet ut ista;  
 Hac quia, quam video, gratior omnis erit.  
 In medias Syrtes, mediam mea vela Charybdia  
 Mittite, præsentem dum careamus humo. 10  
 Styx quoque, si quid ea est, bene commutabitur Istro:  
 Si quid & inferius, quam Stygia, mundus habet.  
 Gramina cultus ager, frigus minus odit hirundo,  
 Proxima Marticolis quam loca Naso Getis.  
 Talia succensent propter mihi verba Tomitæ, 15  
 Iraque carminibus publica mota meis.  
 Ergo ego cessabo numquam per carmina lædi,  
 Plectar & incauto semper ab ingenio?  
 Ergo, ne scribam, digitos incidere cunctor,  
 Telaque adhuc demens, quæ nocuere, sequor? 20  
 Ad veteres scopulos iterum devertor, ad illas,  
 In quibus offendit naufraga puppis, aquas.

Sed nihil admisi; nulla est mea culpa, Tomitæ;

Quos ego, cum loca sim vestra perosus, amo.

Quilibet excutiat nostri monumenta laboris, 25

Litera de vobis est mea quæstæ nihil.

Frigus, & incursus omni de parte timendos,

Et quod pulsetur murus ab hoste, queror.

In loca, non homines, verissima crimina dixi.

Culpatis vestrum vos quoque sæpe solum. 30

Esset perpetuo sua quam vitabilis Ascra,

Ausa est agricolæ Musa docere senis.

At fuerat terra genitus, qui scripsit, in illa:

Intumuit vati nec tamen Ascra suo.

Quis patriam sollerte magis dilexit Ulixæ? 35

Hoc tamen asperitas indice nota loci est.

Non loca, sed mores dictis vexavit amaris

Scepsius Ausonios, atque Roma rea est.

Falsa tamen passa est æquâ convicia mente,

Obfuit auctori nec fera lingua suo. 40

At malus interpret, populi mihi concitat iram,

Inque novum crimen carmina nostra vocat.

Tam felix utinam, quam pectore candidus, essem!

Exstat adhuc nemo saucius ore meo.

Adde, quod Illyrica si jam pice nigrior essem, 45

Non mordenda mihi turba fidelis erat.

Molliter a vobis mea sors excepta, Tomitæ,

Tam mites Grajos indicat esse viros.

Gens mea Peligni, regioque domestica Sulmo,

Non potuit nostris lenior esse malis. 50  
 Quem vix incolumi cuiquam salvoque daretis,  
 Is datus a vobis est mihi nuper honor.  
 Solus adhuc ego sum vestris immunis in oris;  
 Exceptis, si qui munera legis habent.  
 Tempora sacratâ mea sunt velata coronâ, 55  
 Publicus invito quam favor imposuit.  
 Quam grata est igitur Latonæ Delia tellus,  
 Erranti tutum quæ dedit una locum;  
 Tam mihi cara Tomis: patriâ quæ sede fugatis  
 Tempus ad hoc nobis hospita fida manet. 60  
 Dî modo fecissent, placidæ spem posset habere  
 - Pacis, & a gelido longius axe foret.

---

## EPISTOLA XV.

### SEXTO POMPEJO.

**S**I quis adhuc usquam nostri non immemor exstat,  
 Quidve relegatus Naso, requirit, agam;  
 Cæsaribus vitam, Sexto debere salutem  
 Me sciat. a Superis hic mihi primus erit.  
 Tempora nam miseræ complectar ut omnia vitæ, 5  
 A meritis ejus pars mihi nulla vacat.  
 Quæ numero tot sunt, quot in horto fertilis arvi  
 Punica sub lento cortice grana rubent.

Africa quot segetes, quot Tmolia terra racemos,  
 Quot Sicyon baccas, quot parit Hybla favos. 10  
 Confiteor. testere licet. signate Quirites.

Nil opus est legum viribus: ipse loquor.  
 Inter opes & me, rem parvam, pone paternas.

Pars ego sim census quantulacumque tui.  
 Quam tua Trinacria est, regnataque terra Philippo, 15

Quam domus Augusto continuata Foro;  
 Quam tua, rus oculis domini, Campania, gratum,  
 Quæque relicta tibi, Sexte, vel emta tenes:

Tam tuus en ego sum. cujus te munere tristi  
 Non potes in Ponto dicere habere nihil. 20

Atque utinam possis, & detur amicus arvum,  
 Remque tuam ponas in meliore loco!

Quod quoniam in Dis est, tenta lenire precando  
 Numina, perpetuâ quæ pietate colis.

Erroris nam tu, vix est decernere, nostri 25  
 Sis argumentum majus, an auxilium.

Nec dubitans oro; sed flumine sæpe secundo  
 Augetur remis cursus euntis aquæ.

Et pudet, & metuo, semperque, eademque precari,  
 Ne subeant animo tædia justa tuo. 30

Verum quid faciam? res immoderata cupido est.

Da veniam vitio, mitis amice, meo.  
 Scribere sæpe aliud cupiens delabor eodem:

Ipsa locum per se litera nostra rogat.  
 Seu tamen effectus habitura est gratia, seu me 35

Dura jubet gelido Parca sub axe mori;  
 Semper inoblita repetam tua munera mente:  
 Et mea me tellus audiet esse tuum.  
 Audiet & cœlo posita est quæcumque sub illo;  
 Transit nostra feros si modo Musa Getas. 40  
 Teque meæ caussam servatoremque salutis;  
 Meque tuum libra norit & ære minus.

## EPISTOLA XVI.

## AD INVIDIUM.

**I**Nvide, quid laceras Nasonis carmina rapti?  
 Non solet ingeniis summa nocere dies.  
 Famaque post cineres major venit: & mihi nomen  
 Tunc quoque, cum vivis adnumerarer, erat.  
 Cum foret & Marsus, magnique Rabirius oris, 5  
 Iliacusque Macer, sidereusque Peto,  
 Et, qui Junonem læsisset in Hercule, Carus;  
 Junonis si non jam gener ille foret;  
 Quique dedit Latio carmen regale Severus;  
 Et cum subtili Priscus uterque Numa; 10  
 Quique vel imparibus numeris, Montane, vel æquis  
 Sufficis, & gemino carmine nomen habes;  
 Et qui Penelopæ rescribere jussit Ulixen,  
 Errantem sævo per duo lustra mari;



Quique suam Trœzena, imperfectumque dierum 15  
 Deseruit celeri morte Sabinus opus;  
 Ingeniique sui dictus cognomine Largus,  
 Gallica qui Phrygium duxit in arva senem;  
 Quique canit domitam Camerinus ab Hercule Trojam;  
 Quique sua nomen Phyllide Tuscus habet; 20  
 Velivolique maris vates, cui credere possis  
 Carmina cœruleos composuisse Deos;  
 Quique acies Libycas Romanaque prælia dixit;  
 Et Marius, scripti dexter in omne genus;  
 Trinacriusque suæ Perseidos auctor, & auctor 25  
 Tantalidæ reducis Tyndaridosque Lupus;  
 Et qui Mæoniam Phæacida vertit, & unâ  
 Pindaricæ fidicen tu quoque, Rufe, lyræ;  
 Musaque Turranî, Tragicis innixa cothurnis,  
 Et tua cum socco Musa, Melisse, levis. 30  
 Cum Varus Gracchusque darent fera dicta tyrannis,  
 Callimachi Proculus molle teneret iter:  
 Tityrus antiquas & erat qui pasceret herbas,  
 Aptaque venanti Gratius arma daret;  
 Naidas a Satyris caneret Fontanus amatas, 35  
 Clauderet imparibus verba Capella modis.  
 Cumque forent alii, quorum mihi cuncta referre  
 Nomina longa mora est, carmina vulgus habet:  
 Essent & juvenes, quorum quod inedita cura est,  
 Adpellandorum nil mihi juris adest; 40  
 Te tamen in turba non ausim, Cotta, silere,

Pieridum lumen, præsidiumque fori.  
Maternos Cottas cui Messallasque paternos.  
Maxima nobilitas ingeminata dedit.  
Dicere si fas est, claro mea nomine Musa, 45  
Atque inter tantos, quæ legeretur, erat.  
Ergo submotum patria proscindere, livor,  
Desine; neu cineres sparge, cruenta, meos.  
Omnia perdidimus. tantummodo vita reliqua est,  
Præbeat ut sensum materiamque malis. 50  
Quid juvat extinctos ferrum dimittere in artus?  
Non habet in nobis jam nova plaga locum.

**F I N I S.**

I N

P. OVIDII NASONIS  
FASTORUM  
LIBROS NOTÆ.

IN LIBRUM PRIMUM.

- v. 1 *Latium*. Solarem, sive Julianum; cuius systema est dierum CCCLXV cum quadrante diei, h. e. horis sex.
- v. 3 *Cæsar Germanice*. In familia Cæsarum nonnulli *Germanici* cognomen habuere, quorum primus fuit Nero Claudius Drusus Germanicus, Livlæ Drusillæ Augusti uxoris ex Tiberio Nerone filius. Senatus, ob res maxima felicitate in Germania gestas, *Germanici* cognomen ipsi posterisque ejus decrevit. Hujusce filio, qui a patruo Tiberio fuerat adoptatus, suos Fastos inscripsit Ovidius.
- v. 7 *Annalibus*. Commentariis nempe Pontificum; ad quos Annalium confectio pertinebat.
- v. 10 *Pater ... avus*. Tiberius, a quo fuerat adoptatus ipse; Augustus, a quo Tiberius. *Sic etenim D. Augustus* (Justinianus lib. I Institutionum, Titulo XI.) *non ante Tiberium adoptavit, quam is Germanicum adoptasset; ut protinus, adoptione facta, inciperet Germanicus Augusti nepos esse.*
- v. 12 *Druso*. Tiberii filio, adoptivo fratre.
- v. 13 *Cæsaris*. Julii nempe Cæsaris, Pontificis Maximi; qui, anno in ordinem digesto, & aras Numinibus extruxit, & novos antiquis dies sacros addidit.
- v. 20 *Clario ... Deo*. Apollini, in Claro Joniæ oppido templum habenti, ut fontem etiam, & lucum sibi sacrum.
- v. 22 *Civica ... arma*. Dicendi scilicet facultatem.
- v. 17 *Trabeati ... Quirini*. Romuli trabeâ succincti. *Qui-*

- vin*i fuit illi nomen inditum, postquam vita functus Deus habitus est. Trabea vero Romanorum toga erat, quæ purpureas in albo fascias habebat trabium instar intextas, a Regibus primum, deinceps a Consulibus etiam gestari solita.
- v. 42 *Numero*. Quintilis, Sextilis, September &c.
- v. 43 *Avitas ... umbras*. Februarius enim ab eo dictus, quod continuis diebus duodecim pro defunctorum Manibus *Februa*, h. e. Sacrificia expiatoria, fierent. Sunt & aliæ nominis rationes, quas tradit Auctor lib. seq.
- v. 47 *Tria verba*. Fastis tantummodo diebus in jurisdictione exercenda Prætoribus fari licebat tria verba illa sollemnia, *Do, Dico, Addico*; h. e. Do actionem, Dico jus, Addico sive adjudico rem controversam alterutri litigantium.
- v. 50 *Qui &c.* Dies hujusmodi *Intercisus* vocabatur. Ita Varro lib. V de L. L. cap. 41: *Intercisi dies sunt, per quos mane & vesperi est nefas, medio tempore, inter hostiam casam, & extra porrecta, fas: a quo, quod fas tum intercedit, intercisi dies; aut quod tum intercisum nefas.*
- v. 52 *Honoratus*. Vel quod *bonorati* dicuntur, qui Magistratus obtinent; vel quod Edicta Prætorum *Juris Honorarii* nomine vocabantur.
- v. 53 *Est &c.* Dies *Comitiales* indicat; quibus per omnes horas agi cum populo licebat, si nulla penitus Comitia haberentur; secus, id quidem licebat adhuc, sed aliquatantum diei parte. *Septorum* autem nomine loca illa duo in Campo Martio, quo fiebant Comitiae, instar ovilium tabularis inclusa significantur: in quorum altero populus Romanus stabat Comitiorum tempore, antequam ad suffragium vocaretur; in altero Magistratus, qui Comitibus præerat, ejusque ministri.
- v. 54 *Est quoque, &c.* Nundinas significat, quæ fiebant nono quoque die; quæque Lege a Q. Hortensio dictatore lata fastæ factæ sunt, quo rustici, nundinandi causa in urbem convenientes, suas lites peragere possent.
- v. 55 *Vindicat &c.* Ita Macrobius lib. I Saturn. cap. 14: *Us Idus omnes Jovi, ita omnes Kalendas Junoni tributas, & Varronis & pontificalis affirmat auctoritas: quod etiam Laurentes patriis religionibus servant; qui & cognomen Deæ ex ceremoniis addiderunt, Kalendarem Junonem vocantes.*
- v. 58 *Ater*. Dies omnes postridie Kalendas, Nonas, Idus, *Atri* vocabantur, h. e. ominosi, infelices, & in quibus

gravis aliquando Reipublicæ calamitas accidisset. Adpellationis autem ratio est, quod Veteres felicia omnia albo, tristia & infausta atro colore notabant.

- v. 70 *Revera &c.* Templi aditum ad sacra facienda postulat, non ad sinistrum aliquod omen indicandum. Novimus autem aperto Jani templo bellum grassari, clauso pacem florescere.
- v. 71 *Favete.* Hoc loco *re favere* non jam silentium agere significat, sed votis, faustis ominibus, & precibus sacerdotem sacra peragentem aut comitari, aut sequi. Vide Metam. lib. XV, v. 677.
- v. 76 *Spica Cilissa.* Crocus, cujus feracissima Cilicia est.
- v. 79 *Tarpejas ... arces.* Capitolium. Vide Notam in v. 49 Eleg. X Amor. I.
- v. 81 *Novi ... fasces.* Novi Magistratus insignia. *Nova purpura.* Consularis nempe prætexta; quæ & *toga picta*, & *trabea* quoque dicitur.
- v. 82 *Ebur.* Sella curulis, signis ornata, & ebore distincta. Majorum Magistratuum propria erat, nempe Consulum, Prætorum, & Ædilium eorum, qui de Patribus creati forent, quique & *Curules* simpliciter vocabantur.
- v. 120 *Cardinis.* Quatuor sunt cardines, in quibus Mundus vertitur, Septentrionalis & Meridionalis axis, Occiduus & Oriens.
- v. 129 *Patulcius.* Quod belli tempore templi portæ paterent, *Patulcius* vocabatur; *Clusius* autem, quod tempore pacis clauderentur.
- v. 157 *Ignota.* Quod a longinquis regionibus ad nostras inunte vere transvolet.
- v. 163 *Bruma.* Hiemale nempe Solstitium; quod peculiari nomine *Bruma* vocatur ab Auctoribus Latinitatis auriæ. Varro lib. V de L. L. cap. 21 *Tempus a bruma ad brumam, dum Sol redit, vocatur annus.*
- v. 169 *Delibat.* Leviter nimirum attingit, non ut opus revera faciat, sed ut felicitis ominis causâ operis annui & quotidiani specimen exhibeat.
- v. 174 *Velim.* Rectius & significantius, quam *toles*.
- v. 179 *Ad primam &c.* Ut insunt omnia principiis ex prima observatione cantûs, & volatûs avium; sic insunt etiam precibus, quæ Kal. Jan. mihi funduntur.
- v. 185 *Rugosaque carica.* Ficus, in Caria abunde nascens; quæ ibidem siccata in alias regiones vehebatur. Cicero lib. I de Divinat. c. 40: *Quidam in portu caricas Cauno (op-*

- pido Cariz) *adveſtas vendens, cauneas clamitabat.*  
 v. 189 *Stipis.* Strenæ; h. e. muneris, quod ineunte anno felicitis ominis gratia dari solebat. Symmach. lib. X. Epistol. 28: *Ab exortu pene Urbis Martiæ strenarum usus adolevit, auctoritate Tatii Regis, qui verbenas felicitis arboris ex luco Streniæ anni novi auspices primus accepit.* Verbenis postea successerunt æræ monetæ, tandem aureæ.  
 v. 228 *Clavigerum.* Qui dextra baculum, sinistra clavem gerebat, ut supra v. 99.  
 v. 234 *Falcifer.* Quia falx est insigne Saturni, qui culturæ agrorum præsidere videtur, ut ait Festus.  
 v. 239 *Servavit.* Perperam alii *formavit*; nam Janus ipse cuderat æs illud, in quo & biceps effigies ejus, & Saturni ratis inspiciebatur. Macrobius Saturnal. lib. I, cap. 7: *Servavit & in hoc Saturni reverentiam, ut, quoniam ille navi fuerat adveſtus, ex una quidem parte sui capitis effigies, ex altera vero navis exprimeretur, quo Saturni memoriam in posteros propagaret.*  
 v. 258 *Hæc ubi &c.* Duo Jani templa significat, quorum alterum in foro Boario, alterum in Piscario fuit. Dicebatur quoque Janus spatium illud, quod erat inter utrumque Jani templum, & in quo mercatores ac fœneratores frequentissime habitabant. Hujusce loci pars prima, ubi pecunia fœnori dabatur, *summus Janus*, ultima *imus*, media *medius* adpellabatur.  
 v. 260 *Æbali ... Titi.* Tatii Sabinorum Regis, cui prænomen *Titus*. Sabini autem a Lacedæmoniis duxerunt originem, qui ab Æbalo, quondam Laconiz Rege, adpellati fuerunt *Æbalii*. Sic infra Fast. III, v. 230: *Æbalidos matres* sunt Sabinæ a Romulo raptæ.  
 v. 261 *Levis custos.* Tarpeja, Sp. Tarpeji filia, qui Romanæ præerat archi in Capitolio sitæ. Cum hæc arcem Sabinis sub Romulo tradidisset, ab his pro armillis, quas pretium proditiõnis pepigerat, injectis armis obruta est.  
 v. 265 *Cujus.* Reperitur & *custos*, & *civis*, & *Juno*, & *conjux*. Juno autem Romanis, quod a Teucris originem ducerent, erat adhuc infensa.  
 v. 276 *Cum strue.* Festus: *Strues genera liborum sunt, digitorum conjunctorum non dissimilia, qui superjecta panicula in transversum continentur.*  
 v. 282 *Nomine.* Alii *munine*.  
 v. 287 *Ministros.* Cæsares.  
 v. 288 *Neve &c.* Ne scilicet moriens Augustus cesset pace

- ful, cujus fuit auctor. Ita Crispinus cum aliis Interpretibus.
- v. 290 *Duo templa*. Alterum Jovi, alterum Æsculapio, qui filius Apollinis & nepos est Jovis.
- v. 307 *Non ut &c.* Juxta Gigantum fabulam, qui Jovi bellum illaturi montes montibus imposuerant.
- v. 315 *Institerint &c.* Hujusce distichi habetur lectio multiplex. Istam vero secuti, interpretamur ita: Imminentium Nonarum signa dabunt insurgentes imbres & procellæ exoriente Lyra.
- v. 318 *Agonali luce*. Agonalia Festa a Numa fuisse instituta colligitur ex Macrobio Saturnali. Lib. I, cap. 4.
- v. 322 *Agone?* Id est, *Ferio ne hostiam?* M. Varro lib. V de L. L. *Dies Agonales, per quos Rex in regia arietem immolat, dicti ab agone; eo quod interrogatur Princeps civitatis, & princeps gregis immolatur.*
- v. 323 *Ab actu*. Festus: *Agonias hostias putabant ab agendo dictas. Unde agolum pastorale baculum, quo pecudes aguntur.*
- v. 328 *A pecoris &c.* Duâto vocabulo ἀπό τοῦ ἀγῶνις, *trepido, sive timeo.*
- v. 330 *Graja*. Grajis ἀγῶν perinde sonat ac certamen, sive ludus. Ludorum autem Agonalium auctor fuisse creditur Hercules.
- v. 339 *Lacrimatas*. Juxta Myrrhæ fabulam, Metam. lib. X, v. 298 & seqq.
- v. 459 *Noxæ*. Rectius, quam *noxæ*. Legalis autem dicendi formula *noxæ reum alicui dedere* perinde sonat, ac aliquem ob noxam alteri plectendum tradere.
- v. 363 *Aristæus*. Apollinis ex Cyrene filius, de quo vide Virg. Georg. lib. IV prope finem.
- v. 367 *Proteus*. Vide Notam in v. 10 Eleg. XV Amor. II.
- v. 385 *Hyperiona*. Solem.
- v. 387 *Triplici*. Vel quod in trivii Dianæ simulacrum ponebatur a Græcis; vel quod in Cælo Luna, in Silvis Diana, apud Inferos Proserpina vocabatur. *Pro virgine*. Iphigenia; de qua vide v. 27 & seqq. Metam. XII.
- v. 389 *Sapeos*. Thraciæ populos; qui Proserpinæ canes immolabant, ut latratibus suis immissos ab ipsa Manes averterent.
- v. 393 *Festa*. Nempe *Trieterica*; de quibus vide Notam in v. 593 Rem. Amor.
- v. 400 *Quique &c.* Priapus, hortorum rurisque custos.

- v. 404 *Parce*. Alii *large*, at perperam; agitur enim Bacchi convivium.
- v. 411 *Mitia*. Quatuor Codices *mutua*.
- v. 420 *Illa suo*. Rectius alii *illa senem*.
- v. 440 *Hellespontiaco*. Quod esset illi patria Lampsacos, in Hellespontii litore collocata.
- v. 448 *Penna* ... *ore*. Hinc *præpetes* & *orcines* vocabantur, quod & cantu & volatu auspiciū redderent.
- v. 453 *Defensa* ... *Capitolia*. A Gallis Senonibus; qui, nisi anseres clangore suo Manlium excitassent, Capitolium cepissent. Contigit hoc anno ab Urbe condita CCCLXIII. Meminit hujus rei Liv. lib. V, & Plutarch. in Vita Camilli. Anseres porro Isidi, quæ filia fuit Regis Inachi, fuisse sacros tradidere Veteres.
- v. 461 *Nupta*. Alii *Aurora*, nupta Tithono.
- v. 462 *Arcadia* ... *Dea*. Carmentæ; cujus sacrum *pontificale* vocat, quia Festis Carmentalibus Pontifex præesse debebat.
- v. 464 *Virginea*. Huic aquæ nomen inditum a Virgine, quæ militibus sitientibus aquæ venam ad Campum Martium usque permeantem ibique scaturientem indicavit.
- v. 471 *Utroque*. Carmentæ scilicet & Mercurii, vel Pallantis juxta Nostrum.
- v. 490 *Cadmus*. Vide Notam in v. 35 Eleg. XII Amor. III.
- v. 491 *Tydeus* ... *Pagæus Iason*. Ille, quod imprudens Menalippum fratrem occidisset, fugit exsul ad Argivos; hic, interempto Pelidæ injusto sibi sævoque patruo, Corinthum abiit. A Pagasis autem, oppido Thessaliæ, *Pagæus* quoque dicitur.
- v. 499 *Amnem*. Albulam; qui postea Tiberis adpellatus.
- v. 501 *Terenti*. Qui locus est in Campo Martio juxta Festum, Val. Maximum, & Censorinum.
- v. 510 *Novos* ... *Deos*. Æneam, Romulum, & Cæsares.
- v. 520 *Femina*. Vide Notam in v. 21 Eleg. XII Amor. II.
- v. 521 *Palla*. Qui cæsus a Turno vindicem habuit Æneam, cujus armis ipse faverat.
- v. 524 *Obrues* &c. Prædicat Romanorum victorias in Græcos, a quorum Majoribus victi fuerant Majores eorum, nempe Trojani.
- v. 526 *Num minus*. Hæc omnibus potior visa lectio, cujus hic sensus est: Num minus ex isto cinere exorientur, qui totum terrarum orbem sibi subdant?



- v. 529 *Idem*. Jul. Cæsar & Imperator, & Pontifex, & Divus.
- v. 533 *Nepos natusque Dei*. Tiberius, Divi Augusti filius; Divique Jul. Cæsaris nepos; qui, callide simulans, alienus ab Imperii cupiditate videri voluit.
- v. 536 *Julia*. Secunda Cæsaris Augusti conjux, quæ prius dicta Livia Drusilla; at, postea in Juliorum domum mariti adoptione translata, Julia Augusta vocari cæpit. Hanc nepos Claudius consecravit, ut tradit Suetonius lib. V, cap. II.
- v. 541 *Nova tellus*. Quibus a veteri novi hospitis patria *Pallantium* nomen inditum.
- v. 543 *Ecce &c.* Hercules, in oppido Tirynthe natus, clava munitus Geryonem Iberiæ sive Hispaniæ Regem devicit, & ejusdem armenta secum abduxit in eam Italiæ partem, qua regnabat Evander Arcas; atque ibi Cacum, latronem sævissimum, interfecit.
- v. 545 *Togoa*. Ab oppido Arcadiæ, cui nomen *Tegea*.
- v. 550 *Feres*. Alii *boves*, alii *ferox*.
- v. 565 *Calum &c.* Vide Notam in v. 17 Heroid. Epist. IX.
- v. 573 *Typhoea*. Gigantem immensæ magnitudinis, fulmine a Jove percussus, & sub *Ætna* sepultus; ubi adhuc spirare dicitur, & flammam evomere.
- v. 582 *Hic &c.* In foro nempe Boario; quod ita fuerat appellatum vel a bove, quem mactavit Hercules, juxta nonnullos, vel ab æneo bove ibidem collocato.
- v. 589 *Redditaque &c.* Anno U. C. DCCXXVI post orationem illam simulatam, habitam a Cæsare Octaviano de deponendo Imperio, redditæ Senatui & Populo Romano omnes pacatæ provinciæ; quæ nondum sedatæ, a Cæsare retentæ. Augusti vero nomine decoratus fuit Octavianus Id. Jan., at juxta Censorium XVI Kal. Febr.
- v. 593 *Africa &c.* P. Scipio Cornelius ob Africam devictam *Africanus* adpellatus fuit; P. Servilius domitis Cilicibus & Isauris *Isauricus*; Q. Cæcilius Metellus Cretæ Insulâ debellatâ *Creticus*; Q. Metellus alter victo Jugurta & Numidis *Numidicus*; M. Valerius Maximus captâ Messanâ, urbe Siciliæ, *Messana* cognominatus; Scipio demum *Æmilianus* excisa & deleta Numantia *Numantinus*, vel etiam *Africanus*.
- v. 601. *Ex uno*. Ob eximium factum unum. *Torquis adempta*. Alii *adempti*. Cicer. III de Off. T. Manlius, ad Anie-

nem, Galli, quem ab eo provocatus occiderat, torque detractio, cognomen invenit.

- v. 602 *Aut Corvi &c.* M. Valerius, singulari certamine cum Duce Gallorum congressus, quod, adjutore corvo super ejus galeam volante, & hostem unguibus ac rostro petente, victor evaserit, *Corvini* nomen adeptus est.
- v. 604 *Nomine major.* Idest Jul. Cæsar, omni nomine ac titulo major. Pompejus autem *Magni* nomen a magnis rebus gestis invenerat.
- v. 609 *Sancta &c.* In adulationem Augusti ait Auctor illum eo nomine vocari, quo & sancta & templa a Patribus vocata fuere; immo & *augurium* ab *augustus* originem trahere contendit. Aliter attamen Suet. in Aug. cap. VII: *Loca religiosa, & in quibus augurato quid consecratur, augusta dicuntur ab auctu, vel ab avium gestu gustu.*
- v. 614 *Querna corona.* Quæ & *corona civica* dicebatur, ob servatum ab se civem alicui dari solita. Pendebat igitur ante Augusti fores inter duas lauros hujusmodi corona, ut servatorum ab eo civium esset indicium.
- v. 618 *Parrhasia ... Dea.* Carmentæ; quæ *Parrhasia* dicitur ab Arcadiæ urbe cognomine. *Relata.* Idest renovata; nam sacra eidem fiebant etiam III Id. Jan., ut supra vidimus.
- v. 620 *Ab Evandri ... parente.* Carmentâ, literæ *m* in *p* commutatione facta.
- v. 629 *Scortea &c.* Varro lib. VI de L. L. *Dicimus scortea ea, quæ ex corio & pellibus sunt facta. Inde in aliquot sacris ac sacellis scriptum habemus, Ne quid scortum ad-bibeatur, ideo ne morticinum quid adsit.*
- v. 638 *Quâ fert &c.* Templum Concordiæ inter Forum & Capitolium erat prope templum Junonis Monetæ, ad quod a templo Concordiæ centum gradibus conscendebatur. *Moneta* porro dicta fuit a *monendo*, quod Romanos propter terræmotum sue plenâ rem divinam facere monuisset.
- v. 640 *Sacrata ... manus.* Tiberii scilicet & Liviae; qui Concordiæ templum, olim a M. Furio Camillo conditum, restituere.
- v. 647 *Libarti.* Idest, libanda Diis obtulisti.
- v. 652 *Per juvenis &c.* Indicat Solis transitum in Aquarium. Illum vero juvenem Ganymedem fuisse fabulantur, & quod Jovis pincerna fuerit, ab eodem inter astra translatum.
- v. 655 *Sidere &c.* Post occasum Lyræ, nocte sequenti. *ignis*

- gnis* sive sidus occultitur, quod in medio Leonis pectore micat.
- v. 658 *Sementiva*. Ad sementem pertinens. Sementivæ porro feriæ, quod non haberent statum in anno diem, a Pontificibus indicebantur; in iisque feriis sacrificium Deabus Telluri & Cereri in templo Telluris ejusdem offerebatur.
- v. 670 *Pagani* ... *focis*. Quivis pagus suum foculum habebat, ex instituto Servilii Tullii.
- v. 693 *Bis*. Nam primò far Veteres torrebant; deinde sub mola in farinam redactum, panē jam factō, coquebatur iterum in furnis: sic *bis tostum* alibi Noster adpellat.
- v. 707 *Fratres*. Tiberius & Drusus.
- v. 711 *Frondebis Aëtiacis*. Laureis nempe frondibus, Apollini Aëtio sacris. Est autem laurus non minus insigne pacis, quam victoriæ: & ad celebrem victoriam illam respexisse videtur Auctor, quam retulit Augustus apud Aëtiū in M. Antonium & Cleopatram; quibus devictis, clausit non multo post Jani templum, pacemque Romæ restituit.
- v. 719 *Pacalibus*. Quæ fiunt in arā Pacis.

## IN LIBRUM II.

- v. 1 *Hinc*. Optimi Codices *it*, & aptius quidem.
- v. 18 *Pacando &c.* Pugnat eo tempore Germanicus cum sævissimis Germaniæ populis.
- v. 21 *Rege*. Nempe sacrorum; qui & *Sacrificulus* dicebatur. *Flamine*. Sacerdote. Tres primum fuere *Flamines*, *Dialis*, *Martialis*, *Quirinalis*, h. e. Jovis, Martis, & Quirini. Progressu temporis duodecim alii creati fuere, & *Flamines minores* adpellati.
- v. 23 *Lictor*. Festus: *Flaminius lictor est, qui Flamini Diali sacrorum causâ præsto est*.
- v. 25 *Arbore pura*. Alii pinum intelligunt, alii laurum, alii quamlibet arborem nec fulmine tactam, nec vento furente læsam.
- v. 27 *Flaminicam*. Alii *Flaminiam*, h. e. Flaminis conjugem.
- v. 39 *Aëtoriden*. Patroclum, Aëtoris nepotem; qui Clesonymum interemerat.

- v. 42 *Phasida*. Medeam, a Phaside Crichorum fluvio ita dictam. Hanc *Ægeus* sibi duxit uxorem, expiatam ratus.
- v. 43 *Amphiaraidas*. Alcmaeon, Amphiarai filius. Vide Notam in v. 551 El. X Amor. I. *Naupactoo*. Quod suat prope Naupactum, urbem Ætoliz.
- v. 55 *Phrygia* ... *Matri*. Cybeli ex Phrygia Romam delata, ut alibi narrat Auctor.
- v. 56 *Sospita*. Juno; quæ adorabatur a Romanis titulo *Sospita*, sive conservatricis Imperii.
- v. 60 *Ducis*. Augusti.
- v. 69 *Penetræ Numa*. Vestæ Templum prope Numæ Regiam.
- v. 81 *Sed Ecce*. Amphitriti scilicet indicavit amorem Neptuni.
- v. 82 *Gum Domino*. Arione Methymnæ indigenâ, quæ Lesbii urbs est.
- v. 110 *Pennâ*. Per synecdochen pro sagittâ. Sunt qui in Jonia cygnos habere dicant pennam ceteris duriores, quæ frontem ipsis perforat, & mortem adferat.
- v. 139 *Tu rapis Ecce*. Sabinarum raptus mentionem facit, & asyli, quod Romulus cujuscumque fursus hominibus aperuerat: Augustus autem leges sanxit de pudicitia, gravesque pœnas imposuit adulteris; & maleficos in urbem recipi vetuit.
- v. 145 *Puer Idæus*. Vide Notam in v. 652 lib. præced.
- v. 151 *Custodem Ecce*. Vide Notam in v. 55 Art. II. Sequentem Fabulam narrat etiam Metam. II.
- v. 173 *Lycaoni*. Lycaonis filia.
- v. 194 *Hic Ecce*. Insulæ, quam Tiberis format, angulo superiorè positum fuit Fauno templum, anno ab U. C. DIX.
- v. 216 *Gaca*. Et *tecla*, & *operta*, & *sava* reperiatur.
- v. 220 *Repente*. Plurimi Codices *repente*; quæ sane lectio magis aridet.
- v. 224 *Quosque Ecce*. Rectius, quam *Quodque vident iterant*. Unus Heinsii *cadunt*, alius *feriunt*.
- v. 231 *Laurentibus*. Alii *latratibus*. Admissa tamen lectio præferenda; quod sapissime & ab aliis Auctoribus optimis Laurentium aprorum mentio fiat.
- v. 237 *Herculeæ*. Vel quia Fabii trahebant originem ab Hercule & Vindunâ Evandri filiâ, vel quia generosis viribus Herculem imitabantur.
- v. 241 *Maxime*. Qui plurimis victoriis superbientem Anni-

- balcm Dictator creatus cunctando fregit, & ad incitas redactam ac pene collapsam Rempublicam restituit.
- v. 264 *De nullo &c.* Antequam fici Autumni tempore maturerant, ægri sunt sexaginta diebus juxta Plinium corvi, & ob sitim præcipue.
- v. 271 *Pana.* Eundem ac Faunum, in cujus honorem XV Kal. Mart. fiebant *Lupercalia*, ita a Lupercis Fauni Sacerdotibus adpellata.
- v. 273 *Stymphalides.* Stymphalus urbs in Arcadia, & ejusdem nominis amnis.
- v. 277 *Equarum.* Alii *aquarum*; & lectionem suam tuentur variis Græcorum Auctorum locis, ex quibus Pani Deo si-ve Fauno vota a piscatoribus facta colligitur.
- v. 282 *Dialis.* Proprie flamen si-ve sacerdos est Jovis; qui tamen Pani quoque sacrificabat. Pan autem ab aliquibus universa natura creditus, & idem ac Jupiter.
- v. 305 *Domina.* Omphali; quæ *Maonis* infra dicitur, quod erat ex Mæonia, si-ve Lydia.
- v. 324 *Pta.* Alii *quia*.
- v. 341 *Ut sape &c.* Alii *sepe*. Virg. Æn. II, v. 329:  
*Improvium aspris veluti qui sentibus anguem*  
*Pressit bumi nitens, trepidusque repente refugit.*
- y. 375 *Fabii*que. Romuli temporibus *Fabii* si-ve *Fabiani* & *Quintilii* seu *Quintiliani* vocabantur Luperci, a Fabio & Quintilio præpositis suis. *Fabii* fuere Remi socii, Romuli *Quintilii*.
- v. 380 *Quod bene cessit, habet.* Alii *cui*; alii *quis bene cessit, habent*.
- v. 383 *Ilia.* Quæ & *Rhea* & *Sylvia* quoque dicitur, Numitoris filia est, neptis Amulii. Hic, postquam Fratri regnum abstulit, & omnem ejus stirpem virilem necavit, neptem per speciem honoris Vestalem fieri coegit. At cum furtim a Marte compressa Romulum & Remum genuisset; geminos Tiberis undis exponi impius patruus imperavit, & illam sepeliri vivam; quæ pœna Vestalibus in adulterio deprehensis infligi solebat. Romulus attamen & Remus a Lupa servati, cum adolevissent, Amulio pulso & obtruncato, Numitori regnum restituere.
- v. 452 *Rumina &c.* Sunt qui legant  
*Romula nunc ficus, Rumina ficus erat.*  
 Sed hoc est contra-historiam. Nam Liv. lib. I, c. 4: *In proxima alluvie, ubi nunc ficus Ruminalis est (Romularem vocatamferunt) pueros exponunt.* Dictam voluit.

- a *rumine*, idest mamma; quod ibi lac infantibus illis lupa præbuerit.
- v. 418 *Fingit*. H. e. format: aptius, quam *lingit*.
- v. 420 *Nec sibi promissi*. Alii *Et sibi promissi*. At acutior est & elegantior admissa lectio. Aluntur scilicet lacte lupino, quod illis ita expositis nemo promittere fuisset ausus.
- v. 423 *Arcadio ... monte*. Lycæo; nam Græce Λύκος significat *Lupus*, Λύκαιος autem *Lupinus* sive *Lupercus*, Λύκαια tandem *Lupercalia*.
- v. 427 *Fecunda*. Morem aperit, juxta quem Romanæ mulieres pellibus caprorum a Lupercis se cædi sinebant, quod inde fieri fecundæ censerent.
- v. 436 *Junonis &c.* Junonis nempe Lucinæ.
- v. 441 *Caper hirtus*. Alii *sacer hircus*.
- v. 457 *Levis*. Liber nimirum a pondere Solis, qui intrat in Pisces.
- v. 461 *Dione*. Proprie Veneris est mater; at sæpissime ab Auctoribus optimis pro Venere sumitur.
- v. 493 *Sol fugit*. Notarunt hanc Solis defectionem in Romuli excessu Veterum omnium monumenta. Vide Scalig. de Emend. Tempor. lib. V, pag. 395.
- v. 503 *Trabeaque*. Vide Notam in v. 37 super. libri.
- v. 510 *Populos*. Sabinum scilicet & Romanum. Alii *Patres*, quidam *populum*.
- v. 512 *Cersi*. H. e. annui iidemque statim, quibus Quirinalia celebrabantur in Quirinali colle, qui prius Agonus adpellabatur. *Paterna*. Quia Romulo dicata, qui fuit Romanorum pater & auctor.
- v. 513 *Stultorum*. Festus docet, Stultorum ferias adpellari Quirinalia; quod Quirinalium die Quirino sacrificent ii, qui ignoraverunt suorum Fornacalium sacrorum diem: & sic moræ piaculum quibus mittebatur feriis expiabant. Fornacalia porro a Numa Pompilio instituta fuere.
- v. 527 *Curio ... Maximus*. XXX Curionum Εἰσπρχος, siue princeps; cujus auctoritate Curie omnes curionesque reguntur.
- v. 537 *Projeclis*. Coronæ post exacta convivia, in quibus solebant adhiberi, a domum abeuntibus projiciebantur.
- v. 540 *Via*. Veteres prope vias sepulcra ponebant. Apulejus: *Portam civitatis egressi monumentum quoddam conspicimus*.
- v. 549 *Nam dicitur &c.* Tot fuere Romæ cadavera, in su-

- burbanis rogis de more cremanda, ut calor & vapor ipse ad Urbem usque pervenerit.
- v. 558 *Pinea tada*. Qua prælucente mariti domum nova nupta ducebatur. Uxoris autem foculo, non viri, accendi solebat.
- v. 560 *Hasta recurva*. Qua novæ nuptæ caput comebatur a viro. Hasta porro illa vel ominabatur fortes liberos nascituros, vel imperium viri in uxorem significabat. Alii aliter.
- v. 575 *Rbombo*. Muliebri instrumento, cui involvebant Sægæ licia sive fila incantata.
- v. 577 *Quodque &c.* Mænæ quoque, pisciculi cujusdam marini, caput pice adstrictum, acuque trajectum, *torres in igne*; iisque perfectis incantamentis, vincit hostium linguas, ne possint in jurgia prorumpere.
- v. 583 *Dea Muta*. Laëtantius lib. I de Falsa Religione cap. 20: *Quis, cum audiat Deam Mutam, risum tenere queat? Hanc esse dicunt, ex qua sint nati Lares; & ipsam Larum nominant vel Larundam. Qua prestare colenti potest, qua loqui non potest?*
- v. 588 *Cognatas*. Erat enim Numici fluminis Nympha.
- v. 598 *Quaque &c.* Nymphæ scilicet Anienis Fluvii, cui post editos Romulum & Remum nupsit Ilia.
- v. 601 *Ex vitio*. Ex loquacitate. Hinc Græce *Δαλία*, quod a *λαλέω* loquor. *Almo*. Fluvius prope Romam.
- v. 617 *Caristia*. Solemne convivium a majoribus institutum, cui præter cognatos & affines nemo adhibebatur; ut, si qua inter necessarios querela esset orta, apud sacra mensæ & inter hilaritatem animorum, fautoribus concordie adhibitis, tolleretur. Ita Val. Max. lib. II, c. 7.
- v. 617 *Tantalida*. Tantalii nepotes, Atreus & Thyestes; de quibus vide Notam in v. 205 Heroid. Epist. XVI. *Iasonis uxor*. Medea; de qua vide Notas in v. 154 Heroid. Epist. VI, & in v. 2 ac 135 Heroid. XII.
- v. 618 *Et qua &c.* Ino Athamantis uxor, quæ sererent, *ruricolis semina rosta dedit*. Cum frustra seges expectaretur, sterilitatem illam iræ Deorum adscribendam esse de industria discitabat, eosdemque placari non posse, nisi sanguine Phryxi & Helles; de quibus vide Notam in v. 123 Heroid. Epist. XIX.
- v. 619 *Et Soror &c.* Vide Notam in v. 153 Heroid. XV.
- v. 634 *Incinctos*. Quia Lares succincti exhibebantur, tam marmore sculpti, quam ære fusi.

- v. 663 *Thyreatida terram*. Cum de Thyreate agro bellum esset inter Argivos & Lacedæmonios, res pugnae CCC milium utrinque commissa est; quibus omnibus interfectis, Othryades Spartanus, qui solus evaserat, se interemit & aliis se comitem dedit.
- v. 685 *Traxit &c.* Dies enim ille dictus fuit *Regifugium*.
- v. 691 *Trium minimus*. Sextus Tarquinius; qui vim etiam intulit Lucretiæ, ut infra narratur.
- v. 725 *Juvenis*. Alii Regem Tarquinium intelligunt, & legunt *juvenes socios*.
- v. 733 *Cui &c.* Tarquinius alius, Egerii filius, Regis propinquus; qui Collatinus cognominatus est, quod ejus pater diu Collatiæ a Tarquinio Prisco captæ præfectus fuerat.
- v. 739 *Nurum Regis*. Sexti Tarquinii conjugem.
- v. 757 *Collatina*. Alii *Collatini*; qui Lucretiæ maritus.
- v. 803 *Urguetur*. Eleganti prorsus Gracismo, ut sæpe alibi Noster. Inapte igitur alii *urgentur*.
- v. 837 *Tandemque &c.* Factis scilicet ostendit, se non esse stupidum & hebetem, ut inditum *Bruti* cognomen indicat.
- v. 851 *Consul*. L. Junius Brutus, & L. Tarquinius Collatinus, acerrimi Libertatis vindices.

## IN LIBRUM III.

- v. 12 *Aquas*. Numici; *Vesta enim*, juxta Servium, *libare non nisi de hoc fonte licebat*. Hunc fontem ad templi quoque lotionem Vestalibus adsignaverat Numa Pompilius.
- v. 35 *Patrus*. Vide Notam in v. 383 super. libri.
- v. 43 *Emeritis*. Metaphora a militibus desumpta; qui, cum suo munere plene perfundi vacationem militiæ obtinerent, *emeriti* milites dicebantur.
- v. 55 *Larentia*. Uxor Faustuli, quæ Romulum & Remum lactavit & aluit, *Lupa* dicta, quod fuerit femina vulgato corpore sive prostituta. Hinc origo Fabulæ, superiore libro descriptæ v. 413 & seqq.
- v. 58 *Acceptus genitis*. Quod eo mense Saturnalia celebrentur, lautisque conviviis indulgeatur Genio, voluptatis Deo.
- v. 64 *Actos*. Abactos scilicet a prædonibus. *In sua rura*. Alii *in sua jura*.



- v. 82 *Tellus Hyppipylea*. Lemnos insula; in qua regnavit Hypsipyle, Thoantis filia.
- v. 84 *Manalis ora*. Arcadia, a Mænalo monte sic adpellata.
- v. 91 *Inter &c.* Hæc ita construenda videntur: Tempora constant inter Aricinos, & mœnia Albana, & facta &c. Sensus autem hic esset: Et Aricia, & Alba, & Tusculum, a Telegono conditum, Martis mensem faciunt ordine tertium.
- v. 94 *A tribus hunc primum*. H. e. quartum.
- v. 112 *Constabat &c.* H. e. ea tamen sidera Deorum instar habebant veteres Romani. Alii aliter legunt, & interpretantur.
- v. 113 *Signa*. Ludit Ovidius ambiguitate vocis, quæ hîc cœlestia signa significat, & versiculo sequente Romana vexilla. Primis autem Romæ temporibus erant ea signa quidam fœni inanipuli, de quibus sic infra: *Pertica &c.* Hinc in re militari *manipulus* sive *maniplus* erat agmen militum in centenos homines distributum.
- v. 120 *Mensibus &c.* Lustra constant annis quinque; decem mensibus quondam constabat annus; ergo ea lustra decem mensibus erant minora præ nostris.
- v. 127 *Pares*. Ætate scilicet & robore; quos divisit in decurias, & e singulis decuriis elegit *Hastatum*. Dicebantur *Hastati*, quod hasta pugnarent; sic alii *Principes*, quod primi pugnam intrent; & quidam *Pilani* sive *Triarii*, quod in tertio aciei loco collocati pila conjicerent.
- v. 131 *Quin etiam &c.* Romulus in tres tribus Populum Romanum distribuit, Titiensium scilicet, Ramnium, & Lucerum; singulas vero tribus in decem curias. *Titienses* traxere nomen a Tito Tatîo, Sabinorum Rege; *Ramnes* sive *Ramnenses* a Romulo; *Luceres* seu *Lucerenses* a Lucero, Rege Ardeæ, qui auxilio fuerat Romulo adversus Tatium belligèranti.
- v. 139 *Regis*. Nempe Sacrorum, sive Sacrificuli.
- v. 140 *Curia Prisca*. Triginta Curias intelligit, sive sacra illa loca, in quibus sacrificia offerebat Rom. Populus in triginta curias distributus. Addidit *Prisca*, ut ab aliis triginta discerneret, ob auctum Populum deinceps institutis.
- v. 146 *Anna*. Dea, quæ præsidet annis. Huic sacrificari cœptum est, ut *annare* & *perennare* liceret, juxta Macrobium.
- v. 148 *Ad spatium &c.* Usque ad annum DC ab Urbe condita, Q. Fulyio & T. Annio Coss. qui primi Kal. Jan.

suum magistratum inierunt. Ac ille dies deinceps sollemnis ineundis Magistratibus est habitus.

- v. 153 *Sannio*. Vide Notam in v. 60 Metam. XV.
- v. 156 *Cæsar* &c. Macrobius lib. I Satur. ita: *Nam Julius Cæsar, ut siderum motus, de quibus non indoctos libros reliquit, ab Ægyptiis disciplinis hausit; ita hoc quoque mutuatus est, ut ad Solis cursum finiendi anni tempus extenderet.*
- v. 165 *Lustrum*. Hic pro spatio annorum quatuor accipitur. Hinc bissextus annus est, in quo dies ille intercalaris inseritur.
- v. 170 *Festa*. Quæ a matronis dicta fuere *Matronalia*. Hinc Juvenalis Kal. Martias nuncupat *femineas*; & Tertullianus de Idololatria *matronales ferias*.
- v. 201 *Et quos* &c. Cenninenses, Crustumerini, & Antennates. Fusis istis a Romulo, secuta est Sabinorum rabies; quæ tamen, fati Urbis sic volentibus, mulierum interventu & lacrimis sedata fuit, diviso inter Romulum ac Tatium imperio.
- v. 205 *Dictam*. H. e. conditam, sive constitutam ab Hersilia, uxore Romuli.
- v. 230 *Æbalides*. Sabinæ a Romulo raptæ. Sabini enim a Laconibus, qui & Æbalii dicebantur, traxerunt originem. Alii legunt *Italides*.
- v. 245 *Quod excubias* &c. Romulus, cui dubia Titi Tatii fides erat, excubias ad custodiam sui fieri jussit ad Esquilinum collem sive Esquilias; quas *alii scripserunt ab excubiis Regis dictas*, juxta Varronem.
- v. 264 *Sacer*. Quia positum apud illum fuerat Dianæ simulacrum; quod Orestes cum Pylade Ariciam, occiso Rege Thoante, transtulerat.
- v. 265 *Hippolytus*. Vide Notas in v. 10 Heroid. Epist. XXI, & in v. 492 Metam. XV.
- v. 271 *Regna* &c. Colligimus ex Pausania in Corinthiacis Dianæ Aricinæ Sacerdotes fuisse servos, eosdemque fugitivos; & alios aliis invicem successisse, prout singulari certamine inter sese dimicantes victores evaserant. Sacerdotium autem illud *regnum* etiam adpellabatur, & *Rex nemorensis* ipse Sacerdos.
- v. 274 *Exiguus*. Ob aquam nimis gelidam.
- v. 335 *Donaria*. H. e. altaria. *Sacraria* Patavinus unus.
- v. 337 *Ambage remotæ*. Sensus est: Quamvis minime sit

- nsus *ambage*, h. e. longo & obscuro verborum circuitu, vel captiosa sermonis perplexitate; verum tamen abdicat &c.
- v. 343 *Risit*. Quod ambiguis propositionibus se captum vidit a Numa. *Hic, &c.* Cepa scilicet, capillis, & anima piscis expiabis & avertes fulmina. *Procurer*. Alii *repetlar*.
- v. 377 *Ancile*. Quasi *amicum*; ab *am* circum, & *casus*. In adsignanda tamen *ancilis* vera forma Auctores discrepant.
- v. 378 *Quaque*. Alii *Quemque*.
- v. 381 *Plura*. Undecim, quibus cœleste misceretur.
- v. 397 *Apicati*. Pileo nempe texti. *Cincta*. Flaminicâ veste velata, interprete Festo. Alii aliter legunt.
- v. 402 *A vento*. Alter *Nóτιος*; h. e. *Australis*, Βόρμος alter sive *Boreus* adpellatus.
- v. 409 *Satyris*. Rectius, quam *Satyro*. Carpit enim Nympham vulgato corpore infamem.
- v. 412 *Nomen*. Nam Græce vitis ἄμπελος adpellatur.
- v. 418 *Cratera*. Alii *Gratare*; haud inepte.
- v. 429 *Una &c.* Mensi Martio hic tantum honos est, quod ejus Nonis ante duos Asyli lucos inter arcem & Capitolium ædes Vejovis a Romulo dicata est. Legunt alii, eodem penitus sensu, *Una nota est Martis Nonis: sacrata &c.*
- v. 443 *Capra*. Vide Notam in v. 188 Heroid. Epist. XVIIIF.
- v. 446 *Vescaque*. Vocabulum ex *ve* & *esca* conflatum. Festus in *Vesculi* hæc habet: *Ve* syllabam rei parvæ præponebant: unde *Vejovem*, parvum *Jovem*, & *vegrandem fabam*, minutam dicebant.
- v. 449 *Vallabunt*. H. e. cingent. Alii *variabunt*; ut enim flores prata variant & distinguunt, ita stellæ cælum.
- v. 450 *Gorgonei ... equi*. Pegasi; quem alatum ex Medusæ sanguine, quam Perseus interemit, natum asserunt. Cum a Bellerophonte captus in Heliconæ evolasset, saxum ungula feriens, fontem aperuit; qui ex eo Hippocrene, idest fons equinus, est adpellatus. In cælum tandem evolasse dicitur, & inter sidera constitutus.
- v. 459 *Coronam*. Vide Notam in v. 114 Heroid. VI.
- v. 460 *Thereo crimine*. Vide Notam in v. 59 Heroid. IV.
- v. 468 *Filia Regis*. Ignoratur utriusque nomen.
- v. 476 *Relata ... est*. Nempe rediit. Alii *novata*; quidam *iterata*.
- v. 493 *At, puto*. Ironice; namque Indæ fuscæ sunt.

- v. 499 *Matrem*. Pasiphaen; de qua vide Notam in v. 37 Heroid. IV.
- v. 500 *Tua*. Vide notam in v. 33 Heroid. XIII.
- v. 503 *Ortus &c.* Vide Notam in v. 37 Eleg. III Amor. III.
- v. 519 *Alter*. Namque prima fiebant III Kal. Mar.
- v. 522 *Cælius*. Festus: *Martialis Campus in Cælio monte dicitur, quod in eo Equiria solebant fieri, si quando aqua Tiberis Campum Martium occupasset.* Campus minor etiam vocabatur.
- v. 524 *Haud procul &c.* Ubi nemus est Annæ Perennæ. *Advena*. Quod a Thuscæ montibus ducit originem. Hinc alias *Thuscus amnis* adpellatur.
- v. 538 *Multaque &c.* Res nempe multas saltatione exprimit, sive representat. Vide Notam in v. 501 Art. I. Alii *Cultaque*, sed perperam; neque enim *duris*, h. e. incompositis, choreis *non culta* conveniet.
- v. 553 *Elissa*. Nomen Didoni a Pœnis inditum post mortem, & significat *virago*; quod se fortiter interfecerit, ne cui nuberet Africæ Regum. Vide Notam in v. 3 Heroid. VII.
- v. 565 *Pede ... æquo*. Vel secundum cursum intellige, vel funem, quo imus veli angulus utrinque religatur ad latera navis, ut expansum sit, ventumque concipiat.
- v. 582 *Purus*. H. e. patens: sic Met. III, v. 709:  
*Purus ab arboribus, spectabilis undique campus.*
- v. 595 *Phœnissa*. Anna; quæ traxerat originem ex Phœnicia.
- v. 617 *Nec &c.* Sensus est: Nec rebar Didonem sibi necem illaturam.
- v. 620 *Tartarus &c.* Ad Inferos namque descenderat, duce Sibylla. Vide Virg. Æn. VI, v. 450.
- v. 631 *Regnum*. Nam secuta Didonem Tyro aufugerat, ut impii fratris (Pygmalionis) fraudes eluderet.
- v. 649 *Sidonis*. Anna; ex Sidone urbe Tyri.
- v. 658 *Inachiam ... bovem*. Io, Regis Inachi filiam; de qua vide Notam in v. 85 Heroid. XIV.
- v. 659 *Atlantida*. Putant aliqui Annam fuisse vel Pleionem Atlantis conjugem, vel Majam ejusdem filiam.
- v. 663 *Plebs &c.* Plebs ob feneratorum avaritiam ære alieno oppressa sæpe postulavit a Patribus, ut contractuum obligationibus liberaretur; & sæpenumero decepta, tandem anno U. C. CCLXI conspiravit, ne amplius Patricios in bel-

- lo, neque ulla alia in re adjuvaret. Itaque secessit in Montem sacrum, neque reduci inde potuit, priusquam ea obtineret, quæ jamdiu concupierat. Inter quæ illud præcipuum fuit, ut Magistratus quotannis crearetur, qui Plebis jura defenderet, ceteris Magistratibus intercederet, & ne ipsi quidem supremo Consulari imperio parere teneretur. Qui in eum Magistratum lecti sunt, *Tribuni Plebis* adpellati. Liv. lib. II, cap. 32.
- v. 707 *Philippi*. Urbs extremæ Macedoniæ, in Thraciæ confinio; quæ profligati fuere ab Octaviano & Antonio Brutus & Cassius conjuratorum Principes. Vide Flor. lib. IV, c. 7.
- v. 715 *Semelen*. Vide Notam in v. 37 El. III Amor. III.
- v. 717 *Nec*. Alii *Nam*. Verum hæc ita construenda: Nec referam, *puer ut posses &c.*
- v. 721 *Tu quoque &c.* Pentheum intelligit ab Agave matre discerptum, quod Bacchi sacra contemneret. Fabula fusius narratur Metam. III.
- v. 722 *Lycurge*. Qui, dum vites amputare vellet, in crus sibi securim impigisse dicitur.
- v. 723 *Tyrrbenaque monstra*. Vide Metam. lib. III, v. 600 & seqq.
- v. 725 *Quare &c.* Mos erat, ut in Liberalibus, sive Bacchi Festis, viles aniculæ liba venderent, eidem Baccho offerenda. Varro lib. V de L. L. *Liberalia dicta, quod per totum oppidum eo die sedent Sacerdotes Liberi, hedera coronata anus, cum libis & foculo pro emtore sacrificantes.*
- v. 733 *Nomine*. A Libero Patre *Liba* & *Libamina* dicta esse putant, quia illi primum fieri & offerri cæpta. Juxta Varronem dicta sunt a *Libando*, quia præcipuus eorum usus erat in sacris.
- v. 745 *Levis*. Calvus. Alii alias lectiones secuti.
- v. 746 *Flavor*. Vaticanus unus *dulcer*, vitatque *καροποιᾶν*.
- v. 763 *Presset*. H. e. liba premat. Alii *præsit*, Liberi nempe sacris; quæ lectio fortasse verior.
- v. 764 *Femineos &c.* Bacchas intelligit. Quoad thyrsus vide Notam in v. 23 El. I Amor. III.
- v. 769 *Nysiades*. Ex Nysa; quæ urbs erat Arabiæ, & in qua fuit altus occulte Bacchus, ac Junonis iræ subtrahus.
- v. 771 *Toga libera*. Sive *virilis*, vel *pura*; quæ *prætexta* opponitur, quia scilicet nullo purpuræ prætextu distincta. Hanc sumebant adolescentes, cum prætextam deponebant. Quo autem die sumebatur, is dies celebrabatur magna propinquorum amicorumque frequentia.

- v. 775 *Pater*. Ita Servius: *Pater licet generale sit omnium Deorum, tamen proprie Libero semper coheret.*
- v. 783 *Ad ludos*. Ad Liberalia, quæ promiscue *ludi* vocabantur, juxta Tertullianum libro de Spectaculis.
- v. 784 *Studiis*. H. e. voluptati, sive genio.
- v. 786 *Tadiferâ* ... *Deâ*. Cerere; quæ accensis duabus facibus Proserpinam filiam, a Plutone raptam, variis regionibus conquisiverat. Cereris vero ludi, qui deinceps Liberi ludis fuere conjuncti, *Elusinia* vocabantur; de quibus vide Notam in v. 67 Heroid. IV.
- v. 787 *Tironem celebrare*. Perinde sonat ac ad forum deducere & comitari, ipso tirocinii die. *Tiro* autem dicitur adolescens, quo primum tempore, sumta virili toga, in forum prodit; ac *tirocinii* dies, quo eadem toga sumitur.
- v. 791 *Argos*. Loca quædam sic adpellata, quod in iis sepulti essent quidam Argivorum illustres viri, qui cum Hercule Argivo Romam venerant, & in oppido Saturniâ subsederant. *Qui sint*, &c. In aliquo sex posteriorum, qui desiderantur.
- v. 798 *Fatis debita*. Quia, ut infra legitur, *Viscera* &c.
- v. 810 *Nominaque* &c. Quinquatria sive quinquaterus sunt dies festi Minervæ; a *quinque*, quod quinque diebus sacra hæc celebrarentur. Primo enim die sacrificia fiebant, quatuor sequentibus gladiatores in theatro certabant. Erant etiam minora Quinquatria, quæ Idibus Juniis celebrabantur. Tum vero tibicines feriati per Urbem vagabantur, & ad Ædem Minervæ conveniebant. Fast. VI, v. 651.
- v. 819 *Stantes*. Junctas nempe jugo, h. e. ligno, in quo stamen extenditur.
- v. 824 *Tychio*. Sutore celeberrimo.
- v. 825 *Epeo*. Virg. Æn. II: *Ipsæ doli fabricator Epeus*, qui nempe Græcis equum ligneum fabricavit.
- v. 819 *Censu*. Mercede scilicet a discipulis persolvenda magistris; quæ a *Minerva* disciplinarum præside *Minervæ* adpellabatur. Et Codices & Interpretes quoad lectionem hujusce versus mire discrepant.
- v. 831 *Quique* &c. Cælatores, Pictores, & Sculptores intelligit. *Uris*. Pingebant enim ceris discoloribus tabulæ illitis, & igne admoto candefactis. Ea vero pingendi ratio *Εὔκαστικὴ*, h. e. *Encaustica* dicta fuit.
- v. 837 *Capita*. Alii *Capita*. Quadruplex potest esse ratio nominis. Tertia admissam lectionem fieri videtur.

- v. 849 *Tubar &c.* Hinc dies illa *Tubilustrium* vocabatur.
- v. 853 *Tortis*. Vide Notam in v. 728 super. libri.
- v. 856 *Delphicus*. Apollo; a *Delphis*, urbe Phocidis. Ad amplissimum in ea templum gentes ex toto terrarum orbe confluebant, ejusdem Apollinis Oraculum consulturæ.
- v. 863 *Miser*. Nephele. Vide Notam in v. 123 Heroid. XIX.
- v. 865 *Draconigenam*. Thebæ enim fuere conditæ a Cadmi sociis, qui ex dentibus illius Martii Draconis a Cadmo satis duxerunt originem, ut fuse narrat Auctor Metam. III.
- v. 873 *Gemini*. Odium novercæ significat, & fretum.
- v. 882 *Romana Salus*. Ita Livius: *C. Junius Bubulcus cum M. Titinio magistro equitum profectus, primo congressu Equos subegit; ac die octavo triumphans in Urbem cum redisset, ad eam Salutis, quam Consul roverat, Censor locaverat, Dictator dedicavit.* Id autem accidit anno ab U. C. CCCCLVII.

## IN LIBRUM IV.

- v. 4 *Geminorum*. Quorum alter Eros, alter Anteros Græco nomine dicitur. Sunt qui cælestem Amorem intelligant & vulgarem, item qui honestum & rurpem.
- v. 20 *Quo tenearis*. Ob adoptionem in Juliam familiam.
- v. 33 *Hujus*. H. e. filius.
- v. 35 *Proximus*. Creat nempe Capys Anchisen.
- v. 37 *Hinc satus &c.* In hac Regum genealogia discrepant aliquantulum Ovidius, Livius, Eusebius, Dionysius. Id monuisse sufficiat.
- v. 45 *Recidiva*. H. e. resurgentia, seu rediviva; fuerat enim alter nomine Capys, ut supra legimus.
- v. 47 *Tiberinus*. Vide v. 389 Fast. II.
- v. 61 *Grajo sermone*. Macrobius primo Saturnalium: *Secundum mensem nominavit Aprilem, ut quidam putant, cum aspiratione, quasi Aprilem, a spuma, quam Græci ἀφρόν vocant, unde orta Venus creditur.*
- v. 69 *Dux quoque Neritius*. H. e. Ulixes quoque venerat; qui dicitur *Neritius* a Nerito, Ithacæ monte. *Laistrygo-*

- nos*. Immanes incolæ Latii, humanis carnibus victitantes; qui & quosdam Ulixis socios devoraverunt.
- v. 73 *Atreides*. Nepos Atrei. Vide Notam in v. 1 El. XIII Amor. III.
- v. 76 *Æniden*. Diomedem, Ænei nepotem.
- v. 100 *Si levis &c.* Nisi aliquod saltem adsit amoris initium.
- v. 113 *Mota*. Multo elegantius, quam vel *nota*, vel *nata*, vel *inita*.
- v. 120 *Lasa*. Vide Notam in v. 31 El. VII Amor. I.
- v. 121 *Judice*. Vide Notam in v. 5 Heroid. V.
- v. 134 *Quis vitta &c.* Meretrices. Vide Notam in v. 31 Art. I.
- v. 145 *Fortuna ... Virili*. Cui posita fuerat ædes a Ser. Tullio in ripa Tiberis. Vide Dionys. Halicarn. lib. IV, cap. 17.
- v. 153 *Marito*. Vulcano.
- v. 158 *Cumaam ... anum*. Sibyllinos nempe libros.
- v. 160 *Inde &c.* Verticordis nomen inditum est Veneti, & consecratum eidem simulacrum, *quo facilius* (ita Val. Max. lib. VIII, cap. 16.) *virginum mulierumque mentes a libidine ad pudicitiam converterentur*.
- v. 169 *Pliades &c.* Vide Notam in v. 188 Heroid. XVIII.
- v. 177 *Electra*. Fuit enim Dardan mater, primi Trojanorum Regis, juxta nonnullos.
- v. 181 *Berecynthia*. Ex Berecyntho, Idæ monte; in quo præcipua religione colebatur Idæa Parens, sive Cybele. Hujusce Deæ ludus *Megalesia* dicebatur.
- v. 190 *Lotos*. H. e. tibia ex arbore loto.
- v. 196 *Quod &c.* Namque Erato dicitur ab ἐρα, amor: eamque rebus amatoriis præesse perhibent.
- v. 201 *Rhea*. Cybele; quæ & Rhea, & Opis aliquando dicitur.
- v. 205 *Veste &c.* Sensus est: Deceptus Saturnus involutum veste saxum pro Jove devoravit.
- v. 209 *Rudibus*. Ligneas alii virgas, obtusos nonnulli gladios intelligunt. Ut enim gladiatores clypeos tundere gladiis in veræ pugnæ profectione solebant; ita Corybantes sive Curetes clypeos rudibus æque tundeant, pugnæ cujusdam imaginem exhibentes. Alii *manibus*, quidam *rudibus*. Vox autem *rudis* alia quoque significat, ut monuimus ad v. 22 El. IX Amor. II.
- v. 229 *Sagartide*. Cui Pater Sagaris, Phrygiæ fluvius.



- v. 236 *Palæstinas* ... *Deas*. *Furias*, ita dictas a *Palæstre* vico Epiri prope Oricum, ubi templum *Ditis* fuit. Alii negant esse in Epiro *Palæsten*; ajuntque ita quidem vocari *Furias*, at adpellationis hujus causam ignorari.
- v. 249 *Cybelen*. Unum ex Phrygiæ montibus, in quo *Cybele Mater* colebatur.
- v. 257 *Carminis* &c. Anno U. C. DXLV, P. Corn. Scipione & P. Licinio Crasso Coss., secundi autem belli Punici anno XIV, cum Annibal devastaret Italiam, Sibyllinos libros consulere; & inspectum &c. Quod autem Cummæ, ab Euboicis colonis olim conditæ, Sibylla vixerit, ejusdem quoque carmen *Euboicum* dicitur.
- v. 275 *Ustis*. Vide Notam in v. 831 super. libri.
- v. 278 *Phryxæ*. Sororis nempe Phryxi; de quibus vide Notam in v. 123 Heroid. XIX.
- v. 305 *Ab alto*. Alii *ab Atta*. Livius lib. III: *Atta Claudius*, cui postea *Appio Claudio* nomen fuit.
- v. 323 *Vita*. Gronovius Observat. secundæ editionis lib. II, cap. 21 *vitta* corrigit; ut *vittam* posuerit Naso pro pudicitia, quod fecit & alias. At, pace tanti Viri, admissam lectionem supplicationis hujus simplicitati magis consonam judicamus.
- v. 339 *Canus* ... *Sacerdos*. Multi *castus*. Intelligitur autem Ἀρχιερεὺς, sive *Archigallus*.
- v. 347 *Tunc exstitit*. Alii aliter; negantque *Nasicam* auctorem templi fuisse. Burmannus ita: Forte scripserit *Naso*, Templi pater exstitit auctor; ut hæc *Claudia* fuerit filia C. Claudii Neronis Censoris, qui locavit eadem Matris Magnæ in Palatio cum collega Livio, teste Liv. lib. XXIX, cap. 17: Quod tamen affirmare non audeo. Vide quoque Val. lib. II, cap. 15.
- v. 354 *Tum magis*. Eo præcipue tempore, h. e. Megalensibus.
- v. 367 *Moretum*. Cibi genus, quod ex his octo conficiebatur, allio, apio, ruta, coriandro, bulbo, caseo, oleo, aceto. Exstat incerti Auctoris Poemation, inter Virgilii *Catalecta*, ubi fuse describitur.
- v. 373 *Pallantis*. Aurora, Pallantis filia.
- v. 374 *Levaris*. H. e. Jugo. Alii *lavaris*.
- v. 376 *Fortuna* ... *Publica*. Duo *Fortunæ Publicæ* templa in colle Quirinali dicata fuere, unum Nonis Aprilis, VIII Kal. Jun. alterum. Fuit hæc *Fortuna Publica* simpliciter dicta, illa *Fortuna Publica Primigenia*.

- v. 380 *Juba*. Mauritanie Regis; qui & post insignem Pharsaliæ pugnam contrarias Jul. Cæsari partes tuebatur. In Africam autem se receperant Cato, Scipio, & alii fautores Libertatis acerrimi.
- v. 391 *Deorum*. Quorum imagines longo ordine præferri solebant, &, cum inciperent Ludi fieri, certis unaquæque locis collocari.
- v. 405 *Ær*. Ex quo rustica instrumenta conficerent. *Chalybeia massa*. Ex qua enses confari cœperunt.
- v. 445 *Patruus*. Pluto Proserpinam Jovis fratris sui filiam *velociter aufert*.
- v. 474 *Quique &c.* Drepanum scilicet, urbem in Eryce Siciliæ monte sitam. Falx enim dicitur Græce *δρεπάνος*.
- v. 477 *Heloria tempe*. Amœna Helori fluminis loca. Vide Notam in v. 15 El. I Amor. I.
- v. 482 *Ales*. Vide Notam in v. 153 Heroid. XV.
- v. 500 *Nisai ... canes*. Vide Notas in v. 123 Heroid. XII, & in v. 21 El. XII Amor. III.
- v. 506 *Sub Jove*. H. e. sub dio.
- v. 533 *Oblito*. Decreverat enim abstinere cibo, donec amissam Proserpinam filiam reperisset.
- v. 536 *Mystra*. Cereris Sacerdotes. In hujusce versus lectione Codices valde discrepant.
- v. 570 *Siccaeque terra*. Ægyptus & Æthiopia.
- v. 577 *Parrhasides stella*. Vide Notas in v. 149 & 152 Heroid. XVIII, ac Fabulam VI Met. II.
- v. 593 *Gyge*. Vide Notam in v. 12 El. I Amor. II.
- v. 597 *Posita &c.* Alii *cessis mihi regia cali*.
- v. 605 *Caducifer*. Vide Notam in v. 62 Heroid. XVI.
- v. 617 *Cessatis*. Ob iram & absentiam Cereris. Hæc eadem Fabula describitur etiam Metam. V.
- v. 621 *Victor*. Livius lib. X: *Ipsæ* (Q. Fabius Maximus Rulianus Consul) *ad eam Jovi Victori spoliisque hostium cum pervisset, ad castra Samnitiū perrexit*.
- v. 624 *Atria*. Tib. Gracchus erexit, refecit Asinius Pollio, ac publicâ Bibliothecâ ditavit.
- v. 627 *Tamen &c.* Apud Mutinam Augustus Antonii castris positus est; idque accidit anno U. C. DCCX, præcipue virtute Coss. C. Pansæ & A. Hirtii.
- v. 630 *Forda*. Festus: *Fordicidiis boves forda, idest gravida, immolabantur, dicta a fœtu*. Varro autem: *Bos forda, quæ fert in ventre*.

- v. 615 *Ter denas &c.* Singulæ Curix, quæ fuere triginta, fordam bovem sacrificabant.
- v. 619 *Virgo.* Vestalium virginum *vetustissima* hæc Tacito nominatur, Dioni ἡ παλαιότατα.
- v. 650 *Manalis ... Deo.* Fauno, ab Arcadiæ monte.
- v. 657 *Usus abest &c.* Vel ipsimet Idolorum cultores duce tantum ratione noverant, abstinendum sibi esse a voluptatibus & ornamentis, quoties more supplicum preces Numinibus adhiberent.
- v. 669 *Conjux.* Egeria.
- v. 675 *Ut titulum &c.* XVI Kal. Maj. Augustus Imperatoris nomine decoratus est, ob relatum de Ægyptiis potissimum victoriam; & inde Imperii sui annos numerare cœpit.
- v. 678 *Dorida ... petunt.* H. e. occidunt; Doris enim, quæ Oceani filia est ac Tethyos, hic pro mari ponitur.
- v. 680 *Partitor.* H. e. divisos & emissos carcere.
- v. 695 *Tibicine.* Ligno, vel columella sive pila, rusticorum casas sustinente. Versum hunc alii aliter legunt, & interpretantur.
- v. 704 *Cobortis aves.* Gallinas; cohors enim proprie locus est maceris aut sepe circumdatus, in quo custodiuntur gallinæ, & alia ad usum villæ servantur. Varro lib. III de R. R. cap. 3: *In plano cohors, in qua pascebantur gallinæ.*
- v. 707 *Incendit.* Hæc Fabula ab historia Sampsonis originem duxisse videtur.
- v. 715 *E duce &c.* Ab Ariete scilicet in Taurum.
- v. 720 *Invita.* Sive ad Europæ Fabulam respicias, quæ ab Jove in tauri formam converso rapta fuit; sive intelligas Io, Junonis pellicem, in speciem vaccæ mutatam.
- v. 726 *Februa.* Vide Notam in v. 19 Fast. II.
- v. 727 *Certe &c.* Ita Varro: *Palilia tam publica, quam privata sunt; & est genus hilaritatis & lusus apud rusticos, ut congestis cum fano stipulis ignem magnum transiliant, his Palilibus se expiari credentes.*
- v. 745 *Rescēlis.* H. e. divisis. Alii *reliclis*, quidam *paratis*.
- v. 761 *Labra.* Idest fontes, ubi lavatur. Respicit Auctor ad Actæonis Fabulam, quæ Metam. III fuse describitur.
- v. 780 *Sapam.* Varro de vita populi Romani: *Sapam appellabant, quod de musto ad mediam partem decoxerant.*
- v. 791 *Exsul.* Romanæ leges, quoties in exilium aliquis pellendus esset, eidem aqua & igni interdicebant.

Ovidius T. III.

KK

- v. 792 *Hir &c.* Vide Notam in v. 598 Art. II.
- v. 821 *Frugas &c.* Quod erat augurium fertilitatis, dilatan-  
dique deinceps Imperii;
- v. 833 *Lavo.* Plinius: *Fulmina lava prospera; quia sacri-*  
*ficantis vel precantis latus lavum dextrum est ejus, qui*  
*postulata largitur.*
- v. 843 *Rutro.* Instrumento rustico præferrato.
- v. 855 *Nondum facti ... Quirites.* Ita enim vocari cœ-  
perunt post initam cum Curibus sive Sabinis societatem.
- v. 864 *Uiramque.* H. e. Palen inter & Venerem. *Vinalia*  
vero Festum quidem Veneris adpellari, sed esse revera Jo-  
vis infra dicit Auctor.
- v. 866 *Multa.* Heinsius *Culta* præferret. Crispinus eleganti  
Græcismo *multa* dici pro *multum* arbitratur. Alii con-  
struunt *Multa Venus*, h. e. potens Veneris patrocinium.  
*Proffesarum.* Quod se vulgate non possent, nisi prius ar-  
tem ipsæ suam apud Ædiles profiterentur.
- v. 871 *Templa:* Veneris Erycinæ.
- v. 903 *Pecudem.* Signum Arietis. Vide Notam in v. 123  
Heroid. XIX.
- v. 904 *Exoriturque Canis.* Ita Heinsius: *Plinius* (lib.  
XVIII, cap. 29) *Canem hoc tempore ait occidere, etiam*  
*Columella & Ptolemæus, Nostro in contraria eunte, quod*  
*miror: reprehendit jam Nasonem hoc nomine Solinianis*  
*Exercitationibus Salmasius.* Farnes. *Occidit atque Ca-*  
*nis.*
- v. 911 *Leve.* Sine robigine; quæ scabrum illud efficeret.
- v. 933 *Mantele.* Linteolum, solutos villos habens, h. e.  
pendentes cirros sive subtemina; quodque tergendis mani-  
bus inserviebat. Varro lib. V de L. L. *Mantelium, quasi*  
*manuterium, ubi manus tergantur.* Græcis *χειρόμακτρον*  
dicitur.
- v. 939 *Icarium.* Vide Notam in v. 4 El. XVI Amor. II.
- v. 943 *Cum Phrygiæ &c.* Id est, cum Luna, Soror Titanis,  
sive Solis, relicto Assaraci fratre Ganymede (h. e. Aquarii  
sidere) *Sustulit &c.* Perperam legunt alii *Titbonia*, &  
Auroram intelligunt conjugem Tithoni; qui certe frater Assa-  
raci minime fuit.
- v. 949 *Cognato &c.* Cum Pontifex Maximus ædes publicas  
juxta Vestam deberet incolere, & Augustus jam designatus  
Pontifex Palatium vellet inhabitare, Vestam ad se transtu-  
lit. In alia Palatii parte templum erexit Apollini, qui dein-  
ceps *Palatinus Apollo* dictus est.

## IN LIBRUM V.

- v. 7 *Qua &c.* Musæ, quibus sacer est fons Hippocrene. Quoad equum Medusæum, sive Pegasus, vide v. 450 & seqq. Fast. III, ac in illos Notas.
- v. 9 *Dissentere.* Junianus *Assensere*, nempe Vati. At admissa lætio significat, Musas in assignanda quoad Mensem Majum ratione nominis inter se discrepare.
- v. 15 *Hos &c.* Alii *quæ mundum temperat omnem.*
- v. 31 *Suspectus.* Admiratio scilicet, vel æstimatio.
- v. 34 *Dens.* Saturnus, Cœlo dejectus ab Jove.
- v. 68 *Interior.* H. e. remotior a via, & parieti propior. Alii aliter legunt.
- v. 76 *Nec avum sustinuisse.* Sensus est, avo non restitisse; sed cessisse. Alii Codices, & optimæ quidem notæ, habent *avo*; proptereaque *negare*, vel quid simile, subintelligitur.
- v. 88 *Ætherium &c.* Mercurium significat; de quo, & ejus talaribus diximus alias.
- v. 90 *Lunâ &c.* Ita Censorinus de Die Nalali cap. 19: *Arcaides trimestrem annum primo habuisse dicuntur; (quod & Plinius tradit lib. VII, cap. 48.) & ob id προέληντος sunt adpellati, non, ut quidam putant, quod ante nati sint, quam Lunæ astrum, sed quod prius habuerint annum, quam is in Græcia ad Lunæ cursum constitueretur.*
- v. 92 *Impositor.* Navi nempe suæ. De Evandro & ejus matre Carmenta vide lib. I, v. 464 & seqq.
- v. 101 *Vellera.* Veteres plerique *verbera*; alii *tergora*. Verum τὸ *vellera* pro pellibus caprinis eleganter dixeris. *Vias.* Multi *manus*; & Heinsius τῶν *celebres* substituendum putat *steriles*. De more porro cædendarum hisce pellibus mulierum, ut secundæ fierent, vide lib. II, v. 425 & seqq.
- v. 103 *Materno.* Majæ; cujus est filius Mercurius. Maja vero fuit una ex septem Plejadibus.
- v. 108 *Turbæ &c.* Musa quælibet parem habet auctoritatem.
- v. 113 *Nascitur &c.* Vide Notam in v. 183 Heroid. XVIII.
- v. 118 *Diçlaos.* A Diçte, Cretæ monte.
- v. 129 *Præstitibus.* Vel a *præsto*, vel a *præsum*, ut infra dicitur. Isti vero sunt Lares publici.

- v. 140 *Compita*. Hinc Lares *Compitales*, & *Compitalia*, h. e. ea Sacra, quæ in compitis in honorem Larium celebrantur.
- v. 143 *Gemellorum* ... *Deorum*. Vide v. 615 Fast. II.
- v. 146 *Trina*. Duos nempe Lares, & Augusti Genium.
- v. 148 *Diva* ... *Bona*. Vide Notam in v. 637 Art. III.
- v. 155 *Heres*. Hæc Appia illa Claudia probatæ pudicitie femina, de qua egit Auctor sup. lib. v. 305.
- v. 159 *Hyperionis*. H. e. Aurora, Hyperionis filia.
- v. 161 *Argestes*. Ventus ab Occidente solstitiali spirans; qui *Corus* etiam dicitur.
- v. 162 *Calabris*. Alii aliter. Burmannus lectionem hanc sequitur; eidemque *agua Calabra* pro quibuscumque poni videntur. Sic & apud Lucan. v. 589 *Calabri portus*.
- v. 169 *Nendum* &c. Vide Notam in v. 631 Metam. IV. Conjugem habuit Æthram, ex qua Hyantem genuit & Hyadas.
- v. 173 *Formidine*. Vide Notam in v. 203 Rem. Amoris.
- v. 176 *Leas*. Plurimi Codices *feras*.
- v. 182 *Illa*. Pietas dedit illis cælum; *nomina* &c.
- v. 189 *Circus* &c. Sensus est, Mense tantum Majo in honorem Floræ spectacula ludosque scenicos in Circo fieri.
- v. 190 *Munera*. Quoad vocis hujus significationem egimus in Nota ad v. 170 Art. I. Alii *numine*.
- v. 196 *Litera Graca*. X sive Ch, quæ in F mutata fuit. Libri duo *litera prima*.
- v. 197 *Campi felicitis*. Vel hortos Alcinoi in Insula Corcyra, vel contra Mauritaniam sitas Fortunatas Insulas intellige.
- v. 204 *Pramia*. Orithyian Erechthei, Regis Athenarum, filiam. Narratur Fabula Metam. VI, v. 683.
- v. 223 *Therapneo* ... *de sanguine*. Indicat Hyacinthi Fabulam, qui conversus fuerat in florem cognominem, ut legimus Metam. X. Puer autem ille Therapnis natus est, oppido Laconiae.
- v. 225 *Narcisse*. Cujus Fabula fuse describitur Metam. V.
- v. 227 *Cinyraque creatum*. Adonidem.
- v. 270 *Nebule*. Sunt illud quasi velamen, summitatem vasis operiens, quod Italo sermone *Fiori* vocamus.
- v. 272 *Cana*. Alii *grata*, quidam *summa*.
- v. 273 *Idem facimus*. Idest, nos quoque florescimus.
- v. 277 *Ludorum*, &c. Scribit, *Ediles Plebis*, qui dicti L. Publicius Malleolus & M. Publicius Malleolus, cum pluri-

mos locupletes pasena & agros Populi Romani occupasse animadvertissent, ad populum reos adduxisse; ex quo factum, ut peculatus damnarentur. *Ex multatitia pecunia*, (ita Livius) *quam exegerunt pecuariis damnatis, ludi facti*, seratusque clivus.

- v. 281 *Locuples*. Plinius: *Hinc & locupletes dicebant loci, idest agri, plenior*.
- v. 285 *Publica*. Legunt alii *pasena*, multi *pabula*.
- v. 305 *Thesiaden*. Melcagrum, Thesii ex Althæa matre nepotem. Vide Fabulam IV Metam. VIII.
- v. 307 *Tantaliden*. Agamemnonem, Tantalii pronepotem. Vide Notam in v. 3 Heroid. XIII, itemque argumentum Fab. I & II Metam. XII. *Vela*. Legunt alii *tela*; eosque secutus Marsus per *Tantaliden* Niobem intelligit, & per *tela* sagittas, quibus extincta ejusdem soboles, ut fuisse describitur Fab. III Metam. VI. Interpretatio Marsi sequi versiculi sensui magis consentanea est: nec enim spreverat Agamemnon Dianæ focos; sed ejusdem cervum tantummodo, & quidem ignarus, occiderat.
- v. 309 *Hippolyte*. Vide Notam in v. 10 Heroid. XXI, itemque Fab. XLV Metam. XV. *Dionen*. Dione parens est Veneris; at ab Auctoribus optimis pro Venere frequenter ponitur.
- v. 327 *Convenerere &c.* Id accidit anno U. C. DLXXX, ut recte supputat Sigonius, L. Postumio Albino & M. Popilio Læna Consulibus.
- v. 343 *Acheloe*. Fluminis hujusce ripis primæ vites satæ feruntur; proptereaque dicit Auctor, non prius cæpisse flores coronas æstimari.
- v. 346 *Sidere*. Vide Notam in v. 114 Heroid. VI.
- v. 358 *Et color*. Aptius alii *At color*.
- v. 361 *Lumina*. Accensæ faces; illi namque Ludi per noctem etiam continuabantur.
- v. 379 *Chiron*. Centaurus Saturni & Philyræ filius, Medicus & Citharædus præstantissimus; cui Thetis Achillem filium educandum tradidit. Cum Herculem hospitio suscepisset, & ejus arma tractaret, evenit, ut sagitta quædam Hydræ Lernæ veneno imbuta illi in pedes decideret. Ope nulla sanari potuit; proptereaque Deorum miseratione in cælum sublatus est, & collocatus inter Signa Zodiaci figurâ Sagittarii.
- v. 389 *Troja duo fata*. Quod expugnari non posset sine Achille, & Herculis sagittis, quarum futurus erat heres

- Philotes; ut animadvertimus etiam ad v. 111 Rem. Amor. Hercules autem ipse Trojam primò sub Laomedonte diruerat.
- v. 393 *Leonis*. Quem in Nemea silva peremerat.
- v. 414 *Bis septem*. Juxta Hyginum XXIV.
- v. 423 *Annus &c*. Ita Neapolis: *Proponit hæc veterem hunc ritum, a Romulo institutum, numquam omissum; licet Numa additum anno Februarium, totum placandis defunctis & lustrationibus addiderit.*
- v. 433 *Signaque &c*. Digtum nempe medium adeo presse eum pollice jungit, ut lapsus in palmam crepitum edat: idque facit, ne umbra tacito sibi ante fabarum jactum occurrat.
- v. 438 *Redimo*. Varro de Vita populi Romani: *Quibus temporibus in sacris fabam jactant noctu, ac dicunt se Lemures extra januam ejicere.*
- v. 441 *Temeseaque ... ara*. Ex Temese, Brutiorum urbe, ære flando & perficiendo clarâ. Æris etiam tinnitum ad spectra fuganda idoneum putabant.
- v. 447 *Plejade nate*. De Mercurio Majæ filio, ejusque caduceo sive virga vide Notam in v. 62 Heroïd. XVI. *Virga*. Alii *lingua*: nec perperam; est enim Mercurius eloquentiæ quoque Deus.
- v. 471 *Æqualis*. Nempe *meæ*.
- v. 490 *Malas*. Alii *malum*; quibus minime subscribendum.
- v. 492 *Nullo &c*. Celebrabantur enim prima VII, media V, ultima III Id. Maj. eaque tempore nocturno.
- v. 494 *Falsus eris*. Fallêris; in idem namque tempus Orionis occasus incidit.
- v. 498 *Pronum*. Alii *pronus*, quidam *promptum*.
- v. 508 *Quassas*. Reperitur & *siccas*.
- v. 517 *Diffuderat*. Legit Heinsius *defuderat*. At *vinum defundere* proprie significat in pateram vel cyathum ex dolio aut cado fundere, bibendi causâ; *diffundere* autem, ex lacu in amphoram, cadum, vel dolium condere, servandi causâ.
- v. 522 *Terra rubens*. H. e. fœcilis.
- v. 525 *Prima mihi cura juvena*. Codices mire variant; quamvis ex omnibus idem fere sensus eliciatur. Burmannus libentius legeret *prima mihi flore juvena*.
- v. 535 *Uriona*. Οὐρον enim significat urinam.
- v. 541 *Fuit impetus &c*. Sensus est, ausu nefando tentasse Scorpion suis spiculis, h. e. aculeo, inferre damnum



- Latonæ; quæ *gemellipara* dicitur, quod uno partu Apollinem & Dianam edidit.
- v. 545 *Mundo*. Alii *calo*, nostro scilicet hemisphærio. Fingit autem poetice Noster & Oriona & cetera sidera solito citius occidere, ut anniversaria dies illucescat, qua Cæsar Octavianus, Bruto & Cassio victis, signisque receptis a Parthis, in Foro a se structo Marti templum dedicavit; quem *Bisultorem* cognominare voluit, quod primum J. Cæsaris, deinde Crassorum M. patris & P. filii necem ultus esset.
- v. 555 *Giganteis*. Adsimilat Gigantibus Conjuratos, qui in Augustam Familiam impia tela sumserunt.
- v. 556 *Hinc fera &c.* Quoties bellum aliquod movendum esset, in hoc Martis templum Senatores Augusti decreto convenire debebant, cum antea in Capitolio congregarentur.
- v. 561 *Diversa sola figura*. Varia scilicet devictarum gentium spolia, *Armæque &c.*
- v. 563 *Hinc videt &c.* Videt etiam Æneæ statuam, qui *Sacra patriemque humeris, altera sacra, tulit*.
- v. 565 *Iliaden*. Romulum. *Ducis*. Acrænis, Ceninensiumque, singulari certamine victi. Eadem arma Jovi Etrærio Romulus dedicavit.
- v. 566 *Subesse*. Uniuscujusque viri statuæ rerum gestarum index sive titulus subscriptus erat.
- v. 567 *Prætextum*. Inscriptum scilicet, sive insignitum.
- v. 673 *Pater ... Vestaque sacerdos*. C. Jul. Cæsar, Pontifex Maximus; cujus fuerat Octavianus adoptione filius.
- v. 574 *Numen utrumque*. Legunt alii *nomen*, Patris scilicet, & Sacerdotis.
- v. 581 *Tuta sagittis*. Parthi jaculis præcipue mittendis feroces, & simulata fuga præliantes.
- v. 583 *Crassorum funera*. Vide Notam in v. 179 Art. I.
- v. 595 *Bis ulto*. Alii *Bisultor*, nonnulli *bis ultum*. Admissa Heinsii lectio præferenda.
- v. 603 *Idibus &c.* Pridie Idus Tauri caput oritur ante Solis ortum.
- v. 605 *Tyræ ... puellæ*. Europæ; quæ & *Sidonis* infra dicitur. Tyrus & Sidon Syriæ sunt urbes in Phœnicia.
- v. 619 *Phariam ... juvencam*. Io, Inachii filiam; de qua vide Notam in v. 85 Heroid. XIV. Dicitur *Pharia* ab opido Ægypti Pharo, vel Insula cognomine.
- v. 621 *Tum quoque &c.* Eadem nempe die a Virginibus Vestalibus, interventu Pontificum, Prætorum, ac Sacerdotum,

quotannis de ponte Sublicio publice jaciebantur in Tiberinæ simulacra hominum triginta e scirpeis virgultis facta, quæ vocabantur *Argei*. Varias hujusce ritus causas recenset Auctor. Vide Festum in *Sax*.

v. 623 *Corpora &c.* Falsam quorundam opinionem rejicit, qui veteres Romanos, annis sexaginta completis, de ponte Sublicio præcipitari putabant.

v. 627 *Falcifero ... Seni*. Saturno; cui falcis insigne tribuitur, quia culturæ agrorum præsidere videtur, ut ait Festus. In ejus honorem Numinis duo corpora quotannis de ponte Sublicio dejecta credunt; idque factum fuisse dicunt, monente Apolline, in cujus sacris Leucadis incolæ sontium aliquem e specula montis in mare præcipirabant.

v. 647 *Pallantiur*. Quod originem duceret a Pallante, Arcadiæ Rege.

v. 648 *Caco*. Vide v. 543 & seqq. Fast. I.

v. 651 *Venerat Argis*. Alii *venerat agris*, quidam *mansit in agris*, vel *arvis*. Aptior est recepta lectio; inde enim scirpea illa simulacra, de quibus supra, dicebantur *Argei*.

v. 663 *Clare &c.* Invocat Mercurium, (Virg. *Æn.* VIII, v. 138)

*Quem candida Maja  
Cyllenes gelido conceptum vertice fudit.*

v. 667 *Nitida*. Quod oleo perfunderentur Athletæ.

v. 675 *Incinctus tunicas*. Cingulo, ex quo pendet marsupium.

v. 676 *Suffrâ*. Suffimentis purgata. Perperam alii *suffusa*, vel *suffecta*.

v. 682 *Præterita ... die*. Vel diem, quæ præcesserat, vel transactum quodvis tempus intellige. Alii *præterita fide*, h. e. posthabita sive neglecta; quæ lectio fortasse rector.

v. 687 *Pereant*. Codices optimæ notæ bene multi *pateant*, h. e. pateat aditus ad nova perjuria.

v. 691 *Ridet*. Ridendo scilicet exaudit.

v. 692 *Ortygias ... boves*. Quas surripuit Apollini, in Delo sive Ortygia nato, cum Admeti greges pasceret.

v. 696 *Quot*. Nempe duodecim; quæ vidimus fere omnia Heroid. Epist. IX, & in Notis ad eandem evolvimus.

v. 699 *Phæbetque sororem*. Hilairam.

v. 700 *Tyndaride fratres*. Castor & Pollux, Tyndari Ledæque filii. Infra dicuntur *Æbalide*, quod fuerint *Æbali* nepotes; qui & *Æbalia* nomen indidit Laconiae. Alias Jo-

- vis dicuntur filii, ut vidimus in Nota ad v. 67 Heroid. VIII.
- v. 723 *Canis*. Vide Notam in v. 4 El. XVI Amor. II.
- v. 727 *Quatuor &c.* In antiquo Kalendario legebantur sequente Maji die quatuor istæ litteræ Q. R. C. F. idest *Quando Rex Comitio Fugit*. Sacrificulo, sive Regi sacrorum, magistratum gerere, itemque habere verba ad populum nefas erat. Hoc tantum die in Comitium ire poterat, ac sacrificii quidem causâ; quo festinanter peracto, fugâ sese Comitio proripiebat. Hunc sacri faciendi ritum perhibent Tarquinii Fugæ memoriâ revocare.
- v. 733 *Auferat*. Alii *Auferet*. Quoad Booten vide Notam in v. 55 Art. II.

## I N L I B R U M VI.

- v. 2 *Leges*. H. e. seliges. Alii *legas*, nonnulli *lege*.
- v. 13 *Præceptor arandi*. Hesiodus; de quo vide Notam in v. 25 Art. I. Vidit autem Musas.
- v. 15 *Priamides*. Paris, Priami filius. Notissimum Judicium ejus in Nota ad v. 5 Heroid. V presse descripsimus.
- v. 18 *In arce Jovis*. In Capitolio cum Jove Junonem quoque venerabantur.
- v. 32 *Hæc &c.* Vide Notam in v. 113 Metam. I.
- v. 34 *Tarpejo*. Vide Notam in v. 49 El. X Amor. I.
- v. 42 *In genus &c.* Electra Dardanum ex Jove peperit, Trojanorum Regem; ex quibus originem duxere Romani.
- v. 43 *Rapto*. Vide Notam in v. 197 Heroid. XVI. Trojanus autem fuerat Ganymedes.
- v. 45 *Foveo*. Alii *fovi*, unus *foveam*.
- v. 53 *Mavors*. Filius Junonis, Romuli pater.
- v. 59 *Nemoralis*. Quod esset in ea nemus, Junoni sacrum.
- v. 62 *Prænestina ... Dea*. Fortunæ; cui templum ingens Præneste positum.
- v. 65 *Herculis uxor*. Hebe, Junonis filia, juventutis Dea.
- v. 72 *Faveas ... ipse*. Alii *faveat ... ipsa*, h. e. Juno.
- v. 81 *Paterna*. Quam sortitus est a Patre Vulcano. Fabula fuse describitur v. 543 & seqq. Fast. I, & a Virg. *Æn.* VIII, coloribus omnino poeticis.

- v. 92 *Placidi ... Ducis*. Tiberii; qui Concordiæ templum dicavit. In eo frequenter Senatores congregabantur.
- v. 113 *Huic aliquis juvenum*. Alii *si quis juvenum*.
- v. 129 *Spinam*. Spineam nempe virgam. Alii *virgam*.
- v. 131 *Non quæ &c.* Non Harpyiæ; quæ Phinei mensam & cibos turpissime fœdabant. Vide Notam in v. 339 Art. I.
- v. 133 *Stantes*. Exstantes, seu prominentes. Alii *grandes*.
- v. 142 *Nenia ... Maria*. Carmen funebre, ad incantamenta quoque conficienda a Marsis præcipue adhiberi solitum. Vide Notam in v. 102 Art. II. *Volucres ... anus*. Ita Festus: *Striges, maleficis mulieribus nomen inditum est; quas etiam volaticas vocant*.
- v. 143 *In illis*. Nempe thalamis, diebus quinque ab ejus ortu transactis.
- v. 163 *Prosecta*. Seorsim, priusque secta. Victimæ pars prima Diis, Sacerdotibus altera, tertia reliquis adponebatur.
- v. 165 *Sumitur*. Alii *ponitur*, quidam *subditur*.
- v. 175 *Quam &c.* Attagen intelligitur; quam quidam putant appellari ab Italis *Francolino*.
- v. 176 *Nec quæ &c.* Grues significat; cum quibus fama est bellum habere Pygmæos, Indiæ populos, victosque per aërem ferri. Vide Juvenal. Sat. XIII, v. 167. Non ultra duos pedes cum dimidio longos esse colligimus, auctore Gellio lib. IX, c. 4. Adi quoque Plinium lib. VII, c. 2.
- v. 178 *Ante*. Quidam *arte*, nonnulli *tellus ... Astra*, vel *Inda*. Alii aliter legunt, ac interpretantur.
- v. 183 *Monetæ*. Quia credita est monuisse Romanos, ut propter terræmotum sue plena rem divinam facerent. Huic ædem vovit Aurunco bello L. Furius Camillus.
- v. 185 *Qui Gallica &c.* Vide Livium lib. V, c. 47. Quod affectaret imperium, rupe Tarpeja præcipitatus fuit.
- v. 191 *Teſtæ*. Quia lapide strata esset, ita dictam putant; eamque Gronovius & Heinsius esse volunt, quæ a porta Capena ad Martis ducebat. Legunt alii *reſtæ*; sed quænam, vel ubi fuerit, ignoratur, aliis alibi ex conjectura collocantibus.
- v. 194 *Cum pene &c.* Vovit ædem Tempeſtati M. Marcellus, gravi procellæ periculo liberatus, dum Corsicam & Sardiniam classe peteret: idque accidit Bello Punico secundo.
- v. 201 *Hac &c.* Ita Livius lib. X: *Dicitur Appius in medio pugne discrimine, ita ut inter prima signa manibus ad cælum sublatiſ conspiceretur ita precatuſ eſſe: Bello.*

*na, si nobis hodie victoriam duis, ast ego templum tibi voveo.*

- v. 203 *Pace negata.* Epitome Liviana lib. XIII: *Cyneas, Legatus a Pyrro ad Senatum missus, petiit, ut componenda pacis causa Rex in Urbem reciperetur: de qua re cum ad frequentiore Senatum referri placuisset, Ap-  
pius Claudius, qui propter invaletudinem oculorum jam-  
diu a consiliis publicis abstinuerat, venit in curiam; &  
sententiâ suâ tenuit, ut id Pyrro negaretur.* Venerat  
in Italiam Pyrrhus an. U. C. CDLXXIII, laturus opem  
Tarentinis; victus est, & ex Italia pulsus anno U. C.  
CDLXXVIII.
- v. 206 *Parva columna.* Festus, Pompejus: *Bellona diceba-  
tur Dea bellorum: ante cujus templum erat columella,  
quæ bellica vocabatur; supra quam hastam jaciebant,  
cum bellum indicebatur.*
- v. 209 *Custode sub Hercule.* Ita legitur in Fragmento ve-  
teris Kalendarii: *Herculi magna Custodi in Circo Flami-  
nio.*
- v. 210 *Euboico.* Cumæ nempe Sibyllæ. Cumas in Italia Eu-  
boicæ coloniz condidere.
- v. 227 *Donec &c.* Ita Festus: *Stercus ex ade vestæ XVII  
Kal. Jul. deferretur in angiportum medium fere clivi Ca-  
pitolini: qui locus clauditur porta Stercoraria. Tanta  
sanctitatis Majores nostri esse judicaverunt.*
- v. 232 *Perpetua.* Namque Diali omnino vetitum divortium.
- v. 235 *Lycaona.* Arcadem intellige, Lycaonis nepotem; qui  
inter astra translatus cœpit adpellari *Bootes*, & *Arctophy-  
lax.* Vide Notam in v. 55 Art. II.
- v. 243 *Consulis.* C. Flamini, ob ingentem cladem illam ad  
Lacum Trasymenum patratam.
- v. 257 *Dena &c.* Festa Palis quotannis celebrabantur. Ela-  
psis igitur annis XL ab U. C. Vesta *ade recepta sua est*,  
quam posuit illi Numa, origine Sabinus.
- v. 277 *Arte Syracosia.* Auctoris nempe Archimedis Syra-  
cusani. Legunt alii *Arce*; Achradinâ scilicet, editiore Sy-  
racusarum parte, ubi Sphæram hanc servatam fuisse docemur  
ex Athenæo lib. V. Quoad vitream Sphæram illam, ab Ar-  
chimedem primum inventam, vide quoque Claudiani Epi-  
gramma; in quo simulatos Solis, Lunæ, Siderumque mo-  
tus ipse describit.
- v. 300 *Grazi nominis.* Nam Εἰς τὴν Græci dixerunt; idque  
ἄπο τῆς εἰς τὴν, quod ster.

- v. 307 *Vacuna*. Deæ vacantium, sive otiosorum. Huic agricolæ, cum a laboribus ruris vacarent, ut post perceptos fructus requiescerent per hiemem, vota solvebant, & sacrificabant.
- v. 311 *Coronatis* &c. Asini panibus, & molæ floribus in honorem Vestæ a pistoribus coronabantur; de quo ritu ita quoque Laëtantius: *Lamprateni asellum Priapo quasi in ulationem mactare consueverunt; cum enim hic Deus Vestæ dormienti vim inferre conaretur, asinus intempestivo clamore eam excitavit. Hinc libido insidiatoris detecta. Apud Romanos eundem asellum Vestalibus sacris in honorem pudicitie conservata panibus coronant.*
- v. 325 *Nec licet*. Legit Heinsius *Nec libet*: cui minime tamen subscribimus, cum videatur Auctor respicere Tantalum fabulam; de qua vide Notam in v. 205 Heroid. XVI.
- v. 363 *Ærata*. Et *aurata*, & *reserata* reperias. Præfert Heinsius *reserata*; sic enim Florus lib. 1, cap. 13. *Parentes passim domos adeunt, ubi sedentes in curulibus suis senes prætextatos mactant.* Vide quoque Livium lib. V, cap. 47.
- v. 403 *Aras*. Pro *aram* dixit Auctor; ac juxta P. Victorem *ara Saturni in lacu Curtii* significatur.
- v. 405 *Velabra*. Plutarchus in Romulo: *Vocatur autem nunc locus iste velabrum, eo quod crebro fluvio exundante, eo loco trajectus esset in Forum: trajectum autem adpellant Romani velaturam.* Alii ita dictum volunt a *velis*, quod qui munus aliquod populo exhibebant, inde velis viam, quæ a Foro ad Circum maximum ferebat, adumbrarent.
- v. 410 *Nomen* &c. Illorum hic opinionem securus est Auctor, qui putant dictum inde *Versumntem*, quod Tiberini fluvium a Foro Romano longe verterit. Metam. autem lib. XIV, v. 643 & seqq. ratio nominis videtur inde petenda, quod in variis sese formas Deus ille converteret.
- v. 421 *Signum caeleste*. Palladium, h. e. Palladis simulacrum, intelligit; quod in Ilium cœlitus eo tempore cecidit, quo Rex Ilius ejusdem Divæ templum ædificabat. Grassante bello furtim sublatum fuit a Græcis, & plurimis elapsis annis Romam pervenit, ubi collocatum est in æde Vestæ; qua flagrante, a Metello ex incendio fuit ereptum, ut infra fuse describitur.
- v. 425 *Smintheus*. Apollo, in Mysia & Phrygia cultus cognomine *Smintheus*, quod infestantes ea loca mures sagittis ipse confixerit. Mus autem *σμινθος* Phrygium lingua dicitur.

- v. 432 *Suo*. Clarius alii *sua*, h. e. ejus. Quoad Paridis vero judicium vide Notam in v. 5 Heroid. V.
- v. 433 *Genus Adrasti*. Diomedes Adrasti nepos, & Ulixes simul eripuerunt Palladium: hæc est opinio fere communis: quidam ab Ænea in Italiam translatum autumant.
- v. 434 *Datur*. Traditur, sive narratur. Alii *ferunt*.
- v. 437 *Sceleratis ignibus*. Quos Galli hostes injecerant.
- v. 461 *Callaico &c.* Eodem Vestalium diean. U. C. DCXVIII D. Junius Brutus sexaginta Callaicorum millia in Hispania cecidit: unde Callaici cognomen retulit.
- v. 468 *Uxor*. Ventidius Orontem inter & Euphratem Pacorum, Parthorum Regem, & ejusdem viginti millia militum interfecit. Vide Florum lib. IV, cap. 9.
- v. 476 *Thebana ... Dea*. Vide Notam in v. 159 Heroid. XVIII.
- v. 478 *Posito de bove*. In Foro Boario, in quo Templum Matutæ, bos æneus positus erat.
- v. 484 *Tua est*. Inus enim sive Matutæ soror est Semele, Bacchi mater.
- v. 487 *Raptâ ... pellice*. Quoad modum, quo rapta fuerit sive sublata, vide Notam in v. 37 El. III Amor. III.
- v. 489 *Imaginem falsa*. Quod Learchum filium, leunculum ratus, interemerit.
- v. 495 *Est spatium &c.* Isthmus videlicet Corinthiacus.
- v. 519 *Æteus*. Hercules; quod in Æta, Thessaliæ monte, sibi rogum accenderit.
- v. 531 *Tegeæ Sacerdos*. Carmenta vates, ab oppido Tegeæ sic adpellata.
- v. 548 *Ite*. Edit. Gryph. Neap. & aliæ *Este, precor*.
- v. 549 *Adnuerant: promissa fides*. Licet alii aliter legant, hic tamen sensus elicitur: Carmentæ promissa effecerunt, ut adnuerint se locis illis fore propitios.
- v. 553 *Cadmei*. Ino Cadmi filia.
- v. 558 *Tibi*. Libri duo *sibi*, h. e. Matutæ.
- v. 567 *Pallantide ... eadem*. Eadem scilicet Aurora cæsus Didius &c. Cum autem, quis fuerit iste Didius, haudquamquam liqueat, legunt alii *Porcius*, h. e. L. Porcius Cato Consul; qui sane bello Marsico interiit anno sequente ab U. C. DCLXIV.
- v. 586 *Intus*. Ab equis in Circo currentibus translatione desumpta; qui, quo interius agerentur, metam eo breviori gyro tangebant.
- v. 587 *Peraflo*. Alii *parato*.

- v. 624 *Septimus*. Si cum Solino Tatium quoque Romanis Regibus inseras.
- v. 638 *Quam*. Qua nempe concordia cum Augusto vixit viro suo.
- v. 640 *Domus*. Superbam illam Vedii Pollionis domum intelligit, cujus ille heredem legato fecit Augustum. Hic autem eandem solo, creatus Censor, æquavit.
- v. 651 *Quinquatrus* ... *minores*. De majoribus egit Auctor v. 809 & seqq. Fast. III. Quoad minores ita Varro lib. V de L. L. *Quinquatrus minuscula dicta Junia Idus ab similitudine majorum: quod tibicines tum feriat per urbem vagantur, & conveniunt ad ædem Minervæ*.
- v. 661 *Mercede*. Vesci enim in æde Jovis tibicinibus jus erat. At illi postea a Censoribus Appio Claudio & C. Plautio fuere vetiti (ita Valerius) in æde Jovis, quod prisco more faciliarent, *vesci*.
- v. 663 *Edilis*. Idem Appius Claudius funeris impensas coarctavit. Hinc irati tibicines *Tibur* (ita Livius) uno agmine abierunt: adeo ut nemo in urbe esset; qui sacris præcineret.
- v. 676 *Vindicta*. Libertatis. Vide Notam in v. 615 Art. III.
- v. 679 *Dominus*. Nempe convivii, h. e. libertus.
- v. 691 *Placuit*. Claudio scilicet inventio jocosa Collegæ.
- v. 701 *Dixit*. Codices fere omnes *dixi*, & aptius illi quidem; pergit enim narrare Pallas.
- v. 703 *Satyrus*. Marsyas; cujus supplicium descripsit etiam v. 383 & seqq. Metam. VI.
- v. 711 *Dodoni Thyene*. Una ex Nymphis Dodonidibus, quas Hyades esse creduntur.
- v. 712 *Agenorei*. Ejus nimiram, a quo rapta fuit Europa, Agenoris filia.
- v. 713 *Purgamina*. Vide Notam in v. 227 hujus.
- v. 719 *Proles Hyriea*. Orion; de quo egit sup. lib.
- v. 721 *Olim*. Anno ab U. C. CCCXXII. Adi Livium.
- v. 729 *Tua*. Nupserat Aurora Tithono, Laomedontis filio.
- v. 731 *Summano*. Deus hic aliis Juppiter est, Plato aliis, quasi *summus Manium*.
- v. 732 *Tum, &c.* Anno CCCCLXXIII, captis Romanorum castris, Romam versus duxit exercitum.
- v. 735 *Juvenis*. Æsculapius, Phæbi filius & Nympha Coronidis. Vide Notam in v. 644 Metam. II.
- v. 737 *Phadra*. Vide Notam in v. 10 Herold. XXI.



- v. 751 *Tunc, cum &c.* Obscurum distichon, & spurium habitum ab Heinsio; neque enim augurem fuisse novimus Æsculapium. Ab illo occisus anguis, ope cujusdam herbæ ab alio pariter angue præstita, in vitam rediit; proptereaque sidus Æsculapii nexas angue gemino manus porrigere dicitur v. 736.
- v. 755 *Dislynnæ*. Diana, a δίκτυον, rete; quia retium inventrix fuisse dicitur. Quoad Hippolytum vitæ restitutum, conversum in Virbium, & Aricinæ silvæ præpositum, latius Auctor Metam. XV, v. 427 & seqq.
- v. 757 *Clymenus*. Pluto; ita dictus vel a κλέω, quod audiat ab omnibus, vel a καλέω, quod omnia ad se vocet. Alii aliter legunt. *Hæc &c.* Vide Notam in v. 3 Heroid. XII.
- v. 762 *Propter te*. In gratiam nempe tui facit id Juppiter, quod ab aliis fieri vetat, h. e. in vitam revocat Æsculapium, Deumque reddit.
- v. 769 *Superat &c* Rex Masinissa, populi Romani socius, Syphacem Numidæ Regem devicit an. U. C. DL.
- v. 770 *Hasdrubal*. An. DXLVI sibi necem intulit, damnatus a civibus, quod bellum male gessisset.
- v. 778 *Munera Regis*. Templum a Servio positum.
- v. 787 *Zona*. Orionis cinctus stellis tribus constare dicitur.
- v. 792 *Hæc &c.* In Via Sacra, ubi artifices coronis texendis dabant operam, easque vendebant.
- v. 793 *Stator*. Florus lib. I, cap. 11 *Adeo ut Romulus Jovem oraret, fedam suorum* (in Sabinos pugnantium) *fungam sisteret. Hinc templum, & Stator Juppiter*.
- v. 796 *Trabeæ*. Vide Notam in v. 37 Fast. I.
- v. 799 *Adjunxerit*. Musis erat templum commune cum Hercule, qui tandem novercæ Junonis odium vicit. Templum autem illud Fulvius Nobilior ex pecunia Censoria fecit; & Marcius Philippus, Augusti vitricus, jam vetustate collapsum restituit.
- v. 803 *Sacrificio ... Anco*. Anco Martio, quarto Romanorum Rege, qui Numam imitatus pietatem ac religionem coluit.
- v. 809 *Nupta &c.* Marcius Philippus duas Accias uxores habuit, primum Augusti materteram, deinde matrem.



I N

P. OVIDII NASONIS  
**TRISTIUM**  
 LIBROS NOTÆ.

IN LIBRUM PRIMUM.

ELEG. I. v. 5 *Vaccinia*. Alia certe ab iis, de quibus ait Virg. Ecl. II, v. 18: *Vaccinia nigra leguntur*. Auctores plurimi censent esse hyacinthos.

v. 7 *Cedro*. Vitruvius lib. II, cap. 9: *Ex cedro oleum, quod cedrium dicitur, nascitur: quo reliquæ res, cum sint unctæ, uti etiam libri, a tineis & a carie non leduntur*. Multi *linatur* pro *notetur*.

v. 8 *Candida &c.* Geminæ libri *frontes* sunt extremæ partes complicati voluminis; ex quibus eminent libri *cornua*, h. e. utraque extremitas umbilici sive bacilli, quem circa chartis complicatis efficitur volumen.

v. 11 *Ablataque*. Placet aliis *pacataque*.

v. 47 *Maoniden*. Homerum; vel quod Mæonis filius est, vel quod altus a Mæone Lydiæ Rege, vel quod in Mæonia natus.

v. 56 *Ingenio &c.* Videtur hic Auctor adscribere causam exsilii sui tribus Artis Amatoriæ Libris. Animadvertas atamen aliam fuisse veram ejus exsilii causam, & priorem illam ad velandam veritatem facti prætexi quodammodo atque prætendi. Quænam vero fuerit, aperte colligi nequit: illud tantum ex plurimis horum Operum locis conjectare possumus, Ovidium Augusti penetralia imprudenter ingressum turpis aliquid fortasse vidisse, & ideo in extremis orbis partibus exsulare coactum, ut quam longissime abesset unicus ejus turpitudinis testis. Hoc dixisse semel sufficiat.

v. 81

- v. 81 *Jovis*. Augusti; quem & *Deum* sæpe vocat, & *Jovem*.
- v. 83 *Capharea*. Vide Notam in v. 735 Rem. Amor.
- v. 100 *Achilleo*. Vide Notam in v. 7 El. IX Amor. II.
- v. 112 *Hi quoque*. Tres Amorum libros fortasse denotat, qui non minus perniciosi domino censendi, quam tres Artis Amatorum libri. Hinc illos infra vocat *Ædipodas* ac *Telegonos*, h. e. parricidas; quod *Ædipus* Lajum, *Telegonus* Ulixem, parentes ipsi suos licet inscii peremerint.
- ELEG. II. v. 29 *Sicca*. Quod prohiberetur æquore tingui. Fabula fuse describitur v. 153 & seqq. Fast. II.
- v. 50 *Posterior* &c. Decumani fluctus omnium maximi censebantur.
- v. 61 *In loca jussa*. Tomin, in ora Ponti Euxini sitam.
- v. 67 *Est*. Jus est illi scilicet inferendi mihi necem, quin obnoxius fiat invidiæ.
- v. 80 *Jocose*. Quod ab Alexandria diu nocturne cymbæ discederent, viris mulieribusque tripudium agentibus refertæ. Petebant autem Canopum ad Serapidis Festa concelebranda.
- v. 83 *Obligor*. H. e. votis. *Lavi*. Alii *savi*.
- v. 86 *Exilem*. Brevem scilicet & compendiosam, juxta Crispinum. Quidam *exilio*.
- v. 99 *Immo* &c. Hæc ita construenda: *Immo ... ita parcite* (v. 105) *Divi; si me meus absulit error* &c.
- v. 102 *Publica*. Ita Crispinus: *Si mihi Augusti semper nuntur, & simplex voluntas pro lege fuit*.
- ELEG. III. v. 19 *Nata*. Perilla cum viro suo petierat Africam, cujus Libya est ingens provincia.
- v. 31 *Numina*. Apud Livium ita Manlius quoque: *Juppiter optime maxime, Junoque regina, ac Minerva, ceterique Dii Deaque, qui Capitolium arcemque incolitis* &c.
- v. 48 *Parrhasis Arctos*. Vide Notas in v. 149 & 152 Heroid. XVIII.
- v. 66 *Therea ... fide*. H. e. artissimis fidei vinculis. Theus & Pirithous celeberrimum amicorum par.
- v. 75 *Sic Priamus* &c. Magis arridet ea lectio, quæ ab aliquibus substituitur, licet nullis Codicibus confirmata: *Sic doluit Metius, tum cum in contraria perios Ultores habuit proditoris equos*.
- Metius autem Dictator Albanorum cum Tullo Romæ Regi, contra Fidenates belligeranti, opem ferre deberet; fervente pugna, versipellis proditor paulum secessit, eas secutus.
- Ovidius T. III.

- turus deinde partes, ad quas inclinare victoria videretur.  
Tullus vicit, Metiumque binis quadrigis in diversa nitentibus evinci & lacerari jussit. Graphice Livius lib. I.
- ELEG. IV. v. 1 *Custor*. Arctophylax; de quo vide Notam in v. 149 Heroid. XVIII. Pylades; de quo vide Notam in v. 15 El. VI Amor. II. Quoad Oresten vero vide Notam in v. 7 El. VII Amor. I.
- v. 23 *Cupio* &c. Cupit a patria revelli metu Cæsaris, timet autem ob ejusdem patriæ desiderium.
- ELEG. V. v. 1 *Phocæus*. Pylades; de quo vide Notam in v. 15 El. VI Amor. II. Quoad Oresten vero vide Notam in v. 7 El. VII Amor. I.
- v. 42 *Simplicitate*. Imprudenti sc. ignorantia, non scelere.
- v. 52 *Dissimulante*. Ne id fortasse detegat, quod celare cogitur metu Cæsaris.
- v. 57 *Duce Neritio*. Ulixæ; a Nerito, Ithacæ monte. Eravit autem annis decem.
- v. 74 *Ingenua*. Exiles, vel delicatæ, non quæ aduetis labori servis inesse solent. Alii *exigua*.
- ELEG. VI. v. 1 *Clario* . . . *poeta* &c. Cicero in Bruto cap. 51: *Antimachus Clarius poeta*. Lydem alii ejusdem amicam faciunt, alii conjugem. Nomine autem *Coi* Philetas intelligitur, patriâ Cous.
- v. 20 *Comes*. Vide Notam in v. 35 El. XVIII Amor. II.
- v. 25 *Femina*. Livia, Augusti conjux.
- ELEG. VII. v. 18 *Theriat*. Althæa, Thestii filia. Vide Notam in v. 92 Heroid. III.
- ELEG. VIII. v. 16 *Re tibi*. Edit. Gryph. & aliorum *Nunc tibi*: duo scripti *Næ tibi*.
- v. 45 *At mala* &c. Hic videtur esse sensus: Si secus esset, malis nostris tangereris magis, quam nunc reapse tangeris.
- ELEG. IX. v. 27 *De comite* &c. Pylades Oresten ad Tauricam usque Chersonesum secutus est; in qua cum Rex Thoas Oresten interficere vellet, nec agnosceret uter eorum esset Orestes, semet Oresten esse finxit. Vide Cic. de Amic. cap. 7.
- v. 29 *Actorida*. Patroclo, Actoris nepoti.
- v. 31 *Comes*. Vide Notam in v. 72 Heroid. II.
- v. 37 *Hic est*. Quæ sequuntur, quidam a superioribus sejungunt, & seorsim Elegiam faciunt; qua quidem separatione nil opus erat, cum facillime nexus reperiatur. Ait enim auctor: *Hic quidem status, hæc* &c.; sed tamen *mea sunt* &c.

- v. 40 *Processu*. Profectu scilicet, sive progressu.  
 ELEG. X. v. 2 *Nomen*. Vossius etiam *Galeam* dictam fuisse putat, & inde naves *Galeras* adpellatas.  
 v. 15 *Æolia*. Ab Æolo, ejus avo. Quoad Hellespontum vide Notam in v. 123 Heroid. XIX.  
 v. 26 *Ruricolâ* ... *Deo*. Priapo, hortorum custode.  
 v. 30 *Hæmonia*. Illud enim condidere Thessali, qui *Hæmones* ab Hæmo monte dicebantur.  
 v. 32 *Gemini*. Propontidis scilicet, & Euxini.  
 v. 34 *Instabiles*. Vide Notam in v. 121 Heroid. XII.  
 v. 35 *Urbem*. Apolloniam, Anthium olim adpellatam.  
 v. 38 *Nomine*. Dionysipolin; Bacchus enim *Dionysius* quoque dicitur, quasi Διὸς ὄνς, h. e. Jovis mens, juxta Macrobius lib. I Saturn. c. 18.  
 v. 41 *Milesida* ... *urbem*. Tomin; quæ Milesiorum colonia fuit.  
 v. 45 *Tyndarida* ... *fratres*. Sidera Castoris & Pollucis navigantibus propitia. Colebantur autem in Insula Samo.  
 ELEG. XI. v. 5 *Bimarem* ... *Isthmon*. Corinthiacum intellige. Vide Notam in v. 105 Heroid. IV.  
 v. 13 *Hædis*. Vide Notam in v. 188 Heroid. XVIII; ubi & de Plejadibus agitur, quarum una fuit Sterope.  
 v. 43 *Vincat &c.* Ecce sensus: Me tempestas a scribendo deterreat; sed statim ac *Ipse modum statuam carminis*, ipsa statuatur modum sui, h. e. sœvire desinat.

## IN LIBRUM II.

- ELEG. I. v. 19 *Teuthrantia*. Teuthrans, Mysiæ Rex: generum adsciverat sibi Telephum & heredem regni. Vide Notam in v. 7 El. IX Amor. II.  
 v. 24 *Carmina &c.* Id autem fiebat ludis Megalensibus, ut fuse describitur Fast. lib. IV, v. 179 & seqq. *Turrigera* dicitur, quia caput ejus turribus ornatum pingitur.  
 v. 25 *Ludos*. Seculares intelligit, qui in Romanis centesimo quoque anno celebrabantur. Hinc ideo dictum *seculare carmen*, quod ludis illis in laudem Phœbi ac Dianæ caneretur.  
 v. 40 *Nomen*. Perperam alii *numen*; sic Fast. II, v. 131:

*Hoc tu per terras, quod in aethere Iuppiter alto,*

*Nomen habes: hominum tu Pater, ille Deum.*

- v. 69 *Fama Jovi superest*. Tanta scilicet est, ut superior sit hominum præconiis. Alii aliter legunt, ac interpretantur.
- v. 90 *Ille, &c.* Quotannis III Id. Jul. Equites Romani insidentes equis Capitolium petebant: iisdemque magnifice vestitis, & oleâ coronatis, singillatim prætereuntibus Censoris conspectum subire præscribebatur; qui, quoties Eques aliquis male audiret, suisque vitiis, equestrem reditum diminueret, eundem jubebat equum vendere, atque ita ab equitum albo expungebat. Ovidio nil tale accidit sub Augusto, ut infra quoque colligimus v. 541.
- v. 105 *Ætæon*. Vide Fabulam II Metam. III.
- v. 124 *Ematurerit*. Mitis evaserit; a fructibus sumta metaphora, qui maturescentes acerbitatem exuunt.
- v. 137 *Exsul*. Exsilium perpetuum est, non autem relegatio; nec relegati bona, quemadmodum exsulis, proscribuntur. Sequens versiculus subobscurus est; & ejus lectio multplex reperitur.
- v. 165 *Natur*. Tiberius adoptione filius; & infra Augusti nepotes sunt Germanicus & Drusus, prior Tiberii adoptione filius, alter origine.
- v. 190 *Nunc quoque &c.* Bellum ingens in Romanos Dalmatiæ ac Pannoniæ populi concitaverant; ad quos debellandos Augustus Tiberium miserat.
- v. 190 *Parrhasia ... virginis*. Ursæ majoris; de qua vide Notas in v. 149 & 152 Heroid. XVIII. Animadvertas autem matribus etiam, modo florida ætate sint, nomen *virginis* aliquando tribui.
- v. 228 *Captaque signa*. Vide Notam in v. 179 Art. I.
- v. 241 *Fronti ... severæ*. H. e. viris severæ frontis, ut interpretatur Heinsius. Legunt alii *frontis*; & libri frontem intelligunt.
- v. 247 *Este &c.* Quoad vittas & institam vide Notam in hosce versus 31 & 32 Art. I.
- v. 261 *Sumserit, &c.* Eos nempe libros, in quibus agitur Æneadum prima genetrix. Vel Maronis Æneiden juxta Crispinum, vel ipsos Fastorum libros intellige.
- v. 282 *Arena*. Vide Notam in v. 8 El. XIV Amor. II.
- v. 294 *Erichthonium*. Vide Notam in v. 35 Eleg. VI Amor. II.
- v. 296 *Uleri*. Vide Notam in v. 577 Fast. V.

- v. 199 *Latvius heros*. Endymion; de quo vide Notam in v. 90 Heroid. XV.
- v. 319 *Fratrum*. Eteoclis & Polynicis, qui cum secum invicem pacti fuissent, ut Thebis regnarent alternis annis, cumque dictis non stetisset Eteocles, bellum ingens exarsit: in quo post varias cædes ipsi inter se fratres singulari certamine congressi mutuis vulneribus concidere. Id fuit Statio *Tbebaidis* argumento.
- v. 327 *Arguor*. Artificiosissima Correctio, non tam ad semetipsum excusandum, quam præsertim ad Cæsarem extollendum.
- v. 337 *Detrahere*. H. e. male tractare, juxta Festum. Mal-  
lent alii legere *detrectare*, h. e. detrahare rebus ab Augu-  
sto gestis, easdemque scribendo imminuere, ut evincitur  
sequenti versiculo.
- v. 364 *Senis*. Anacreontis, ex Teo oppido Insulæ cognomi-  
nis.
- v. 367 *Battiade*. Callimache; qui Batti filius.
- v. 373 *Quid prius &c.* Quid aliud majore studio describit  
Ilias, quam amorem Agamemnonis erga Chryseidem, ab  
eodemque raptam Achilli Briseidem?
- v. 380 *Dear*. Quarum una est Calypso, altera Circe; &  
quoad illam vide Notam in v. 15 El. XVII Amor. II.
- v. 383 *Nam quid &c.* Quoad Hippolytum & Elestram, quam  
Noster infra nominat, lege Euripidis Tragædias, quas nu-  
per in Italum sermonem transtulit, mira variandi carmi-  
nis facilitate ac venustate plane sua, Franciscus *Boaretti*.
- v. 386 *Pisæam*. Vide Notam in v. 70 Heroid. VIII.
- v. 387 *Mater*. Medea; de qua in Notis ad Heroid. XII.
- v. 389 *Volucres*. Vide Notam in v. 153 Heroid. XV.
- v. 391 *Si non &c.* Vide Notam in v. 205 Heroid. XVI.  
*Erope* fuit Atrei conjux.
- v. 393 *Scylla*. Vide Notam in v. 21 El. XII Amor. III.
- v. 397 *Domitore Chimæa*. Bellerophon; ejus insigni ve-  
nustate capta lasciva Præti conjux Stenobæa, & ægre fe-  
rens repulsam, apud virum ipsa suum innocentem hospi-  
tem accusavit. Ex quo factum, ut Bellerophon a Præto  
plurimis subeundæ mortis periculis objiceretur.
- v. 399 *Schæneia virgo*. Atalanta. Vide Notam in v. 263 He-  
roid. XVI; & quoad Hermionen a Pyrrho raptam Oresti  
lege Heroid. VIII.
- .400 *Phæbas*. Vide Notam in v. 21 El. VIII Amor. II.

2. 401 *Quid* &c. Vide Notas in v. 27 El. XIX Amor. II,  
35 Heroid. XV, 37 El. III Amor. III.
- v. 402 *Hamona*. Qui cum amore incredibili Antigonen ædipi  
& Jocastæ filiam deperiret, ad ejus tumultum mortem sibi  
conscivit. Et *noctes* &c. Vide Notam in v. 45 El. XIII  
Amor. I.
- v. 403 *Generum Pelia*. Admetum; cujus uxor fuit Alceste.  
Vide Notam in v. 19 Art. III; & quoad raptam a Theseo  
ac deinceps proditam Ariadnen vide Notam in v. 59 He-  
roid. IV.
- v. 404 *Primus*. Vide Notas in v. 91 Heroid. XIII, & 38  
El. XVIII Amor. II.
- v. 485 *Herculis uxor*. Multæ fuerunt Herculis uxores. Hæc  
Dejaniram intellige; quo spectant Sophoclis *Trachiniae*,  
quas Attius vertisse traditur.
- v. 416 *Iliadesque puer*. Ganymedes.
- v. 411 *Auctor*. Interpretibus ignoto: Heinsius Sotadem quem-  
dam, impurum hominem, fuisse suspicatur.
- v. 417 *Sybaritida*. Obscenum Hemitheonis Sybaritani civis  
opus de generibus voluptatum. Hinc turpes quilibet libelli  
*Sybaritici* dicuntur.
- v. 418 *Quæ*. Perperam alii *qui*; intelliguntur enim Philænæ  
& Elephantis poetrix, quarum fœdissima scripta passim cit-  
cumferebantur.
- v. 420 *Facta*. H. e. reddita.
- v. 428 *Falsum*. Apulejus: *Eadem igitur operâ accurent C.*  
*Catullum, qui Lesbiam pro Clodia nominavit, & Tici-*  
*dam similiter, quod, quæ Metella erat, Perillam scri-*  
*pserit.*
- v. 439 *Is* &c. C. Terentius Varro; qui scripsit *Argonautica*.  
Vide Notam in v. 1 Heroid. VI.
- v. 446 *Sed* &c. Cum enim inter pocula in Augustum teme-  
re locutus esset, eidem ille domo & provinciis suis inter-  
dixit.
- v. 473 *Tali*. Vide Notam in v. 205 Art. II.
- v. 475 *Tessera*. Lusoriæ tesserae sunt cubi ossei, vel lignei,  
punctis distincti, quibus in alveolum jactis luditur. Di-  
scrimen duplex inter tesseras & talos ostendit Martial. lib.  
XIV, Epigr. 15.
- v. 477 *Discolor* &c. Vide Notam in v. 207 Art. II.
- v. 481 *Tabella*. Vide Notam in v. 203 Art. II.
- v. 485 *Formas*. Quatuor erant formæ pilarum, *Trigonales*



- scilicet, *Follet*, *Paganica*, *Harpasta*; de quibus vide Martial. lib. XV, Epigr. 45 & seqq.
- v. 519 *Saltata*. Saltatione scilicet expressa, sive representata.
- v. 525 *Telamonius &c.* Ita Plin. Hist. Nat. lib. XXXV: *Timomachus Byzantius Caesaris Dictatoris ætate Ajacem ei pinxit & Medeam, ab eo in Veneris Genetricis æde positas, octoginta talentis venundatas.*
- v. 527 *Venus*. Ab Apelle picta; quam Jul. Cæsari patri suo dicavit Augustus. Seq. v. pro *teſta* reperitur & *nata*, & *orta*, & *veſta*. Fingitur autem nata Venus e spuma maris.
- v. 536 *Non legitimo*. Quia Dido fidem violabat, juratam Manibus Sichæi; & quia ratas fieri nuptias illas Juppiter abnuebat.
- v. 547 *Remissum*. Solutum scilicet, sive lascivum.
- v. 553 *Scriptum regale*. Tragœdiam, quam *Medeam* inscripsit.
- v. 567 *Inter &c.* H. e. inter tot millia e turba Poetarum, tot millia e consortibus studii nostri &c. Alii aliter legunt; at idem omnino sensus elicitur.

## IN LIBRUM III.

- ELEG. I. v. 29 *Pallada*. Palladium, sive Palladis simulacrum.
- v. 36 *Querna corona*. Quereus enim est sacra Jovi.
- v. 42 *Leucadio ... Deo?* Apollini, Leucade culto.
- v. 47 *Scripto*. Hoc videlicet: *Ob cives servatos*. Hinc corona querna dabatur illi, qui hoste cæso civem servasset; unde & *civica* dicebatur.
- v. 60 *Dei*. Apollinis Palatini. Quoad ejus Porticum & Bibliothecam vide Notas in v. 4 El. II Amor. II, & 119 Art. III.
- v. 69 *Altera templa*. Alii Veneris Victricis templum intelligunt, Pompeji Theatro proximum; alii Herculis ædem & Musarum; alii aliter.
- ELEG. II. v. 3 *Stirps Latoia*. Apollo Latonæ filius.
- v. 11 *Mare portubus orbum*. Euxinus.

ELEG. III. v. 16 *Plus ... parte*. Majorem nempe partem.  
Legunt alii aliter, sensu tamen eodem.

v. 34 *Præcepisset*. Verbum istud haud raro significat *prævenire*. Livius lib. III: *Dum præciperent iter nuntii ante missi*.

v. 40 *Depositum*. Virgilius *Æneid.* XII, v. 395:  
*Ille, ut depositi proferret fata parentis,*  
*Scire potestates barbarum, usumque medendi*  
*Maluit.*

*Ubi Seroius*: Apud Veteres consuetudo erat, ut desperati ante januas suas collocarentur, vel ut extremum spiritum redderent terræ, vel ut possent a transeuntibus forte curari, qui aliquando simili laboraverant morbo.

v. 62 *Samii ... senis*. Pythagoræ; cujus doctrina de immortalitate ac transmigratione animorum fuse describitur Metam. XV.

v. 67 *Thebana &c.* Antigone, verante Creonte Rege Thebarum, sepeliit Eteoclem & Polynicem; de quibus vide Notam in v. 119 Libri superioris.

ELEG. IV. v. 4 *Nomina magna*. Potentes nempe viros.

v. 19 *Elpenor*. Scalis decedens temulentus, misere interiit; & ejus umbra occurrit Ulixi, cum ille ad Inferos descendisset, ut narrat Homerus.

v. 17 *Filius*. Dolon. Vide Notam in v. 39 Heroid. I.

v. 30 *Cepisset*. Si contentus fuisset patre Merope, neque Solis haberi se filium adfectasset. Vide Fab. I & II Metam. II.

v. 49 *Paludes*. Quarum maxima Mæotis est.

ELEG. V. v. 3 *N?*. Burmannus legere mallet *Qui*; ac nō forsan seq. v. ad *me complexus &c.* referendum putat, ut fiat sensus apertior.

v. 38 *Dardanii ... senis*. Priami, originem trahentis a Dardano. Huic Achilles misericordia captus Hectoris cadaver reddidit, ut poeticis omnino coloribus describitur Iliad. 24.

v. 39 *Qua &c.* Alexander Macedo devicto Poro, Indiæ Regi, non pepercit solum, sed & regnum restituit; ac defuncto Dario, Regi Persiæ, præclarissimas exsequias celebravit.

v. 42 *Gener*. Hercules, cui nupsit Hebe.

v. 56 *Admisso*. H. e. concitato.

ELEG. VI. v. 7 *In*. H. e. erga.

v. 8 *Viro*. Augusto: Crispinus putat alium intelligi.

- v. 21 *Gratia*. Favor scilicet, vel inita cum potentibus consuetudo & familiaritas.
- ELEG. VII. v. 12 *Non patrio*. Haud lascivis numeris, quibus ego. Intelligunt alii Perillam, ad imitationem Sapphūs Lesbīæ Poetriæ, scripsisse lyrica; quod genus carminis Romæ vix obtinere cœperat.
- v. 15 *Pegasis*. A Pegaso, qui Musarum fontem Hippocrenen ictu pedis aperuisse dicitur.
- v. 42 *Irus*. Mendicus adeo, ut paupertas ejus, non secus ac opulentia Cræsi, in proverbium evaserit.
- ELEG. VIII. v. 1 *Currus*. Vide Notam in v. 15 El. VI Amor. III.
- v. 4 *Fugiens*. Vide Notas in v. 154 & 161 Heroid. VI.
- v. 23 *Faciunt*. Idest conferunt, sive prosunt.
- v. 41 *Civiliter*. Moderate scilicet & comiter; vel si mavis, juxta leges & jura civium.
- ELEG. IX. v. 7 *Rate*. Argo; de qua, & Myniis, & Absyrto vide Notas in v. 1, 47, & 129 Heroid. VI.
- v. 12 *Hesper* &c. Versum hunc alii aliter legunt; at idem omnino sensus elicitur ex oratione perplexa, qua utitur apposire, consternatus ac trepidans, speculator.
- v. 33 *Tomis*. Α τήμω, seco; unde etiam τόμος, h. e. frustum sectione ablatum.
- ELEG. X. v. 3 *Stellis*. Ursam & Arcturum intelligit; quæ quidem sidera nobis numquam occidunt.
- v. 27 *Papyrifero* ... *amne*. Nilo, ferente papyros.
- v. 38 *Testa*. Gelu ad instar testæ concretum. Alii *crusta*.
- v. 41 *Leandre*. Vide Notam in v. 1 Heroid. XVIII.
- v. 73 *Acontius*. Vide Notam in v. 5 Heroid. XX.
- ELEG. XI. v. 28 *Hæmonios*. Achilleos; ab Hæmo monte Thessaliæ. Hectoris cadaver ter circum mœnia Trojæ raptauit Achilles.
- v. 39 *Busiride*. Vide Notam in v. 69 Heroid. IX. Illo. Vide Notam in v. 653 Art. I.
- v. 52 *Præsens imbue*. Alii *princeps*, h. e. ipse mihi operis tui specimen præbe primus.
- v. 61 *Collatus*. Semet apposite cum Ulixæ contulit etiam El. V Trist. I.
- ELEG. XII. v. 2 *Maotis*. H. e. Scythica. Diphthongum corripuit Græcorum more ob sequentem vocalem. Plerique tamen mendum hîc latere contendunt.
- v. 3 *Qui* &c. Sidus Arietis; de quo & Helle vide Notam in v. 123 Heroid. XIX.

- v. 9 *Ugne &c.* Sensus est: Hirundo, ne putetur amplius scelerata mater, *Sub &c.* Quoad Prognos Fabulam, in hirundinem conversæ, vide Notam in v. 153 Heroid. XV.
- v. 12 *Virgine.* Vide Notam in v. 464 Fast. I.
- v. 35 *Ille &c.* Hujuscæ distichi sensus est: Si forte huc aliquis, non a proximis, sed a longinquis regionibus adpulerit, miraculo adscribam; nam *Rarus &c.*
- v. 40 *Hujus.* H. e. Latini vox.
- v. 41 *Ab ore freti.* A Bosphoro Thracio.
- ELEG. XIII. v. 28 *Falso ... nomine.* Euxinus enim, qui propter immanitatem hominum inhospitalis est, constat e vocibus aliter significantibus, h. e. ex *ὄν bene* & *ξίρος bospitalis*.
- ELEG. XIV. v. 13 *Palladis.* Illam enim fabulantur ex cerebro Jovis armatam prosiluisse.

## IN LIBRUM IV.

- ELEG. I. v. 15 *Lynxside.* Briseide, Vide Notas in v. 1, 2, & 118 Heroid. III.
- v. 18 *Bis.* De Orpheo & Eurydice vide Fab. I Metam. X, & Virg. Georg. lib. IV, v. 457.
- v. 31 *Lotor.* Narrat Hygin. Fab. CXXV duos Ulixis socios gustato loti fructu, oblitosque reditûs in patriam, ab eo victos ad navem reductos fuisse. Quoad Lotophagos vide Notam in v. 789 Rem. Amor.
- v. 43 *Tbyrsa.* Vide Notam in v. 23 El. I Amor. III. Bacchus etiam Poetarum Deus habebatur; ita enim Horatius: *Bacchum in remotis carmina rupibus Vidi docentem &c.*
- v. 63 *Stamina.* Vide Notam in v. 3. Heroid. XII.
- v. 106 *Consule ... boni.* Bonum judica, atque adeo in bonam partem accipe.
- ELEG. II. v. 1 *Germania.* Ad quam debellandam Augustus miserat Tiberium.
- v. 9 *Juvenes.* Germanicus ac Drusus, prior Tiberii adoptione filius, alter origine.
- v. 40 *Parente.* Liviâ, quæ priori marito Tib. Claudio Neroni Drusus peperit.
- ELEG. III. v. 1 *Magna.* Vide Notam in v. 149 Heroid. XVIII.

- v. 29 *Thebana*. Andromacha, Eetionis Cilicum Thebarum Regis filia.
- v. 34 *Ut &c.* Subintellige *vellem*, vel quid simile.
- v. 63 *Cum &c.* Quoad Capaneum vide Notam in v. 21 Art. III; quoad Phaethontem ejusque matrem Clymenem Metam. I finem versus, & Fab. I lib. II; quoad Semelen vide Notam in v. 37 El. III Amor. III.
- v. 76 *Virtuti*. Ejus, h. e. Hectoris. Alii: *virtutis*.
- ELEG. IV. v. 32 *Pars*. Ejus eloquentia, quæ est quasi pars altera nobilitatis. Fuisse creditur Messala, insignis Orator.
- v. 36 *Axenus*. Inhospitalis; ab α privativa, & ξένος hospes.
- v. 64 *Phaetrata* ... *Dea*. Dianæ; cujus inhumanis omnino sacris Thoas præfecit Iphigeniam: hanc enim virginem, Pelopis proneptem, haud passa fuerat immolari sibi Diana; (ut videre est Fab. I Metam. XII) sed, aræ suppositâ cervâ, eandem in Tauricam regionem transtulerat. Quo cum postea venisset Orestes, ob interentam matrem furiis exagitatus, jamque immolandus esset; a sorore cognitus & liberatus est. Hinc, conjunctis viribus occiso Thoante, Dianæ simulacrum in Italiam transtulerunt, & in Aricino nemore collocavere.
- ELEG. V. v. 30 *Quo &c.* Pollux fratrem suum incredibili amore dilexit, & impetravit a Jove, ut immortalitatem suam cum ipso divideret.
- ELEG. VI. v. 8 *Bellua*. Elephas.
- ELEG. VII. v. 13 *Canes*. Vide Notas in v. 12; Heroid. XII, & in v. 21 El. XII Amor. III.
- v. 16 *Virum* ... *canem*. Geryonem, Cerberum.
- v. 18 *Semibovemque virum*. Minotaurum.
- ELEG. VIII. v. 24 *Rude*. Vide Notam in v. 22 Eleg. IX Amor. II.
- v. 27 *Vacuum*. Curis liberum. Perperam alii *vacuos*.
- ELEG. IX. v. 6 *Tempora* ... *Tisiphonæa*. Quibus videlicet Furæ Tisiphones instar in me penitus invehebaris.
- v. 31 *Cane* ... *receptus*. H. e. cessa, vel desine.
- ELEG. X. v. 6 *Cum &c.* Anno U. C. DCCX Hircius & Pansa Coss. apud Mutinam in M. Antonium pugnantes ceciderunt XIII Kal. Aprilis; quo die natus Ovidius.
- v. 8 *Fortune munere*. H. e. ob divitias ac redditus.
- v. 13 *Hæc &c.* Secunda Quinquatruum dies; qua quidem primum gladiatorum spectaculum exhibebatur, ut videre est v. 211 & seqq. Fast. III.

- v. 28 *Liberior*. Vide Notam in v. 77: Fast. III.  
 v. 29 *Lato ... clavo*. In tunicis Romanorum *clavi* erant segmenta, fere e purpura, ipsi tunicæ assuta ornatus gratiâ. Vide Ferrarium de Re Vestitaria lib. I, c. 13.  
 v. 34 *Eque &c.* Triumvirum se fuisse dicit; ac cum varii fuerint hujusce nominis Magistratus, quem ex illis intelligat, ignoramus.  
 v. 35 *Clavi &c.* Sumtâ virili rogâ, etiam lati clavi dignitatem, veluti spem quamdam ordinis Senatorii, consecutus erat. Sed cum eidem honori, seu potius oneri, se imparum esse crederet; clavi mensuram coartavit, h. e. latum clavum deposuit, induit angustum.  
 v. 51 *Amara*. Alii *avara*. Obiit ætate viridi in Phæacia Tibullus.  
 v. 70 *Quæ*. Hanc enim, ut etiam alteram, repudiavit.  
 v. 95 *Pisaa*. Pisis quinto quoque anno in honorem Jovis Olympici equorum certamina celebrabantur: quibus confectis, olivâ coronabatur equus certamine primus.  
 v. 106 *Temporis arma*. Patientiam scilicet, & constantiam in calamitatibus perferendis.

---

 IN LIBRUM V.

- ELEG. I. v. 11 *Caystrius ales*. Cygnus. Caystrus, Lydiæ Fluvius non longe ab Epheso, cygnis abundat.  
 v. 23 *Publica carmina*. Quæ citra damnum pudoris legi possint ab omnibus. Ceterum hoc distichon subobscurum videtur Interpretibus.  
 v. 57 *Nioben*. Vide Notam in v. 105 Heroid. XX.  
 v. 60 *Progen Halcyonemque*. Vide Notas in v. 153 Heroid. XV, & in v. 81 Heroid. XVIII.  
 v. 61 *Paantiur*. Vide Notam in v. 111 Rem. Amor.  
 ELEG. II. v. 15 *Telephus*. Vide Notam in v. 7 Eleg. IX Amor. II.  
 ELEG. III. v. 1 *Illa &c.* XVI Kal. April. Orgia, h. e. Bacchi Festa, celebrabantur.  
 v. 17 *Sorores*. Vide Notam in v. 3 Heroid. XII.  
 v. 26 *Bir genito*. Vide Notam in v. 37 El. III. Amor. III.  
 Hinc & *Bimater* sæpe dicitur.

- v. 19 *Illo*. Vide Notam in v. 21 Art. III.
- v. 39 *Male pressa*. Ut Veteres eorum Manibus, quos dilexerant, terram fore levem cupiebant; ita, gravis ut esset inimicorum cineribus, vovebant. Quoad Lycurgum vide Notam in v. 22 Metam. IV, & quoad Pentheum Metam. III finem versus.
- v. 42 *Cressa Corona*. Vide Notam in v. 114 Heroid. VI.
- ELEG. IV. v. 25 *Teque &c.* Menœtii filius Patroclus Achilli, Pylades Orestis, Pirithoo Theseus filius Ægei, Euryalus Niso, arctissimo amicitie fœdere juncti fuere.
- v. 48 *Nec &c.* Allegorica dicendi ratio, qua significat se numquam tot meritorum immemorem futurum.
- ELEG. V. v. 3 *Laertius ... beror*. Laertis filius Ulixes, Penelopes maritus.
- v. 33 *Consilio, &c.* Callimachus, Batti filius, memorie prodidit, *commune sacrum* facientibus Eteocle & Polynice, flammam de industria & quasi jussam in duas scissam fuisse partes, & acerrimum inter illos bellum portendisse.
- v. 43 *Heroisin*. Andromachæ & Penelopæ. Est autem dativus Græcus pro *Heroidibus*.
- v. 53 *Echionias*. Ab Echione, in Thebis condendis Cadmi socio. *Vir*. Vide Notam in v. 21 Art. III.
- v. 55 *Una*. Alceste. Vide Notam in v. 19 Art. III; & quoad Laodamiam in v. 38 El. XVIII Amor. II.
- v. 62 *Pylios*. H. e. Nestoris, Pyli Regis; qui tertiam ætatem vixisse dicitur.
- ELEG. VI. v. 7 *Palinure*. Vide Notam in v. 577 Rem. Amor.
- v. 32 *Cum verbis*. Liatores enim Consulem cum fascibus præeuntes elata voce clamabant, ut eidem transeunti locus cederetur a populo.
- ELEG. VII. v. 35 *Quaque*. Vide Notam in v. 735 Rem. Amor.
- v. 54 *E medio*. Magis nempe communia.
- ELEG. VIII. v. 8 *Et exora &c.* Nec metuis Numen quoque Rhamnusiæ, sive Nemesis, quæ superbos odit, & acerrime plectit?
- v. 11 *Vidi &c.* In hujusce versus lectione valde discrepant Codices ac Interpretes. Hæc & clarior omnibus est, & aridet magis:
- Vidi ego, navisfrægem qui riserat, aquore mergi.*
- v. 38 *A primis*. H. e. post vota obtinendæ veniæ.

- ELEG. X. v. 8 *Bruma*. Vide Notam in v. 163 Fast. I.  
 v. 12 *Magis*. Idest, potius.  
 v. 13 *Mendax*. Euxinus enim perinde sonat ac *hospitalis*,  
 ut aliàs animadvertimus; qui vere quondam Axenus, h.  
 e. *inhospitalis*, fuerat adpellatus.  
 v. 41 *Utque &c.* Hoc distichon commentitium & fictum ju-  
 dicat Heinsius; nec facile sensum elicias.  
 ELEG. XII. v. 11 *Anysi ... reo*. Socrati; qui fuit ab Ora-  
 culo Apollinis omnium mortalium sapientissimus judicatus.  
 De falsa religione accusatus ab Anyto capitis damnationem  
 subiit; atque adeo in carcere, sumta cicuta, constanter in-  
 teriit.  
 ELEG. XIII. v. 21 *Trinacris*. Sicilia. Ita Noster:  
*Terra tribus scopulis vastum procurrit in aquor*  
*Trinacris, a posito nomen adepta loci.*  
 ELEG. XIV. v. 31 *Si qua &c.* Hujusce versús habetur le-  
 gio multiplex: hæc ceteris aptior visa est, quamvis ne  
 sit ipsa quidem Ovidianæ perspicuitati consona. Hic igitur  
 sensus elicitur: Si qua tamen virtus est ipsa sibi mer-  
 ces, nec pretium petit aliud, *Inque &c.*  
 v. 39 *Phylaceia*. Vide Notam in v. 38 El. XVIII Amor. II.  
*Phylaceia* dicitur a Phylace, urbe Thessaliæ; ut super. v.  
*Evadne* dicitur *Iphias* ab Iphide patre.





I N

P. OVIDII NASONIS  
EPISTOLARUM  
EX P O N T O  
L I B R O S N O T Æ.

---

I N L I B R U M P R I M U M.

EPIST. I. BRUTO. Cur hisce tantum Epistolis Amicorum nomina præscribat Auctor, neque id antea fecerit, ratio redditur v. 45 & seqq. Ep. VI Lib. III.

v. 19 *Nec ... vultis*. Ne videamini Augusto mei esse fautores.

v. 23 *Antoni &c.* Hic in Augustum sumsit arma, M. Jun. Brutus in Jul. Cæsarem, eumque peremit.

v. 38 *Sistra*. Vide Notam in v. 11 El. XIII Amor. Solebant autem Isidis Sacerdotes, peractis mane sacris, reliqua diei parte stipem ostiatim emendicare.

EPIST. II. v. 3 *Trecenti*. Historia fuse describitur v. 195 & seqq. Fast. II.

v. 9 *Videris &c.* Ut hisce tenebris lucem aliquam adferat, ex duobus distichis unum faciendum putat Heinsius, hoc modo:

*Videris: audebo tibi me scripsisse fateri;*

*Audebo propriis ingemuisse malis.*

v. 34 *Cortice &c.* De Sororibus Phaethontis in populos conversis agit Auctor Fab. II Metam. II.

v. 80 *Dea*. Dianæ. Vide Notam in v. 63 El. IV Trist. IV.

v. 121 *Theromedon*. Crudelissimus Scythiæ Rex, leones hominum cruore pascere solitus. *Atreus*. De quo vide Notam in v. 205 Heroid. XVI.

v. 122 *Quique &c.* Rex Thraciæ Diomedes; qui tandem ab Hercule vidus est, & ipse quoque suis equis ad devorandum obiectus.

v. 133 *Ignes.* Nuptias. Vide Notam in v. 9 Heroid. XIV.

v. 140 *Est ... censa.* H. e. numeravit. Marcia porro patrem habuit Marcium Philippium, Augusti vitricum, qui ab Anco Marcio Rege duxit originem.

v. 141 *Matertera Caesaris.* Accia major, Philippi conjux, Marcie mater, & soror ejus minoris Acciæ, ex qua natus Augustus.

v. 144 *Claudia.* Vide v. 105 & seqq. Fast. IV.

EPIST. III. v. 5 *Peantius.* Vide Notam in v. III Rem. Amor.

v. 24 *Formidatis.* Signat hydrophobiam, quæ ex rabidi canis morsu contrahitur, immedicabile morbi genus.

v. 39 *Pandione nata.* Philomelæ, in lusciniam conversæ. Vide Notam in v. 153 Heroid. XV.

v. 63 *Rutili.* Qui injuste exsulare jussus, quamvis eidem postea L. Sylla Romam redeundi copiam fecerit, Smyrnæ senescere & obire maluit.

v. 67 *Cynicus ... Sinopeus.* Diogenes, Sinope natus.

v. 73 *Cade.* Cleonymi; quem per ludum astragalorum, sive talorum, imprudenter occidit.

v. 75 *Exsul.* Jason; de quo vide Notam in v. 1 Heroid. VI. *Pirenida ... undam.* Corinthum, quam prope est Pirene. Exsulavit autem Corinthi post necem Pelicæ patris, ibique duxit conjugem Creusam.

v. 80 *Humus.* Insula Cypri; in qua condidit Salamina.

EPIST. IV. v. 17 *Aganore natus.* Phineus vates, Agenoris filius vel nepos; qui, cum Argonautas humanissimè excepisset, eisdem viam, quam sequerentur, & quo pacto latentres scopulos evitarent, ostendit. Alii aliter.

v. 41 *Furtiva &c.* Medæ occultus amor; ut fuse describitur Fab. I Metam. VII.

EPIST. V. v. 79 *Calida.* Est enim sub ipso Cancris Tropico sita. Lucanus: *Cancroque suam torrente Syenen*.

EPIST. VI. v. 49 *Inque &c.* Hisce verbis juramentum quasi quoddam continetur, cujus sensus est: Hic moriar, hic tumuler, *Si te &c.*

EPIST. VII. v. 17 *Et nulla &c.* Significat hæc dicendi ratio, neminem fidem suam dare posse de amico, ne peccet; proptereaque, quamvis peccaverit Ovidius, inde invicem nihil in amicos ejus redundare.

v. 55 *Citra*. Minus.

v. 62 *Promeruisse*. H. e. aliis benefacere, eosque tibi collatis beneficiis conciliare.

v. 64 *Quam reddas*. Quam nempe reddas, pro acceptis pari referendo.

EPIST. VIII. v. 10 *In procinctu*. In ipso scilicet articulo prælii conserendi.

v. 15 *Hanc*. Ægypton urbem; quæ ab Ægypto conditore nomen accepit, & cujus incolæ erant Odryæ, Thraciæ populi. Corys autem, Thraciæ Rex, suorum necem acriter ulciscitur.

v. 38 *Virgineusque liquor*. Vide Notam in v. 464 Fast. I.

v. 64 *Dea*. Vide Notam in v. 3 Heroid. XII.

EPIST. IX. v. 34 *Non &c.* Dummodo illud ipse sineres.

EPIST. X. v. 12 *Juventa*. Quæ & Hebe dicitur, Junonis filia: in Deorum conviviis a cyathis fuisse fingitur.

v. 16 *Delicias*. Molliem delicatam nimium & fastidiosam.

## I N L I B R U M II.

EPIST. I. GERMANICO. Adoptione filio Tiberii; qui Tiberius de Pannonibus, Illyricis, Dalmatis, atque Germanis triumphaverat.

v. 31 *Pictas ... vestes*. Togam pictam, sive palmatam, Consulum ac Triumphantium propriam, & Prætorum etiam, quoties ludos ederent.

v. 44 *Pene &c.* Sensus est, tot fuisse numero duces, ut ex ipsis tantummodo confari pene posset exercitus.

v. 67 *Tibi*. A te; Triumphantes enim laureum sertum Jovi Capitolino offerre solebant.

v. 68 *Bit*. Et quoad triumphum, quod supra Germanico portenderat; & quoad poeticum præconium, quod illi pollicitus ipse fuerat.

EPIST. II. v. 73 *Tydidæ*. Diomedis; qui Venerem, & Martem vulneravit. Vide Notam in v. 31 El. VII Amor. I.

v. 25 *Achameniden*. Unum ex sociis Ulixidis. Vide Fab. V Metam. XIV, & Virg. Æn. III, v. 673.

v. 26 *Myro ... Duci*. Vide Notam in v. 7 El. IX Amor. II.

Ovidius T. III.

M m

- v. 47 *Depositus*. Vide Notam in v. 40 El. III Trist. III.  
 v. 74 *Drusi*. Qui Tiberii filius est, Augusti nepos.  
 v. 82 *Phœbæ virginē*. Lauro; in quam arborem versa fuerat Daphne, ut fuse describitur Fab. IX Metam. I.  
 v. 83 *Proles*. Germanicus & Drusus; qui Cæsarum nominibus decorati jam fuerant, & quos adsimilat Auctor Castori & Polluci.

v. 91 *Hunc &c.* Burmannus mallet ita legere: *Hos colis, atque fidem, per quam &c.* Colis scilicet Tiberii filios, & simul fidem, qua meruisti lauream. Messallinus autem, præpositus Illyrico bello, *amplius* (ita Vellejus) *XX milia hostium fudit fugavitque, & ob id triumphalibus ornamentis honoratus est.*

EPIST. III. v. 32 *Te, nihil &c.* Ita Burmannus: *Non aliam mercedem ex facto petis, nisi conscientiam, te non peccasse, aut non defuisse officio, quod amico debebas.* Ceterum locus mendosissimus videtur Heinsio, & aliis etiam Interpretibus.

v. 42 *Æacides &c.* Achilles, nepos Æaci, Patrocli Manibus præstitit plura etiam, quam quæ ab amico præstanda fuerant: tu quoque me habe pro mortuo, & officium amicitiae mihi præsta.

EPIST. IV. v. 22 *Æacidis Aëtoridisque*. Achille & Patroclo, Æaci & Aëtoris nepotibus. Utitur autem Poeta plurali numero pro singulari. Alii *Æacide Aëtorideque*; quidam *Aëtridis Tyndaridisque*; multi *Æaciden Aëtoridenque*; alii aliter.

EPIST. V. v. 11 *Salvi*. Et salvo, & fieri, & minui reparias. Admissa lectio præbet hunc argutum sane sensum: Non jam mortem Cæsaris, ut brevis inde fieret ejus ira, sed optasti citam veniam, quam ipse mihi daret incolumis.

v. 27 *Triumphij*. Quem retulit Tiberius, ut vidimus Epist. I lib. hujus.

v. 67 *Thyrsus*. Vide Notam in v. 23 El. I Amor. III. Hic autem *thyrsus* oratorium, *laurea* poeticum instinctum significat.

v. 73 *De quo censeris*. A quo dignitas tua pendet, & æstimatio.

v. 76 *Tuis*. Alii *suis*; & fortasse rectius. Germanicus scilicet succedat olim Imperio, & moderetur Orbem regimine proprio.

EPIST. VI. v. 9 *Ceraunia*. Vide Notam in v. 19 Eleg. XI Amor. II.

EPIST. VII. v. 25 *Cinyphia*. Libycæ, a Cinypho Libyæ fluvio; quem circa uberrimas segetes terra gignit.

v. 45 *Cacata*. H. e. atris molestiarum curis perturbata & confusa. Visa hæc Heinsio & Burmanno lectionibus aliis sane multis accommodatior.

v. 60 *Ithacæ puppi*. Navi scilicet Ulixis, Ithacæ Regis; quî, decem annorum spatio diversa per æquora vectus, ingentibus procellis obnoxius fuisse dicitur.

EPIST. VIII. v. 6 *Numen*. Ob impressas sive cælatas imagines Augusti, Tiberii, & Livie.

v. 33 *Nepotes*. Germanicum & Drusum.

v. 37 *A Casare proxime*. Qui scilicet ab Augusto, sive post illum, secundus es.

v. 53 *Tota*. Multi *tutus*, nonnulli *tutâ*, eodem omnino sensu: Cæsar enim, quoties ludis intererat, victis & supplicibus gladiatoribus vitam donabat ac libertatem.

EPIST. IX. v. 2 *Coty*. Hic ejus Cotyos filius est, de quo mentionem fecit Auctor Epist. VIII super. Libri. Patri successerat in Imperio Thraciæ.

v. 18 *A Superis*. Eumolpus enim Thraciæ Rex Neptuni filius fuerat & Nymphæ Chiones; hæc ab Athenarum Rege originem duxerat Erichthonio; iste Vulcanum jactaverat patrem, altricem Palladem.

v. 30 *Suis*. Cur mactarent Ethnici suam Cereri, Baccho, caprum, tradidit Auctor v. 348 & seqq. Fast. I.

v. 43 *Cassandreus*. Apollodorus Cassandriæ, urbis Macedoniæ, Tyrannus immanissimus. *Gentiste Pherææ*. Alexander Pheræus, qui in Thessalia tyrannidem crudelissimam exercuit. Alii aliter legunt, ac interpretantur.

v. 60 *Usque &c.* Sensus est: Statim ac scutum, pharetram, arma deposuisti. Ab aliis *pro opus* legitur *onus*.

EPIST. X. v. 24 *Gigas*. Typhoeus; de quo vide v. 347 Notam. V.

v. 27 *Nymphæ*. Vide Notam in v. 30 El. VI Amor. III.

EPIST. XI. v. 15 *Castor*... *Hector*. Alter Hermiones avunculus, alter Ascanii.

## IN LIBRUM III.

- EPIST. I. v. 51 *Notior &c.* Quoad Capaneum, Amphiarum, Philocteten, vide Notas in v. 23 Art. III, 13 ibidem, 111 Rem. Amor.
- v. 75 *De qua censeris.* Ad quam nempe pertines; & in qua a Censoribus, uniuscujusque familiæ nomina ac reditus describentibus, numeraris.
- v. 84 *Sis ambitiosa.* Pro me scilicet totis viribus ambias, ac deprecereis.
- v. 106 *Admeti conjux.* Alceste; de qua vide Notam in v. 19 Art. III; & quoad Penelopen Icaril filiam, Laodamiam, & Evadnen, vide Notas in v. 30 El. IX Amor. III, 38 El. XVIII Amor. II, 21 Art. III.
- v. 121 *Nurus.* Aliquam ex Danaï filiabus intellige; de quibus vide Notam in v. 1 Heroid. XIV.
- v. 123 *Telegonive parens.* Circe.
- EPIST. II. v. 19 *Fallar.* Elegans & vivida Correctio. Alii *Fallor.*
- v. 88 *Cetera par concors.* Idest, quoad cetera fuere Pylades & Orestes amicorum *par concors &c.* Perperam alii *pars.*
- v. 107 *Adelphique &c.* Indicat Cottam in Aureliam Cottarum familiam adoptione transisse.
- EPIST. III. v. 17 *Horrida.* Alii fortasse rectius *Squallida*, cum sequente versiculo vox eadem *horrida* reperiatur.
- v. 31 *Maonio.* Homérico; Homerus enim & *Maonides* appellatus fuit, ab ejus vel patre vel altore Mæone, vel a Mæonia, in qua natus fuisse creditur.
- v. 42 *Satyrum.* Marsyam.
- v. 51 *Pitta.* Vide Notam in v. 31 Art. I.
- v. 80 *Pharias.* Medea; a Phaside, Colchorum fluvio. Vide Fab. I Metam. VII.
- v. 86 *Triumphus.* Cujus fusc meminit Epist. I lib. II.
- v. 96 *Memnonio.* Quo Memnon Æthiops fuisse dicitur.
- v. 100 *Herculeæ.* Fabiorum Familiæ primus auctor Hercules.
- EPIST. IV. v. 3 *Triumpho.* In Tiberii Cæsaris triumphum composuerat Auctor Poematium, idque *Triumphus* inscripserat.
- v. 70 *Hac... quoque parte.* Amicitiae quoque titulo.
- v. 90 *Laurus.* Triumphantes Jovi Capitolino laureum sertum offerre solebant.

EPIST. V. v. 41 *Interdum &c.* Versiculum hunc alii aliter legunt; & Heinsius metuit, ne sit satis integer. Quidam pro *queritur* habent fortasse rectius *querit*.

EPIST. VI. v. 42 *Solito &c.* Phalaride. Vide Eleg. XI Trist. III, v. 39 & seqq.

EPIST. VII. v. 21 *Spem &c.* Quatuor horum versuum sensus est, Spem esse fovendam, quoties non semper irrita futura sit, & fieri posse putes, quæ cupias; secus, fore melius *desperare salutem &c.* juxta illud quoque Virgillii:  
*Una salus victis nullam sperare salutem.*

EPIST. VIII. v. 9 *Palladis ... Arte.* Pallas eloquentiæ, bellis, & lañificiis quoque Dea putabatur.

v. 24 *Consule... boni.* H. e. comiter excipias.

EPIST. IX. v. 9 *Agrius.* Pater Thersitis; cujus insignis deformitas Iliad. lib. II graphice pingitur.

v. 26 *Ut cupidi &c.* Micyllus: *Ita autem corrigendi labor offundit frigora animis, b. e. tardos & tardor facis, perinde ut frana retentans cursum equi cupientis surere.*

## I N L I B R U M I V.

EPIST. I. v. 29 *Artificis... Coli.* Apellis, pictoris eximii.

EPIST. II. v. 1 *Vates... Regum.* Scriptor enim Tragædiarum fuisse dicitur; proptereaque minus apposite legunt alii *vatum*.

v. 47 *Aonius fons.* Hippiocrane, Musis sacer.

EPIST. III. v. 38 *Hoste.* Cyro, Persiarum Rege.

v. 39 *Ille &c.* Dionysius, Syracusarum Tyrannus, regno pulsus Corinthum profugit; ubi ad explendam famem coactum pueros docere perhibent.

v. 41 *Tamen &c.* Pompejus Magnus, a Cesare victus Pharsalica pugna, confugit ad Ægypti Regem Ptolemæum, ejus Ptolemæi filium, cujus e solio dejecti causam Pompejus egerat in Senatu, utque restitueretur, effecerat. At ingratus juvenis Ptolemæus, auctoribus Achilla, Phorino, ac Theodoro Sophista, Pompejum infami prodicione per Seprimium, ejusdem transfugam, de medio sustulit.

v. 47 *Latuit.* Ut Syllæ victoris iram effugeret.

v. 54 *Anticyra*. Insula Maris Ægæi, in qua helleborum abunde provenire dicitur, cujus succus epotus utilissimus sit ad purgandam insaniam melancholicam. Hinc ipsa Anticyra in proverbium abiit, & ad illam mitti solent amentes.

EPIST. IV. v. 9 *Vultum diffundere*. Explicare frontem; cui dicendi modo opponitur *contrahere* sive *ducere frontem*.

v. 31 *Niveos*. Vide Notam in v. 4 El. XIII Amor. III.

EPIST. V. v. 1 *Leves*. Argumentis tantummodo levibus idonei.

v. 18 *Ebur*. Sellam curulem, majorum Magistratum propriam; quæ signis eximiis distincta erat.

v. 19 *Hastam*. Qua posita, per præconem indicebatur auctio, ut quisque pro lubitu ad licitandum conveniret. Interdum pro ipsa quoque auctione sumitur.

EPIST. VI. v. 5 *Quinquennis*. Poetæ liberiore licentia Olympiadem, h. e. quatuor annorum spatium, frequenter posuere pro lustro.

v. 47 *Thyesteæ*. Vide Notam in v. 205 Heroid. XVI.

EPIST. VII. v. 15 *Pilum*. Vide Notam in v. 27 El. VIII Amor. III.

v. 25 *Regi*. Cotyn intellige, Ægypti Regem, amicum Populi Romani.

EPIST. VIII. v. 69 *Numen*. Augustus. Alii *nomen*.

v. 78 *Cum Jove*. H. e. cum arte regendi.

v. 79 *Unda*. Hippocrenen fontem intelligit, quem Pegasus ictu pedis aperuit.

EPIST. IX. v. 52 *Numinis*. Tiberii; Augustus enim obierat. Infra Augusti nomine Tiberium vocat.

v. 102 *Immuner*. A tributis nempe solvendis.

EPIST. X. v. 15 *Hippotades*. Æolus, Hippotæ filius. Vide Notam in v. 29 El. XII Amor. III.

v. 18 *Lotos*. Vide Notam in v. 789 Rem. Amor.

v. 51 *Feminae*... *turma*. Amazonibus. Proximo versiculo Argonautas Auctor denotat.

v. 55 *Quique* &c. Tanais videlicet intelligitur.

EPIST. XII. v. 27 *Phæacida*. Poema, in quo Ulixidis naufragium ad Phæaciæ litora, & ejusdem mora in ejus insula describebatur.

EPIST. XIII. v. 7 *Us*. Pro *utur*, h. e. licet etiam.

v. 47 *Pueri*. Nero, Drusus, & Cajus; quorum pater Germanicus, Carus præceptor & altor.

EPIST. XIV. v. 32 *Agricola*... *senis*. Hesiodi; qui de Re Rustica scripsit.



v. 38 *Scepsius*. Philosophus Metrodorus; quem Plinius gentili nomine *Scepsium*, h. e. osorem, adpellatum fuisse tradidit.

v. 48 *Grajos*. Tomin Græcorum colonia condidit.

EPIST. XV. v. 42 *Meque &c.* Sensus est: Norit me tui juris esse, quamvis entus minime fuerim per æs & libram. De qua solemnī mancipandi ratione pleni sunt Jurisconsultorum Commentarii. Alii aliter legunt.

EPIST. XVI. v. 21 *Pater*. P. Terentius Varro Attacinus; qui Argonautica scripsisse dicitur.

## ERRATA

## CORRIGE

|         |        |         |         |
|---------|--------|---------|---------|
| Pag. 23 | lin. 6 | Artis   | Arcis   |
| 68      | 20     | dedi    | dedit   |
| 75      | 16     | tramine | tramite |
| 127     | 17     | petit   | perit   |
| 300     | 20     | Jovis   | Jovi    |
| 440     | 23     | quidam  | quidem  |
| 451     | 8      | pectore | pectora |
| 461     | 13     | quippe  | quique  |
| 478     | 7      | desinet | desinat |





## EDITIONES PRÆCIPUÆ

## P. OVIDII NASONIS

*Ex Catalogo Doctoris Eduardi Arwood per Mapheium  
Pinelli aucto & emendato.*

- 1471 Opera ex recens. Joan. Andr. Ep. Aleriens. Romæ,  
Swein. & Pan. fol. vol. 2.  
— Bonon. Balthas. Azzoguidus. fol.  
1474 Ven. Jac. Rubeus. fol.  
1477 Mediol. Zarot. fol. vol. 2.  
— Parmæ Stephan. Corallus. fol.  
1480 Bonon. fol.  
— Vicent. a Barnaba Celsano. fol.  
1489 Ven. ex recens. Boni Accursii. fol.  
1498 Ven. ex eadem recensione. fol.  
1502 Ven. ex recens. Andr. Naugerii. 8. vol. 3.  
1515 Ven. ex eadem recensione. 8. vol. 3.  
1529 Paris. Colin. 12. vol. 3.  
1533 Ven. Ald. ex recens. Andr. Naugerii & Honorati Fa-  
scitelli. 8. vol. 3.  
1547 Lugdun. Gryph. 12. vol. 3.  
1578 Ven. Ald. ab Hercule Ciofano 8.  
1629 L. Bat. Elzev. a Dan. Heinsio. 12. vol. 3.  
1649 Ibid. ex eadem recensione. 12. vol. 3.  
1661 Amst. Elzev. a Nic. Heinsio. 12. vol. 3.  
1661-1662-1670-1683-1702 Cum Not. Var. Lug. Bat. 8. vol. 3.  
1689 Lugd. a Daniele Crispino in usum Delphini. 4. vol. 4.  
1713 Ultrajecti. 12. vol. 3. *Editio emendatissima.*  
1715 Lond. a Mich. Maittaire. 12. vol. 3.  
1727 Amst. a Petro Burmanno. 4. vol. 4. *Editio præstan-  
tissima.*  
1745 Lond. Brindley. 12. vol. 5.  
1758 Lisp. a Joan. Aug. Ernesto, & Joan. Frid. Fischero.  
8. vol. 4.

## P. OVIDII NASONIS

## I B I S.

## A R G U M E N T U M.

*Ibis Ovidii nomen ubique maledictis lacerabat, atque ipsum falsis criminationibus in invidiam atque odium vocabat. Tum ejus uxorem perpetuis flagitationibus sollicitabat. Denique tanquam vulturius fortunis ejus inhians, quas naufragii sui tabulas appellat, ipsum ad extremam inopiam redigere conabatur. Et profitetur se Callimachum imitari, a quo Apollonius Rhodius, Ibis nomine ornatus, diris & execrationibus devotus est. Salvagnius suspicatur Higynum esse, quem Ovidius Ibin appellat; illum, inquam, de quo Suetonius meminit libro de claris Grammaticis: is autem est, cujus mythologici libri, omnium manibus triti, supersunt.*

**T**Empus ad hoc, lustris jam bis mihi quinque peractis,  
 Omne fuit Musæ carmen inerme meæ:  
 Nullaque, quæ possit, scriptis tot millibus, exstat  
 Litera Nasonis, sanguinolenta legi.

*Ovidius T. III.*

\*

Nec quemquam nostri, nisi me, læsere libelli : 5

Artificis periit cum caput Arte suâ.

Unus (& hoc ipsum est injuria magna) perennem

Candoris titulum non sinit esse mei.

Quisquis is est, (nam nomen adhuc utcumque tacebo )

Cogit inadsuetas sumere tela manus. 10

Ille relegatum gelidos Aquilonis ad ortus

Non sinit exsilio delituisse suo.

Vulneraque immitis requiem quærentia vexat,

Jaçtat & in toto nomina nostra foro.

Perpetuoque mihi sociatam fœdere læti 15

Non patitur miseri funera flere viri.

Cumque ego quassa meæ complectar membra carinæ,

Naufragii tabulas pugnat habere mei.

Et qui debuerat subitas extinguere flammas,

Hic prædam medio raptor ab igne petit. 20

Nititur ut profugæ desint alimenta senectæ;

Heu, quanto est nostris dignior ipse malis!

Dî melius, quorum longe mihi maximus ille est,

Qui nostras inopes noluit esse vias.

Huic igitur meritas grates, utcumque licebit, 25

Pro tam mansueto pectore semper agam.

Audiet hæc Pontus. faciet quoque forsitan idem,

Terra sit ut propior testificanda mihi.

At tibi, calcasti qui me, violente, jacentem,

Quamlibet & misero debitus hostis ero. 30

Desinet esse prius contrarius ignibus humor;

Junctaque cum Lunâ sidera Solis erunt;  
 Parsque eadem cœli Zephyros emittet & Euros;  
 Et tepidus gelido flabit ab axe Notus;  
 Et nova fraterno veniet concordia fumo;  
 Quem vetus accensâ separat ira pyrâ;  
 Et Ver Autumno, Brumæ miscebitur Æstas;  
 Atque eadem regio Vesper & Ortus erunt:  
 Quam mihi sit tecum positis, quæ sumsimus, armis  
 Gratia, commissis, improbe, rupta tuis. 40  
 Quam dolor hic umquam spatio evanescere possit,  
 Leniat aut odium tempus & hora meum.  
 Pax erit hæc nobis, donec mihi vita manebit,  
 Cum pecore infirmo quæ solet esse lupis.  
 Prima quidem crepto committam prælia versu: 45  
 Non soleant quamvis hoc pede bella geri.  
 Utque petit primo plenum flaventis arenæ  
 Nondum calfacti velitis hasta solum;  
 Sic ego te ferro nondum jaculabor acuto:  
 Protinus invisum nec petet hasta caput. 50  
 Et neque nomen in hoc, nec dicam facta libello;  
 Teque brevi, qui sis, dissimulare sinam.  
 Postmodo, si perges, in te mihi liber Iambus  
 Tincta Lycamæo sanguine tela dabit. 55  
 Nunc quo Battiares inimicum devovet Ibin,  
 Hoc ego devoveo teque tuosque modo.  
 Utque ille, historiis involvam carminâ cæcis,  
 Non soleam quamvis hoc genus ipse sequi.

Illius ambages imitatus in Ibide, dicar  
Oblitus moris, judiciiue mei. 60  
Et quoniam, qui sis, nondum quærentibus edo,  
Ibidis interea tu quoque nomen habe.  
Utque mei versus aliquantum noctis habebunt,  
Sic vitæ series tota sit atra tuæ.  
Hæc tibi natali facito Janique Calendis 65  
Non mentituro quilibet ore legat.  
Dî Maris & terræ, quique his meliora tenetis  
Inter diversos cum Jove regna polos:  
Huc precor, huc vestras omnes advertite mentes,  
Et sinite optatis pondus inesse meis. 70  
Ipsaque tu tellus, ipsum cum fluctibus æquor,  
Ipse meas Æther accipe summe preces.  
Sideraque, & radiis circumdata Solis imago,  
Lunaque, quæ numquam, quo prius, ore micas.  
Noxque tenebrarum specie reverenda tuarum, 75  
Quæque ratum triplici pollice netis opus.  
Quique per infernas horrendo murmure valles  
Imperjuratæ laberis amnis aquæ,  
Quasque ferunt toto vittatis angue capillis  
Carceris obscuras ante sedere fores; 80  
Vos quoque plebs Superûm, Fauni, Satyrique, Laresque,  
Fluminaque, & Nymphæ, Semideûmque genus.  
Denique ab antiquo Divi veteresque novique,  
In nostrum cuncti tempus adeste, Chao.  
Carmina dum capiti malefido dira canuntur, 85

Et peragunt partes ira dolorque suas:  
Adnite optatis omnes ex ordine nostris;  
Et pars sit voti nulla caduca mei.  
Quæque precor, fiant: ut non mea dicta, sed illa  
Pasiphaes generi verba fuisse putet. 90  
Quasque ego transiero pœnas, patiatur & illas;  
Plenius ingenio sit miser ille meo.  
Neve minus valeant fictum exsecrantia nomen  
Vota, minus magnos commoveantve Deos.  
Illum ego devoveo, quem mens intelligit Ibin, 95  
Qui se scit facilis has meruisse preces.  
Nulla mora est in me, peragam rata vota Sacerdos:  
Quisquis ades sacris, ore favete, meis.  
Quisquis ades sacris, lugubria dicite verba,  
Et fletu madidis Ibin adite genis. 100  
Nominibusque malis, pedibusque occurrите lævis,  
Et nigræ vestes corpora vestra tegant.  
Tu quoque quid dubitas ferales sumere vittas?  
Jam stat, ut ipse vides, funeris ara tui.  
Pompa parata tibi est, votis mora tristibus absit, 105  
Da jugulum cultris, hostia dira, meis.  
Terra tibi fruges, amnis tibi deneget undas,  
Deneget adflatus ventus & aura suos.  
Nec tibi Sol clarus, nec sit tibi lucida Phœbe,  
Destituant oculos sidera clara tuos. 110  
Nec se Vulcanus, nec se tibi præbeat aer,  
Nec tibi det tellus, nec tibi pontus iter.

Exsul, inops erres, alienaque limina lustres:

Exiguumque petas ore tremante cibum.

Nec corpus querulo, nec mens vacet ægra dolore: 115

Noxque die gravior sit tibi, nocte dies.

Sisque miser semper; nec sis miserabilis ulli.

Gaudeat adversis femina virque tuis.

Accedat lacrimis odium, dignusque putere,

Qui mala, cum tuleris plurima, plura feras. 120

Sitque, quod est rarum, solito defecta favore

Æumnæ facies invidiosa tuæ.

Caussaque non desit, desit tibi copia mortis.

Optatam fugiat vita coacta necem.

Luâtusque diu cruciatos spiritus artus 125

Deserat; & longâ torqueat ante morâ.

Evenient. dedit ipse mihi modo signa futuri

Phœbus: & a levâ mœsta volavit avis.

Certe ego quæ voveo Superos motura putabo,

Speque tuæ mortis, perfide, semper alar. 130

Finiet illa dies, quæ te mihi subtrahet olim,

Finiet illa dies, quæ mihi tarda venit.

Et prius hanc animam, nimium tibi sæpe petitam,

Auferat illa dies, quæ mihi sera venit.

Quam dolor hic unquam spatio evanescere possit, 135

Leniat aut odium tempus & hora meum.

Pugnabunt jaculis dum Thraces, Iazyges arcu,

Dum tepidus Ganges, frigidus Ister erit:

Robora dum montes, dum pabula mollia campi,



Dum Tiberis flavas Tuscus habebit aquas: 140  
 Bella geram tecum, nec mors mihi finiet iras,  
 Sæva sed in manes manibus arma dabo.  
 Tunc quoque cum fuero vacuas dilapsus in auras,  
 Exanimis manes oderit umbra tuos.  
 Tunc quoque factorum veniam memor umbra tuorum, 145  
 Insequar & vultus ossea forma tuos.  
 Sive ego, quod nolim, longis consumtus ab annis,  
 Sive manu facta morte solutus ero.  
 Sive per immensas jactabor naufragus undas,  
 Nostraque longinquus viscera piscis edet. 150  
 Sive peregrinæ carpent mea membra volucres,  
 Sive meo tinguent sanguine rostra lupi.  
 Sive aliquis dignatus erit supponere terræ,  
 Aut dare plebejo corpus inane rogo.  
 Quidquid ero, Stygiis erumpere nitar ab oris, 155  
 Et tendam gelidas ultor in ora manus.  
 Me vigilans cernes, tacitis ego noctis in umbris  
 Excutiam somnos, visus adesse, tuos.  
 Denique quidquid ages, ante os oculosque volabo;  
 Et querar, & nullâ sede quietus eris. 160  
 Verbera torta dabunt sonitum; nexæque colubris  
 Conscia fumabunt semper ad ora faces.  
 His vivus furiis agitabere: mortuus isdem.  
 Et brevior pœnâ vita futura tua est.  
 Nec tibi contingent funus lacrimæque tuorum: 165  
 Indeploratum projiciere caput.

Carnificisque manu, populo plaudente, trahêris ;

Infixusque tuis ossibus uncus erit .

Ipsæ te fugient , quæ carpunt omnia , flammæ :

Respuet invisum justa cadaver humus .

170

Unguibus & rostro tardus trahet ilia vultur ;

Et scindent avidæ perfida corda canes .

Deque tuo fiet ( licet hac sis laude superbus )

Insatiabilibus corpore rixa lupis .

In loca ab Elysiis diversa fugabere campis ;

175

Quasque tenent sedes noxia turba , coles .

Sisyphus est illic saxum volvensque petensque ,

Quique agitur rapidæ vinculus ab orbe rotæ .

Quæque gerunt humeris perituras Belides undas ,

Exsulis Ægypti , turba cruenta , nurus .

180

Poma pater Pelopis præsentia quærit , & idem

Semper eget liquidis , semper abundat aquis .

Jugeribusque novem qui summus distat ab imo ,

Visceraque adsiduæ debita præbet avi .

Hîc tibi de Furiis scindet latus una flagello ,

185

Ut sceleris numeros confiteare tui .

Altera Tartareis sectos dabit anguibus artus .

Tertia fumantes incoquet igne genas .

Noxia mille modis lacerabitur umbra , tuasque

Æacus in pœnas ingeniosus erit .

190

In te transcribet veterum tormenta virorum ;

Manibus antiquis caussa quietis eris .

Sisyphe , cui tradas revolvibile pondus , habebis :

Versabunt celeres nunc nova membra rotæ.  
Hic erit, & ramos frustra qui captet & undas: 195  
Hic inconsumto viscere pascet avem.  
Nec mortis pœnas mors altera finiet hujus;  
Horaque erit tantis ultima nulla malis.  
Inde ego pauca canam, frondes ut si quis ab Ida,  
Aut summam Libyco de mare carpat aquam. 200  
Nam neque quot flores Siculâ nascantur in Hyblâ,  
Quotve ferat, dicam, terra Cilissa crocos.  
Nec quum tristis hiems Aquilonis inhorruit alis,  
Quam multâ fiat grandine canus Athos.  
Nec mala voce meâ possint tua cuncta referri, 205  
Ora licet tribuas multiplicata mihi.  
Tot tibi, vœ misero, venient talesque ruinæ,  
Ut cogi in lacrimas me quoque posse putem.  
Illæ me lacrimæ facient sine fine beatum:  
Dulcior hic risu tunc mihi fletus erit. 210  
Natus es infelix, ita Dî voluere, nec ulla  
Commoda nascenti stella levisque fuit.  
Non Venus adfulsit, non illâ Jupiter horâ,  
Lunaque non apto Solve fuere loco.  
Nec satis utiliter positos tibi præbuit ignes, 215  
Quem peperit magno lucida Maja Jovi.  
Te fera, nec quidquam placidum spondentia, Martis  
Sidera presserunt, falciferique senis.  
Lux quoque natalis, ne quid nisi triste videres,  
Turpis, & inductis nubibus atra fuit. 220

Hæc est in fastis, cui dat gravis Allia nomen,

Quæque dies Ibin, publica damna, tulit.

Qui simul impuræ matris prolapsus ab alvo,

Cinyphiam fædo corpore pressit humum.

Sedit in adverso nocturnus culmine bubo, 225

Funereoque graves edidit ore sonos.

Protinus Eumenides lavere palustribus ulvis,

Quâ cava de Stygliis fluxerat unda vadis.

Pectoraque unxerunt Erebeæ felle colubræ.

Terque cruentatâs increpuere manus. 230

Cutturaque imbuerunt infantia lacte canino;

Hic primus pueri venit in ora cibus.

Perbibit inde suæ rabiem nutricis alumnus,

Latrat & in toto verba canina foro.

Membraque vinxerunt tinctis ferrugine pannis, 235

A male deserto quos, rapuere rogo.

Et ne non fultum nudâ tellure jaceret,

Molle super silices imposuere caput.

Jamque recessuræ viridi de stipite factas

Admōrunt oculis usque sub ora faces. 240

Flebat, ut est infans fumis contactus amaris:

De tribus est cum sic una locuta Soror:

Tempus in immensum lacrimas tibi vovimus istas;

Quæ semper caussa sufficiente cadent.

Dixerat. at Clotho jussit promissa valere, 245

Nevit & infectâ stamina pulla manu.

Et ne longa suæ præsentia diceret horæ,

Fata canet Vates qui tua, dixit, erit.  
Ille ego sum Vates, ex me tua vulnera disces;  
Dent modo Dî vires in mea verba suas. 250  
Carminibusque meis accedant pondera rerum,  
Quæ rata per lûsus experiere tuos.  
Neve sine exemplis ævi moriari prioris,  
Sint tua Trojanis non leviora malis.  
Quantaque clavigeri Pæantius Herculis heres, 255  
Tanta venenato vulnera crure geras.  
Nec levius doleas, quam qui bibit ubera cervæ,  
Armatique tulit vulnus, inermis opem.  
Quique ab equo præceps in Aleja decedit arva;  
Exitio facies cui sua pene fuit. 260  
Id quod Amyntorides videas, trepidusque ministro  
Prætentes baculo, luminis orbus, iter.  
Nec plus adspicias, quam quem sua filia rexit,  
Expertus scelus est cuius uterque parens.  
Qualis erat, postquam est iudex de lite jocosa 265  
Sumtus, Apollinea clarus in arte senex.  
Qualis & ipse fuit, quo præcipiente columba  
Est data Palladiæ prævia duxque rati.  
Quique oculis caruit, per quos male viderat aurum,  
Inferias nato quos dedit orba parens. 270  
Pastor ut Ætnæus, cui casus ante futuros  
Telemus Eurymides vaticinatus erat.  
Ut duo Phinidæ, quibus idem lumen ademit  
Qui dedit, ut Thamyræ, Demodocique caput

Sic aliquis tua membra secet, Saturnus ut illas 275  
Subsecuit partes, unde creatus erat.  
Nec tibi sit melior tumidis Neptunus in undis,  
Quam cui sunt subitæ frater & uxor aves.  
Sollertique viro, laceræ quem fracta tenentem  
Membra ratis Semeles est miserata soror. 280  
Vel tua, ne pœnæ genus hoc cognoverit unus,  
Viscera diversis scissa ferantur equis.  
Vel quæ, qui redimi Romano turpe putavit,  
A duce Puniceo pertulit, ipse feras.  
Nec tibi subsidio sit præsens numen: ut illi, 285  
Cui nihil Hercei profuit ara Jovis.  
Utque dedit saltus de summo Thessalus Ossa,  
Tu quoque saxoso præcipitere jugo.  
Aut velut Euryali, qui sceptrum cepit ab illo,  
Sint artus avidis anguibus esca tui. 290  
Vel tua maturet, sicut Minoia fata,  
Per caput infusæ fervidus humor aquæ.  
Utque parum miti, sed non impune Prometheus,  
Aerias volucres sanguine fixus alas.  
Aut velut Etracides, magno ter ab Hercule quintus, 295  
Cæsus in immensum projiciare fretum.  
Aut ut Amyntiaden turpi dilectus amore  
Oderit, & sævo vulneret ense puer.  
Nec tibi fida magis misceri pocula possint,  
Quam qui cornigero de Jove natus erat. 300  
More vel intereas capti suspensus Achæi,

Qui miser auriferâ teste pendit aquâ.  
Aut ut Achillidæ cognato nomine clarum  
Opprimat hostili tegula jacta manu.  
Nec tua, quam Pyrrhi, felicius ossa quiescant; 305  
Sparsa per Ambracias quæ jacuere vias.  
Nataque ut Æacidæ, jaculis moriaris adaclis:  
Non licet hoc Cereri dissimulare nefas.  
Utque nepos dicti nostro modo carmine regis  
Cantharidum succos dante parente bibas. 310  
Aut pia te cæso dicatur adultera, sicut  
Qua cecidit Leucon vindice, dicta pia est.  
Inque pyram tecum carissima pignora mittas,  
Quam finem vitæ Sardanapalus habet.  
Utque Jovis Libyci templum violare parantis, 315  
Acta Noto vultus condant arena tuos.  
Utque necatorum Darei fraude secundi,  
Sic tua subsidens devoret ossa cinis.  
Aut ut oliviferâ quondam Sicyone fugato,  
Sit frigus mortis caussa famesque tuæ. 320  
Aut ut Atarnites insutus pelle juvenci,  
Turpiter ad dominum præda ferare tuum.  
Inque tuo thalamo ritu jugulere Pheræi,  
Qui datus est leto conjugis ense suæ.  
Quosque putas fidos, ut Larissæus Aleuas, 325  
Vulnere non fidos experiare tuo.  
Utque Milon, sub quo cruciata est Pisa tyranno,  
Vivus in occultas præcipiteris aquas.

Quæque in Adimantum, Phliasia regna tenentem,  
 Ab Jove venerunt, te quoque tela petant. 330  
 Aut ut Amastriacis quondam Lenæus ab oris,  
 Nudus Achilleâ destituaris humo.  
 Utque vel Eurydamas ter circum busta Thrasylli  
 Est Larissæis raptus ab hoste rotis.  
 Vel qui, quæ fuerat tutatus mœnia sæpe, 335  
 Corpore lustravit non diuturna suo:  
 Utque novum passâ genus Hippomeneide pœnæ,  
 Tractus in Actiâ fertur adulter humo:  
 Sic, ubi vita tuos invisa reliquerit artus,  
 Ultiores rapiant turpe cadaver equi. 340  
 Viscera sic aliquis scopulus tua figat, ut olim  
 Fixa sub Euboico Graja fuere sinu.  
 Utque ferox periiit & fulmine & æquore raptor,  
 Sic te meturas adjuvet ignis aquas.  
 Mens quoque sic furiis vecors agitetur, ut illi, 345  
 Unum cui totò corpore vulnus erat.  
 Utque Dryantidæ Rhodopeia regna tenenti,  
 In gemino dispar cui pede cultus erat.  
 Ut fuit Etæo quondam, generoque draconum,  
 Tisamenique patri, Callirrhoesque viro. 350  
 Nec tibi contingat matrona pudicior illâ,  
 Quâ potuit Tydeus erubuisse nuru.  
 Quæque sui Venerem junxit cum fratre mariti,  
 Locris in ancillæ dissimulata necem. 355  
 Dî quoque tam faciant possis gaudere fideli



Conjuge, quam Talai, Tyndareique gener.  
Quæque, parare suis letum patruelibus ausæ  
Belides, adsiduâ colla premuntur aquâ.  
Byblidos & Canaces, sicut facis, ardeat igne;  
Nec, nisi per crimen, sit tibi nota soror. 360  
Filia si fuerit; sit quod Pelopea Thyestæ,  
Myrrha suo patri, Nyctimeneque suo.  
Neve magis pia sit, capitique parentis amica,  
Quam tibi, vel Pterela, vel tibi, Nise, fuit.  
Infamemque locum sceleris quæ nomine fecit, 365  
Pressit & inductis membra paterna rotis.  
Ut juvenes, pereas, quorum fastigia vultus  
Olim Pisææ sustinuere foris.  
Ut qui perfusam miserorum sæpe procorum  
Ipse suo melius sanguine tinxit humum. 370  
Proditor ut sævi periit auriga tyranni,  
Qui nova Myrtoæ nomina fecit aquæ.  
Ut qui velocem frustra petiere puellam,  
Dum capta est pomis tardior illa tribus.  
Ut qui tectâ, novi formam celantia monstri, 375  
Intrarunt cæcæ non redeunda domûs.  
Ut quorum Æacides misit violentus in altos  
Corpora cum senis altera sena rogos.  
Ut quos, obscuri lusus ambagibus oris,  
Légimus infandæ Sphingæ dedisse neci. 380  
Ut qui Bistonix templo cecidere Minervæ,  
Propter quod facies nunc quoque tectâ Dææ est.

Ut qui Threicii quondam præsepia Regis  
Fecerunt dapibus sanguinolenta suis.

Therodamanteos ut qui sensere Leones, 385  
Quique Thoantæ Taurica sacra Deæ.

Ut quos Scylla vorax, Scyllæque adversa Charybdis  
Dulichiaæ pavidos eripuerè rati.

Ut quos demisit vastam Polyphemus in alvum,  
Ut Læstrygonias qui subiere domos. 390

Ut quos Dux Pœnus mersit putealibus undis,  
Et jacto canas pulvere fecit aquas.

Sex bis ut Icaridos famulæ periere, procique,  
Inque caput domini qui dabat arma procis.

Ut jacet Aonio luctator ab hospite fusus, 395  
Qui (mirum) victor, cum cecidisset, erat.

Ut quos Antæi fortes pressere lacerti,  
Quosque feræ morti Lemnia turba dedit.

Ut qui post longum sacri monstrator iniqui  
Elicuit pluvias victima cæsus aquas. 400

Frater ut Antæi, quo sanguine debuit, aras  
Tinxit; & exemplis occidit ipse suis.

Ut qui terribiles pro gramen habentibus herbis  
Impius humano viscere pavit equos.

Ut duo diversis sub eodem vindice cæsi 405  
Temporibus Nessus, Dexamenique gener.

Ut pronepos, Saturne, tuus: quem reddere vitam  
Urbe Coronides vidit ab ipse suâ.

Ut Sinis, & Sciron, & de Polypemone natus,  
Qui-

Quique homo parte sui, parte juvenus erat. 410  
Quique trabes pressas ab humo mittebat in auras,  
Æquoris adspiciens hujus & hujus aquas.  
Quæque Ceres vidit læto pereuntia vultu  
Corpora Theseâ Cercyonea manu.  
Hæc tibi, quem meritis precibus mea devovet ira, 415  
Eveniant, aut his non leviora malis.  
Qualis Achæmenides Sicula desertus in Ætna,  
Troica quum vidit vela venire, fuit.  
Qualis erat nec non fortuna binominis Iri,  
Quique tenent pontem, quæ tibi major erit. 420  
Filius & Cereris frustra tibi semper ametur,  
Destituatque tuas usque petitus opes.  
Utque per alternos undâ labente recursus  
Subtrahitur presso mollis arena pedi;  
Sic tua nescio quo semper fortuna liquescat, 425  
Lapsaque per medias effluat usque manus.  
Utque pater solitæ varias mutare figuras,  
Plenus inextincta conficiare fame.  
Nec dapis humanæ subeant fastidia: quâque  
Parte potes, Tydeus temporis hujus eris. 430  
Atque aliquid facias, a vespere rursus ad ortus  
Cur exsternati Solis agantur equi.  
Fræda Lycaoniæ repetes convivia mensæ,  
Tentabisque cibi fallere fraude Jovem.  
Teque aliquis posito tentet vim numinis opto: 435  
Tantalides tu sis, Tereidesque puer.

*Ovidius T. III.*

\*\*

Et tua sic latos spargantur membra per agros,  
Tamquam quæ patrias detinuere vias.

Ære Perilleo veros imitere juvencos,  
Ad formam tauri conveniente sono. 440

Utque ferox Phalaris, linguâ prius ense resectâ,  
More bovis, Paphio clausus in ære gemas.

Dumque redire voles ævi melioris in annos,  
Ut vetus Admeti decipere socer.

Atque eques in medii mergare voragine cœni, 445  
Dum modo sint facti nomina nulla tui.

Atque utinam pereas, veluti de dentibus orti  
Sidoniâ jactis Graja per arva manu.

Et quæ Penthides fecit, fraterque Medusæ,  
Eveniant capiti vota sinistra tuo. 450

Et quibus exiguo volucris devota libello est,  
Corpora projectâ quæ sua purgat aquâ.

Vulnera totque feras, quot dicitur ille tulisse,  
Cujus ab inferiis culter abesse solet.

Attonitusque seces, ut quos Cybeleia mater 455  
Incitat, ad Phrygios vilia membra modos.

Deque viro fias nec femina, nec vir, ut Attyis;  
Et quatias molli tympana rauca manu.

Inque pecus subito Magnæ vertare Parentis:  
Victor ut est celeri victaque versa pede. 460

Solaque Limone pœnam ne senserit illam,  
Et tua dente fero viscera carpat equus.

Aut, ut Cassandreus, domino non mitior illo,

Saucius ingestâ contumuleris humo.

Aut, ut Abantiades, aut ut Cygneius heros, 465

Clausus in æquoreas præcipiteris aquas.

Victima vel Phœbo sacras macteris ad aras,

Quam tulit a sævo Theudotus hoste necem.

Aut te devoveat certis Abdera diebus,

Saxaque devotum grandine plura petant. 470

Aut Jovis infesti telo feriare trisulco,

Ut satus Hipponoo, Dosithoesque pater.

Ut soror Autonoes, ut cui matertera Maja est,

Ut temere optatos qui male rexit equos.

Ut ferus Æolides, ut sanguine cretus eodem, 475

Quo genita est, liquidis quæ caret Arclos aquis,

Ut Macedo rapidis ista est cum conjuge flammis,

Sic, precor, ætherii vindicis igne cadas.

Prædaque sis illis, quibus est Latonia Delos

Ante diem, rapto non adeunda Thaso. 480

Quique verecundæ speculantem labra Dianæ,

Quique Crotopiaden diripere Linon.

Neve venenato levius feriaris ab angue,

Quam senis Æagri Calliopesque nurus;

Quam puer Hypsipyles: quam qui cava primus acutâ 485

Cuspide suspecti robora fixit equi.

Neve gradus adeas Elpenore cautius altos:

Vimque feras vini, quo tulit ille modo.

Tamque cadas domitus, quam quisquis ad arma vocantem

Juvit inhumanum Thiodamanta Dryops. 490

Quam ferus ipse suo periit mactatus in antro  
 Proditus inclusæ Cacus ab ore bovis.  
 Quam quî dona tulit, Lernæo tincta veneno,  
 Euboicasque suo sanguine tinxit aquas.  
 Vel de præcipiti venias in Tartara saxo, 495  
 Ut qui Socraticum de nece legit opus.  
 Ut qui Theseæ fallacia vela carinæ  
 Vidit: ut Iliacâ missus ab arce puer.  
 Ut teneri nutrix, eadem matertera, Bacchi:  
 Ut cui caussa necis serra reperta fuit. 500  
 Lydia se scopulis ut virgo misit ab altis,  
 Dixerat invito quæ mala verba Deo.  
 Fœta tibi occurrat patrio popularis in arvo,  
 Sitque Phayllææ caussa læna necis.  
 Quique Lycurgiden letavit, & arbore natum, 505  
 Idmonaque audacem, te quoque rumpat aper.  
 Isque vel exanimis faciat tibi vulnus: ut illi,  
 Ora super fixi quem cecidere suis.  
 Sive idem simili pinus quem morte peremit:  
 Phryx & venator sis Berecynthiades. 510  
 Si tua contigerit Minoas puppis arenas,  
 Te Corcyreum Cresia turba putet.  
 Lapsuramque domum subeas, ut sanguis Aleuæ,  
 Stella Leoprepidæ cum fuit æqua viro.  
 Utque vel Euenus torrenti flumine mersus 515  
 Nomina des rapidæ, vel Tiberinus, aquæ.  
 Astacidæque modo decisa cadavere trunco

Digna feris, homini sit caput esca tuum.  
 Quodque ferunt Brotean fecisse cupidine mortis,  
 Des tua succensæ membra cremanda pyræ. 320  
 Inclususque necem caveâ patiaris, ut ille  
 Non profecturæ conditor historiæ.  
 Utque repertori nocuit pugnacis Iambi,  
 Sic sit in exitium lingua proterva tuum.  
 Utque parum stabili qui carmine læsit Athenas, 325  
 Invisus pereas, deficiente cibo.  
 Utve lyræ vates fertur periisse severæ,  
 Causa sit exitii dextera læsa tui.  
 Utque Agamemnonio vulnus dedit anguis Orestæ;  
 Tu quoque de morsu virus habente cadas. 330  
 Sit tibi conjugii nox prima novissima vitæ;  
 Eupolis hoc periit, & nova nupta, modo.  
 Utque cothurnatum periisse Lycophrona narrant,  
 Hæreat in fibris fixa sagitta tuis.  
 Aut lacer in silva manibus spargare tuorum, 335  
 Sparsus ut est Thebis angue creatus avo.  
 Perque feros montes tauro rapiente traharis,  
 Ut tracta est conjux imperiosa Lyci.  
 Quodque suæ passa est pellex invita sorori,  
 Excidat ante pedes lingua resecta tuos. 340  
 Conditor ut tardæ, Blæsus cognomine, Cyrrhæ,  
 Orbis in innumeris inveniare locis.  
 Inque tuis opifex, vati quod fecit Achæo,  
 Noxia luminibus spicula condat apis.

- Fixus & in duris carparis viscera saxis, 545  
 Ut cui Pyrrha sui filia fratris erat.  
 Ut puer Harpagides referas exempla Thyestæ;  
 Inque tui cæsus viscera patris eas.  
 Trunca geras sævo mutilatis partibus ense,  
 Qualia Mimnermi membra fuisse ferunt. 550  
 Utque Syracosio præstrictâ fauce Poetæ,  
 Sic animæ laqueo sit via clausa tuæ.  
 Nudave dereptâ pateant tua viscera pelle;  
 Ut Phrygium cujus nomina flumen habet.  
 Saxificæ videas infelix ora Medusæ, 555  
 Cephenum multos quæ dedit una neci.  
 Potniadum morsus subeas, ut Glaucus, equarum:  
 Inque maris salias, Glaucus ut alter, aquas.  
 Utque duobus idem dictis modo nomen habenti,  
 Præfocent animæ Gnosia mella viam. 560  
 Sollicitoque bibas, Anyti doctissimus olim  
 Imperturbato quod bibit ore reus.  
 Nec tibi, siquid amas, felicius Hæmone cedat:  
 Utque suâ Macareus, sic potiare tuâ.  
 Vel videas, quod jam, cum flammæ cuncta tenerent, 565  
 Hectoreus patriâ vidit ab arce puer.  
 Sanguine probra luas, ut avo genitore creatus,  
 Per facinus soror est cui sua facta parens.  
 Ossibus inque tuis teli genus hæreat illud,  
 Traditur Icarii quo cecidisse gener. 570  
 Utque loquax in equo est elisus guttur acerno,



Sic tibi claudatur pollice vocis iter.  
 Aut ut Anaxarchus pilâ minuaris in altâ,  
 Ictaque pro solidis frugibus ossa sonent.  
 Utque patrem Psamathes, condat te Phœbus in ima 575  
 Tartara, quod natæ fecerat ille suæ.  
 Inque tuos ea pestis eat, quam dextra Chorœbi  
 Vicit, opem miseris Argolicisque tulit.  
 Utque nepos Æthræ, Veneris periturus ob iram,  
 Exsul ab attonitis excutiaris equis. 580  
 Propter opes magnas ut perdidit hospes alumnum,  
 Perdat ob exiguas te tuus hospes opes.  
 Utque ferunt fratres sex cum Damasichtone cæsos,  
 Intereat tecum sic genus omne tuum.  
 Addidit ut fidicen miseris sua funera natis, 585  
 Sic tibi sint vitæ tædia justa tuæ.  
 Utve soror Pelopis, saxo dureris oborto,  
 Et læsus linguâ Battus ab ipse suâ.  
 Aera si misso vacuum jaculabere disco,  
 Quo puer Æbalides, ictus ab orbe cadas. 590  
 Si qua per alternos pulsabitur unda lacertos,  
 Omnis Abydenâ sit tibi pejor aquâ.  
 Comicus ut mediis periit, dum nabat, in undis,  
 Et tua sic Stygius strangulet ora liquor.  
 Aut ubi ventosum superâris naufragus æquor, 595  
 Contactâ pereas, ut Palinurus, humo.  
 Utque cothurnatum vatem, tutela Dianæ,  
 Dilanient vigilum te quoque turba canum.

Aut ut Trinacrius, salias super ora gigantis,  
Plurima quâ flammâ Sicanis Ætna vomit. 600  
Diripiantque tuos insanis unguibus artus  
Strymoniz matres, Orpheos esse rata.  
Natus ut Althææ flammis absentibus arsit,  
Sic tuus ardescat stipitis igne rogos.  
Ut nova Phasiacâ comprehensa est nupta coronâ, 605  
Utque pater nuptæ, cumque parente domus;  
Ut cruor Herculeos abiit diffusus in artus:  
Corpora pestiferum sic tua virus edat.  
Quâ sua Penthiden proles est ulta Lycurgum,  
Hæc maneat teli te quoque plaga novi. 610  
Utque Milon, robur diducere fissile tentes;  
Nec possis captas inde referre manus.  
Muneribusque tuis lædatis, ut Icarus; in quem  
Intulit armatas ebria turba manus.  
Quodque dolore necis patriæ pia filia fecit, 615  
Vincula per laquei fac tibi guttur eant.  
Obstrucloque famem patiaris limine tecti,  
Ut legem pœnæ cui dedit ipsa parens.  
Illius exemplo violes simulacra Dianæ,  
Aulidis a portu qui leve vertit iter. 620  
Naupliadæve modo ficto pro crimine pœnas  
Morte luas; nec te non meruisse juvat.  
Æthalion vitâ spoliavit ut Isidis hospes,  
Quem memor a sacris nunc quoque pellit Ion;  
Utque Melantheâ tenebris a cæde latentem 625

Prodidit officio luminis orba parens;  
Sic tua coniectis fodiantur pectora telis;  
Sic, precor, auxiliis impediare tuis.  
Qualis equos pacto, quos fortis agebat Achilles,  
Acta Phrygi timido est, nox tibi talis eat. 630  
Nec tu, quam Rhesus, somno meliore fruaris,  
Quam Comites Rhesi tum necis, ante viæ.  
Quam quos cum Rutulo morti Rhamnete dederunt  
Impiger Hyrtacides, Hyrtacidæque comes.  
Cliniadæque modo circumdatus ignibus atris 635  
Membra feras Stygiæ semicremata neci.  
Utque Remo muros auso transire recentes,  
Noxia sint capiti rustica tela tuo.  
Denique Sarmaticas inter Geticasque sagittas  
His precor & vivas & moriære locis. 640  
Hæc tibi tantisper subito sint missa libello,  
Immemores ne nos esse querare tui.  
Pauca quidem, fateor, sed Dî dent plura rogatis,  
Multiplicentque suo vota favore mea.  
Postmodo plura leges, & nomen habentia verum, 645  
Et pede quo debent acria bella geri.





## M O N I T U M.

**Q**UOD tibi, *Leſſor benevole*, P. Ovidii Nasonis Ibiis nullis apposis adnotationibus modo sistimus, id ex eo unice pendet, ne quæ passim in toto Ovidii Opere rudimenta Fabularum explicata jam dedimus, eadem hic absque ulla necessitate compilareremus. Tot ac tanta præterea sunt in hunc unum Libellum a Doctissimis Viris conscripta, ut instituti nostri modum prorsus excedant, qui Latinos Auctores brevibus tantum commentariis voluimus illustratos. Ergo, *benigne Leſſor*, si totius Ovidii edita a nobis Opera perlustres, vix quippiam desideres ad Libelli hujus intelligentiam. Sin vero minus est otii, *Amstelodamensem Francisci Changuion anni 1727 Editionem consulas. Vale.*





## F R A G M E N T A

## P. OVIDII NASONIS.

## E X M E D E A.

**Q**uint. lib. viii, cap. v. Nam cum sit rectum,  
nocere facile est, prodesse difficile, vehementius  
apud Ovidium Medea dicit,

*Servare potui, perdere an possim rogas?*

Item,

*Feror huc illuc, ut plena Deo.*

Sen. Suasor. III.

## E X E P I G R A M M A T I S.

*Cur ego non dicam, Furia, te furiam?*

Fab. lib. ix, cap. 3.

Item,

*Ride, si sapis, o puella, ride.*

*Pelignus, puto, dixerat Poeta.*

Mart. lib. 11, Epig. XLI.

Item,

*Larte ferox caso Cossus opima tulit.*

Prisc. lib. V.

## EX PHÆNOMENIS.

*Tot numero, talique Deus simulacra figurâ  
Imposuit cælo: perque atras sparsa tenebras  
Clara pruinosæ jussit dare lumina nocti.*

Lactant. lib. 11 De Orig. Err. cap. V.

*Plejades ante genu septem radiare feruntur,  
Sex tantum apparent: sub opacâ septima nube est.*

Probus in Georgica Virgilii, in cujus vulgatis  
libris hi versus depravatissimi leguntur.

In Priapejis quædam Ovidii (v. Bart. ad Stat. 1  
Theb. 229.) exstare, eruditi arbitrantur. Ex illo cer-  
te, cujus initium, *Obscure poteram tibi dicere*, Se-  
neca Pater lib. 1, Controvers. 11, hunc versum ad-  
ducit,

*Dum timet alterius vulnus inepta loci.*

Servius in 14 Georg. ubi agit de Eurydice, citat  
ex Ovidio, Bis rapitur, vixitque semel. quod in Au-  
dore nostro nunc nusquam comparet.

Scholiastes vetus Horatii ad lib. 11, od. v. Gy-

ges nomen pueri ex insula Cnido Veneri sacra. hujus autem pueri pulcritudinem laudat etiam Ovidius. *Atqui in iis, quæ exstant, laudat nullibi.*

*Quintilianus lib. XII, cap. x.* Sed evanescent hæc atque emoriuntur comparatione meliorum. ut lana tincta fuco citra purpuram placet. at si contuleris eam lacernæ, conspectu melioris obruatur, ut Ovidius ait. *Quæ nullo negotio in metrum redacta Jambum tragicum efficient & duos hendecasyllabos,*

Ut lana tincta purpuram citra placet,  
At si contuleris eam lacernæ,  
Conspectu melioris obruatur.

*In Notis enim ad Epist. VII, communem esse ultimam in contuleris, dederis, credideris, & similibus syllabam monemus.*

*Seneca Controvers. x. Ex Declamatione Ovidii quadam hæc producit.* Quicquid laboris est, in hoc est, ut uxori virum, & viro uxorem diligere concedas. Necesse est deinde, jurare permittas, si amare permiseris. Quod habuisse nos jusjurandum putas? Tu nobis religiosum nomen fuisti. Si mentiremur, illa sibi iratum patrem invocavit, ego socerum. Parce pater, parce socer: non pejeravimus. Ecce objurgator noster, quam effrænato amore fertur. quam esse filiam preceris. carum quidem, quod il-

lum ab indulgentiâ suâ avocet. Dî boni, quomodo hic amavit uxorem? amat filiam, & abdicat. dolet periclitatam esse, & ab eo abducit, sine quo negat se posse vivere: queritur periculum ejus, quae pene caruit hic, qui amare caute jubet. Facilius in amore finem impetres, quam modum. tunc hos ponis terminos, ut nihil faciant, nisi considerate, nihil promittant, nisi ut jus facturi; omniâ verba ratione & fide ponderent? Senes sic amant. Pauca nosti, pater, crimina: & litigavimus aliquando, & decidimus; & fortasse, quod non putas, pejeravimus. Quid ad patres pertinet, quod amantes jurent? si vis credere, nec ad Deos pertinet. Non est quod tibi placeas, uxor, tanquam prima peccaveris. periit aliqua cum viro, periit aliqua pro viro: illas tamen omnis ætas honorabit, omne celebrabit ingenium. Fer, socer, felicitatem tuam. magnum tibi quam parvo constat exemplum! in reliquum diligentiores facti sumus: errorem nostrum confitemur: exciderat jurantibus: esse tertium qui magis amaret: sic, Dî, sit semper. Persevera, socer, recipe filiam: ego, qui peccavi, poena dignus sum. quare uxore necatâ, socero caussa sim orbitatis? Discedam e civitate: fugiam: exsulabo: utcunque potero; desiderium miserâ & crudeli patientiâ perferam. Morerer, si solus moriturus essem.

*In codice poematorum veterum longe antiquis-*



*simo, quem apud V. C. Petrum Scriverium vidi, Ovidio hoc epigramma ineditum adscribebatur,*

Jam nitidum liquidis Phœbus jubar intulit undis;  
Emeritam renovans Tethyos amne facem.  
Astra subit niveis Phœbe subvecta juvencis,  
Mitis & æthereo labitur axe sopor.  
Alludunt teneri tremulis cum matribus agni,  
Lacteolasque animas lacteus humor alit.

*In eodem codice Argumenta librorum Virgilianorum nostro etiam adscribebantur, ut & in multis aliis exemplaribus vetustis, quæ vidi. Sed perperam. Denique in antiquo libro Georgii Fabricii, hoc epigramma de Lucretia Nasonis nomen ostentabat,*


Cum foderet ferro castum Lucretia pectus,  
Sanguinis & torrens egrederetur, ait:  
Procedant testes me non placuisse tyranno,  
Ante virum sanguis, spiritus ante Deos.

*Sed jam satis. Nam illas ineptissimorum hominum de Pulice, Philomela, & his similes nugæ quis Ovidio adscribi patienter aut æquo animo ferat? Carmen etiam Panegyricum ad Pisonem ad alia jam castra jure optimo transiit.*

F I N I S.

VIA  
1554681







110  
5  
56



